

# მ რ ა მ გ ე

ეროვნული  
ბიბლიოთეკა

თ ვ ი უ რ ი ქ უ რ ნ ა ლ ი

წელიწადი მეექვსე



№ VI

0 3 6 0 6 0, 1 8 9 9

ტ ფ ი ლ ი ს ი

საბჭოთა ყოვ. ხელ. კავშირის გამომცემი ცენტრი, გ. ფ. ხ. ს. ა. ტ. - შ. ა.

1899

Дозволено цензурою. Тифлисъ, 25 Юня 1899 г.

## შ ი ნ ე ა რ ს ი

- I—**ნავარდოზა**.—ნაწილი მეორე. — I, II, III, IV, V და VI.—მოთხრობა ქელანასა . . . . . 83  
1
- II—\* \* ლექსი, ვ. რუხამასა . . . . . 32
- III—**სტუდენტი ანაფორით**.— I, II, III და IV.—(ძველი სტუდენტის ნაამბობიდან), ზატაშენკოსა, თარგმ. ვლ. კდილაშვილასა . . . . . 33
- IV—**ქაჯანა**.— I, II. — რომანი იტალიის ცხოვრებიდან ე. გოინიასა, თარგმანი . . . . . 67
- V—**დამონებულნი**.—XVIII, XIX, XX, XXI, XXII და XXIII.—რომანი ბოლგართა ცხოვრებიდან, ივ. ვაზგვისა, თარგმანი (გაგრძელება) . . . . . 91
- VI—**მასხარა კამფალონი**.—XIII, XIV, XV, XVI, XVII, XVIII და XIX.—მოთხრობა ნ. ს. ლესკოვისა, თარგმანი ფ. ხ.—ისა (გაგრძელება) . . . . . 135
- VII—**გადმოსახლებულუების დაბინავება საქართველოში**. — (ისტორიული წერილი). — III, IV.—აღ. ე—ქესა (დასასრული) . . . . . 1
- VIII—**ოგერ-ვაზა სამეგრელოში**.—III.—გ. ა. ბარდუდინისა, თარგმანი თ. ს.—სა. (დასასრული). . . . . 16



**IX — ტფილისის სათავად-აზნაურო საადგილ-მამულო ბანკის წარმომადგენელთა კრება . . . . . 27**

**X — ქუთაისის სათავად-აზნაურო ბანკის წარმომადგენელთა კრება . . . . . 41**

**XI — შინაური მიმოსილვა. — ტფილისისა და ქუთაისის საადგილ-მამულო ბანკების კრება. — თავ. ილია ჭავჭავაძის ღვაწლი ბანკის საქმეში. — ბ-ნ კალისტრატე ჩიკვაიძის დანაშაული. — ბ.ბ. ლოლუას, თოფურის და ჯორჯიკიას საქციელი კრებაზე. — იმერეთის სამღვდელოების კრება. — † ი. პ. სტარიცკი. . . . . 59**

**XII — ბიბლიოგრაფია — I. О народномъ врачеваніи въ Закавказскомъ краѣ, д-ра И. И. Пантюхова. 1899 г.—II. Вліяніе маляріи на колонизацію Кавказа, д-ра И. И. Пантюхова. 1899 г. . . . . 75**

26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

# ნ ა ვ ა რ დ ო ბ ა

(მოთხრობა)

ნაწილი მეორე \*)

Ⓘ

ს ა ხ ლ ა

ანანოს ქოხი ერთ დროს კარგა ხნობით კარებ-გამოკეტილი იდგა. ეზოს ქოხისას ახლა უფრო დაედო სანახიროს ფერი. დიდყურა და ხმა-მაღალა ცხოველები, მანამ დაცხებოდა, ეზოში სძოვდნენ, ხოლო როცა დაცხებოდა, შედიოდნენ გვერდებ-გამონგრეულ ქოხში და განისვენებდნენ. გზაზედ მიმავალ-მომავალმა ხალხმა ახლა ამ სურათს შეაჩვია თვალი. მაგრამ, რადგანაც ერთი დრო არავის შერჩენია, არც ქოხის დროებით მცხოვრებლებს შერჩათ. რაც იმათ ქოხში სიცხის დროს სიამოვნება ნახეს სულ ერთბაშად ამოჰშხამდათ.

ანანოს სახლ-კარმა და ეზო-ყურემ ერთ მშვენიერ დროს უცბად ფერი იცვალა. ეზოს შემოევლო მაღალი ძეძვის ლობე, ლობეში ერთგან დატანებული ჰქონდა შესავალი, რომელსაც დიდი ალყაფის კარები ება. კარები იხურებოდა მარტო ღამ-ღამობით, დღისით კი, რაკი ცაში ნათელი ჩავარდებოდა, ხშირ ბინდამდის სულ ღია რჩებოდა და განუწყვეტლივ შედიოდა შემოღობილში ურემი ურემზე ხე-ტყითა და სხვა მასალით და-

\*) იხ. „მოამბე“ № V.



დებული; ანუ ქვა-აგურითა და ქვიშით მიძიმედ დატვირთულნი დიდყურა ცხოველები შედიოდნენ ხენეშა-მორთული იორღით და სრულიად ველარა სცნობდნენ თავიანთ უწინდელს სათახარიკოს.

შიგ მოღობილშიაც დიდი მოძრაობა და ყვირილ-ღრიან-ცელი იყო. „ბიჭო, ჩქარა კირი მოუტა!.. აგური მიუტანეთ!.. ჰა, აბა ხელი გაძარით მარდად!... ისმოდა ხშირად ეს სიტყვები და სხვაც ბევრი ამისთანა. ამ სიტყვებს გაიძახოდა მომუშავეთა თავს მდგომი, ესე ორმოცი თუ ორმოც და ხუთი წლის სუფთად ევროპიულ ტანისამოსში ჩაცმული კაცი, რომელსაც ხელში გაშლილი ქოლგა ეჭირა. ხან ერთგან მივიდოდა, ხან მეორეგან და ამხნევებდა მუშებს ზოგს ტკბილი სიტყვით, ზოგს ყვირილით, — ვისთანაც რომელი გაუვიდოდა. ხანდისხან მივარდებოდა კირის ამრევეს, რომელნიც, მისი შეხედულობით, ზღაზღნით მუშაობდნენ, გადააგდებდა ქოლგას, გამოარამეცდა ნიჩაბს და ეტყოდა: „აი ასე უნდა აურიო“ და სამ-ოთხ ჯერ კირში გარევის შემდეგ ქაქანით აძლევდა ნიჩაბს ისევ მუშას, თუმცა არა რწმუნდებოდა მაში, რომ კირის თუნდაც მარდად არევიტ კაცის დაღლა შესაძლებელი იყო.

რაკი კალატოზები წელში აიმართნენ, კიბისა და ქვა-აგურის მზიდავები ველარ ასდიოდნენ და ამის გამო უფრო მოსდიოდა ზიზღი ზედამხედველს და უყვიროდათ მუშებს. ერთი კალატოზთაგანი, როცა დაითავხელებდა ხოლმე თავისუფალ წუთს, მაშინვე ბაიათს შემოსძახებდა ხოლმე. ბაიათის გაგონებაზედ თითქოს ლახვარი ეცა გულშია, ისე დაიღრიჯებოდა ხოლმე ზედამხედველი და გულში ამბობდა: „აი ზახრუმალი და ხმის წყვეტა!“ იმას ასე ეგონა, ერთი ამოძახილით მთელი საათის სამუშაოს მოსცდაო. ამისთვის გაიგონებდა თუ არა ბაიათს, მივარდებოდა კირისა და ქვა-აგურის მზიდავებს და უყვიროდათ: „თქვე მუდრეგ-ტიალებო, ფეხი გადადგით, ნუკი იზღაზნებით! ღმერთი არა გაქვთ!... ფული მომიცია, შეილო, მუქთად ხომ არა მშველით! იქნება თქვენა ფიქრობთ, რაკი ნისიებში და ვალში ვშველით, ვიცუღლლუტოთ, არა უშავს-რაო.

თქვე ასეთ-ისეთებო, პირიქით უნდა მადლობას მეუბნებოდეთ, რომ ნაღდი ფულის მაგივრად მუშაობას გჯერდებით, თქვენ კი მადლობის მაგივრად უმადურობას იჩენთ. ხელი გაანძრიეთ, ვერა ხელავთ ოსტატები მიცდებიან!

საკალატოზო მუშაობას თან სადურგლო მუშაობა მოჰყვა ისეთივე სისწრაფით, როგორი სისწრაფითაც პირველი დასრულდა. ვინც კი მოდიოდა ქალაქში და ხელადედა დიდს ორ-სართულიან სახლს იმ ადგილზედ, სადაც რამდენისამე ხნის წინად ქოხი იყო წამოსკუბებული, გაცვებით პირჯვარს იწერდა და გუნებაში ამბობდა: „დიდება შენთვის ღმერთო, დედამიწიდან ამოძვრა ე სახლი თუ რა მანქანამ გააკეთა ასე ანაზღვეულადაო“.

იყო მიზეზი, რამაც გამოიწვია ვაცხარებული მუშაობა და მოკლე ხანში შენობის დასრულება. სახლი მზადდებოდა საქორწინოდ. პატრონი ახლად ნაშენები სახლისა ახლად იყო დანიშნული და ჯვარს ვერ იწერდა იმის გამო, რომ საკუთარი სახლი არა ჰქონდა. სხვისა სახლში არა კისრულობდა ქორწილის გადახდას, თუმცა სასიამოროც და ბევრი სხვა მეგობრებიც დიდის სიამოვნებით უთმობდნენ სახლს. „რად მინდა თავი ცოცხალი, — ამბობდა იგი, — თუ ჩემს საკუთარს სახლში არ მივიწვევ ჩემს ნათესავებს და მეგობრებს! შეძლება რომ არა მქონდეს, კადევ სხვა არის. შეძლება მაქვს და ჩემი ჭერი და ჩემი სახლის ანგელოზი გავახარო!“ ქორწილის დახანებაც აღარ უნდოდა. ეს გარემოება იყო მიზეზი, რომ საჩქაროდ აშენდა სახლი ქოხის ადგილას. მართალია, მის პატრონს სხვა სახლიცა ჰქონდა მამა-პაპის აშენებული, მაგრამ რაღა საკადრისი იყო იგი სახლი ახლანდელი პატრონისათვის, რომელიც სამაგალითო ქორწილს აპირობდა; იმ სახლში კი ოც კაცზე მეტი არ ეტეოდა. არც აპირობდა მამა-პაპეული სახლის გადაკეთებას, ანუ ხელის შეხებას, რადგანაც უჩინარ ადგილას იყო აშენებული. გარდა ამისა იგი ამბობდა: „მამაპაპეული სახლი ეგრე ხელ-შეუხებელი უნდა მქონდესო, რომ ვუყუროო და შეც კარგად დავინახო ჩემი ყაირათობა და კაცობაო და სხვა-მაცაო“.

ჯერ ცოლის შერთვა ფიქრადაც არ მოსვლოდა ახლად-  
 აშენებულ სახლის პატრონს, როცა შეუდგა იგი კაი სასახლის-  
 ძებნასა და სყიდვას. ხოლო სასახლე ჯერ არა ჰქონდა ნაშოვ-  
 ნი, როცა თითქმის მთელი მასალა სახლისა შეპირებული ჰქონ-  
 და სხვა-და-სხვა სოფლებში იმ პირობით, რომ დაუყოვნებლივ  
 უნდა მოეტანათ ყოველიფერი, როცა კი შეუკვეთავდა. ამ გა-  
 რემოებამ ძრიელ შეუწყო ხელი სახლის მარდად აშენებაში.

## II

### ზატრანი სახლისა

ანანოს სახლებზე ბევრს ჯიბე-გაქიკნილ ვაქარს ეჭირა  
 თვალი. როცა ფარღალალა ეზოში ხედავდნენ დიდყურა ცხო-  
 ველების თოხარის, გულის ტკივილით იტყოდნენ ხოლმე: „აფ-  
 სუს, რომ მაგ ეზოში თქვენს მაგიერად დარბაისელი ვაჭრები  
 დაფა-ზურნით არ ატარებენ ღროებას!“ „ავი ძაღლი არც თი-  
 თონა სჭამს და არც სხვას აჭმევსო, რომ იტყვიან, სწორედ ამ  
 ქოფაკი ანანოს საქმეაო; არც თითონა აქვს შეძლება, რომ  
 კაი სახლი გაიკეთოს და აქაურობა დაამშნოიანოს, არც იმას  
 უთმობს, ვისაც უნო აქვს ამისთანა ანტიკა რამის მოხმარებისა.“  
 „მე უნდა ჩამივარდეს ეს სასახლე ხელში, რომ მეჩვენებინა,  
 რას გავაკეთებდი ამ ადგილას.“ ბევრი იძახოდა, თუ თვით ამ  
 სიტყვებს არა, დაახლოვებით კი ამას და არც ანანოს აძლევენ-  
 ნენ მოსვენებას. ხან ერთი ევაჭრებოდა, ხან მეორე, მაგრამ  
 ანანო ძრიელ უარზე იდგა და სანდროსაც ამაგრებდა, მანამ  
 ცოცხალი ჰყვანდა. იმის სიკვდილის შემდეგ ხომ თითონვე  
 დარჩა სრული მფლობელი და კიდევ გადასწყვიტა არ გაუყი-  
 დოს სასახლე თავის პაწაწა მიხაკოს, რაც უნდა დიდი გაჭირე-  
 ბა დასტებოდა თავს. იყო კიდევ დიდს გაჭირებაში, მუშტრებმაც  
 უფრო მოუხშირეს ამ გაჭირების ღროს, მაგრამ ვერაფერ დათ-  
 ქმევინა გაყიდვა.



ნამეტნავად ორი მუშტარი ჰყვანდა ანანოს თავიდან მო-  
 უცილებელი. თითქმის ძალზე ედგნენ და ყოველ ნაირ საშუა-  
 ლებას ხმარობდნენ, ოღონდ კი ჩაეგდოთ ხელში ეს სასახლე  
 ან ერთსა და ან მეორეს. ეს ორი ვაჭარი-ბაზაზები ისეც და-  
 ჯაბრებულები იყვნენ ვაჭრობაში; უნდოდათ ერთი ერთმანეთი  
 დაეცალათ და ყოველთვის ან იმას ცდილობდნენ, რომ ერთს  
 მეორისათვის ზარალი მიეცა, ან კიდევ ისეთი საქმე ჩაედინა,  
 რაც მეორეს თვალეში გაეჩხირებოდა. იმათ მეტოქობას ის  
 მოჰყვა, რომ სასახლის ფასმა ერთი-ორად აიწია, მაგრამ ანა-  
 ნომ შეაგდო ქვა და შეუშვირა თავი—პირი ვერც ერთმა  
 ვერ დააკერეინა გასასყიდად, ხოლო უპასუხებდათ: „მაშ, მაშ,  
 სწორედ ჩემ პაწაწა მიხაკას გავუყიდი სასახლეს!“

აღექსეი მელიქიჩსაც, როგორც იწოდებოდა ქობის აღ-  
 გილას აშენებული სახლის პატრონი, იგივე ზედამხედველი და  
 თავსმდგომი მუშებისა, შეუფარდა ანანოს სასახლეზედ გული,  
 როცა გაიფიქრა სახლის აშენება. მაგრამ თავის დღეში ვერ  
 ჩაიგდებდა ხელში ამ სასახლეს,—არც მისცემდა იმოდენა ფასს,  
 რასაც სხვები აძლევდნენ,—მოულოდნელ შემთხვევას და მოხერ-  
 ხებას რომ არ გაეხადნა იგი კანონიერ მფლობელად ანანოს  
 სასახლისა, როგორც ბოლოს თვითონვე იკვებოდა.

როგორ მოიპოვა იგი სასახლე აღექსეი მელიქიჩმა, გულ-  
 ახლით უამბო ყველასთვის დაქორწინების შემდეგ. ქორწილის  
 მესამე დღეს მან დაჰპატიჟა სიდედრა-სიმამრი, ხეჩასპერი, ნათე-  
 სავები, ახლო ნაცნობები და ის ორი ბაზაზი, რომელნიც მო-  
 ქიშპეობდნენ ერთმანეთში საზოგადოდ და ანანოს სასახლე-  
 ზე კერძოდ. გათავდა სადილი, მამაკაცი გამოვიდნენ ფართო  
 აივანზე, რომლიდანაც მთელი ქალაქი ხელის გულივითა ჩანდა  
 ახლად განათებული სახლებით. უწინარეს ყოვლისა შემოდგო-  
 მის შებინდების სურათმა შეიპყრო ყურადღება-სტუმარ-მასპინ-  
 ძელთა რამდენსამე ხანს. ზოგს აღუძრა გულში ამ სურათმა  
 სიამოვნების გრძნობა, ზოგს სიმშურნისა. მხოლოდ ნებით იყო,  
 თუ უნებლიედ ყველას გულიდან ერთ ნაირად აღმოხდა კმა-  
 ყოფილების გამოჩხატველი სიტყვები: „იშვ, ამ სანახაობას!“



როდესაც სურათის მონაბერ გრძნობა - შთაბეჭდილებათ  
 დუარეს, ისევ შეუდგნენ საქმეს—დროების გატარებას. დუღუკი  
 ტკილიად უკრავდა; სველ-სველი ხელადები და თეფშებზედ  
 დადგმული ღვინით სავსე სტაქნები წინ ეწყოთ. სიამოვნებისა-  
 გან თავბრუ დახვეულმა მასპინძელმა აიღო ხელში ჭიქა და  
 წარმოსთქვა: „ეს ღმერთმა აღდგომილს იმის ანგელოზი, რო-  
 მელი ანგელოზიც კაცს უწინამძღვრებს და კეთილ გზაზედ  
 დააყენებს“! დალია და მიუბრუნდა სიმამრს: „ერთი უნდა ვი-  
 ამბო, ყაზარ ყარამანიჩი, როგორ ჩავიგდე ხელში ეს სასახლე  
 და როგორ დავსვი ცარიელზე გიქოცა და სარქისაც—თა-  
 ნაც ანიშნა სტუმრად მყოფ ბაზაზებზე. არა განა სასახლეს  
 უფრო უკეთეს სხვაგან ვერ ვიშოვნიდი, მაგრამ ჯიბრის საქმე  
 იყო რაღა! ერთი უნდა მეცადნა ჩემი თავი, თუ რასაც სხვე-  
 ბი ვერ ახერხებენ ფულით ან საქმით, მე მოვახერხებდი თუ  
 არა! და აი მოვახერხე კიდევ, როგორცა ხედავთ და ძრიელ  
 აღვილადაც.“

„ახლა ბ—ს სკოლა აკურთხეს.“ — დაიწყო ალიქსეი მე-  
 ლიქიჩიძე. — „ეშმაკურ-ქაჯურად, — მაგრამ რა ეშმაკურ-ქაჯურად,  
 უფრო მოგება ვნახე, — აკი იქ არ დავესწარი! როცა კურთხევა  
 გათავდა, მამაჩემს ხელში ქალაღი და მითხრეს, სკოლის სა-  
 სარგებლოდ ფული უნდა შაპწირო და ამ ქალაღზე მოაწე-  
 როვო. მე უარზე შავდექი. მე რა საქმე მაქვს-მეთქი, მე სომე-  
 ხი ვარ-მეთქი და სკოლა ქართველებისა და ფულიც ქართ-  
 ველებმა შაპწირონ და თავში ქვაც ითხლიშონ-მეთქი! — ამ სო-  
 ფელში ვაქრობდა მამაშენიო, შენ კიდევ მაგოდენა გაცემუ-  
 ლობა გაქვსო. და როგორ შეიძლებაო, რომ ერთი მანეთით  
 მაინც არ შეეწიოვო. — რა თანხები მოგიციათ-მეთქი ან მამი-  
 ჩემისათვის, ან ჩემთვის, რომ უკანა მთხოვთ-მეთქი! მადლო-  
 ბელს არა ხართ-მეთქი, რომ იმოდენა ფული ჩაგეიყრია ლ დაგვი-  
 ტრიალებია მეცა და მამაჩემსაც ამ სოფელში და ნაღდი ფუ-  
 ლის მაგიერად ბჟიტს დაგჯერებთ-მეთქი! მაინც არ მო-  
 მეშენენ. იმდენი ქნეს, რომ ერთი მანეთი ამაგლიჯეს, მაგრამ  
 იათად კი არ დაუსვი, ბარე ოცი თამასუქი მეტი დავაწერინე“

უჩიტელს. ერთ ქართველს ორი მანეთი ვასესხე. მომავალ გაზაფხულზე ერთი ურემი კირი უნდა ჩაეზარებინა ჩემთვის ამ ორ მანეთში. თუ კირს ვერ ჩამაბარებდა თავის დროზე, ერთი თუმანი ფული უნდა დაებრუნებინა ჩემთვის, რომელიც ვითომ და ჩემგან იმავე თავით ნაღდად მიიღო. ამისი ბარათი უნდა დამეწვინებინა უჩიტლისათვის. შავედი სკოლაში იმ დროს, როცა შევირდებ ასწავლიდა და მანამ გაათავებდა სწავლებას, მეც ჩამოვჯექი სკამზე და ყურს ვუვადებდი. ააყენა ერთი შევირდი და წააკითხა: დათვმა და ლომმა ერთი მკვდარი კურდღელი იპოვნესო და მოუვიდათ ჩხუბიო. იმდენი იჩხუბესო, რომ დაქანცულები აქეთ-იქით მიეყარნენო. ამ დროს მელა შორიდან უყურებდა იმათ ჩხუბსაო და როცა ისინი დაეყარნენ მიწაზე დაქანცულებიო, იხელთა, დასტაცა კურდღელს პირი და მოკურცხლაო. ამის გაგონებაზე უცბად გამიარა თავში ფიქრმა: მოდი ერთი მეც მელასავით მოვექცევი და გიქოსა და სარქისას ხელს დაეზანინებ ანანოს სახლებზე-მეთქი. — აქ ისევ ანიშნა სმენად გადაქცეულ სტუმრებს გიქოზე და სარქისაზე, რის შემდეგაც ყველამ, თითქმის ერთ ხმად წამოიძახეს: „როგორია, გიქო და სარქის!“ — ამ ფიქრმა — გააგრძელა აღექსევი მელქიჩმა საუბარი უფრო თამამად — ისე გამახარა, რომ იმ ჩემ მოვალე ქართველს მერე, როცა ვადა გაუვიდა, ორი მანეთი ვაჩუქე. კირი დროზე ვერ ჩამაბარა და თუმნის მაგიერად რვა მანეთი დავაწერე ზედ თავის სარგებლით, რადგანაც ვერც ფული ჩამაბარა. სოფლიდან რომ მოვედი, პირდაპირ სურბ-კარაპეტში გავწიე; დაეანთე სანთლები, დავიწერე პირჯვარი და მიხაკსაკენ გავექანე. აბა რა ბიჭი პირველადვე სასახლის გაყიდვაზე არ გავამაგრებდი! ისე გავამაგრე, როგორც ქვითკირი! ღვთის წინაშე, კაი ბიჭი კი იყო, აფსუს რომ ქართველი იყო. სომეხი ვერ ივაჭრებდა ისე მოფიქრებით და მოხერხებით, როგორც ისა ვაჭრობდა. არც გავაფუჭებდი სურბ-კარაპეტის მადლმა, რომ ქართველი არა ყოფილიყო“.



დანარჩენზედ კი გაჩუმდა, რადგანაც ყველამ დაწვრილებით იცოდა, როგორც გაათუქა მიხაკა და გამოაცალა ხელიდან სასახლე ადგილი.

### III

#### მკვდრეთით აღდგენილი

მარმარამ მოინელა შვილის სიკვდილი. ამოიღო თავისებურად ილღიაში საწვრილმანოს ყუთი და გაუდგა სოფლებს, სადაც გაცემულობა ჰქონდა. თან ვაქრობდა, თანაც გაცემულობას ანაღდებდა. ვაქრობისა და ნისიების საქმეში ისე ერთობოდა მარმარა, რომ შვილის სიკვდილს სრულიად დავიწყებას აძლევდა. მხოლოდ ზამთრობით, როცა გასურებულ ბუხარ წინ ტახტზე მოკეცილი იჯდა ხოლმე და გასასყიდ წინდებსა ქსოვდა, ბევრჯერ მოაგონდებოდა ხოლმე შვილის უბედურება; გაერთობოდა ფიქრებში და გაშტერებით შეჰყურებდა ბუხარში გაღუდღუდებულ ცეცხლს, წინდების ქსოვას კი შეაჩერებდა ხოლმე. ამგვარად ფიქრებში წასვლა და საქმის შეჩერება დასჩემდა მარმარას და მაშინაც კი ემართებოდა ეს, როცა შვილზედ სრულიად არა ფიქრობდა. ამისთანა მდგომარეობაში იყო იგი ერთხელ ზამთარში უბედურების მეორე წელს. იქნებოდა რვა-ცხრა საათი ღამისა, როცა ვიღაცამ შეაღო მისი სახლის კარები. კარების დარახუნებაზე მარმარა ფიქრებიდან გამოერკვა; მიიხედა კარებისაკენ და, რა დაინახა ლეკური ქუდითა და ტყავით სახლში მომავალი კაცი, მაშინვე ფეხზე წამოდგა და დაუყვირა: „აქ რა გინდა ამ დროს, ლეკო, შე რჯულძაღლო!... სად მოხვალ, რა მოხვალ?!“ რის პასუხადაც მიიღო: „ნუ გეშინიან, დედაჯან, მე ვარ შენი ალალო!“ ამ პასუხმა უფრო მეტად შეაშინა მარმარა და ინსტიქტიურად დაიწყა უკან-უკან დაწევა, რადგანაც დაუპატიებელი სტუმარი მიდიოდა მისკენ პირდაპირ.

— რას მიედ-მოები... ვილაცა ხარ!... დაიკარგე აქედან, თორემ ისეთი ყვირილი მოვრთო, რომ მთელი ქალაქი შეეყარო!... შე დიდი ხანია ჩემს ალალოს გამოვესალმე!... მარმარა გულის დამძიმებით და სვენებ-სვენებით ამბობდა ამ სიტყვებს და სრულად არ ეყურებოდა ლაპარაკი სახლში შემოსული კაცისა: „მაიცა, დედიჯან, დამშვილდი და ყოველიფერს გაიგებ“— ეუბნებოდა იგი.— შემდეგ მოიხადა ქუდი, გადიძრო ტყავი და უთხრა: „აბა შემომხედე, თუ შენი ალალო არა ვარ!“ მაგრამ დამშვიდების მაგიერად მარმარა უფრო აღელდა და შიშის თავზარი დაეცა, რა იცნო თავისი შვილის სახე. იმას თავში გაუელვა ფიქრმა, რომ მისი ალალო გაცოცხლებულა, მკედრეთით აღმდგარა და, მაშასადამე, იგი ქრისტიანი სულ აღარ იყო, იგი იყო ეშმაკეული და ეშმაკთანა ჰქონდა საქმე. ამ გვარი ფიქრის შედეგი ის იყო, რომ მარმარა თვალების დახამხამებას, ხმის ამოღებას და აღგილიდან დაძვრას ვეღარ ახერხებდა, თითქოს გულმაც კი ძგერა შესწყვიტა მის მკერდში. დაუბატყებელი სტუმარი კი იღვა იმის წინ და იმეორებდა: „დამშვილდი, დედაჯან, ნუ გეშინიან, მე არავის მოუკვლავარ, ჩემი ამხანაგები დახოცეს მარტო, მე ღმერთმა და ჩემმა სალოცავებმა ცოცხალი გადამარჩინეს; მე მარტო ტყვედ წამიყვანეს ლეკებმა და ახლა გამოვებარე.“ რამდენჯერმე უნდა გაემეორებინა ეს სიტყვები, რომ მარმარას სმენამდის მიედწიათ. ბოლოს ესეც მოხდა და სურათიც შეიცვალა. მარმარას პირის-სახეს ნაცრის ფერი შეეცვალა ატლასის ფერად— ძალზე აელანძა და აუვარვარდა ისე, რომ თითქო ცეცხლი მოედოვო. მოიკრიბა ძალღონე, ერთი იკივლა და ალალოს კისერზე მოექნა: „ეს რა ესმის ჩემს ყურებს, თქვენი ქირიმეთ, და რასა ჰხედავენ ჩემი თვალები!“.. ამ სიტყვების წარმოთქმა შესძლო მარტო, დანარჩენ სათქმელ სიტყვებს წინ გადაელობნენ გულ-უხვი ცრემლით ქვითინი და დაუსრულებელი კოცნა-ხვევნა.

მოიოხა მარმარამ შვილის კოცნა-ხვევნით გული და გამოვარდა გარეთ, რათა შეატყობინოს მეზობლებს მისდამი მოვლენილი ღვთის წყალობა და მხოლოდ ახლა გაიგო, თუ რამ-



დენ ხანს იყო შებოჭილი ელდისა და სიხარულისაგან. ქველ-  
მის მეზობლებს სანთლები ჩაეჭროთ და გულიანად ეძინათ.  
„ქა, ეხლა არ შებინდდა, ასე ჩქარა რას მისძინებია ხალხს!“  
ცოტა არ იყოს გულნატკენად შემობრუნდა მარმარა სახლში,  
რადგანაც სხვებს ვერავის განუზიარა თავისი სიხარული. ერთი  
კიდევ გადაეხვია ალალოს და მერე მოუტანა ვახშამი, რაც კი  
თავისი სისაწყლისა ებადა რამე.

აი რა უამბო ალალომ დედას და უამბობდა ყველას, ვინც  
კი ჰკითხავდა თავ-გადასაეალს: „საწყალ მოსესას—ღმერთმა  
აცხონოს, ცოდო არ იყო იმისი სიკვდილი!—ძრიელ უყ-  
ვარდა ჩამოხდომო და დასვენება იმ მუხის ქვეშ, სადაც ლე-  
კვები დაგვეცნენ. თუ აქედან გავივლიდით ცარიელები, უთუ-  
ოდ ამ მუხის ქვეშ უნდა დაგვესვენა, პური გვექამა; სა-  
ქონელი მოგვიდიოდა ჭარ-ბელაქნიდან და ერთ ღამეს აქ  
უნდა დაგვეყენებინა. მერე რა უშიშარი ადგილი იყო! ვინ  
წარმოიდგენდა, რომ ის რჯულძალდი ლეკები დაგვეცემო-  
დნენ იქ! როცა მივდიოდით აქედან იმ ოხრადა და შავად  
დასარჩენ დღეს, ჩამოვხდით მუხის ქვეშ პურის საქმელად. ამ  
დროს ერთი მეძროხე წამოგვადგა თავს და ისიც პურის სა-  
ქმელად მოიწვია მოსესამ. ის იყო პურის საქმელად ესხდე-  
ბოდით, რომ ერთი საშინლად დამტკივლა მუცელმა და  
მაშინვე ტყის პირისაკენ გაექანე. შევედი თუ არა ტყეში,  
ათს შეიარაღებულს ლეკს ზედ კი წავაწყდი. თოფები ფეხ-  
ზედ შეყენებული ჰქონდათ და ჩვენთვის დაემიზნათ. თურმე  
ელოდებოდნენ ის რჯულძაღლები იმ დროს, როცა შევიდო-  
დით შუა პურის ქამაში და მაშინ დაეშინათ ჩვენთვის თოფები  
და ამოგველიტენით. ისე დავიფანტე შიშისაგან, გატეხილს  
ვამბობ, რომ ვერც გაქცევა გავბედე და ვერც დაყვირება, ში-  
შისაგან პირში ენა ჩამივარდა. ახლა ამასთან თოფებიც ჩემკენ  
გამოიშვირეს და მომადახეს: კრინტი არ დასძრა, თორემ აქავე  
გაგაქრობთო. მტაცეს ხელი და შემბოქეს მაგრად, ხელ-ფეხი  
თოკით გამიკრეს და პირშიაც ხელსახოცი ჩამიჭურთეს. რა უყვეს  
ჩემს ამხანაგებს; აღარათფერი გამიგია: გონება მქონდა მიხდილი

ცალკე შიშისაგან, ცალკე ხელფეტის სიმწვავისაგან—  
 გამიჭირეს თოკი იმ ურჯულოებმა; მხოლოდ თოფის ხმა მეს-  
 მოდა ხშირად, როცა მე გულწასული ვეგდე. ჩემ შესახებ ორ  
 ნაწილად გაიყვნენ: ერთნი ამბობდნენ მოვკლათო, მეორენი და  
 მათთან ბელადიც;—ნუ მოვკლავთო, წავიყვანოთ ტყვედა და  
 ვიმსახუროთო. გზაზედ ის ურჯულოები, როცა დავიღლებოდი  
 და ვერ მივდიოდი, წამითავაზებდნენ კისერში და მეუბნებოდნენ:  
 კარგა იარე, თორემ ღორივით დაგკლავთ და შენც შენს ამხა-  
 ნაგებს მოგწევთო. ამითი დავრწმუნდი, რომ ჩემი ამხანაგები  
 დახოცეს. იმედი მქონდა, იქნება ვინმე გადარჩა-მეთქი, მაგრამ  
 ჩემი თავიც კი მოუშგლოვებია დედა-ჩემს, არამც თუ სხვა ვინმე  
 გადაერჩინათ მოამბედ მაინც იმ რჯულზედ ხელ აღებულთ. ან  
 მე რაღა კეთილი დამაყარეს, მეც სიკვდილი ბევრით მევრჩინა  
 იმ ტანჯვა-ვაებას, რომელიც მე მომაყენეს. ისე გადამიყვანეს  
 პირ იქით დაღისტანში, რომ ნაწილი არ მოუწვდიათ ჩემთვის,  
 შე ღორო, უნდა მშიერი იყო, სუმბუქად იაროვო. მიმიყვანეს  
 თუ არა თავიანთ სოფელში, მაშინვე ერთ ბნელ ორმოში ჩა-  
 მაგდეს და ვეგდე შიგ მთელი ერთი წელიწადი მშიერ-მწყურ-  
 ვალი. ორმოდან რომ ამომიყვანეს, მიმსახურებდნენ; თანაც  
 მცემდნენ და მემუქრებოდნენ; მოგკლავთ, თუ ჩვენ რჯულს  
 არ მიიღებო. ისეთი უდიერი ტანჯვა-ვაება მომაყენეს, რომ,  
 ღმერთო, შეგცოდე! — დაიწერდა ხოლმე პირჯვარს—ველარ  
 გაეუძელ და დავყევი იმათ სურვილს; მივიღე იმათი რჯული,  
 მხოლოდ გარეგნობით. აბა გულით კი როგორ ვუღალატებდი  
 ჩემ რჯულს და ქრისტეს ჯვარს როგორ დავემობდი! გულში  
 ისევ ღმერთს ვადიდებდი; იმათ კი ისე ვაჩვენებდი თავს, რომ  
 ვითომც მოვიქეცე იმათ რჯულზე. დამნიშნეს ერთ ლეკის გო-  
 გოზე, მეც უარი არ ვუთხარი. მინდოდა იმათთვის თვალები  
 ამეხვია. ე ლეკური ლაპარაკიც ძრიელა მშველოდა. ყველამ  
 გული დაამშვიდა და დარწმუნდა ნამდვილად, რომ მე ჩემ რჯულს  
 გადავუდექი და იმათსას მტკიცედ შევეუერთდი; ამისათვის უწინ-  
 დებურად თვალ-ყურს აღარ მადევნებდნენ, მეც ეს მინდოდა.  
 ლეკის გოგოც განგებ შეიყვარე და ამითი უფრო ავუბი იმათ



თვალეები. ერთ მშვენიერ ღამეს ვიხელოთ, ავდექი, დავიწვრე პირჯვარი და გამოეუღდექ გზას. მხოლოდ გზებს ვერიდებოდი და ნადირსავით სულ ტყე-ტყე დავდიოდი. სწორედ თვე ნახევარი ვიარე, მანამ გადმოვადწვედი პირ-აქეთ საჩვენოში. რაკი გადმოვედი, ღმერთმა უშველოთ, ყველანი, ვისაც კი მივმართავდი, ხელს მიწყობდნენ სასმელ-საქმლით; ამგვარად მოვალწიე ღვთით შინამდის. მიშველა იმ ღმერთმა, რომელსაც შევცოდე და გადვუდექი გარეგნობით, თუმცა გულით კი ვევედრებოდი. მაგრამ მაინც ცოდვილად ვთვლი ჩემ თავსა და უნდა მოვინანიო, გამოვისყიდო ჩემი ცოდვები კეთილი საქმეებით, ისევ, რასაკვირველია, ღვთის დახმარებით“.

თითქმის ორი თვე იარა აღალომ ტყვის ტანისამოსით ქალაქში გულხელ დაკრეფილმა. როცა უამბობდა ვისმე თავს გადასავალზე და გაათაყებდა, ბოლოს დაუმატებდა ხოლმე: კიდევ კარგი, რომ დედა-ჩემს გაცემულები აქვს და ცოტაოდენი ფულიც მოუვროვებია, თორემ დაღუპვისა და სათხოვარ გზაზე უნდა დავმდგარიყავიო“. შეიცვალა შემდეგში ტყვეობის ტანისამოსი დიდის გაჭირებით, როგორც თვითონ ამბობდა, და წავიდა იმ სოფლებში, სადაც იმის დედას გაცემულობა ჰქონდა. წაიღო თან თამასუქები და ვისაც ჰქონდა ხელში ფული, ართმევდა ვალს, ვისაც არა, აცვლევინებდა თამასუქებს და თავის სახელობაზე აწერიანებდა. მოვალეებს ერთობ ძრიელ გაუხარდათ აღალოს უვნებელად სახლში დაბრუნება, ულოცავდნენ წმინდის გულით, ღმერთს მადლობასა სწირავდნენ, რომ აღარ უყურებდნენ იმის დედის ქვრივობრულ საცოდაობას და უარის უთქმელად უსრულებდნენ სურვილს.

მოიმჯობინა აღალომ სოფლებში საქმე თუ არა, დაჰკრა ფეხი და გასწია ტფილისში; სამი წელიწადი პირი აღარ უქნია შინათკენ. რას აკეთებდა ამ დროს იგი ტფილისში, არავინ მისმა მეზობელთაგანმა არ იცოდა. მხოლოდ ხმები ისმოდა, რომ იგი ერთ ვილაცა სირაჯს გაჰხდამოდა ამხანაგად; შერე თვითონ დაენარჩუნებინა სირაჯის ღუქანი და ძრიელ წარმატებით და მოგებით ვაქრობდა. ასეთი ხმები მოდიოდა აღალოზედ მის



სამშობლო ქალაქში. ხოლო სამი წლის შემდეგ თვითონაც გამოცხადდა იმავე ქალაქში ისეთი ყოფით, რომ ველარავინა სცნობდა. უწინარეს ყოვლისა მისმა ძვირფასმა ტანისამოსმა და ქამარ-ხანჯალმა მიიქცია ყველას ყურადღება. მაგრამ ეს კიდევ არაფერი. აღალომ ისეთი საქმე ჩაიდინა ამავე დროს, რომელმაც მთელი მოქალაქეების თითოთ საჩვენებელი და სალაპარაკო გაჰხადა იგი. ნათლილების დღეს ოც და ათი თუმანი შესწირა, რაც თავის დღეში არ ენახათ ტერტერებს, და ჯვრის ხეჩასპერობა თვითონ დაინარჩუნა. „ღმერთს ერთხელ შევცოდე, რჯულს გადაუდექი და მთელ ჩემ სიცოცხლეში იმას უნდა ვეცადო, რომ ეს ცოდო გამოვისყიდო; გადაეწყვიტე ყოველ წელს შევწირო ღმერთს, რასაც და როგორც შემაძლებინებს,“ — ამბობდა ხოლმე აღალო.

#### IV

### განსამართლება

შემოდგომის ბურუსმა მოიცვა მთა-წმინდისა და ნარიყალას მთები. ბურუსი თან-და-თან იწვედა ძირს, რათა ჩაწოლილიყო ქალაქში და მოებერა მოქალაქეთათვის მოწყენილობა. ხოლო ვისაც რაიმე მიზეზით შერყეოდა სიმშვიდე სულისა და სევდა გულს უღრღნიდა და ნაღველს უსიებდა, მათ ტაროსი თავისი დაღვრემილობით უორკეცებდა მოწყენილობას.

ამ უკანასკნელთ რიცხვს ეკუთვნოდა აღალო მანუქოვი, ახლად დაბრუნებული კახეთიდან და დაღვრემილი სახით ქუჩაში მიმავალი. — ეს იყო იმ წელს, რომლის დასაწყისშიაც წმ. ჯვრის ხეჩასპრობით გაანცვიფრა თვისი მეზობლები და ნაცნობნი სანინლანში.

გავყვეთ აღალოს, რომელიც ისეთ ნაირად მიეშურებოდა გზას, თითქოს გაურბის მთებიდან ჩამოწოლილ ბურუსსაო.

ჩვიდმეტ-თვრამეტი წლის ბიჭს, რომელიც აღალოს გამოჰყვა დუქნიდან, ილღიაში ამოედო ღვინით სავსე კაი მოზ-

დილი ტიკქორა. ამათ გასწიეს პირდაპირ ქალაქის ძველ წილისაკენ. აქ აღალომ შეუხვია ერთ ვიწრო ქუჩაში. შეალო ქუჩის კარები და შევიდა პატარა ეზოში. ხუთი ნაბიჯის გადადგმით მიუახლოვდა პატარა სამ-საფერხულიან ქვის კიბეს. ავიდა კიბეზე, შეალო სქელი, ყადაღის თავებით მოქედელი კარები და პირდაპირ დიდსა და ბარაქიან დარბაზში გადადგა ფეხი. თუ ღავენდობით მალალ სპილენძის შანდალში გაკეთებულ ქონის სანთლისა და პატარა ქრატის სინათლეს, რომელნიც ახლად აენთოთ კედლებ გაულესავი დარბაზის გასანათებლად, მისი მორთულობა დაახლოვებით ამ ნაირი იყო: დარბაზის ერთ მხარეს, მარჯვნივ, თავით-ბოლომდის შეკრული იყო ტახტი. დაფენილი ქეჩით, ქეჩის ზემოდან კედლის სიახლოვეს, ჯეჯიმით და ჯეჯიმის ზემოდან ვიწრო ნაალით. ტახტის თავით კედელში დატანებული ჰქონდა განჯინა, ბოლოში კედელსა ჰქონდა მიკრული ფიცრული, ბუღაურებით აქრელებული წალო. მარცხნივ კედლის ნახევრამდის—დაწყებული უკანა კედლიდან—გამწკრივებული იყო სამ პირად თაროებზე, რომლებზედაც ელაგა: ჯამ-ჭურჭელი ქაშანურისა და სპილენძის თასები—მალლა თაროზე; ხელადები, საღვინეები, ღვინის სასმელი ჩარეკები, კიქები და გოზაურები—საშუალო თაროზე; მესამე თაროზე ელაგა სპილენძეულობა — ქვაბები, სინები, ლაგნები, საწვინე ქაფქირი, თუშ-შალანგი და თუნგები. მარჯვენა კედელზე, ირმის ჩხაზე, ეკიდა: ორი თოფი, ორი დამპაჩა, ხმალი, ხანჯალი, შევერცხლილები ყველა, ოთხი წყვილი შევერცხლილი და ვერცხლისავე ჯაჭვებით გადაბმული სხვა-და-სხვა სიდიდის ჯიხვები და ყანწები, ორი წყვილი შევერცხლილივე კულა. უკანა კედელში ბარაქიანი ბუხარი იყო, რომელშიაც ცეცხლი გუზგუზებდა და ზედ შემოდგმული ქვაბიდან გადმონადენ ცხიმიან წვეს შხიბ-შხიპი გაჰქონდა. ბუხრის პირამდის მიტანილ ტახტზე იდგა დიასახლისი, რომელიც ხან გადაჰხდოდა ხოლმე ქვაბს საფარებელს, ხან ხურავდა.

დღისით სანათურად ორი პატარა სარკმელი ჰქონდა დატანებული დარბაზს: ერთი ბანში, მეორეც მარცხენა კედელში.

ტახტის შუა ადგილას იჯდა სახლის პატრონი მოკეცილი ისე, რომ ცალი მუხლი ქვეშ ედო და მეორე ზემოდან გადაედო; ფეხთ მარტო თეთრი წინდები ეცვა, ხოლო ტანზე— შავი პრუნელის ახალუხი, ორი ღინკილოთი მარტო კუჭთან შეკრული და შავი შალის შალვარი; თეთრი პერანგის საყელო ჩამოეხსნა, რათა სინსუქნისაგან დაჯირჯვლებულს და ბაღნით დაფარულ მის გულ-მკერდს სიგრილე ეგრძნო; ქუდი კალმუხისა მუხლზე ედო, ქუდს დაჰბჯენოდა მარცხენა ხელით, ხოლო მარჯვენათი დაყრდომოდა მარცხენას და ასე ათამაშებდა კრიალოსანს.

— ბარილიუს, პარუმ ჰიოვანე!

— ასტუბარი, ჩემო ალალო! მაგრამ ეგ რა არი, ყურში ჩავისხა, თუ პირში? ანიშნა ტიკქორაზე, რომელიც ალალოს ბიჭმა მიაყუდა თაროსთან და თითონ გავიდა გარედ.

— შენ დაღევა შეიძელ და ჩქარა ნუ მოგვიხუცდები, თორემ ღვინოც და ჩვენც შენი ჭირი სანაცვლონი ვართ; ღვინოს, რამდენიც გნებაეს, ზოგართმევ, ოღონდ შენ არ მოგვიხუცდე. რა მე და რა სხვა, ყველანი მოვალენი ვართ! ჩვენ უშენოდ არ ვარგივართ, უსტაბაშო, და ვერც გაძოდვდებით, თუ შენ დაგვიბერდი... მერე ასეთი ღვინოები მომიტანია, როგორც წამალი.— ამ ლაპარაკში ალალო იოვანეს ახლო ტახტზე ჩამოჯდა, ქუდი მოიხადა და მუხლის თავზე დაიდო.

— არ გაიგე, უსტაბაშო, რა ბიაბრობა მომაყენა იმ უღმერთო და ნამუსზე ხელ-აღებულმა თადეოზის შვილმა?— დაიწყო ისევ ალალომ— დღეს ჩვენი მამაცა და პატრონიც შენა ხარ. თუ შენ არ გვიპატრონებ, სულ ერთიანად დავიღუპებით. ამაზე მეტი უბედურება-ლა იქნება, რაც მამა-პაპით დაწესებული და დადებული ჩვეულება იყო, მოშლას უპირობენ. ასეთი უპირობა და უსვინილისობა ჩაიღინა შენმა კოტე თამაზიშვილმა, რომ მართლა შენი მოწონებული! ცოდო არ არის ის იმ მამის შვილია, როგორც აქებენ თამაზს! ამოვიღე, შენი ჭირიმე, ღვინოები; ურმები მივატანინე, კიდევ კარგი, არ დამედო ჯერ ურმებზე. უსწორდებოდი. ამოვარწყვევინე საპალნე ოც და ცა-



მგტი ჩაფით და ბოლოს ანგარიშის დროს, როგორც წესია; საპალნეზედ თითო ჩაფს დასხმას მივედი. შადგა ერთ აშარზედ: მე რად დაგისხამო! დასხმა არ არის, საპალნე ოც და თოტმეტი ჩაფია და მე კი ოც და ცამეტი ჩაფით მოგიწყეო! ვა, კნიაზო მეუქი, მამა-პაპით დადებულოა საპალნე ოც და ცამეტი ჩაფით და ჩვენ ხომ ვერ მოვშლით-მეთქი მამაპაპის ჩვეულებას: დასხმაც ხომ მამა-პაპის შემოღებულოა, ჩვენი მოგონილო ხომ არ არის-მეთქი, რად არღვევ მამა-პაპის ჩვეულებას-მეთქი. ცოდო არ არის, რომ ამისთანა კაი ჩვეულება მოიშალოს-მეთქი; ხომ ღმერთი გადაგახდეინებს-მეთქი. იცი ახლა ამის პასუხს რას მეუბნება: თუ დასხმა გინდოდა, ჩაი-შაქარს მომიტანდიო.—ჩაი-შაქარი წესად არ არის დადებულო, მე წესის მიმდევარი კაცი ვარ-მეთქი და რაც არის დადებულო წესად ის მოგართვი-მეთქი. აი გაოხრდეს, რომ იმას „მოგართვი“ ვუთხარო!—ერთი წყვილი კაი თართის დოში მივუტანე იმოჯახ-დასაქცევს და კაი ხიზილალა. ჩაი-შაქრის მოტანა არ არის წესად და არც საპალნეზე მეთოთხმეტე ჩაფის დასხმა არის წესადო. შენ ისიც გეყოფათა, რომ შენი ჩაფით ამოიწყე ღეინო და არა ჩემი ჩაფითაო. გესმის, რას მეუბნება! კნიაზო, სირაჯხანაში ხომ არა ვყიდულობ, რომ რვა ხელადიანი ჩაფით ამომეწყეო. ქვევრიდან ვიღებ მღვრივე ღეინოს და წესიც ისეა, რომ ცხრა ხელადიანი ჩაფით ამოვწყეო-მეთქი.

რალა ბევრი გაევაგრძელო, ის თავისას არ იშლიდა და მე ჩემსას. მე საპალნე დასხმით ოც და თოთხმეტი ჩაფით ვიანგარიშე და დავუთვალე ფული, რამდენიც ერგებოდა. მერე ხუმრობა ხომ არ იყო, შუაში ერთი საპალნე თამაშობდა. ის ამ ერთი საპალნის ფასსაცა მთხოვდა, მაგრამ მე უარზედ ვიდექი. ახლა რა ქნა. ფული უკანვე გადმომიყარა, დაუძახა ბიჭებს და უბძანა: მოხსენით რუმბებს პირი და ქვევრებზე მიუშვითო. გადავუდექი წინ. ეგ როგორ შეიძლება-მეთქი. ვინ გაუგონია, ან ვინ ჩაუღენია ამისთანა უსვინილისობა, რასაც შენა შვრები-მეთქი. სიტყვილო არ არის შენთვის, კნიაზო, რომ ერთ ჩაფ ღეინოზე მაგეებსა შვრები-მეთქი. ერთ ჩაფ ღეინოზე კი არა, ერთ სა-

პალნე ღვინოზე არის ლაპარაკიო. მოხსენით, ბიჭო, რუმბებს პირი, რაღას უყურებთო, დაუჭყვილა. ვხედავ თავისას არ იშლის: მეც დავუჭყვილვ: როგორ თუ რუმბებს პირი მოხსენითო! აქონაობა ხომ არ არის, ვაჭრობაა-მეთქი. აბა ერთი გაბედღას ვინმე და ხელი ახლოს-მეთქი და მოვექიდე რუმბებს, მაგრამ მეცა გაცოფებული კოტე, მკრა ხელი და კინალამ კისერი არ მომატეხინა. საწყალი ბიჭები ხომ ცემით დამიხოცეს. ერთობ გულ-მუცელი ამერია, მაგრამ რას ვიზამდი! იმოდენა ბიჭები შემომარტყა გარს და ძალა იმათკენ იყო. ახში კი გადავუხდი! ჩაასხმევინა ღვინო ისევე ქვევრებში. გადმოგვიყარა ცარიელი რუმბები. ახლა ეს თავქარიანი მეურმეები მომეხეივნენ. ვოქვი, ვაი თუ წაქეზდნენ და ამათაც ბიაბრუობა მომაყენონ-მეთქი; მოცდენის ფასი მივეცი და გავისტუმრე. ცოტა ზარალი კი არ მომცა იმ უსინდისომ! ახლა ვუთხარ: კნიაზო, ბეი დამიბრუნე-მეთქი. რის ბეიო, ღვინოები ამირივ-დამირივ და ბეისაც კითხულობო. შენ ბეის იგრე ვეღარა ნახავ, როგორც შარშანდელ თოვლსაო. შენი დოშები კი თავში იხალეო და გადმომიყარა დოშებიც და ხიზილალაც. ამაზე მეტი უბედურება-ლაიქნება?! ცალკე ამოდენა ზარალი, ცალკე ბეის დახუთვა, ცალკე ბიაბრუობა. წამოვედი ცარიელი და ნონიკოს ღვინოები ვიყიდე. მაგრამ რა! იქაც ვცახცახებდი შიშით. ამანაც ისეთი დღე არ დამაყენოს-მეთქი. ეჰ, ღმერთმა უშველოს, ის სულ სხვა ნამუსის კაცია—ღვთის ნათლულია სწორედ. ხმა, კრინტი არ ამოუღია არც ჩაი-შაქარზე, არც დასხმაზე. მარანში არცკი შემოსულა, როცა ღვინოს ვიღებდი. აბა ნამდვილი თავადი-შვილი ის არის! ჩემ სულს რომ გადავდგომოდი და ღვინის ამომღებისათვის ერთი ორიოდე მანეთი მეჩუქებინა, ოც საპალნეს ხუთმეტ საპალნედ ვათქმეივნებდი. მაგრამ ეს არ ვიკადრე, რა არის მენდობა-მეთქი! იმ ასეთ-ისეთმა თადეოზის შვილმა კი, გაუწყდეს თავადიშვილობა, ისეთი უსენინდისობა ჩაიდინა. კიდევ კარგი ნინიკოს არა ჰქონდა ჯერ გაგებული. თუმცა ის კი არ მოახდენდა იმისთანა საქმეს, მაგრამ სხვა, ვინც გაიგებს, წაქეზდება და ყველა ისეთ დღეს დაგვაყენებს, თუ არ გვი-



პატრონებ, რომ ბარემ ყელები დაგვქრა და გადაგვყარო, ის გვირჩევნა. მაშინ ხელი უნდა ავიღოთ ვაჭრობაზედაც და აღებ-მიცემობაზედაც.

— ახლა რა უჯიათობა იყო შენი, რომ ერთი პატარა თავი შექარი და ჩაი არ მიუტანე. ღმერთი აღარ არის, ჩვენ ჩვენთვისა ვთქვათ, სულ სამი მანეთი ხომ არც კი გაგივიღოდა და ამ სამ მანეთში ერთი საპალნე ღვინო უნდა წამოგეღო, — უთხრა იოვანემ ღიმილითა და ხვეწეწით.

— ეგ მართალია, უსტაბაშო, მაგრამ იცი სად წაეა, ჩაი-შაქარს რომ დავაჩვიოთ! დღეს თუ ჩაი შექარს მოგვთხოვენ, ხვალ სხვა რამეს, უფრო ძვირფასს მიგვატანინებენ. მოდი შენ ახლა და ფული მოიგე! დალალები ხომ არა ვართ, შე დალოცვილის შეიღო, რომ ჩამოვიტანოთ ვილაც ტუტუცი ქართველი თავადიშვილის ღვინო, გავუყიდოთ, სადაღლო ავიღოთ და დღე-დღეულად ვიცხოვროთ! შენ პატივის ცემა გინდა, ჩვენ ცხოვრება გვინდა, თანხას მიმატება უნდა, ვენაცვალე იმათ მადლს—პირჯვარს იწერს—წელიწადში ოც-ორმოც თუმანს საყდრებსა ვწირავ; ტერსაკა მუდამ იმას გაიძახის, შეიღო, ეკკლესიები არ დაივიწყოთო, რაც ბევრს შესწირავთ, მით უფრო შეგიწირავთ ღმერთიო და ერთიორად ფულს მოგაგებიანებოთ. ჩვენი სომხობის მშველელი და გამაძლიერებელი ეკკლესიებია და უფრო ვაპარშაპატიო. ეცადეთო, რომ ყოველ წლივ გზავნოთ ერჩიადინში შესაწირავიო. ხომ იცი, თუ ერთი ორას-სამასი თუმანი მაინც არ იქნება, ნაკლები აბა როგორ გაიგზავნება ერჩიადინში! საიდან იქნება ან ერთი, ან მეორე, ან მესამე, თუ ყაირათობა არ გავწიეთ და ოსტატურად არ დავიჭირეთ ხელში ქართველები? თუ გინდა, რომ ქართველებს მხარი დაუჭირო და ჩვენი თავი იმათ ანაცვალო, ეგეც შენი ნებაა! — დააბოლოვა აღალომ ხელების გაშლითა და წყრომის კილოთი თვისი საუბარი.

მთელი საუბრის დროს იოვანე შეუცვლელი სახით იჯდა და ათამაშებდა კრიალოსანს, ხოლო ლაპარაკის გათავებისას წარბები შეათამაშა, მის სახეს დარბაისლური გამომეტყველება

შიცა, თავი მალლა აიღო, კრიალოსანის თამაში შეაჩერა და წარმოსთქვა: „ყოჩაღ, ჩემო ალალო, ყოჩაღ! მე სულ სხენაირი კაცი მეგონე, ახლა კი კარგად გავიცან, ვინცა და რაც ყოფილხარ. მე პირში გეტყვი, ბევრი არ გამოვა ჩვენ სომხობაში შენისთანა ახალგაზდა მოვაჭრე. ვაჭრობის უნარი, რომლითაც შენ ღმერთს დაუჯილდოვებიახარ, ნუ ააცდინოს სუბსარქისის მადლმა ნურც ერთს ჩემს მოძმესა და მოკეთეს, მაგრამ მე შენი უფრო ის მომწონს, რომ ეკლესიებისთვის ყოფილხარ გამსჭვალული. მართალი არ არის განა, რაც ტერსაკას უთქვამს და ამბობს ყოველთვის ისა თუ სხვა? როცა ჩვენი სომხობა არაფერსა ზოგავს ეკლესიებისათვის, ეკლესიებიც ჩვენი მწყალობელნი არიან; ვაჭრობაშიაც გვეხმარებიან და სხვა საქმეშიაც. ვისაც ჩვენი ტერტერების დარიგება ესმის და იმათ სიტყვასა და დავალებას ასრულობენ, აბა განგებ ყური უგდე, თუ ღმერთიც იმათ არა შევლოდეს! რამ გიშველა შენ თითონ და რამ გაგხადა ასე მოკლე დროში ფულის პატრონად?—იმან რომ ღმერთი არ დაგვიწყებია და ეკლესიები გყვარებია, ღმერთიც გშველის და გიმართავს ხელს ვაჭრობაში. კაი გამოცდილი კაცი ვერ მოახერხებს იმას, რაც შენ მოგიხერხებია და ახერხებ ღვთისა და ეკლესიების შეწევნით, რასაკვირველია.

— ჰო და აბა მაგის მთქმელი ამართლებ თადეოზის შეილს?—წამოიძახა გახარებულმა და წაქეზებულმა ალალომ.

— ვამართლებ განა? მე ჩვენში ვთქვი ასე. საჯაროდ რა მათქმევენებს ამას, რაც უნდა მართალი იყოს ღვინის გამყიდველი და მტყუანი სირაჯი. როგორ გავამართლებ გამყიდველს! კაცი ამ ხელობაში დავბერდი და მე არ ვიცი ჰამქრის საქმე? საქმით გაჩვენებ, როგორ ვაკუნტრუშებ შენ კოტეს. ბევრს აღარაფერს გეტყვი.

— ჰოო, დალოცა ღმერთმა დედიშენის ძუძუ! ერთი ჯავრი ამომყარე კოტესი და მერე რაც გინდა მამთხოვე: თუ არ შეგისრულო, მაშინ პირში ჩამათურთხე, ფუი შენ კაცობასათჳო. იცოდე, თუ იმის ჯავრს არ შემაქმევ, პირობას გაძლევ,



რომ მომავალ წელს უთუოდ მირვნის კურთხევაზე წავალ ეზ-  
მიადინში და ერთი ორას-სამას თუმანს სარგებლობას მივცემ ეზ-  
მიადინის მონასტერს.

— შენ კაცობასთან კი რა საქმე მაქვს—უთხრა ღიმილით  
იოვანემ,—მაგრამ ე ქაშნიკი რომ ცოტი მოიტანე, ეგ კი ვერ  
არის კაი საქმე. რა იყო, შე კურთხეულის შვილო, ცოტა მოზ-  
დილი ტიკქორა გეშოვნა!

— ვა, უსტაბაშო, რა დაუთალაბში მე ვვაქრობ, დუქანი  
აქ არა მაქვს! როცა შენი სურვილი იყოს, მიირთვი, რამდენ-  
იც გნებავს. მაშ რისთვის გვინდა ჩვენი ცხოვრება, თუ არა  
ჩვენი შნოსათვის და ჩვენი კეთილის მყოფელის სიამოვნებისა-  
თვის!

ამითი გათავდა საუბარი იოვანესი და ალალოსი საქმეზე.  
ბოზბაშის ქვაბმა ბუხარში ადგილი დაუთმო მწვადებს; უსტა-  
ბაში და ალალოც შეუდგნენ ქაშნიკის სინჯვას, თანაც მუსაი-  
ფობდნენ ვაქრობის საგანზე.

მეორე დღეს განგებ გაგზავნილმა გზირმა დაუარა მთელ  
სირაჯებს, გამოუცხადა უსტაბაშის გარდაწყვეტილება: „რომელი  
სირაჯიც კი გაჭბედავს და იყიდის თადეოზის შვილის ღვინოს,  
სამქროდ გარდახდება სამასი თუმანიო.“

დიდი ბოდიშის მოხდა და ფეშქაშების გაცემა დასჭირდა  
კოტეს, მანამ, ორი წლის შემდეგ, უსტაბაშა იოვანე აუხსნიდა  
მარანს.



### ძალის მოშვება

მას შემდეგ, რაც თადეოზის შვილმა, კოტე მორბედაქემ,  
ბიბროუბა მიაყენა, რცხვენოდა თუ სხვა რამ მიზეზით, ალა-  
ლოს ორი წელიწადი ტფილისიდან ფეხი არსად გაუდგამს. მე-  
სამე წელს კი წამოვიდა სანინლანში,—ისიც ღვინისთვის კი  
არა, სულ სხვა განზრახვით.



მოსვლის უმაღვე აღალო გაემართა იმ სოფლებისაკენ, სადაც ვაცემულობა ჰქონდა და შეუდგა ვალების აკრეფას. „ახლა კი ჩამაბარეთ ჩემი საქონელი, არ ეყო აქამდის ჩემ ფულებს თქვენ ხელში ყოფნა?“ ეუბნებოდა იგი მოვალეებს. ბევრმა მისცა, თუ სულ ვერა, ნაწილი მაინც; ბევრმა თამასუქი გამოუცვალა და უფრო მომეტებულმა უარი უთხრა: ზოგმა უქონლობისა და შეუძლებლობის გამო, ზოგმაც სულ უარი განაცხადა მიცემაზე.

ერთმა შეზარხოშებულმა მოვალემ შეურაცხყოფაც მიაცენა: „ვინა ხარ, ან ვის დაჰკარგვიხარ? რა მართებს შენი? მე დიდი ხანია ჩემი ვალი მოვიშორე!“ და დედ-მამა უშვერის პირით უხსენა.

აღალოს უნდოდა იქვე წაეგდო წიხლ-ქვეშ და კვირტის გორგალივით ეგორებინა, მაგრამ მამასახლისმა, რომელიც უკან დასდევდა და ვალების აკრეფაში ეხმარებოდა, არ გაუშვა იგი; თვითონ გადამეტებით გადაახდევინა თავზე მოვალეს. ხოლო ამ გვარ გადახდევინებას აღალომ დასძინა მუქარა: „თუ ვერ გაცნობო თავი, მაშ მე კაცი არ ვყოფილვარ!“ ღვინით გამობრუებულმა გლეხმა მაინც ვერ მოითმინა და თამამად და იმედინად უპასუხა: „რაც შენ ჩემგან წააღო, შენ კ—პა დედასთან დაიკვებე!“ აქ კი ძლივს შეიმაგრეს ვეფხივით განრისხებული აღალო; იქნება კიდევ გასხლტომოდათ ხელიდან და კარგები აეყვანინებინა ყბელი და პირაოში მოვალესათვის, ეს უკანასკნელი რომ არ გაესტუმრებინათ სახლისაკენ.

ერთმა სხვა მოვალემაც გამოიჩინა აღალოს წინაშე ურჩობა ვალის გადახდაში, თუმცა სიტყვითი შეურაცხყოფა არ მიუყენებია მისთვის. აი ამ ორ მოვალეზედ შეიტანა აღალომ საჩივარი მომრიგებელ მოსამართლესთან. იგი იმდენად იყო მიხვედრილი ახლად შემოღებული სასამართლოების წეს-წყობილებას, რომ შეეძლო თამამად გამოეყენებინა ეს წეს-წყობილებანი თავისი ხრიკების და განზრახვის გასაყვანად და შესასრულებლად. ამისთვის სრულიად დარწმუნებული იყო, რომ შესაფერად დასჯიდა ურჩსა და შეურაცხყოფელ მოვალეებს.



ხოლო ამ უკანასკნელთ არ ეგემათ ჯერ, თუ რა ხილი იყო მომრიგებელი მოსამართლე, ან რას ნიშნავდა უწყებები მოსამართლისა, რომელთა მიღებაც სიცილად არ ეყოთ. ამასთანავე გადასწყვიტეს ფეხი არ დაედგათ სასამართლოს კარზე. „თუ გვმართებს რამე, მოვიდეს და წაიღოსო!“ მათ დაუსწრებლად გარდაწყვეტილების პირსაც არ მიაქციეს ყურადღება და არ შეიტანეს ვადაზე პასუხი. ხოლო, როცა ეს გადაწყვეტილება კანონიერ ძალაში შევიდა, ალალომ მიიღო აღმასრულებელი ფურცლები და ბოქაულითა და მამასახლისით წაადგა თავს იმ „მამაცსა და გულად ვაჟბატონებს“, — ასე დანათლა ისინი ალალომ, — მაშინ კი დაფაცურდნენ და თავს ბალანი აეშალათ. ახლამტკიცედ დარწმუნდნენ, რომ ეს ხუმრობა აღარ იყო; ალალო უხდიდა სამაგიეროს, როგორც დაიკვება. თუ მაშინ იცინოდნენ და აინუნში არ მოსდიოდათ დამუქრება ალალოსი, რომელიც ბრაზით გულზე სქდებოდა, ეხლა ცხარე ცრემლით სტიროდნენ, ხოლო ალალო სიამოვნებდა მათი ტანჯვით და თავისი გამჭირახობით და ძლიერებით. ნამეტნავად ერთი მათგანი იხრაკებოდა უცეცხლო ცეცხლში. ბარათი ალალოს სახელობაზე იყო დაწერილი, ვალი კი მისმა დედამ ჩაიბარა — ორი მანეთი — ღა დარჩა მოვალეზე. აი რისთვის შეელაპარაკა შეზარხოშეული მოვალე ალალოს და უთხრა — „მე ჩემი ვალი დიდხანია მოვიშორეო.“ მაგრამ ალალომ უჩივლა მთელი თამასუქით და მომრიგებელმა მოსამართლემც დააკისრა სრული ვალი — საჩი თუმანი. მოვალეს ბათილამაც კი არა ჰქონდა ალალოს დედისაგან მიცემული და, თუნდაც ჰქონოდა, ახლა გვიანდა იყო.

როცა ბოქაულმა საქონელი აუწერა და უყიდდა უკვე გასტუმრებულ ვალში, გულხელ დაკრეფილ მოვალეს მუშტისტელა ცრემლები სცვივოდა თვალებიდან და ამბობდა: „ან ღმერთი არსად არის, ან სამართალი?! ამისთანა უცოდო მადლობა იქნება, რომ მე თქვენ მიშვრებით! ერთხელ გატყავებულს მეორედ ტყავს მაძრობთ, ამისთანა ცეცხლი გინახავთ! რი სახარების მადლმა, ორი მანეთი — ღა დარჩა ჩემზედ, — ოცო

და რვა მანეთი ჩავაბარე თითონ მაქთალინას. სამება გავიწყ-  
რეს, ოჯახი დამელუბოს, თუ მაგ სამ თუმანშიაც სამი მანეთის  
ნათასები მქონდეს წამოდებული. დღესავით მახსოვს, ერთი  
შოლტი ქალმანი წამოვიღე, ორი ლიტრა მარილი, დედაჩემს  
კიდე ორი სტილი საპონი წამოვღეო. ცხონებულმა მელქომ  
როცა დუქანი მოშალა, სამი მანეთი უანგარიშა მამაჩემს და  
სარგებლით დააწერა. იარა ამ სამმა მანეთმა და სამ თუმნად  
გადაიქცა. მაგრამ, რა სამი თუმანი, როცა აღალომ ჩემ სა-  
ხელზე გადმოიტანა ვალი, აი თუნდა გამამტყუნოს, აქა ბრძან-  
დება, რვა მანეთი ნაღდად მივეცი და სამი თუმნისაც ბარათი  
ამ სამი თუმნიდან ოც და რვა მანეთიც მაგის დედას მივეცი  
და ეხლა რომ ისევ მახდევინებთ ერთხელ გადახდილ ვალს,  
ღმერთი არა გაქვთ, ან პირჯვარს არ იწერთ?“

— შენ ზღაპრებს კი ნუ მოჰყე! ეს პატიოსანი პრისტავი  
საქმისთვის მომიყვანია, საქმე უნდა გავაკეთოთ. ან ჩემი ფუ-  
ლები ჩამაბარე, ან არა და ეხლავე გაგეყიდება ხარები.

— შენც გვხვეწები, აღალო, და პრისტავსაც: ნუ დამელუ-  
პავთ ერთ საწყალ კაცს. თუ შევეცი და გაწყენინე, რა ვქნა,  
ნასვამი ვიყავი და გთხოვ მაპატიო; სხიანაირად გადამახდევინე.  
ორი მანეთი, მართალია, მევალება შენი; იმას, სადაც იქნება,  
მოვთხრი და ეხლავე მოგართმევ თავისი კუთვნილი სარგებლით.

— ჯერ შენ ეს უნდა იცოდე, რომ მე შენი აღალო არა  
ვარ. მე ალექსეი მელიქიჩის მეძახიან. მეორეც ესა — აკი ვაპატივე,  
რის პატიობაც შეიძლებოდა. რაც შენ წყენა და შეურაცხყო-  
ფა მომაყენე, რომ არ მეპატივებინა, ახლა სატუსალოში იჯდე-  
ბოდი, მაგრამ მე მამიჩემის სულს ვაპატივე და არ გადაგახდევინე.  
და რაც ეხლა შენა გხდება, ეს მაგიერის გადახდევინება კი არ  
არის, როგორც შენა გგონია და ჰყბედობ, გმართებს და მე ჩემსას  
გთხოვ. მომცემ ხომ რა კარგი; არ მომცემ და ხარები აქ არიან.  
ბატონო პრისტავო, გთხოვთ გაუყიდლოთ ეს ხარები და მე ჩემი  
ჩამაბაროთ. თქვენგნით მიცემული ვადა გავიდა. ამას ყური არც  
კი გაუბერტყენია და არა ცდილა ფულის შოვნისათვის, ამას  
ხუმრობა ჰკონებია, როგორც ეტყობა.



— შენი ქირიმე, ბატონო პრისტავო, ნუ დაჰლუპავ ჩემ ცოლსა და შვილს. ემ უღელ ხარზე ვკიდევართ მთელი იმო-დენა ოჯახი.

— მე რა საქმე მაქვს, ჩემო ძმაო, ან მე რა შეველა შე-მიძლიან! ყოველიფერი შენი ბრალია. გამოცხადდებოდის სუდ-ში, როცა დაგიბარეს, მოახსენებდი სუდიას, რაც საბუთები გქონდა და ის გადასწყვეტდა—მტყუანი იყავ თუ მართალი. ეხ-ლა აღარაფერი ეშველება საქმეს, заочное рѣшение ძალაში არის შესული; ბევრიც რომ იტოკო, გადაგხდება ვალი. ჩემგნით რა შელავათიც შეიძლებოდა, მოგეცი. როცა ხარები აგიწერე, ვადა დაგიდე და გითხარი: თუ ამ დრომდის არ იშოვნე ფულ-სა და არ გაუსწორდები მოვალეს, ხარები გაგეყიდება-მეთქი— გამოგიცხადე ასე თუ არა?

— ჰო, შენი ქირიმე, გამომიცხადე, მაგრამ რა ექნა, ყვე-ლაფერი უცოდინრობითა და სიბრიყვით მომივიდა და გთხოვეთ შემიბრალოთ და მაპატიოთ, ნუ დამილუპავთ ცოლ-შვილს.

— ეხლა იმის მეტი აღარაფერი დაგვრჩენია, ჩემო ძმაო, რომ კანონი შევასრულოთ და არც შემიძლიან არ შევასრუ-ლო.

დაიწყეს საჯაროდ ვაქრობა უღელი ხარისა და სწორედ იქამდის ასწიეს იმათი ფასი, რამდენიც აღნიშნული იყო აღმა-სრულებელ ფურცელში—ბოქაულის დასაჯილდოებელის ზედ-მისვლით. ამ ფასში დაინარჩუნა ხარები სოფლისავე მამასახ-ლისმა. ასევე გადაახდევინა ალალომ მეორე თავხედ მოვალე-საც.

გაიგეს თუ არა ეს ამბავი დანარჩენმა მოვალეებმა, თავს ზარი დაეცათ. დაფაცურდნენ ყველანი და ზოგი ფულს მოურბენინებდა, ზოგი ეხვეწებოდა თამასუქის გამოცვლას. ისე მოაწყო ალალომ გაცემულობის საქმე, როგორც სურ-და. თავისდა საბედნიეროდ ახალი წესიც მოიგონა თამასუქე-ბით ვალის გაცემისა: სარგებელს არ აცხადებდა თამასუ-ქებში, როგორც წინად იგიც და სხვებიც შვრებოდნენ; იგი სარგებელს თავნზედ მიდიოდა, როგორც ბოლოს ვექსილებს

დაუწყეს წერა, კიდევ იკვებოდა ალალო, მე ვასწავლე ყველას  
ეს წესიო და აწერდა უსარგებლოდ დანიშნულ ვადამდის. რაც  
უნდა დიდი სარგებელი აეღო, ვერავინ შეუტყობდა. ამგვარი  
წესის შემოღებამ ძრიელ ხელი შეუწყო ალალოს და სარგებ-  
ლობაც დიდი მოუტანა: რამდენსაც სთხოვდა სარგებელს, უარს  
ვერავინ ეუბნებოდა, ოღონდ არ ეჩივლა და ბოქაული არ მიე-  
ყვანა მის კარზე.

ამასაც არ დასჯერდა ალალო. იმან გადაჩხრიკა თამასუ-  
ქების ყუთი და ბევრი გაბათილებული თამასუქი იპოვნა. ამ  
თამასუქებით მის დედ-მამას გადაეხდევინებინათ ვალი, მოვა-  
ლევებს კი არც დაეხევიანებინათ, არც დაეხსნათ. მხოლოდ, რად-  
განაც ათი წლის ვადა გასული ჰქონდათ, დამწერები იყო და  
ალალომ კარგად იცოდა, რომ კანონი არ შეიწყნარებდა. მა-  
გრამ ბევრი აღარ ახანა და შიშის ზარით დაფეთიანებულთ  
დაეცათ ამ გაბათილებული და დამწვარი თამასუქების პატრონებს.  
მომეტებული ნაწილი თამასუქებში მოხსენებულ პირთა ცოცხ-  
ლები აღარც კი იყვნენ; ხოლო რადგანაც შიგ მოხსენებული  
იყო, „ჩვენმა შვილებმა და შვილის შვილებმა გადაიხადონ ჩვე-  
ნი ვალი, თუ ჩვენ ვერ გადავიხადეთო“, ცოცხლებს მიმართა  
ამგვარი სიტყვებით: „ხომ გაგიგონიათ, სოსიას და ფიდას რა  
დღე დაეყენე, რადგანაც გამიჯიუტდნენ და ბიაბრუობა მო-  
მაყენეს. ამას იქით ვინც გამაჯავრებს, იმაზედ უარესს დაე-  
მართებ და ვინც ტკბილად მომირიგდება, იმათთან მეც სიტკბოს  
და კაი კაცობას გამოვიჩინ. რამდენიმე თამასუქი მიეგლო მამა-  
ჩემს ისეთ ადგილას, რომ ვერც დედა-ჩემმა და ვერც მე ვერ  
მივაგენით აქამდის. ახლა ვიპოვნეთ და იმათში თქვენი თამა-  
სუქიც აღმოჩნდა,“ ეუბნებოდა, ვასთანაც საქმე ჰქონდა, „თუ  
არ მაჩივლებთ, მეც არ შემაწუხებთ და თქვენ თავსაც, ხომ  
რა კარგი; თუ მაჩივლებთ და ისიც თქვენი ნება იყოს. მარ-  
თალია, შევწუხდები სასამართლოში სიარულით, მაგრამ თქვენ  
უფრო ძრიელ შეგაწუხებთ, და თუ შინაურულად მოვრიგდე-  
ბით, მაშინ საქმის გათავება ჩემს სვინიდისზე მოაგდეთ. გადა-  
იხდით ეხლვან ვალს, იმას დაგჯერდებით მარტო, რაც თამა-

სუქში სწერია, სარგებელს არ გამოვუდგები—ან როგორ ამო-  
 უხვალთ იმოდენა სარგებელს, რამდენიც შედგება, ჩემს ღმერთს  
 რომ გადავუდგე და გიანგარიშით; ვერ გადაიხდით ახლა და—  
 თამასუქი გამომიცვალეთ. ისევ იმას დაგაწერთ, რაც თამასუქში  
 სწერია; ერთი წლის სარგებელსაც გაპატიებთ, რადგანაც თქვენც  
 ცოდონი ხართ, განა არ მესმის, რომ თქვენ დაეწყებული  
 გაქვთ ეგ ვალი, რაკი აქამდის არავის უთხოვნია თქვენთვის.  
 რომ ეთხოვნა ვისმე, აქამდის როგორმე მაიშორებდით.

— მართალია, არ გვახსოვს მაგისთანა ვალი,— ეუბნებოდ-  
 ნენ შვილნი და შვილის შვილნი ვალის ამლებთა,— მხოლოდ ის  
 კი გაკვივონია, რომ მართებიათ და მოუშორებიათ. ეინ იცის,  
 იქნება არ მოუშორებიათ მართლა, თორემ თამასუქს დახე-  
 დნენო. ხოლო ვინც ცოცხლები იყვნენ, ისინი დაქვემდებარე-  
 ბით ეუბნებოდნენ, რომ მიცემული გვაქვსო, მაგრამ თამასუ-  
 ქების გამორთმევა დაგვაფიწყდაო. მინც რა გაეწყობა, ჩვენ  
 იქამდის არ მიგიყვანთ, რომ გაჩივლოთო.

ყველანი დასთანხმდნენ თამასუქების გამოცვლას. აღა-  
 ლომაც აასრულა თავისი დაპირება: დააწერათ მარტო ის, რაც  
 თამასუქებში ეწერა და თითო წლის სარგებელიც აპატივით—  
 ამას ჩაედევარ მამი-ჩემის სულის გულისათვისაო. როცა ახალი  
 თამასუქები ჩაიწყო ჯიბეში, აღალომ წყრომით უთხრა მოვა-  
 ლეებს: დახე რა სიკეთე გიყავით და თქვენ მადლობასაც არ  
 მეუბნებითო. იცოდეთ ამის შემდეგ, რომ ძალაცა და სამარ-  
 თალიც ჩემ ხელში არის. ეს კარგად შეიგენით და ყურებიც  
 გამოიბერტყეთ, არ გამაჯაეროთ და არც გამალაპარაკოთ,— ეუბ-  
 ნებოდა აღალო რიხიანის კილოთი მოვალეებს.

## VI

### მაკაერას გადახდა

რაკი აღალომ გაცემულობის საქმე სასურველად დაამო-  
 ლოვა, ძრიელ კარგ გუნებაზე იყო და მოინდომა ერთი საუ-

კეთესო დროება გაეტარებინა თავის სწორ-ამხანაგებთან. გარ-  
და იმისა, რომ იგი თავის ნასიამოვნებ გულს სხეერპლს მიუ-  
ძღვნიდა, უნდოდა კიდევ ამ დროების გატარებით თავი გამოე-  
ჩინა და გასცნობოდა კარგად მეზობლებს, რომელნიც ვერ  
იცნობდნენ დაშორების გამო.

წადილი მალე და დაუბრკოლებლივ შეისრულა ალალომ.  
საგანგებო მეჯლიში გამართა, საგანგებო სტუმრებიც მოიწვია;  
სუფრას, თუ მომზადებას, თუ ქცევას ალალოსას, როგორც  
მასპინძლისას, გულს მოდგინება და გულუხვობა არ აკლდა.  
ყოველი ესე ტკბილი დუღუკით იყო შემკული.

მოქეიფენი ეშხში იყვნენ შესულნი, როცა ერთ სტუმარს  
შემოუტანეს ამბავი: კნიაზ კოტე გეძახის საჭირო საქმისათვისაო.

— ვინ კნიაზ კოტეა, რას ამბობ?— მიუბრუნდა ამბის მომ-  
ტანს ალალო.— რა დროს საქმეა ეხლა?— და მუხლებზე ხელი  
დაადო ასადგომად მომზადებულ სტუმარს.

— თადეოზის შეილიო,— მიიღო ალალომ პასუხად.

— წავიდეს, მისი ასე და ისე! ის რა ღირსია, რომ იმის  
გულისათვის გარედ გახვიდე და ქეიფს მოსცდე!— უთხრა ალა-  
ლომ სტუმარს. კაცი რომ იყოს, სუფრაზე არ მოვიწვევდი! მაგ-  
რამ ეგ კაცი კი არა, ძალზე უარესია!— ამ სიტყვებზე ალა-  
ლოს გული ისე აუტოკდა, რცმ მისი ძაგა-ძუგი ახლო მსხდო-  
მარეთ ესმოდათ.— ექ შენთვის იჯექი და დროება გაატარე. თუ  
საჭირო საქმე აქვს, არსად წავა, დაე გიცადოს კარზე მური-  
კასავეით.

ყოველი ეს სიტყვები გაიგონა კოტემ, რადგანაც კარებს  
ახლო იღვა და შემოუძახა გარედან:— ნეტა ვინა თავხედობს და  
ვინ მიჰქარავს მაგისთანებს?

ამის თქმა იყო და ალალოს უცბად ფეხზე წამოდგომა.  
თვალის დახამხამებაში გადმოხტა სუფრაზე; გამოვარდა კარში  
და ისე მოულოდნელად ეცა კოტეს და წაუშინა მუშტები,  
რომ იგი ამ მოულოდნელობისაგან გაშეშდა და ვერც ხელი  
გამოიღო და ვერც ხმა ამოიღო. როცა გონს მოვიდა, კიდევ  
გააშველეს სუფრიდან წამოშლილმა ხალხმა. ახლა წაივლო კო-



ტემ ხელი ხანჯალზე, მაგრამ გვიან-ლა იყო: მოჩხუბარნი შორი-შორს ექირათ გამშველებელთ, — ლანძღვა-გინებით-ლა იოხებდნენ ერთმანეთზე გულს.

— ეხლა მეც მიცანი, ვინა ვყოფილვარ! — ეუბნებოდა კოტეს ალალო. — ეს ბოღმა ხომ გავხეთქე! წადი ახლა და საცა შენი დაიკვებო, იქ ჩემიცა სთქვი! არა, შენ გეგონა, დედაჩემი ორი შაურის ტყემალი იყო, რომ იმისი ლანძღვა შემერჩინა შენთვის! შენს სახლში რომ დიდი გული გქონდა და ბიჭების იმედით ჰყოყლოჩინობდი, აბა ეხლა გამობძანდი, ეს ბურთი და ეს მეიდანო, გავშინჯოთ ერთმანეთი! მაგრამ მგონია კი გაიღე გემო ჩემი მუშტებისა.

კოტე გულზე ხელს იცემდა და ალალოსაკენ იწევდა, ხოლო გამშველებელთ მაგრა ჩაეჭიდნათ ხელი და არ უშვებდნენ.

კარგა ხანი დასქირდათ გამშველებელთ მოჩხუბრების და-შოშმინებაზე. შუაკაცებიც გაჩნდნენ, რომელთაც აქავე მოინდომეს მათი შერიგება. შემოეხვივნენ კოტეს და მოსვენება აღარ მისცეს: „კნიაზო, რაც იყო — იყო; შერიგდით, შერიგდით. საჩივლელად საქმეს ნუ გახდითო. კოტე დიდს უარზე იდგა. ალალო კი გაიძახოდა: წავიდეს მაგისი ასე და ისე! ეგ კი კნიაზი და მე ეს აღექსეი მელიქიჩ მანუქოვი და ეს ჯიბეც ჩემთან ერთად, — დაიკრა ჯიბეზე ხელი, — ერთი ფულის ძალა უნდა დაენახვო მაგას და!... რაც მაგან მე დამაკლოს, თავის ცოლთან დაიკვებოს! ხოლო შუაკაცი თავისას არ იშლიდნენ.

მეორე დღეს ეს ორი მოჩხუბარი ისხდნენ ერთად ისევ იმ სალხინო სახლში და იმავე ამქარში; შეექცეოდნენ ტკბილად დუდუკზე და ხშირად ჰკოცნიდნენ ერთმანეთსა; თანაც ერთმანეთსა სთხოვდნენ შენდობასა და პატიებასა, რაც მათში წინა დღეს მოჰხდა. გუშინდელი მოსისხლე მტრები დღეს გულითად მეგობრებად გარდაიქცნენ. არა თუ მარტო დღეს, შემდეგშიაც დიდ ხანს ვასტანა მათ შორის კეთილმა განწყობილებამ. ერთიცა და მეორეც ცდილობდნენ ერთმანეთისათვის



მეგობრული სიყვარული გამოეცხადებინათ და გულითადი სასახური გაეწიათ.

მეგობრული განწყობილების დამტკიცება პირველად აღალოსა ხვდა. კოტე მოსულიყო სანინლანში ხუთმეტოდე თუმანის სასესხებლად. როცა აღალომ გაიგო ესა, უთხრა: „ვა, კნიაზჯან, ეხლა მე შენ სხვაგან გაგზავნი ფულისათვის!“ ამოიღო ჯიბიდან და იქვე დაუთვალა ხუთმეტი თუმანი უბარათოდ. მოქიფე ხალხს თვალები აუჭრედდათ, როცა იმან ჯიბე-უბიდან დასტა-დასტად ამოაღა ათ-თუმნინანი ბილეთები. ამ დროს იგი ყველას თვალში მილიონის პატრონად გადაიქცა, ხმაც ასე დაუარდა და აღალოც ამ ხმას ეძებდა. ხოლო კოტე ისე მოხიბლა მისმა ქცევამ და გულში ისე მრავლად აღუძრა სამადლობელი გრძობანი, რომ ამის მეტი ვეღარა მოახერხარა: „მაშ კაცი ნუ ვყოფილვარ, თუ მეც არ გადაგიხადო!“

ერთი კვირის შემდეგ აღალომ „მირონი შეიტანა“ კნიაზ კოტეს სახლში. ღმერთს მადლობასა სწირავდა კოტე და ძრიელ საბედნიეროდ სთვლიდა იმ გარემოებას, რომ შეესწრო იმ დროსათვის მოსანათლი ბავშვი, რომელმაც მეგობრობა მტკიცედ დააკავშირებინა „ყოვლად პატიოსან და საყვარელ კაცთან“, როგორც იგი უწოდებდა აღალოს. ამის შემდეგ აღალო სასურველ და სანატრელ სტუმრად გარდაიქცა თავადი კოტეს სახლისთვის, მაგრამ იმას სტუმრობისათვის არ ეცალა.

აღალოს ფულების იღბალმა გასჭრა, თუ მისგან ოჯახში შეტანილმა მირვნის მადლმა იმოქმედა, იმ წელს თ. კოტე მორბედაძეს დიდი მოსავალი მოუეიდა ღვინისა, — რალა თქმა უნდა, რომ იგი ძრიელ გახარებული და გულ გახსნილი იყო. დაიდულა თუ არა ღვინოებმა, კოტემ დაიბარა აღალო, უჩვენა რამდენიმე ქვეერი და უთხრა:

— აბა, ალექსეი მელქიჩი, რომელი ქვევრებიც გინდა დაბეჭდე, თუნდა ამ საათშივე ამოიღე ერთი ურემი ღვინო (სამი საპალნე) შენს თხუთმეტ თუმანში, რომლითაც ისეთ დროს გამიმართე ხელი, რომ თხუთმეტ ათას თუმნად მიღირდა.

— ვა, კნიაზჯან, აბა, რასა ბრძანებ! მეც არა ვთქვი, რამე სხვა საქმისათვის მიბარებს-მეთქი. ასე მცოდნოდა, აქ ფეხს



მოვდგამდი! კანა ჩვენში მაგისტანა ანგარიშები უნდა იყოს! ეკსულ მეტია.

— არა, ჩემო ალექსეი მელიქიჩ, მეც კაცი ვარ და მინდა კაცთან კაცურად მოვიქცე—ამ დროს ერთი ყურთმაჯი კაბისა მხარზე გადიგდო,—შენ მენდე, პატივი მეცი და მე შენი პატივის ცემა ისე უნდა ჩავატარო!

დიდს უარზე იღვა ალალო, მაგრამ მაინც დასცალო კოტემ; ალალომ დაბეჭდა ორი საუკეთესო ქვევრი და შემდეგ მიჰმართა კოტეს:

— კნიაზო, იცი რა? ეშმაკი ღმერთმა დასწყევლოს, რომ ჩვენში უთანხმოება და უსიამოვნება ჩამოაგდო; ალებ-მიცემობა და ვაჭრობა მოგვისპო ერთმანეთში. იმ ოხრად დასარჩენს დღეს მეც დიდი ზარალი მომეცა და თქვენც. მოდი, ყველაფერი დავიწყებას მივცეთ და ისევ აღვადგინოთ ერთმანეთში ვაჭრობა და ალებ-მიცემობა. მე ყოველთვის ღვინო მინდა, თქვენ ღვინის გაყიდვა. იმედია, ეხლა აღარაფერი შუღლი და უსიამოვნება არ გამოგვერევა, რადგანაც ნათელ-მირონები ვართ. მხოლოდ ამას კი გთხოვ: არც შენ დამეხატრო ვაჭრობაში, არც მე დაგეხატო. ვაჭრობამ ხათრი არ იცის,—ვაჭრობა ამოღებული ხმალივით უნდა იყოს.

— მაგას რა ემჯობინება, ჩემო ნათლია კაცო!—შეიგდო მხარზე მეორე ყურთმაჯი კაბისა—მე გასასყიდად არ მინდა ჩემი ღვინოები, მა რად მინდა! შენზე უკეთეს ვიღას მივყიდი? თუნდაც მეტ-ნაკლები წავიდ-წამოვიდეს ერთი-ერთმანეთში, მაინც დაკარგული არ იქნება.

მორიგდნენ ურემს ოც და ათ თუმნად და ალალომ დაბეჭდა ყველა ქვევრები. ფულიც ჩააბარა კოტეს, რამდენიც, სთხოვა და თან დაატანა: „თუ ვიყვარდე, ნათლიამ, ფულზე ნუ დამეხატო, იქნება ღვინოების ამოღება დავაგვიანო, მხოლოდ შენ რამდენიც გინდა ფული და რა დროსაც გინდა, მოიკითხე და მიირთვი,

ღვინის ამოღების დროს წინანდებულად არ მოიქცა ალალო. მოუტანა ნათლი მამას სამი თავი შაქარი, ჩაი, ღოშები,

ზიზილალა, გელაქნურები, ხმელი ხილი და ლიმონები. დასხმასაც კი საზღვარი არა ჰქონდა.

როცა გაუსწორდა ღვინის ფასში და ეთხოვებოდა წასასვლელად, კიდევ გაუმეორა ალალომ კოტეს; თუ გიყვარდე, კნიაზო, და ჩემი ხათრი გაქვს, ნუ დამზოგავ; რამდენიც გნებავდეს, მომკითხე ფული, არც ბარათი მინდა შენი და არც სხვა რამ. როცა კაცს პირი აქვს, ბარათი რაღა საჭიროა. ბარათი უპიროზის იარაღია. დღეს ჩვენ მეგობრები ვართ და მეგობრობაზედ უფრო მტკიცე კავშირი ჩვენში ნათელ-მირონობა არის. მე შენ სახლში მირონი შემომიტანია და ამ მირენის ხათრით მოვალე ვარ ყოველისფრით გემსახურო და გასიამოვნო.

ამის შემდეგ ნათლია და ნათლიმამა ისეთ განწყობილებაში იყვნენ, რომ მინავ ნუ გასტყდები და ღვინოვ ნუ დაიღვრებიო. დიდ სიკეთესაც კი უშვრებოდა ალექსეი მელიქიჩი კოტეს. რა დროსაც კი ან რამდენიც კი მოუნდებოდა ფული, ან თითონ მიდიოდა, ან ბიჭსა გზაფინიდა და ყოველთვის უარის უთქმელად მოსდიოდა. ერთი სიტყვით, ნათლია ნათლიმამისთვის საზინად გადაიქცა, მაგრამ არც ნათლიმამა რჩებოდა ქვეშ. ატივისცემით სახლში მიღებასა და უხვ მასპინძლობას როდი აკმარებდა იგი ალალოს; იგი იმასა ცდილობდა, რომ სიკეთისათვის მაგიერის გადახდა ღვინოების იათად მიყიდვაში და მიყვანაში გამოეჩინა.

მკლანაა

(შემდეგი იქნება)

\* \* \*

როს აწმეოსგან დაჩაგრული  
მომავლისგან ველი შეებას,  
მაშინ იმედ-მოცემული  
ვგრძნობ ზეციურს ნეტარებას.

და მთლად გრძნობა-მორეული  
სულით ვტკბები, გულით ვხარობ;  
საიმედო მომავალსა  
ველოდები და ვნეტარობ.

მაგრამ ამ დროს იდუმალი  
ხმა ჩამძახებს: «იცი ესა:  
სანამ ჰეტრე მოვიდოდა,  
ზავლეს ტყავი გააძვრესა».

და წამს იმედ-დაკარგული  
ვეძლევი მე შწუნარებას,  
სული მეწვის, გული მიკვნესს  
და ვწუეულა ჩემ დაბადებას.

გ. რუხაძე



# სტუდენტის ანაფორით

(ძველი სტუდენტის ნაამბობიდან)

## ზოტაბენკოსა

1

უნივერსიტეტის კურსის შესრულებას ორი წელიწადი-ლა მიკლდა და ეს ორი წელიწადი ერთ პროვინციის უნივერსიტეტში ვავატარე.

საზაფხულოდ სოფელში კერძო გაკვეთილები მქონდა; ამ გაკვეთილებს მალე მოერჩი და ქალაქში ათ აგვისტოს ჩამოვედი. ჩემი ამხანაგები ჯერ არ ჩამოსულიყვნენ. მხოლოდ უნივერსიტეტში იყო ზთოდ კაცი, რომელთაც ზაფხულის მაგიერ ეხლა, ენკენისთვეში უნდა დაეჭირათ ეგზამენები. მე იმათ იშვიათად შევხვდებოდი ხოლმე, რადგან ყველა მათგანს თავიანთი საქმე ჰქონდა—ეგზამენისთვის ემზადებოდნენ.

ქალაქში ვერაფრით გავერთე. ჩემი ერთად-ერთი გასართობი საგანი თეატრი იყო, მაგრამ თეატრის კარი საზოგადოებისთვის ჯერ არ გაღებულიყო. ცხელოდა საშინლად; ქუჩებს განუწყვეტლივ მტვერი ასდიოდა. ჭერსად ვერ მოვახერხე წასვლა და ამიტომ ძალაუფლებურად უნივერსიტეტში დავხეტიალობდი. თანაც იმედი მქონდა, სტუდენტები ეხლა კი ჩამოლაგდებიან და ნაცნობ ამხანაგებს მალე შევხვდები-მეთქი.

მაგრამ ამხანაგები არსად სჩანდნენ. უნივერსიტეტში შემოდისოდნენ მორცხვად და გაუბედავად უცნობი პირნი. ესენი

ახლად ჩამოსულები იყვნენ, უნივერსიტეტში შესვლას ეხლა აპირობდნენ.

ამ ახლად ჩამოსულთ შორის სემინარიელებიც ბევრნი იყვნენ. იმათ უნდა ეგზამენები დაეჭირათ უნივერსიტეტში შესასვლელად. სემინარიელებს ადვილად იცნობდით გარეგანი შეხედულობით და ტანისამოსით. ისინი ძალიან გაუბედავად იქცეოდნენ; ტანზედ ეცვათ სემინარიიდან გამოყოლილი გრძელი სერთუკები. ახლად ჩამოსულთაგანი მე არაფერს ვამიცენია, როგორღაც ვერ მებერებოდა. უსაქმობამ, ცოტა არ იყვეს, გამაბეზრა და ორიოდეჯერ აუდიტორიაში შევედი ეგზამენების საცქერლად. მაინც და მაინც ამითაც ვერ გავერთე. ისე რომ, ექვი არ არის, მესამედ მე აუდიტორიაში აღარ შემოვიდოდი, თუ რომ აქ ერთი საინტერესო შემთხვევა არ მომხდარიყო.

ზემო სართულში ეგზამენები სწარმოებდა; მე მარტოდ-მარტო ქვემოდა დავხეტიალებოდი. არ სჩანდა არსად არც კარის კაცი, არც მოსამსახურე. ერთ კუთხეს რომ მივატანდი, მერე მეორისაკენ ვბრუნდებოდი. ამავე დროს კარებისაკენ ვიციქირებოდი, აცა, იქნება ნაცნობი ვინმე შემოვიდეს-მეთქი. ამ ყოფაში რომ ვიყავ, უცებ კარები გაიღო და გამოჩნდა ადგილისა და გარემოების შეუფერებელი ადამიანი. ეს იყო სასულიერო წოდების პირი, — მხოლოდ რა ხარისხისა, ის ვეღარ გავიგე. ტანთ ეცვა გრძელი, ფართო-სახელოებიანი ანაფორა; თავზე დაძველებული შავი ქუდი ეხურა; მხრებზე გრძელი თმა ჩამოჰფენოდა. ამ კაცს ქერა წვერი ჰქონდა და ბანლიანი პირისახე. ისე რომ ძნელი გამოსაცნობი იყო, თუ რამდენი წლისა იქნებოდა იგი. ქუდი, ანაფორა და თმა მტვრით ჩამოგინგლოდა; ეტყობოდა, ნამგზავრი იყო.

ახლად შემოსულმა გარშემო ყურება დაიწყო, თითქო ეძებს ვისმეო.

მე კარგა შორს ვიდექი და ეს კაცი რომ დავინახე, გავშტერდი. თანაც შორიდან ყურება დავუწყე, აცა რას იზამს-მეთქი. ის ერთბაშად შეკრთა და მე გავსწიე იმისკენ.

მე მაშინვე ის ვიფიქრე, ეს უთუოდ ნათესავია ერთ-ერთ ახლად ჩამოსულ სტუდენტ-სემინარიელისა-მეთქი. ერთი შეხედულობით სოფლის მღვდელს წააგავდა.

— ეინა გნებავთ, მამაო?— შევეკითხე მე.

ჩემ სიტყვებზე იმას გაელიმა და ქული მომიხადა.

— არა,— მიპასუხა ბოხი ხმით,— ის... არავინ მინდა, მხოლოდ უნდა გამეგო... თუ შეიძლებოდეს, მითხარით, ეგზამენებს სად იქერენ აქ?..

— ეგზამენებს?— შევეკითხე— ეგზამენები რადა გნებავთ?

— მინდა ისე... მეც, რა ჰქვიან... უნდა დავიჭირო ეგზამენი...

მე გავოცდი.

— როგორ თუ ეგზამენი? განა თქვენ... ეს ხომ უნივერსიტეტია!

— ვიცი,— მიპასუხა მან,— ვიცი რომ უნივერსიტეტი... მეც სწორედ უნივერსიტეტი მინდა.

— მოითმინეთ... მე ვერ გავიგე; უთუოდ თქვენი ნათესავი იქერს ვინმე ეგზამენს და იმის ნახვა თუ გინდათ.

— ეჰ, არა,— გაცხარებით წარძოსთქვა მან,— მე თითონ უნდა დავიჭირო ეგზამენი.

— როგორ, რა ამბავია?

— აი რაშია საქმე: მე თხოვნა მივეცი, რომ სტუდენტად მივეღეთ... ეს, რასაკვირველია, არა ჩვეულებრივი შემთხვევაა, რადგან ანათორა მაცვია... მაგრამ ეს არაფერი... ნება გვიბოძეთ გაგეცნოთ: სოფელ ბოგოდუხოვის მთავარი, ევმენილოვი გახლავარ... თქვენ სტუდენტი ბძანდებით?

— უკაცრავად! მე არ ვიცი, თუ სასულიერო პირებსაც შეეძლოთ უნივერსიტეტში შესვლა.

— რატომ არ უნდა შეგვეძლოს? ჩვენ რა სხვაზე ნაკლები ვართ? მაგრამ უკაცრავად, ეგზამენებს სად იქერენ? ცოტა არ იყვს, დამიგვიანდა. სამოცი ვერსია ჩვენ სოფლამდის. დილით რიფრაეზე წამოვედით, მაგრამ გზაში ლერძი გავკიტყდა და იმან დაგვაგვიანა...

მე და მთავარი მალლა კიბეზე ავედით და ვაჩვენე აუდიტორია, საცა ეგზამენები სწარმოებდა. რომ მივდიოდით, ათასნაირი ექვები მებადებოდა ამ კაცის შესახებ. ვფიქრობდი: რა ამბავია, აქ ეშმაკობა ხომ არაფერი უნდა იყვეს-მეთქი. მაგრამ მთავარი ბეჯითად მიაბიჯებდა, თანაც ნალელიანობდა, ვაი თუ ველარ მივესწრო ეგზამენებს და ისე დავრჩეო.

— მამაო, რა ფაკულტეტი გაქვთ ამორჩეული?— ვკითხე მე.

— მათემატიკისა...

ამ სიტყვებზე მეტად გავოცდი.

— მაშ თქვენ, ალბად, სემინარია გაგიტაყვებიან!

— არა, სემინარია არ გამითაყვებია, ფილოსოფიის კლასი შევასრულე,— წინად ესე უწოდებდნენ; შემდეგ ღვთის-მეტყველების კლასში გადავედი, მაგრამ აქ უსიამოვნობა მომიხდა... მე და ინსპექტორი ერთმანეთში ვერა ვრიგდებოდით და სწავლას თავი დავანებე. ამ დროს მთავრის ადგილი იყო დაცლილი; მე ავდექი, ცოლი შევირთე და სამსახურს შევეუდექი. მაინცა და მაინც, შევირდობის დროს მათემატიკა ძალიან მიყვარდა და ცხოვრებაშიც რომ გამოვედი, ამ საგანს თავი არ ვაგანებე. ამ რამდენისამე წლის წინად მთავრობამ ბრძანება გამოსცა: ვისაც საზოგადო განათლება მიუღია, შეუძლიან, თუ ეგზამენს დაიქერს, უნივერსიტეტში შევიდესო. მეც ვიფიქრე: ბოდი შევალ უნივერსიტეტში-მეთქი. საზოგადო განათლება მიმიღია, მართალია, ანაფორა მაცვია, მაგრამ ვითომ რაო, რას დამიშლის-მეთქი. ავდექი, ჩვენს მთავრობას ქალაქი მივეცი, უნივერსიტეტში მინდა შევიდე-მეთქი. ამის თაობაზე არქიელმა თავისთან დამიბარა. ჯერ ისე გვერდელად შემომხედა. ვიფიქრე, რაღაც ამბავია ჩემ თავს-მეთქი. მერე დამიწყო გამოკითხვა: როგორ, რისთვის, საიდან დაგებადა ეგ სურვილიო და სხვა. მე, რასაკვირველია, ყველაფერი ვუამბე. ვუთხარი: მათემატიკა ჩემი სატრფიალო საგანი არის, მთავრობიდან ესეთი განკარგულება გამოვიდა და მეც მინდა ვისარგებლო ამ განკარგულებითა-მეთქი. „მერე რა აზრით გინდა სწავლა, რა მიზანი გაქვსო“— მკითხა ყოვლად სამღვდელმომ. მე ვუპასუხე: ის აზრი





მაქვს, თქვენო მეუფებაე, რომ ჯერ ერთი საგანს შევისწავლო, მეორეც სასულიერო უწყების სასწავლებელში მათემატიკას ვასწავლი. ჩვენ საზოგადოდ მათემატიკის მასწავლებელი არა გვყავს, აკადემიელებმა მათემატიკა ნაკლებად იციან. ამიტომ, სასურველია ჩვენივე კაცი გვყავდეს მათემატიკის მასწავლებლად ჩვენს სასწავლებლებში, თორემ ეხლა ძალა-უნებურად ან გიმნაზიიდან ვიწვევთ მათემატიკის მასწავლებლებს ან კიდევ რომელიმე სხვა საერო სასწავლებლებიდან“... ყოვლად სამღვდლო დაფიქრდა, დაფიქრდა და მითხრა: „მართალსა ლაპარაკობ, უფალმან წაგიმართოს ხელი, რახან სწავლა გინდა, ისწავლე; მხოლოდ სამრევლოს რას უზამ?“

— „სამრევლოს, რასაკვირველია, თავი უნდა დაეანებო!“ — „ოჯახს? დიდი ოჯახი გაქვს?“ — „ცოლი მყავს და სამი შვილი“ — მეთქი. — „მერე იმათ რას უზამ?“ — „ცოლსა და შვილებს სიმამრთან ვიყოლიებ.“ — „მერე შენ რითი იცხოვრებ?“ — როგორც იქნება, ვიცხოვრებ — მეთქი, თქვენო მეუფებაე, იქ ერთი ნაცნობი ბერი მყავს და იმასთან ვიცხოვრებ, თქვენო მეუფებაე. ოთხი წელიწადი უნდა ვიყო უნივერსიტეტში, მეტი ხომ არა, რა ბევრია.“ ერთი სიტყვით, არქიელმა მომიწონა ეს საქმე. ამის შემდეგ სადაც ჯერ არს, თხოვნა გავგზავნე. იქაც რაღაც ეჭვით შეხედეს ჩემ თხოვნას; რამდენიმე ხანი ქალაქდები სჩხრიკეს. მერე სასულიერო მთავრობას შეეკითხნენ. ბოლოს დარწმუნდნენ, რომ დაბრკოლება არსაიდანა მაქვს. ფილოსოფიური კლასი გათავებული მქონდა, მაშასადამე იმ განკარგულების წინააღმდეგი აღარაფერი იყო. — როგორ მეტყოდნენ უარს? — მართლაც მალე ქალაქი მომივიდა: უნდა უნივერსიტეტში გამოცხადდე და ეგზემენი დაიჭირო ბერძნულში, ლათინურში და მათემატიკაშიო. მეც, აგერა, გამოცხადდი.

ამ დროს დავუახლოვდით აუდიტორიას, სადაც ეგზემენს იჭერდნენ მათემატიკაში. მთავარი შევიდა და მეც, ცნობის მოყვარეობით გატაცებული, თან შევყე.

სასულიერო პირის დანახვამ აუდიტორიაში ყველანი გააოცა. სკამებზე რამდენიმე ყმაწვილი კაცი ისხდა. ერთი დაფას-



თან იდგა და გულმოდგინედ რაღაც ტეორემას ამტკიცებდა. პროფესორი სტოლთან იჯდა და უგემურად ყურს უგდებდა ყმაწვილი კაცის ლაპარაკს. აქ ეგზამენები ფორმალურად სწარმოებდა, სამზე ნაკლებ ნიშანს არაეის უწერავდნენ. სემინარია დამთავრებულები ფილოლოგიურ და იურიდიულ ფაკულტეტზე აპირობდნენ უნივერსიტეტში შესვლას; ხოლო მათემატიკას ძალიან გაუფრთხობდნენ. ამიტომ იმათგან უფრო ლათინურისა და ბერძნულის ენის ცოდნასა თხოულობდნენ. რაც შეეხება მათემატიკას კი ამ საგანში მხოლოდ ისე იჭერდნენ ეგზამენს. პროფესორი კეთილი კაცი იყო და იმათ ნაკლებ ცოდნას გულგრილად უყურებდა. ზოგჯერ სულ უბრალო ამოცანებს ეუბნებოდნენ სემინარიელებს, მაგრამ იმის გაკეთებაც კი უძნელდებოდათ. პროფესორი მაინც ეუბნებოდა: არა უშავს-რაო, და სამებს სწერდა.

აუდიტორიაში რომ შევედით, ყველამ თვალები დაგვაქყიტა. პროფესორმა თავი მალლა აიღო. დაფასთან ვინც იდგა, იმანაც ლაპარაკი შესწყვიტა და ცარცი იქვე ახლო დააგდო.

— აქ დაესხდეთ,— ვუთხარ მთავარს და სკამზე მივუთითე. მთავარი ჩამოჯდა და მეც გვერდზე მოვუჯექი. გავიდა სამიოდ წუთი. პროფესორმა დაფასთან მდგომარე გამოისტუმრა:

— მამაო, ვინა გნებავთ?— ჰკითხა ევმენილოვს.

მამა ევმენილოვი წამოდგა, ტანში გასწორდა და თმებზე ხელი ჩამოისვა.

— მე ეგზამენზე გიახელით, ბატონო პროფესორო!— უპასუხა მან.

— ჰო, აქ ეგზამენს იჭერენ,— უთხრა პროფესორმა:— მაგრამ თქვენ გნებავთ ვინმე, თუ ისე ყური უნდა დაუგდოთ?

— არა, ბატონო პროფესორო! მე თითონ ეგზამენის დასაქერად მოვედი.

— თქვენა? თქვენ გინდათ ეგზამენი დაიჭიროთ?— ჰკითხა გაკვირვებით პროფესორმა.

— დიად, ბატონო პროფესორო,— უპასუხა მამა ევმენი-  
 დოვმა.

— მაშ, სტუდენტობა გინდათ?

— დიად, თხოვნა გავგზავნე და პასუხიც მომივიდა. უნდა  
 გზამენებზე გამოცხადდეთო. მეც, აგერა, გამოვცხადდი.

— ჰო, უნივერსიტეტში გნებავთ შემოიხვიდეთ, ჰა?.. ეს  
 პირველი შემთხვევაა, რომ სასულიერო წოდების პირი სტუ-  
 დენტი იყვეს.

— მაგისი რა მოგახსენოთ. ერთი ხელობა, მართალია,  
 დამაბრკოლეს... მაგრამ ყოველად-სამღვდელს მიემართე და იმან  
 ნება მომცა.

— რომელ ფაკულტეტზედა გსურთ?

— მათემატიკისა!— პროფესორს გაელიმა.

— ძალიან კარგი!— სთქვა მან.— ეგზამენი გინდათ დაიჭი-  
 როთ? დაფასთან მიბრძანდით.

მთავარმა პირდაპირ დაფასკენ გასწია; ხოლო პროფესორ-  
 მა უკანიდან სიცილით თვალები გაადევნა, რითაც იქ მყოფთ  
 აგრძნობინა, რომ დაფასთან ამ წუთში, სასაცილო ამბავი რამ  
 მოხდებოდა. პროფესორისათვის ძნელი წარმოსადგენი იყო, რომ  
 ეს სოფლელი, მზისგან გარუჯული კაცი, გძელ თმიანი და  
 გძელ ტანისამოსიანი, — რამე ცოდნას გამოიჩინდა მათემატიკაში.  
 ის, უეჭველია, ასე ფიქრობდა: ვილაც ოხერია, სისულელეს  
 მოუვლია და მათემატიკისა არა გავგებარაო. პროფესორი მაგიდას-  
 თან მივიდა.

— აბა, მამაო, გააკეთეთ ეს ამოცანა... და თან წაიკითხა  
 უბრალო ამოცანა.

მამა ევმენიდოვმა დაფაზე დასწერა, რაც საჭირო იყო;  
 შემდეგ უკან მიიხედა და პროფესორს დააშტერდა.

— ეს სულ ადვილი ამოცანაა, ბატონო პროფესორო.—  
 უთხრა მან.— ამას ზეპირადაც გავაკეთებ.

— აბა, გააკეთეთ!— უთხრა პროფესორმა.

— აი ამ საათში.



აქ მამა ევმენილოვი ერთ წუთას დაფიქრდა, თავისთვის გონებაში რაღაც გამოიანგარიშა და შემდეგ აღსნა, თუ როგორ უნდა გაკეთდეს ამოცანა.

— მართალია! — უთხრა პროფესორმა. — სჩანს, მამაო, მათემატიკა გცოდნიათ. აბა ეხლა ეს გააკეთეთ, ეს უფრო ძნელია...

პროფესორმა წაიკითხა რთული ამოცანა. იქ მყოფთ ამ ამოცანის გაკეთების თავი არც ერთს არა ჰქონდა და ამიტომ იფიქრა, აბა ეგ ამ ამოცანას როგორ გააკეთებსო.

ევმენილოვმა, რაც უთხრეს, დასწერა.

— მამაო, — უთხრა პროფესორმა, — იკისრებთ ამის გაკეთებას?

— რატომ, გავაკეთებ. — უთხრა მთავარმა.

ევმენილოვმა დაიწყო კეთება, პროფესორმა ჯერ უცქირა, უცქირა, მერე დაუახლოვდა და უთხრა:

— სწორეა, სწორედ ეგრეა, არ მეგონა, მამაო, თუ ეგრეთი მათემატიკოსი იყავით.

— მე მათემატიკა მიყვარს, — სთქვა ევმენილოვმა და თან ამოცანას აკეთებდა.

— სიყვარული სხვა არის და ცოდნა სხვაა! — სთქვა პროფესორმა. — აი ეს ყმაწვილები, — განაგრძო დაცინვით, — ექვი არ არის, მათემატიკა ამათაც ეყვარებათ, — ცოდნით კი არ იციან...

აუდიტორიამ ერთბაშად გაიხმაურა. მამა ევმენილოვმა კი ამ დროს ამოცანის გაკეთება შეასრულა და ცარცი თავის ადგილას დასდო.

— მშვენივრად გააკეთეთ, მამაო! გთხოვთ არ იწყინოთ ჩემი ექვიანობა! გარწმუნებთ, ეს პირველი შემთხვევაა... მე მეგონა სამღვდელო პირებმა მართო წირვა-ლოცვა იციან და სხვა არაფერი-მეთქი. სიამოვნებით მოგვგებებით ამისთანა სტუდენტს მათემატიკის ფაკულტეტზე. მამაო, გეომეტრიაც იცით?

— როგორ არა! ვიცი. ტრიგონომეტრიაც ვიცი.

— საკვირველია! სად შეისწავლეთ ყველა ეს?...

— ბატონო პროფესორო, ამას სემინარიაში ვწავლობდით. მართალია, მათემატიკას იქ ისე კარგად არ ასწავლიან, უბრალო საგნად მიაჩნიათ... მაგრამ ვისაც უყვარს, თავისითა სწავლობს... მეც მიყვარდა ეს საგანი და ვატაკებოდა ვწავლობდი.

— განა რამდენი ხანია, რაც სემინარიიდან გამოხვედით?

— ესე, რვა წელიწადი იქნება.

— მერე აქამდე არ დაგავიწყდათ?

— არა, შინ ვმეცადინებოდი... იცი, რა მოგახსენოთ, ზოგჯერ ჩამრჩებოდა გონებაში რომელიმე ამოცანა და ისე, საქმეში რომ ვიყავ გართული, ან ვმღვდელთ-მსახურებდი, — უცებ გამოვიყვანდი ხოლმე იმ ამოცანას. მე ძალიან მივდეგ ამ საგანს. ხანდისხან დადვდივარ ისე ჩემთვის ბაღში და თავში ტეორემა მიტრიალებს. ზოგჯერ ესეც მომსვლია: ვდგევარ ჩემთვის საყდარში და იმ დროს, როდესაც ერთი ასამაღლებელიდან მეორეზე გადავდივარ, ამოცანა გამომიძვნიან... ბევრჯერ კიდევ გამეჩხირებოდა გონებაში რომელიმე რიცხვი და ვეღარ ვიშორებდი....

— მაშ თქვენ მათემატიკის ნიჭი გქონიათ...

— არ ვიცი, იქნება ეგრეც იყვეს...

— მაგრამ, უკაცრავად, მამაო, მე ეჭვი კი არა მაქვს, მხოლოდ ისე შეინტერესება გავიგო, როგორ გააკეთებთ ერთ ამოცანას. აბა სცადეთ.

პროფესორმა უთხრა ამოცანა, რომელსაც აუდიტორიაში მყოფთ ვერც თავი გაუგეს, ვერც ბოლო. მამა ევმენილოვი სწვრავდა ამოცანას და თან დრო-გამოშვებით პროფესორს შემოსცქეროდა.

— გეყურებათ, რაშია საქმე? — ჰკითხა პროფესორმა.

— მეყურება, ბატონო პროფესორო, მხოლოდ ვერ გავაკეთებ... ეს უმაღლეს მათემატიკას ეკუთვნის.

— მაინც სცადეთ.

— ვცდი. უმაღლეს მათემატიკიდან ცოტა რამ წამიკითხნია... მიკეთებია კიდევ, მხოლოდ რაც უმთავრესია, იქ მეშლება.

— არა უშავს-რა, დაიწყეთ, მე შეგეშეელებით.

— დაეიწყებ...

ევმენილოვმა ამოცანის გაკეთებას მიჰყო ხელი. სახეზედ ეტყობოდა, რომ ყოველ სიტყვას ღრმად უფიქრდებოდა. პროფესორი ნელ-ნელა ეშეელებოდა და საქმე წინ მიდიოდა. მაგრამ აგერ მთავარი გაჩერდა, ჯიბიდან ხელსახოცი ამოიღო და ოფლი მოიწმინდა.

— ძნელია, ბატონო პროფესორო, ძალიან ძნელია! — სთქვა მან და ცარცი ძირს დააგდო. — რაც არ ვიცი, იმას ვერ ვიკისრებ...

— ეს ხომ სავალდებულო არ არის... მე მხოლოდ ისე ცნობის-მოყვარეობით... თქვენ მათემატიკის ნიჭი გაქეთ. ამის-თანა სტუდენტთან მეცადინეობა სწორედ სასიამოვნოა...

მე თქვენ ხუთს დაგიწერავთ.

— გმადლობთ! — სიამოვნებით წარმოსთქვა ევმენილოვმა და პროფესორს თავი დაუკრა. — შემძლიან ეხლა წავიდე?

— დიად, ეხლა ყველანი წახვალთ, ეგზამენები გათავდა. ევმენილოვმა ხელმეორედ თავი დაუკრა და თავის ადგილზე წამოვიდა. პროფესორმა ხელი დააელო ქალაღს, რომელზედაც ნიშნებსა სწერავდა, გამოეთხოვა იქ მყოფი და გამოვიდა. ამის შემდეგ მე და ევმენილოვს მთელი აუდიტორია გარს შემოგვეხვია.

ევმენილოვს აქეთ-იქიდან ეკითხებოდნენ: სადაური ხართ, სადა სწავლობდით და ან ცოლშვილი გყავთ თუ არაო. ვიდრე ქუჩაზე გამოვიდოდით, ევმენილოვი ყველამ გაიცნო. გაიცნეს ერთმანეთი აგრეთვე სტუდენტებმაც.

## II

— მადლობა უფალსა, — ამბობდა მამა ევმენილოვი, — როდესაც ქუჩაზე გამოვედით და თან ჩემსკენ იხედებოდა. — მადლობა უფალსა, რომ მოვეუსწარი, ყველაზე ბოლოს მე დაეიჭირე ეგზამენი... პროფესორი ძალიან კეთილი კაცი ყოფილა, კარ-

გი მოლაპარაკე. ესლა ლათინური და ბერძნულია საქმე. ბერძნული კიდევ არაფერი, როგორც იქნება გამოვალ, ლათინური მაშინებს: ლათინური იმ თავითვე ნაკლებად ვიცოდი.

— ნუ გეშინიან! — ამშვიდებდნენ სხვები; — ადვილია.

— ზოგისთვის ადვილია, მაგრამ ზოგისთვის კი არა. თქვენზე თვალი შეჩვეული აქვთ და ერთბაშად ყველანი კარგად გამოდიხართ. მაგრამ მე, ანაფორიან კაცს, რამწამს დამინახავენ, გაოცდებიან... მაშინვე იმას იფიქრებენ: ანაფორა აცვია, ჩვენ ამისთანა არავინა გვეყოლიაო. გარდა ამისა, ექვით შემომხედვენ: სოფლიდან ჩამოსულ მთავარს რა ეცოდინებოდა და ჩინჩში ჩამიდგებიან... არა, ლათინურის ძალიან მეშინიან...

— თქვენ საით მიბრძანდებით, მამაო, — ჰკითხა ევმენილოვს ერთმა სტუდენტმა, როდესაც მთავარმა მარცხნივ მხარეს გაუხვია, ხოლო სტუდენტებმა კი მარჯვნივ.

— სახლისკენ... — უპასუხა ევმენილოვმა.

— სახლში რა გინდათ, წამობრძასდით ჩვენთან, აქ ერთი „ტრახტირია“, ერთად ვისადილოთ.

მამა ევმენილოვმა ღიმილით თავი გაიქნია.

— არა, ეგ არ შემშვენის. მე შეიძლება ამას შემდეგ სტუდენტიც ვიყვე, მაგრამ ჩემი ხარისხი მაინც სხვა არის. მშვიდობით ბატონებო... ლათინურში ეგზამენი როდის გვექნება? — სტუდენტებმა აუხსნეს, რომ დანარჩენი ეგზამენები ამ სამ დღეს ში იქნებაო.

— მაღლობა ღმერთსა! მაშ ბევრს ხანს არ დამიგვიანდება. თქვენც „ტრახტირში“ მიბრძანდებით? — მკითხა მან.

— გნებავთ, თქვენკენ გამოვივლი... წელან ვისაუხმე; მე ჯერ არც კი მშიან.

— მაშ წავიდეთ; აქაური ამბები მიაშხეთ... მეც აქვე, ერთ ქუჩაზე ვცხოვრობ.

მე დავეთანხმე; შემდეგ ამხანაგებს გამოვეთხოვე და ერთად წავედით.

— იცი, რა უნდა გითხრათ, — მეუბნებოდა გზაში მამა ევმენილოვი, — თუმცა ჩემთვის ყველა ამხანაგები ერთნი არიან,



მაგრამ თქვენზე თითქო უფრო გული მომენდობა; ამიტომ უნდა გამოგიტყდეთ და გითხრათ, რომ ჩემი საქმე ძალიან ცუდად არის, შემდეგში არ ვიცი როგორ იქნება.

— რა ამბავია, ასეთი რა გაწუხებთ?— ვკითხე მას.

— ისა რომ არ ვიცი შემდეგში რა იქნება. ვინ იცის ეგზამენებზე კარგად გამოვალ თუ არა. ლათინური ძალიან მაფიქრებს.

— ნუ შიშობთ, მამაო, — ვამშვიდებდი მე. — თქვენ მათემატიკის ფაკულტეტზე აპირობთ უნივერსიტეტში შესვლას და რაკი ამ საგანში ისახლეთ თავი, ამიტომ სხვა საგნებში ისე სასტიკად აღარ მოგეჭყვევიან. თქვენ თითონ კარგად იცით, რომ მათემატიკისთვის ბერძნული და ლათინური საჭირო არ არის.

— მართლა რომ ვგრე იყვეს, კარგი იქნება, თორემ ჩემი საქმე ვერ არის კარგად. მე, იცით, მრევლში ისევ მთავრად ვითვლები. ადგილისთვის პირდაპირ თავის განებება არ შეიძლება. ერთი ცენახოთ ეხლა ეგზამენში ჩამჭრან, — მაშინ ხომ უადგილოდ უნდა დავრჩე. ამიტომ ეხლა თუმცა აქა ვარ, მაგრამ ჩემი მღვდელი კი ძალიან სასტიკი კაცია, ძველებური აზრებისა. მე რომ იმას პირველად ჩემი სურვილი გამოვუცხადე, უნივერსიტეტში შესვლა მწადია-მეთქი, ხელები გაიქნია და კინაღამ განმაკანონა. მაგისტანა აზრებისათვისაო, — მითხრა მან, — მე შენ საღამოს ლოცვაზე საქვეყნოდ ასჯერ მუხლს მოგაყრევიან. რამდენი ვეჩიჩინე ამის შესახებ, რამდენი არ, ეუთხარი რომ ამ ჩემ სურვილში არავითარი ცოდვა არ არის-მეთქი, — მაინც ვერ დავაჯერე. ამის შემდეგ ჩამიღვა ჟინში. წინაღ კარგად მიცქეროდა, კარგი განწყობილებაცა გვქონდა ერთმანეთში. მაგრამ მერე, რაკი-ლა გაიგო, რომ ხელ-ახლად სწავლა მოვინდომე და მერე ისიც მათემატიკის და ისიც საერო სასწავლებელში, აღარ მისვენებდა. ზოგჯერ ვდგევარ ისე ჩემთვის ხოროზე და ვგალობ, ისე, როგორც კვლავ მიგალობნია: რვა წლის განმავლობაში, რასაკვირველია, წირვა-ლოცვის წესს შევისწავლიდი, ის კი სდგას საკურთხეველში და ბუზღუნობს: »ეგ ვგრე



არ არის, ცუდადა გალობ, "შენ სულ შენი მათემატიკა გაგონ-  
 დებოა"... ჩამაცივდებოდა, აღარ მისვენებდა, ღვრე არ არის,  
 ეგრე არ არისო.... "ჩამოეცალეთ ვითომ ესეც მეცნიერი უნ-  
 და გახდეს, შეშვენოდეს მაინცა, ვის გაუგონია, ანაფორიანი  
 კაცი და მეცნიერიო". მე კი, ღმერთმანი, ვერ გამიგია, განა  
 ანაფორა კაცს სწავლას დაუშლის? ეხლა რომ ღზამენის და-  
 საქერად მოვდიოდი, რამდენიმე დღით დავეთხოვე: იმან ისევ  
 თავისებურად დამიწყო: "წადი, წადი, მაგრამ თუ რამე საქმე  
 გამოჩნდა, ჯარმას გადაგახდევინებო". საკვირველია, ღმერთმა-  
 ნი, რალაც ბოროტებით გაიმსჭვალა ჩემს წინააღმდეგ. მე კი  
 იმისთვის არა დაძინებებია-რა, ყოველთვის თანხმობით ვცხოვ-  
 რობდით. აი რა არის ძველი აზრების კაცი, ვერაფერს ვერ  
 შეასმენ! რას ვიზამ, უნდა ავჩქარდე. სტუდენტადაც რომ მი-  
 მილონ, ჯერ ისევ სამრევლოში უნდა წავიდე, ყველაფერი,  
 როგორც წესი და რიგია, ჩავაბარო მოძღვარს და მერე გა-  
 მოვიდე სამსახურიდან. ქალაქის მოსვლას კი უნდა მოვეუცადო,  
 თორემ წინდაწინ რომ წამოვიდე, იქაურობას აიკლებს.

— ეხლა თქვენ მარტო ბრძანდებით აქა?—ვკითხე მე.

— არა, მარტო არა ვარ. ჩემი მეუღლე ძალიან სწუხდა.  
 მე აქ ვერ გავძლებ, ვიდარდებო, არც ძილი მომივა, არც საქ-  
 მელს ექნება ჩემთვის გემო; სულ იმის ფიქრში ვიქნები, ვაი  
 თუ რამე შეგემთხვესო. რას ვიზამდი, წამოვიყვანე ცოლიც და  
 შევიღებო. მადლობა ღმერთსა კიდევ, ერთი ნაცნობი ბერი  
 გყავს, და იმასთან შევიხიზნეთ. აგერ ეს ქუჩაა, მგონი, ჩვენი  
 ქუჩა.

მივედით, სადაც ისინი იდგნენ.

— თქვენ არ შემობრძანდებით? ჩემ მეუღლეს გაგაცნობთ,  
 ბერსაც, ძალიან კარგი კაცია.

მე თანხმობა განვუცხადე ევმენილოვს. რადგან მენტე-  
 რესებოდა როგორც იმის ოჯახობის გაცნობა ისე ბერისაც.  
 ბერები იშვიათად მენახა; ბერების სამყოფო და მონასტრები  
 კი სრულებით არა მქონდა ნახული.



შევედით ეზოში. პატარა ოთახები ერთი-ერთმანეთს ეხებიან და ნენ გამწკრივებულნი. აქა-იქ კიბეებზე ერის კაცები ჩამომჯდარიყვნენ. სასულიერო პირის დანახვაზე ყველანი ფეხზე წამოდგნენ და გზა მოგვეცეს.

ბალკონი გავიარეთ და ერთ ოთახში შევედით. ამ ოთახს სამი ფანჯარა ჰქონდა. შიგ იდგა ორი ტახტი, მაგიდა და რამდენიმე სკამი. კუთხეში ხატები ეკიდა; ხოლო ზედ კედლებზე ჩამოკიდული იყო წმინდანების სურათები და აგრეთვე ათონის მთის სურათი. ტახტზე იჯდა ახალგაზდა დედაკაცი და ხელებით პაწკია, ორი წლის გოგოს აქანავებდა. ბაღს ეძინა. ორი იმაზე ცოტა მოზდილი ბავშვი ფანჯარასთან იდგნენ და ეზოში იყურებოდნენ.

— გმადლობთ შენ შემოქმედო!—წარმოსთქვა მხიარულად ევმენილოვმა, როცა ცოლს დაუახლოვდა.—მათემატიკაში ეგზემენი კარგად დავიჭირე. თან, აგერ, სტუდენტიც წამოვიყვანე. მაგრამ თქვენი გვარი რომ არ ვიცი,—მითხრა მე.

მე ჩემი გვარი ვუთხარი და მამა ევმენილოვის ცოლს ხელი ჩამოვართვი, ეს იყო ახალგაზდა, მაგრამ დაღვრემილი ქალი. პირისახე ოდნავ გადალესილი ჰქონდა; ეტყობოდა ბევრი მწუხარება გამოუვლია ცხოვრებაში. ქმრის სიტყვებზე იმან ხმაც არ ამოიღო. მე შევატყე რომ, ის გულ-გრილად ისმენდა ქმრის სიტყვებს, იმისი საქმე თითქო არ მოსწონდა, თითქო ექვიანობდა და უიმედობდა.

— განა თქვენ მოხარული არა ბრძანდებით, რომ თქვენმა ქმარმა ეგზემენი დაიჭირა?—ვკითხე მას, როდესაც მამა ევმენილოვი ბერის მოსაყვანად გავიდა მეორე ოთახში და ჩვენ მარტო დავრჩით.

— არა, რატომ... დილაც კარგია, მაგრამ ვინ იცის, გამოვა რამე?

— ვითომ რა მიზეზებია, რატომ არ გამოვა?—ვკითხე მე.

— რა ვიცი. ამისთანა შემთხვევა თავისდღეში არა ყოფილა და რაღა ეხლა იქნება? ეხლა, აბა, მრევლი მაინცა გყავს; ცოტა შემოსავალი გვაქვს, მაგრამ ღარიბულად ხომ ეცხოვე-

რობთ. სწავლა რომ დაიწყოს, მრევლი უნდა დავკარგოთ... და შემდეგ კიდევ ვინ იცის რა იქნება... ერთიც ვნახოთ უნივერსიტეტში ვერაფერს გახდა, მაშინ უნდა სულ ახლად ეხეტილოს „კონსისტორიებში“, არქიელს ფებ ქვეშ უნდა ჩაუვარდეს და ბლალოჩინებს ეხვეწოს, რომ ხელ-ახლად ადგილი მისცენ.

ეს კიდევ არაფერი. მე უნდა ჩემ დედ-მამასთან ვაცხოვრო. ის კი აქ მარტო უნდა იყვეს გამოყრუებული. ჩვენ შორს ვიქნებით და ან კი რითი უნდა იცხოვროს?

— რატომ ვერ იცხოვრებს? განა არ შეიძლება აი აქ ბერებთან იყვეს...

— რისთვის, მაგათ რად უნდა დააწვეს კისერზე; ნათესავია იმათი თუ რა არის?.. არა, ღმერთმანი, მე არ გამეგება, რას მოასწავებს ეს საქმე.

— მაშ თქვენ, როგორც გეტყობათ, თანაგრძნობას არ უწევთ თქვენს ქმარს? მხარს არ აძლევთ?

— მე რა... მე იმას არაფერსაც არ ვეუბნები. ერთხელ როგორღაც მომიხდა და ვუთხარი, უნდა დაფაქრდე, საქმე კარგად უნდა ასწონ-დასწონო-მეთქი, —ამაზე იმან ისეთი სიტუვები მითხრა, რომ, სწორედ გითხრა, შემეშინდა. ეგ არის შენი თანაგრძნობაო. მე სიკეთეს ვეძებ და შენ კი არ გინდა ეს შეისმინო, შენ ჩემი მეუღლე ხარ, ჩემი ცხოვრების მეგობარი და იმის მაგიერ რომ მხარი დამიჭირო, მაგ გვარად მელაპარაკებიო... ბოლოს იქამდის მივიდა საქმე, რომ ცუდად გახდა და ტირილი დაიწყო. იმის შემდეგ აღარაფერს გვეუბნები. რაც უნდა, ისა ქნას, ბოლოს თითონვე ინანებს...

ამ დროს ოთახში შემოვიდა მამა ევმენილოვი და თან შემოჰყვა ბერიც. ეს ბერი იყო შუა ხნის კაცი; მაღალი და მოსული ტანისა; ჰქონდა ლამაზი სახე, შავი წვერ-უღვაში, დიდრონი მშვიდი თვალები და ხუჭუჭი თმა. იმის დანახვამ ჩემზე მშვენიერი შთაბეჭდილება იქონია, მეტადრე მომეწონენ იმის მშვიდი და წყნარი თვალები, რომელნიც მეტად ალერსიანად გამოიყურებოდნენ.

ბერი დამიხლოვდა და ღიმილით ხელი გამომავლოდა.

— ძალიან სასიამოვნო გახლავთ თქვენი გაცნობა. იმედია, რაკი კარგად გავიცნობთ ერთმანეთს, ხშირად მობრძანდებით ხოლმე. ახალგაზდა ხალხი მე ძალიან მიყვარს. მეტადრე მოსწავლე ყმაწვილ-კაცობა. აგერ ჩვენი მამა მთავარიც ხელ-ახლად იწყებს სწავლას. კარგი საქმეა, წინააღმდეგობა აქ არაფერია... სწავლა ყველასთვის საქიროა. ჩვენც გვეყავს რამდენიმე სწავლული ათონში. ერთი ექიმია, მაგალითად, ძალიან ნასწავლი კაცია; ლექსებსაცა სწერავს... მხოლოდ, რასაკვირველია, სასულიერო შინაარსისას... დაბეჭდილიც არის ის ლექსები, როდისმე გაჩვენებთ. მამაო მთავარო, აბა, ყმაწვილ კაცს გავუმახინძლდეთ. უკაცრავად კი ნუ ვიქნებით, — მომმართა მოკრძალებით: — მკირედი საქმელი გვექნება, როგორც ბერებს შეშვენის, მაგრამ არა უშავს-რა... აი ეხლავ...

კარებთან მივიდა, პატარაზე გამოალო და დაიძახა:

— ექვთიმე, ექვთიმე!

— აქ გახლავართ, მამაო მიხეილ! — მოისმა ყმაწვილი კაცის ხმა.

პატარა ხანს უკან ოთახში შემოვიდა ექვთიმე. ეს იყო ახალგაზდა მორჩილი. ტანთ გრძელი ანაფორა ეცვა, რომლის სახელოებიც გადაეკეცნა. ალბად ამ ჟამად საქმიანობაში იყო გართული. მამა მიხეილმა ექვთიმეს მიმართა.

— ექვთიმე, საუზმე მოგვიტანე. ღვინო არ დაგავიწყდეს ათონისა... აი, ბატონო სტუდენტო, ათონის ღვინო ხომ არსად დაგიღვიათ?

ექვთიმემ ნელ-ნელა დაიწყო ქურჭლისა და საქმელების შემოზიდვა. შემოიტანა თევზი, ხიზილალა, ზეთის ხილი. შემდეგ მოტანილ იქმნა ერთი ბოთლი ათონის ღვინო და ათონური თხილი.

— ეხლა კი ვისაუზმოთ, — სთქვა მამა მიხეილმა. — იქნებ არაყს მიირთმევთ? — მკითხა მე. არაყი აკრძალული არა გვაქვს, მონასტრებში ბევრნი სვამენ... მამა მთავარიც ამაზე მგონი უარს არ იტყვის...

ექვთიმე, ზოგვიტანე.

— ჩვენ თითონ კი არა ვსვამთ, — განმარტა მამა მიხეილ-მა, — ისე სტუმრებისთვის ვინახავთ.

ექვთიმემ ჩქარა არაყი შემოიტანა და ისევ გავიდა. მამა ევმენილოვის მეუღლემ პატარა ქალი ტახტზე მიაწვინა. შემდეგ ყველანი მაგიდას შემოუსხდნენ. მხოლოდ ბავშვები ცალკე ისხდნენ და ჭკვიანად შეექცეოდნენ საქმელს.

უნდა მოგახსენოთ, რომ იმ დღეს მეტად გემრიელად ვი-საუზმე. ყველა იქ მოტანილი საქმელები ძალიან მომეწონა, გემრიელად შეჩვენა. ამის მიზეზი, ჩემის აზრით, მამა მიხეილი იყო. იმისი გამომეტყველი სახე და სიამოვნებით სავსე ხმა თითქო ყველაფერს გემოს აძლევდა და სიმხიარულებსა ჰფენდა.

— ღმაწვილო, — მეუბნებოდა იგი აღერსიანად, — ახლა ზეთის ხილი მიირთვით; თქვენ სულ თევზს მიირთმევთ. თევზი აქაურია; ზეთის ხილი კი პირდაპირ ათონიდან არის მოტანილი. ზეთის ხილის ხეები ჩვენში ძალიან ბევრია. იქ თითქმის ყველა ბერის სენაკის წინ მშვენიერი ზეთის ხილის ხე არის გაშლილი, თავისი ფართო ტოტებით.

თხილიც მიირთვით, ბატონო; ეს თხილი საკუთარი ჩვენი ხელით არის მოკრეფილი. ხოლო რაც შეეხება ღვინოს, — უნდა მოგახსენოთ, რომ მაგისტანა ღვინოს აქ ვერსად შეხვდებით; ტკბილია, თანაც სურნელოვანი... ეგ ღვინო ნაკურთხია, ისე როგორც თვით ჩვენი ქვეყანაა ნაკურთხი.

### III

შემდეგი სამი დღის განმავლობაში მამა ევმენილოვი რამდენჯერმე შემხვდა. როდესაც უნივერსიტეტში მოვიდოდა, უწინ მე მომძებნიდა ხოლმე.

ეგზამენებისა ძალიან ეშინოდა. მათემატიკის ეგზამენზედ რომ თამამადა ჰგრძნობდა თავსა, ეხლა შიშობდა და გაუბედვად შედიოდა აუდიტორიაში, სადაც ლათინურსა და ბერძნულ ენებში ეგზამენები უნდა დაეჭირათ.

— რად მინდა ეს ოხერი ლათინური? — ამბობდა ხოლმე მამა ევგენილოვი. — ვინც მათემატიკასა სწავლობს, იმას რაში ეჭირვება? ჩემთვის საჭირო არ არის!. რომ ჩაეიჭრა კი — სირცხვილია. ჩემ მღვდელს ეგ-ლა უნდა. აქედან რომ დამარცხებული წავიდე, დატრავით ამიკლებს.

მე ვამხნევებდი ევგენილოვს. შევიყვანდი ხოლმე აუდიტორიაში და ვაჩვენებდი თუ რა კეთილად ექცეოდნენ მოეგზამენთ პროფესორები და რა ადვილადა ჰკითხავდნენ.

მახსოვს, როდესაც ევგენილოვი გავიდა პროფესორთან ეგზემენის დასაჭერად, პროფესორმა განსაკუთრებითი ყურადღება მიაქცია. ალბათ იმისი ამბავი ყველამ გაიგო.

— მაშაო, რამდენი წელიწადი იქნება, რაც სემენარიიდან გამოხვედით? — ჰკითხა პროფესორმა ევგენილოვს.

— რვა წელიწადი იქნება! — მიუგო ევგენილოვმა.

— მაშ დაგაეიწყდებოდათ ლათინური?

— რასაკვირელია, მაშინდელი ცოდნა სხვა იყო...

— მაშ, აბა, რას გადათარგმნით? ამოირჩიეთ თქვენ თვითონ, რაცა გნებავდეთ...

შემდეგში ევგენილოვი მეუბნებოდა:

— რა მომივიდა, როგორ მოეტყუედი. რომ მცოდნოდა, თუ ეგრე იქნებოდა საქმე, ერთ ხუთიოდ სტრიქონს მაინც დავისწავლიდი კარგად. მაგრამ სულ ვერ მოვედი ფიქრზედ. მე სულ ერთნაირად ვიცოდი, ე. ი. ცუდად... ამიტომ ავდექი და, რაც მომხვდა, ის დავიწყე. დავიწყე და მოვეყენელ-ნელა... ვნახოთ პროფესორს ელიმება. ვიფიქრე, ალბათ კეთილი თვალთ მიცქერის-მეთქი. ამით ძალიან წაეხალისდი, თითქოს რაღაც მეტი ცოდნა შევიძინე და, წარმოიდგინეთ, ზოგი ისეთი სიტყვები მოვიგონე, რომელნიც წინად არ მახსოვდა... დიად, აი რასა ნიშნავს, როდესაც ადამიანს წაახალისებენ და ალერსიანად ექცევიან.

მამა ევგენილოვმა რომ ისე სამაგალითოდ დაიჭირა მათემატიკაში ეგზემენი, ეს ყველა პროფესორებმა გაიგეს და ამიტომ ყველა მათგანი ადვილად ეპყრობოდა. სხვა ეგზემენებ-

„LPG 025 1935hc 281v კ.ბ.“

ში. მართალია, ადვილი არ იყო, ევმენილოვისთვის ეგზამენების გადვილება იმაზე მეტად, როგორც, მაგალითად, სხვა სემინარიელებს უადვილებდნენ, მაგრამ ერთი მოსახზრების გამო არ შეიძლებოდა უფრო და უფრო ადვილად არ მოჰპოვებოდნენ ევმენილოვს ეგზამენში. ევმენილოვი რვა წელიწადი ყოფილიყო სოფლად. ამ რვა წელიწადში დაცოლშვილებულა, რამდენი რამ გამოუცდია, და ნახეთ, რომ ისეთი უნარი შერჩენოდა სწავლისადმი, რომ სამსახურისთვისაც თავი დაენებებინა, მრევლისთვისაც და უნივერსიტეტში წამოსულიყო. ეს ამბავი ყველასთვის საგულისხურო იყო. მამა ევმენილოვმა თვისი ანაფორით, თვისი მოქმედებით ყველას სიყვარული და პატივისცემა დაიმსახურა.

მესამე დღეს ევმენილოვი გახარებული მოდიოდა ბერების სამყოფ სახლებისაკენ. იმას უკვე გამოუცხადეს, რომ სტუდენტად მიგიღეთო.

—ჰე, სტუდენტიც ხომ გაეხდი,—მხიარულად ეუბნეოდა ცოლს:—ეხლა ჩვენი მღვდელი ველარ დამცინებს. ასე იყო თუ ისე, მე ჩემი გავიყვანე.

— მე რა უნდა ვუყო ეხლა?—უთხრა საყვედურით ცოლმა:—სამშობლოში უნდა წავიდე?,

— არა, ჯერ მოიცა, მარო, არქიელსა ენახავ. ასე მიბრძანა, როცა ეგზამენებს მორჩე უნივერსიტეტში, შემომიარეო. ენახოთ ერთი რას მეტყვის.

მამა ევმენილოვი იმ დღესვე წავიდა არქიელთან და მეც თან წავყე. ის რომ იმასთან შევიდა, მე კარზე ვუცდიდი და, როცა გამოვიდა, მაშინვე იმისკენ გავექანე. ევმენილოვს სახე უღიმოდა; თან ჩემსკენ მოდიოდა და შორიდანვე მეუბნეობოდა:

— რანაირი სიამოვნებით მიმილო არქიელმა... აი, ეტყობა, რომ გონიერი და შესმენილი კაცია... გამოვიდა თუ არა, სიცილი დამიწყო: „რაო, მამაო ევმენილოვ! უნივერსიტეტიდან ხომ არ გამოგცოცხეს?“ მითხრა მან,—არა, თქვენო მეუფებავ,—ვუპასუხე,— კი არ გამოგცოცხეს სტუდენტად მიმიღეს.—„ჰხედავ! სჩანს დიდი ცოდნა გამოგიჩენია“.—არა, თქვე-

ნო მეუფებავ, დიდი ცოდნა კი არა, მაგრამ ყველანი კი გავაკვირვე ეგ ზამენზედ. იმიტომ რომ, როგორც მოგვხსენებათ, ჩვენმა სემინარიელებმა მათემატიკა ნაკლებად იცინან.— „ვიცი! მართლია, — სთქვა არქიელმა. — აი ეხლა შენ რომ პროფესორად იქნები, შენ კარგად ასწავლე სემინარიელებს, ჰა?“ — ვეცდები-მეთქი, თქვენო მეუფებავ, — ვუპასუხე მე. — „მაშ ეხლა შენ მთავარი აღარა ხარ, სტუდენტი ხარ, არა?“ — არა, თქვენო მეუფებავ, მთავარიცა ვარ და სტუდენტიც. — გაეცინა. დამიწყო გამოკითხვა ცოლ-შვილზე, ჩვენ მღვდელზედ. — „თქვენი მღვდელი ძველებური კაცია, როდის გაათავა იმან სემინარია... მაშინ ისევ ძველებური ბურსა იყო... დიაღაც ახალი აზრებისა საიდგან იქნება? — მაგრამ ეს არაფერი, ახლა შენ რითი უნდა იცხოვრო?“ — როგორც იქნება, ვიცხოვრებ, ცოლს სიმამრთან გავვზავნი. — „მერე ეგ ადვილი მოსახერხებელია?“ — რასაკვირველია, ადვილი არ არის, იმას უიმისოდაც დიდი ოჯახი აწევს თავზე, მაგრამ რა ვუყოთ, როგორც იყვეს, საქმე გაიჭირვოს; როცა კურს გავათავებ, გადავუხდრი. — „არა, ეგ ეგრე არ იქნება, ეგრე რომ იცხოვრო, გული გულის ალაგას არ გექნება. შენ გარემოებაზედ დაიწყებ ფიქრს და სწავლას მოსცდები. მე ჩემ თავზე გამომიცილია: როდესაც არქიმანდრიტად ვიყავ მონასტერში, არაფერი საზრუნავი და საფიქრებალი არა მქონდა-რა, ბევრს წიგნებს ვკითხულობდი. მარტო ღვთის მეტყველობას კი არა, სხვა საგნებსაც დაეუწყე სწავლა... იცით, გეოგრაფია შევისწავლე, ეხლაც ძალიან მიყვარს გეოგრაფია... შემდეგ კი, როცა ეპარქია ჩამბარეს და არქიელი გავხდი, საქმე ბევრი დამაწყდა და წიგნში აღარც კი ჩამიხედნია. შენი საქმე უნდა სხვანაირად მოხერხდეს. ერთი ეს მითხარი, სამრევლოდან შემოსავალი რა გქონდა?“ — მე, რაც სათქმელი იყო, ვუთხარი.

— ნახევარი იმ შემოსავლისა გეყოფა ცოლშვილით რომ იცხოვრო? შენ ხომ ეხლა სტუდენტი ხარ, მაშასადამე სტუდენტურად უნდა იცხოვრო, ე. ი. ღარიბად.

— რატომ, ვიმყოფინებდი, თქვენო მეუფებავ, — ვუპასუხე.



— მაშ ჩვენ ასე მოვახერხოთ, და შენმა მღვდელმა იქ რამდენიც უნდა იჯავროს! — აქ ერთი მთავარი მყაეს — ბერი, კარგი კაციც არას — წყნარი, ამასთან ხანში შესულია. — მოდი ის გაგზავნოთ შენს ადგილას და, რაც აიღოს, ნახევარი შენ, ნახევარი იმას. რას იტყვი ჰა? "

— ძალიან კარგი იქნება, თქვენო მეუფებავ, ძალიან კარგი — და ძლიერ მდაბლად თავი დავუკარი.

— ჰო და მაშ ეგრე იყვეს.

მაშინვე ქალღი დასწერა და გაგზავნა, საცა წესი და რიგი იყო.!

ამის შემდეგ მამა ევმენილოვის სახლი მთლად გამოიცვალა. იმისმა ცოლმა რომ გაიგო ქმრის ამბავი, გულიდან ჯავრი გადიყარა და მოღრუბლული სახე გაუმხიარულდა.

— ეგრე ძალიან კარგია, — ამობდა ის, — როგორც იქნება ვიცხოვრებთ იმ შემოსავლით.

ევმენილოვის ცოლს შემდეგ ხმაც აღარ ამოუღია ქრმის წინაღმდეგ. იმის უკმაყოფილებების მიზეზი იმ თავითვე ის იყო, ულუკმა-პუროდ დავრჩებიო. ის ხშირად ამობდა ხოლმე:

— რას ბრძანებთ, ოთხი წელიწადი მამაჩემთან ცხოვრება აღვილია! იმოდენა ოჯახი თავს აწევს; მერე საუბედუროდ, სასმელს ეტანება... რომ დაითრობოდა — უყურე, დამიწყებდა საყვედურსა და კიცხვასა... მე კი ამას ვერ ავიტანდი... ხუმრობა ხომ არ არის რვა წელიწადი ჩემი საკუთარი ოჯახი მქონდა. ეხლა ღარიბად ვიქნებით, მაგრამ რა ვუყოთ, საკუთარი სახლი მაინც გვექნება, როგორც იქნება, ვიცხოვრებთ.

შემოვიდა მამა მიხეილი. ევმენილოვმა იმასაც უამბო თავისი ამბავი.

— მაშ ჩვენთან დარჩით, — ეუბნებოდა მამა მიხეილი. — აი ამ ოთახში ბრძანდებოდეთ, მეტი რად გინდათ. ღმერთმანი სასიამოვნო იქნება თქვენი აქ ყოფნა. თუმცა ჩვენ ბერები ვართ და თქვენ კი არა, მაგრამ რა ვუყოთ, აი რამდენია ასეთი ხალხი ჩვენს ეზოში. ღმერთმანი კარგი იქნება:



— არა, მამაო მიხეილ, დიდადა გმადლობთ, თქვენი შევიწროება გვეძნელება. გარდა ამისა სტუმრად ყოფნა დიდ ხანს ვის გაუგონია? რამდენიმე დღით შეიძლება, სასიამოვნოც არის, მაგრამ დიდ ხანს რომ ვიყევთ, შეიძლება უსიამოვნება რამ დაგვებადოს... მერე თვითონვე სინანულში შეხვალთ.

— ეჰ, რა უსიამოვნობა შეიძლება ბერებთან, მერე ისიც ათონელებთან... ვწუხებარ, ღმერთმანი, ძალიანა ვწუხებარ... ბავშვებმა რომ ჩვენ ეზოში სირბილი დაიწყეს, აქაურობა თითქოს გამხიარულდა... აი ეს ყმაწვილიც ივლიდა ჩვენთან, ერთმანეთს უფრო კარგად გავიცნობდით. შემდეგში კიდევ, ვინ იცის, იქნება ეგეც ბერად შემდგარიყო.

მე გამეცინა. ბერად წასვლას არას დროს არა ვფიქრობდი და მამა მიხეილმაც ეს სიტყვები, რასაკვირველია, ხუმრობით წარმოსთქვა.

მამა მიხეილმა მე ძალიან დამაინტერესა. ამიტომ ვიდრე ევმენილოვი იმასთან იმყოფებოდა, ხშირად მივდიოდი ხოლმე მათთან. მამა მიხეილს ცოტად თუ ბევრად დავუახლოვდი.

ის იყო ორმოც წლისაზე მეტი. მამა ამისი ყოფილიყო გამოჩენილი ქალაქის ვაჭარი. მე მინდოდა გამეგო, თუ რამ აიძულა მამა მიხეილი ბერად წასულიყო, ეს ყველაზე მეტად მეინტერესებოდა. ის ბერული მიმართულების კაცი არ იყო. სხვა ბერებივით ღმერთზე იშვიათად ლაპარაკობდა და მღვდელთმსახურების შესრულებაც არ უყვარდა ძალიან. აქ კი, ამ ადგილის, მხოლოდ იმიტომ იმყოფებოდა, რომ მიეღო თუ რასმე შესწირავდნენ ათონის შთას. ერთხელ, როდესაც მარტოკა დაერჩით მე, მამა მიხეილი და ევმენილოვის ცოლი, სიტყვამ მოიტანა და ვკითხე მამა მიხეილს:

— რა მიზეზით შესდგეით ბერად, მამაო მიხეილ; მაინც რამ გაიძულათ? ალბად ბერობა ძალიან მოგწონდათ.

მე ვითქვარე, მამა მიხეილი ამის პასუხს არ მომცემს, გაუძნელებამეთქი. ეს იმისი საიდუმლოა და არავის გაუმხელს-მეთქი. მაგრამ იმან თავისუფლად მიპასუხა:

— არა, ოქვენ როგორცა ფიქრობთ, ვგრე არ გახლავთ საქმე; ბერობა ვგრე რიგიდ არ მოქწონდა, მე უფრო საერო კაცი ვიყავ, ვიდრე საბერო; გართული ცხოვრება მიყვარდა, მაგრამ ჩემი ბერად შედგომის მიზეზად სიყვარული გამიხდა.

— სიყვარული?—გაკვირვებით ჩავეკითხე.

— დიალ, ერთი ქალი შემიყვარდა. ის იყო თავადიშვილი, თანაც განათლებული. ის ჩემი შესაფერი არ იყო... მე განათლება არ მიმიღია; მხოლოდ მასწავლეს ის, რაც ვაქრობისთვის არის საჭირო: დაეთრებში ჩაწერა... ანგარიში...

— მერე უარი გითხრათ იმ ქალმა?

— არა, უარი არ უთქვამს, მე ძალიან გაუბედავი ვიყავ. ეთქვათ, ისე გამბედაობა არ მაკლია, მაგრამ იმ ქალს რომ დავინახავდი, მიში ამიტანდა ხოლმე. თქვენ იქნება არც კი დაიჯეროთ და მე ერთხელაც არ მითქვამს იმ ქალისთვის, რომ ისე გაგიჟებით მიყვარდა. მე ვგრძნობდი, რომ ის ჩემი შესაფერი არ იყო; მაგრამ მას შემდეგ კი, რაც ის შემიყვარდა, აღარაფერი სიამოვნება არ მიგრძენია ამ ქვეყნად იმ ხანებში. მე ისეთი მაღალი გრძნობით ვიყავ გატაცებული, რომ სხვა ქალის შერთვა შეურაცხყოფად მიმაჩნდა, ჩემთვისაც და იმისთვისაც. ამავე დროს მშობლებმა მოინდომეს ჩემი ცოლის შერთვა. ამომირჩიეს ერთი ქალი. კარგი ქალიც იყო, მაგრამ რა გამოვიდა, მე ის არ მიყვარდა. ჩემ გუნებაში ასე ფიქრობდი: ეგ ქალი რომ შევირთო, ბედნიერი ცხოვრება არ გვექნება, მაგასაც გავაუბედურებ-მეთქი. ამიტომ ავდექი და ყოველისფერი ვუაშხე იმ ქალს. ის მადლობელი დამჩა... გავიდა, ესე, ორი თუ სამი წელიწადი მას შემდეგ, ფიქრობდი, გავერთობი ღ ყველაფერი გადამავიწყდება-მეთქი. მაგრამ ტყუილად. მე ის ქალი ვერ გადავივიწყე. მაშინ კი ეთქვი: მე აქ აღარ მეცხოვრება-მეთქი. ავდექ და წაველ ბერად. კარგადაც მოვიქეცი ძალიან...

— როგორ კარგად, გადავივიწყეთ ის ქალი?—ვკითხე.

— არა, იმას როგორ გადავივიწყებ. ის ეხლა ჩემ გულში ანგელოზად არის გადაქცეული. დიდხანია აღარა გამიგია-რა

იმზე, არ ვიცი, როგორი ქალი დადგა ცხოვრებაში. მაგრამ ეს სულ ერთია. გონებაში მე ის ისეთაირადა მყავს წარმოდგენილი, როგორსაც ვიცნობდი და თუ სხვებს, როგორც ამბობენ, თითო ანგელოზი ჰყავთ ცაში,—მე მაშინ ორი ანგელოზი უნდა მყავდეს.

მამა ევმენილოვი ბერებთან ცხოვრებაზე უარზე იდგა. იმას უნდოდა ცალკე ეცხოვრა იმ შემოსავლით, რომელსაც ახლად დანიშნულ მთავრისაგან მიიღებდა ყოველ წლივ.

— მე ხომ ეხლა სტუდენტი ვარ, შენ კიდევ სტუდენტის ცოლი, — ეუბნებოდა მზიარულად მამა ევმენილოვი თავის ცოლს, — მაშასადამე, სტუდენტურად უნდა ვიცხოვროთ. სტუდენტები კი, როგორც გამიგონია, ძალიან ღარიბადა სცხოვრობენ. ერთმა სტუდენტმა მიაშბო: იმ ხანში, რაც უნივერსიტეტში ვწავლობდი, სულ ერთ ოთახში ვიდექიო. ეს ოთახი სიგანით ორი არშინი იყო და შიგ კიდევ ერთი კრაოტის და სკამის მეტი არაფერი შედგაო. მადლობა ღმერთსა, ჩვენ ხომ ისე არ ექნებოთ, ცოტაოდენი სახლის სამკაული ხომ გვექნება.

მამა ევმენილოვი, ამ დღეებში, ძალიან მზიარულად იყო. რაკი-ლა ეგზამენები კარგად დაიჭირა და არქიელმაც ალერსიანად მიიღო, — ამიტომ წახალისდა და გამზიარულდა.

ერთხელ, როდესაც მე, მამა მიხეილი და ევმენილოვის ოჯახი ერთად ვიყავით შეკრებილი, მოგვესმა ფეხის ხმა და შემდეგ კარის რაკუნი. შემოვიდა ექვთიმე.

— რა გინდა? — ჰკითხა მამა მიხეილმა.

— ვილაც ბერი გახლავთ, მთავარსა ჰკითხულობს.

— ბერი?

— დიად, არქიელის ბერი ვარო...

— ჰო, ეს ის იქნება, — სთქვა მამა ევმენილოვმა, — შეიძლება აქ შემოვიყვანოთ, მამაო მიხეილ?

— რატომ, რატომ? ექვთიმე, უთხარი.

ოთახში შემოვიდა ბერი. ეს იყო ხანში შესული კაცი; ჰქონდა დაქმუქვნილი სახე და თხელი წვერი. ბერი შემოსვლის უმალ ერთ აღვილს შეჩერდა; შემდეგ დაიწყო აქეთ-იქით

ცქერა და რა შეამჩნია კუთხეში ხატი სამჯერ პირჯვარი დაღიწვრა და იქ მყოფთ თავი დაუკრა.

— არქიელმა გამომგზავნა, — სთქვა მან, — ახალი სამსახური დამინიშნა.

— დიად, დიად, — უთხრა ევმენილოვმა, — მობრძანდით, მამაო დიაკონო. თქვენ ჩემ ადგილას იქნებით გამწესებულნი!

— დიად, მათმა მეუფებამ ეგრე მოისურვეს! — სთქვა წყნარად ბერმა და მაგიდის მახლობლად სკამზე ჩამოჯდა.

მაგიდაზე საკმელები ისევ ელაგა.

— არ ინებებთ? — უთხრა მამა ევმენილოვმა, — ბერული საკმელი გახლავთ, — მამა მიხეილი სხეას არაფერს გვაქმევს.

— ბერმა პირჯვარი გადაიწვრა და მიჰყო ხელი ზეთისხილს.

— ჩვენს მონასტერშიაც ძალიან ეტანებიან ზეთის ხილს, — სთქვა მან, — კარგი საკმელია.

— თქვენ რომელ მონასტრიდანა ბრძანდებით? — შეეკითხა მამა მიხეილი.

— მე სულის წმინდის მონასტრიდან გახლავართ. აქედან ოცი ვერსი იქნება. წინად მე იქ ვიყავი, მაგრამ არქიელმა მერე აქ, თავისთან გადმომიყვანა. ოთხი წელიწადია არქიელის ეკკლესიაში ვმსახურობ. — რა უნდა მოგახსენოთ, მამაო, — მიჰმართა ევმენილოვს, — თქვენი სამრევლო როგორი გახლავთ! ამის შესახებ მათ მეუფებას არა უბრძანებიათ-რა.

— სამრევლოს არა უშავს-რა, — უპასუხა მამა ევმენილოვმა: — საქმე ბევრი გექნებათ. მხოლოდ მღვდელი ძალიან სასტიკი კაცია. ამას ეხლავ გეუბნებით.

— რა ეუყოთ, რომ სასტიკია, — მიუგო ბერმა, — ბერი უნდა ყველას მორჩილობდეს, რაც სასტიკი კაცი იქნება, ისა სჯობიან, — მორჩილობა უფრო დაფასდება.

— მართალია, მაგრამ თუკი ზედ გადელევი, ეგ რაღა გამოვა! მოუხეშავი რამ კი არის. ხანდახან ისეთ სისულელეს ჩაიდენს, რომ ვერც წარმოიდგენთ!



— არა უშავს-რა, — ამობდა დამშვიდებით ბერი, — მე ბევრ-  
გან ვყოფილვარ, ბევრი რამ გამომიცდია... მაგრამ რა უნდა  
მოგახსენოთ, მამო, შემოსავალი როგორია იმ სამრევლოში?

ევმენილოვმა ცალი თვალით შემომხედა, თითქოს უნდო-  
და ეთქვა: ბერი და შემოსავალსაც კითხულობსო.

— შეხვედრახეა. — მიუგო ევმენილოვმა. — თუ კარგი წყ-  
ლიწაღია, ას თუმანზე მეტს აიღებთ.

— მარტო ჩემ წილად? — იკითხა დაინტერესებულმა ბერმა...

— რას ბრძანებთ, მამო? — სუყველანი ერთად ას თუმანს.  
ეგრეთი შემოსავალი რომ მარტო მთავარსა ჰქონდეს, მაშინ ქა-  
ლაქელი დიაკვნებიც სოფლად წამოვიდოდნენ. მთელი შემოსავა-  
ლი ორად იყოფა, ეგრეა არქიელისაგან ნაბრძანები.

— დიად, დიად... ეგეც კარგია, მადლობა უფალსა. მე მა-  
გას იმიტომ გეკითხებოდით, მამო მთავარო, რომ არქიელთან  
უფასოდა ვმსახურობ, მარტო სახლს მაძლევენ და საქმელს...  
ტანთსაცმელზედ კი ჩემთვის არაინ ფიქრობს, ანაფორა სულ  
ზედ შემომაცვდა, თეთრეულიც. . . იმიტომ გეკითხებოდით.

ამ დროს მე ევმენილოვს შეხვედე და იმის თვალებიდან  
ეს აღმოვიკითხე: „ცბიერობ, მამო, გეტყობათ, ფული გყვარე-  
ბიათ“.

ბერმა საუზმე გაათავა, ზეზე წამოდგა პირჯვარი გადაიწე-  
რა და მამა მიხეილს თავი დაუკრა. შემდეგ მიუბრუნდა ევმე-  
ნილოვს და უთხრა:

— როდის უნდა გავემგზავროთ, მამო მთავარო? — ან რა  
გზით შეიძლება წასვლა?

— წასვლა ადვილი გახლავთ. ხვალ მე თვითონ ვაპირებ წას-  
ვლასა, მღვდელს უნდა ჩავაბარო, რაც რამ მამარია ეკლესიი-  
სა; ერთად წავიდეთ. ცოლ-შვილს აქ დაეტოვებ მამა მიხეილ-  
თან და ჩვენ ერთად გავემგზავროთ.

ბერი რომ ფეხზე წამოდგა, ეტყობოდა, შინ წასვლა უნ-  
დოდა, მაგრამ აღარ წავიდა. აღბად ჩვენი საზოგადოება მოე-  
წონა. ან იქნებ ამის მიზეზი ისიც იყო, რომ ამ დროს ექვთი-  
მემ გაჩაღებული სამოვარი შემოიტანა. ეს სამოვარი საერთო

იყო ბერებთა სამყოფელოში მცხოვრებთათვის; ამ ქალაქის  
დღე ხან ერთ ოთახში შეჰქონდათ აღუღებული და ხან მეორეში. მაგიდიდან თეფშები ააღაგეს და იმათ მაგიერ ჩანს ქიქები ზოიტანეს. მაგიდას შემოვუსხედით.

ჩვენი ახლად გაცნობილი ბერი მშვიდობიანი შეხედულობის კაცი იყო, მაგრამ ეტყობოდა კი, რომ ბევრი ტანჯვა გამოეკრა.

— რა წოდებისა ბრძანდებით?— ვკითხე მას.

— გლეხი გახლავართ, ჩემო ბატონო,— მიპასუხა მან,— სახელმწიფო გლეხი, საბატონო არას დროს არა ვყოფილვარ, მაგრამ უსიამოვნობა კი ბევრი გამომივლია.

— ბერად რად შემდგარხართ?

— ბერული ხასიათისა გახლავართ. ღმერთი მიყვარდა და ღმერთმაც არ დამკარგა. ბერობაში წერა-კითხვა შევისწავლე. ამიტომ მონასტრის წინამძღვარმა მთავარ-ღიაკვნობა მომცა. იქ რომ დავრჩენილიყავ, მღვდელ-მონაზნობასაც დამპირდა, მაგრამ, აბა, აქ წამოვედი და უეჭველია, მთავარ-ღიაკვნობაზე უნდა გავატარო ჩემი დღენი.

ნახევარ საათის შემდეგ ბერი სახლში წავიდა; თანაც პირობა მისცა მამა ევმენილოვს, რომ ხვალ დილით მოვალ და ერთად წავიდეთ სამრევლოშიო.

მეორე დღეს მამა ევმენილოვი და ბერი დილით ადრე გაუდგნენ თავიანთ გზას.

ერთი კვირის შემდეგ მამა ევმენილოვი სოფლიდან დაბრუნდა; რაც საჭირო იყო, უკვე ჩაებარებინა მღვდლისათვის.

— საკვირველია კაცია!— ამოხდა იგი მღვდელზე.— რაც იქ ვიყავ, სულ დაბღვერილი მიცქეროდა. წამოსვლის დროს ხელზე სამთხვეველადაც აღარ მიმიშვა! რაკი უნივერსიტეტში შევდივარ, იმას ჰგონია, უწმინდური გახდაო. აი რა არის ძველგური კაცი რომ იქნება. ვერ შეუსმენია აქამდის, რომ საღმ-



თო მსახურებაც და მეცნიერებაც ღმერთისაგან არის დაარსებული.

ევმენილოვმა დაიჭირა ორი ოთახი თავისი სამზარეულოთი, გადაზიდა ავეჯეულობა, დაიწყო ახალი ცხოვრება. იმისი ცოლი, სოფელთან შედარებით, აქ უფრო კარგად მოეწყო და წინანდებურად აღარ ბუსხუნობდა.

— რას ბრძანებთ, — ამბობდა იგი, — სად აქ და სად იქ. იქ ათასი საქმე მაწვა: ეს ძროხა მოწველე, ეს ქათმებს აქამე, ეს ღორს აქამე და სხვა-და-სხვა. აქ კი ყველაფერ ამას მოშორებული ვარ, წახვალ ბაზარში და რასაც გინდა იშოვი, ყველაფერი გასასყიდი. ეს კიდევ არაფერი, — ამბობდა გატაცებით, — აქ ფილაქანი გვაქვს. ვერ წარმოიდგენთ, რა რიგ ვიტანჯებოდით სოფელში. ერთი უბედური ფეჩი გვქონდა, სულ მუდამ ხრჩოლავდა: საკმელს ვერა ვხარშავდით ხოლმე. ფილაქანზე კი დადგამ ქვაბს და თითონ იხარშება საკმელი. აბა, რამდენად ადვილია ქალაქში ცხოვრება!..

მამა ევმენილოვი თავის ცოლშიღლით უნივერსიტეტის მახლობლად დასახლდა. ამიტომ უნივერსიტეტში ადვილად დაიარებოდა და ერთი ლექციაც არ გამოუშვია. მათემატიკა ეხლა წინანდელზე მეტად შეუყვარდა; გზაზე რომ დადიოდა, სულ რაღაც ტეორემებზე ფიქრობდა. უმაღლესი მათემატიკაც ადვილად შეითვისა და ეს ძალიან უხაროდა.

— უნდა მოგახსენოთ, რომ მათემატიკა ძალიან სახალისო რამ არის, — ამბობდა ხოლმე ევმენილოვი, — არა მგონია, ქვეყანაზე ისეთი ძნელი, მალალი და ღრმად დამაფიქრებელი საგანი რამ იყვეს, როგორც უმაღლესი მათემატიკა.

ევმენილოვისთვის რომ შეგეხდნა, როდესაც ქუჩაში წყნარი ნაბიჯით მიიბიჯებდა და ან უნივერსიტეტში დაიარებოდა, ადვილად შეამჩნევდით, რომ ის კმაყოფილი იყო თავის ცხოვრებით.

იმისი კმაყოფილება და ბედნიერება ამხანაგებთან დამოკიდებულებაშიაც იხატებოდა. ის ყველას ერთნაირად ექცეოდა, ყველასთან კეთილი იყო და ცდილობდა სუყველასთვის



სამსახური გაეწია. სამაგიეროდ ამხანაგებსაც უყვარდათ ევმენილოვი და ერთად ღროს ატარებდნენ.

მხოლოდ ეს იყო, სტუდენტებმა ერთ რამეში ვერ დაიყლიეს ევმენილოვი. სტუდენტები ძალიან ხშირად დაიარებოდნენ ერთ მახლობელ „ტრახტირში“, აქა სადილობდნენ და ღროს ატარებდნენ. „ტრახტირში“ კარგ საჭმელებს ვერ ამზადებდნენ, მაგრამ იაფი იყო ყველაფერი. გარდა ამისა სტუდენტები აქ მეტად თავისუფლად ჰგარძნობდნენ თავიანთ თავს. სტუდენტებს უნდოდა ევმენილოვიც ეტარებინათ აქ და ამიტომ ხშირად ეუბნებოდნენ:

— შემობრძანდით. რატომ არ შემოხვალთ? განა აქ გასაკიცხი რა არის? ჩვენს მეტი იქ არაფერ იქნება, ვილაპარაკოთ, თან დაისვენეთ კიდევცა.

— დასასვენებელი რა მჭირს. შინ მოსვენებითა ვცხოვრობ, ცოლი არაფერს მიშლის და შეილები...

— ეგ მართალია, მაგრამ ამხანაგებთან ყოფნა მაინც სხვა არის...

— ჰო... ამხანაგებთან ყოფნა ფრიად სასიამოვნოა, მხოლოდ ამ ნაირ ტანისამოსიანს „ტრახტირში“ არ შემეშვენის.

— ეს რა „ტრახტირია“ მერე, — ეუბნებოდნენ ამხანაგები. — ვითომც სტუმრად მოსულხარ ჩვენთან. ჩვენს მეტი იქ ვინ იქნება?

ევმენილოვს ამხანაგების წყენა არ უნდოდა და ამიტომ მე შეკითხებოდა, როგორ მოვიქცე ამ შემთხვევაშიო. ჩემის აზრით „ტრახტირში“ შესვლა არაფერი წინააღმდეგი იყო და ამისთვის ვურჩიე შეესრულებინა ამხანაგების თხოვნა. ბოლოს, როგორც იყო, გადასწყვიტა შესულიყო სტუდენტებთან. გამიძლოდა წინ და ორთავემ უჩუმრად თავი ამოვყავით სტუდენტების ოთახში. სტუდენტებს ძალიან გაეხარდათ. აქეთ-იქიდან შესთავაზეს ზოგმა რა, ზოგმა რა, მაგრამ ევმენილოვმა ყველაფერზე უარი სთქვა.



— ჩაის დავლევ, სხვას კი არაფერს, — ამბობდა იგი, — შინ შეიძლება სხვა რამეც დალიოს კაცმა, აქ კი — წესი არ არის. არ შემოქლიან, სრულებით მიჩვეული არა ვარ...

— ამის შემდეგ ხშირად დადიოდა ევმენილოვი „ტრახტი-რში“, მხოლოდ ჩაის მეტს არას ეკარებოდა. სტუდენტები „ტრახტირში“ მომეტებულად სხვა-და-სხვა საგანზე მსჯელობდნენ და კამათობდნენ; ევმენილოვიც ყურს უგდებდა.

— ლვთის წინაშე, ბერა რამ არ მეყურება იმათი ლაპარაკიდან, — მეუბნებოდა ევმენილოვი. იმათი სალაპარაკო სულ მილი და სმიტია. მე კი არაფერი წამიკითხავს არც მილისა და არც სმიტისა. გამიგონია კა, რომ ორთავენი გამოჩენილი მწერლები არიან, მაგრამ წაკითხვით, აბა როდის წავიკითხავდი... ძალიან სასიამოვნოა, როცა ისინი კამათობენ. მთელი წელიწადი რომ უცქირო, არ მომწყინდება... თვალები თითქოს გაუბრწყინდებათ ხოლმე, აქეთ-იქიდან ხარივით ხმა გაისმის... იმ დროს ისინი მიყვარან...

გავიდა ერთი წელიწადი. ევმენილოვის ტანისამოსს ყველამ თვალი შეაჩვია. ის ეხლა თითქოს უნივერსიტეტის კუთვნილება შეიქმნა. ამხანაგებმა ისე შეაჩვიეს იმას თვალი, რომ ერთი დღე რომ არ მოსულიყო უნივერსიტეტში, ეხამუშებოდათ და ერთი ალიაქოთი შეუდგებოდათ ხოლმე.

ერთს კვირას ევმენილოვი ძალიან დაღვრემილი იყო. მე ეს წინაღვე შევამჩნიე და ვკითხე:

— თქვენ თითქოს რაღაზედაც დარდობთ, აგერ, რამდენიმე ხანია!

— მართალია, ვერა ვარ ჩემ ღონეზე, — მიპასუხა მან.

— რა მიზეზია, ხომ არაფერი შეგემთხვათ?

— არა, რა უნდა შემთხვეოდა? — მხოლოდ აი რა არის: წინად, წირვა-ლოცვის დროს ეკკლესიაში რომ ვმსახურობდი, იმაზედ ვდარდობ.

— წირვა-ლოცვაზედ აკი ეხლაც დადიხართ!

— არა, მე მაგ აზრით არ მოვახსენებთ. წირვა-ლოცვაზე, რასაკვირველია, მუდამ დავდივარ, — ისე როგორ იქნება?.. მხო-

ლოდ საქმე რაშია: სრულია რვა წელიწადი მრევლში ვიყავ და მუდამ კვირა-უქმეს ეკლესიაში ვმსახურებდით. ისე რომ მიჩვეული ვიყავ წირვა-ლოცვაზე სამსახურს: აქ კი აგერ რამდენი ხანი გავიდა აღარსად მიწირნია...

— მერე, განა არ შეგიძლიანთ, რომელიმე აქაურ საყდარში სწიროთ?

— რა მოგახსენოთ, — როგორ არ შეიძლება! მხოლოდ უფროსმა მღვდელმა ნება უნდა მომცეს — თხოვნა უნდა და მეზარება. იცით, იმათ თავიანთი მთავრები ჰყავთ — ისინი რომ გაიგებენ, მაშინვე სხვანაირად იფიქრებენ. ექვიანი ხალხია. მე ვამბობ ისევ არქიელსა ეთხოვ, რომ იმისავე ეკლესიაში წირვაზე მოვებმარო.

ევმენილოვი წავიდა არქიელთან და სთხოვა, რის განზრახვაც ჰქონდა. არქიელმა სიამოვნებით მიიღო ევმენილოვი და დიდადაც მოიწინა იმის სურვილი.

— აი, — უთხრა მან, — სჩანს შენი მღვდელი სტყუოდა, მტყუანი ყოფილა. იმას ეგონა, რაკი სტუდენტი რქნება, მაშინვე ერის კაცივით სხვა-და-სხვა აზრებს გაჰყვებო. ის კი არა თუ აგერ ისე ვერ გაგიძლია, — მღვდელთ-მსახურობა მოგიწადინია... სჩანს, როდესაც ადამიანი სასულიერო მიმართულებისაა, რამდენიც უნდა ისწავლოს საერო საგნები, მაინც ისევ ის ხასიათი შერჩება... სასიამოვნოა, ფრიად სასიამოვნოა. როცა გინდათ, ჩემს ეკლესიაში წირვა-ლოცვის დროს შეიმოსენით.

მომავალ კვირა დღეს არქიელის ეკლესია სავსე იყო მლოცველებითა. აქავე ერთ ადგილას შეჯგუფულიყვნენ სტუდენტები. ესენი მოსულიყვნენ იმისთვის, რომ ევმენილოვისთვის ყური დაეგდოთ, თუ როგორა სწირავდა. ევმენილოვმა მშვენიერად სწირა; იმისი წირვა მარტო მლოცველებს კი არა, ბერებსაც მოეწონათ.

— ჰოო, ეხლა კი მოვისვენე, — ამბობდა შემდეგ ევმენილოვი. — ისე არ შეიძლება, ყველას თავისი სფერა და ცხოვრება აქვს. როგორც, მაგალითად, თევზმა უსათუოდ წყალში, უნდა იცხოვროს...

ამის შემდეგ, რაკი-ლა არქიელმა ნება დართო, კიდევ რაედენჯერმე მოეხმარა წირვა-ლოცვაზე არქიელის ეკკლესიაში მოსამსახურე პირთ.

მახსოვს ერთი შემთხვევა. ჩვენ მოგვიკვდა ამხანაგი, — ისიც ევმენილოვისაებ მათემატიკოსი იყო. მოკვდა რაღაც უცნაურად. ორი კვირის წინად ვიდრე მოკვდებოდა დიდ მონაწილეობას იღებდა იგი სტუდენტების კამათობაში, როდესაც „ტრაბტირ-ში“ შეიყრებოდნენ ხოლმე. მთელ ოთახში ზარივით გაისმოდა იმისი ხმა და თვალებიც ცეცხლივით ჰქონდა ანთებული. ლაპარაკში ხანდახან ხრინწი მოერეოდა ხოლმე და ახველებდა კიდევ, მაგრამ ვინ რას მოიფიქრებდა, რომ ეს კაცი ისე მალე გამოესალმებოდა წუთი სოფელს.

უცებ ჩავარდა ლოგინად და უცებ მოელო ბოლო. დასაფლავებაზე ყველა ამხანაგები დაესწრნენ. როდესაც ცხედარი უნივერსიტეტის საყდარში მოასვენეს, ევმენილოვმა მაშინვე რექტორი მოძებნა.

— ნება მომეცით მეც შევიმოსო, — უთხრა მან რექტორს, — ერთადა ვწვალობდით, ერთ სკამზე ვისხედით... უნდა შევავედრო ღმერთს...

რექტორმა თავის მხრივ სთხოვა ღვთის მეტყველებას პროფესორს მღვდელს, რათა მიეცა ნება ევმენილოვისათვის იმასთან ერთად მღვდელ-მსახურებისა. პროფესორმა ნება მისცა. ევმენილოვი შეიმოსა. წირვის შემდეგ პანაშვიდი გადუხადეს.

შემდეგში ევმენილოვი მეუბნებოდა:

— რომ მომაგონდება, ის რომ ამ რამდენიმე დღის წინად გვიმტკიცებდა, ჩვენი სიცოცხლე საქვეყნო საქმეს უნდა შევწიროთო, — გული ამიჩუყდება ხოლმე. იმის ამგვარი ლაპარაკი, ანდერძს რომ ვუფებდით, მაშინაც მომაგონდა და არ დაიჯერებ, ცრამლები ველარ შევიკავე.

მართლაც, იმ დროს საკვირველი შემთხვევა მოჰხდა საყდარში. ეს შემთხვევა უნივერსიტეტში მყოფთ დიდ ხანს არ დაჰვიწყებიათ.

გამოვიდა ევმენილოვი საყდრის შუა ალაგას, სადაც ვიხსენებოდა და დაიწყო კითხვა, რაც საჭირო იყო. წარმოიდგინეთ, კითხვის დროს უცებ ხმა შეუწყდა, გული აუჩუყდა და ცრემლები წამოუვიდა. ამ ამბავმა ისე მოქმედა საყდარში მდგომ პროფესორებსა და სტუდენტებზე, რომ იმათაც ტირილი დაიწყეს.

ამ შემთხვევის შემდეგ ამხანაგები უფრო დაუახლოვდნენ ევმენილოვს; ისე უცქეროდნენ მას, როგორც კარგ დიდი ხნის მეგობარს.

მე და ევმენილოვი ერთმანეთს მალე დავშორდით. მე იმაზე ორი წლით აღრე გავაზავე უნივერსიტეტი და გამოვეცალე იქაურობას.

რამდენისამე წლის შემდეგ მომიხდა ჩამოსვლა იმ ქალაქში, რომელშიაც ეწავლობდი. რასაკვირველია, უწინარეს ყოვლისა ევმენილოვი მოვძებნე. იმას უნივერსიტეტი უკვე გაეთავებინა. გათავების დროს პროფესორებს ლაპარაკი ჰქონდათ: ეს კაცი ღირსია სახელმწიფო ფულით უმაღლესი მეცნიერების უფრო კარგად შესასწავლად საზღვარ გარედ გაიგზავნოსო. მაგრამ ამ აზრის სისრულეში მოყვანა შეუძლებელი იყო; ანაფორით შემოსილი კაცის გაგზავნა ვერა ხერხდებოდა. ღვთის წინაშე, თითონ ევმენილოვსაც აღარ უნდოდა სწავლის გაგრძელება.

— არა, ესეცა კმარა, — ამბობდა ის, — ღმერთმა ისეთი ბედნიერება მომანიჭა, რომ იმის ღირსიც არ ვიყავ... სწავლის გაგრძელება ჩემთვის შეუძლებელია... ცოლშვილი მყავს... ხნითაც ყმაწვილი აღარა ვარ... უმაღლეს მეცნიერებას რომ შეუდგეს კაცი, უნდა მიჰყვეს კიდეცა, სულითა და გულით უნდა მიეცეს იმ საგანს; თუ არა, რა იქნება? მე, რასაკვირველია, შემემძლო მიყოლა, თავ-დავიწყებამდის მივყვებოდი... მაგრამ აბა, რაღა დროსია... გარემოებაც სულ სხვა ნაირი მაქვს.

ევმენილოვს მათემატიკის მასწავლებლობა მისცეს, იმავე ქალაქის სემინარიაში. მალე მღვდლადაც აკურთხეს, მაგრამ მრევლში სამსახური არ მოინდომა, — აქ ირჩია. აქ თავისუფალი დრო ბევრი ჰქონდა და შემოსავლითაც კმაყოფილი იყო.



— ნეტარებაში ვარ, ღმერთმანი, ნეტარებაში, — ბეუბნე-  
ბოლა ევმენილოვი, — ეხლა, იცი, წიგნების კითხვაც დავიწყე,  
დრო ბევრი მაქვს. ან კი რატომ არ უნდა ვიკითხო, გაჭირება  
არ მადგია, ოჯახში არა მიჭირს-რა. მერე იცი ვისი თხუზუღე-  
ბა წავიკითხე? გახსოვთ, მაშინ რომ სულ მიღზე და სმიტზე ლა-  
პარაკობდნენ... უნდა კი მოგახსენოთ, სმიტი დავიწყე, მაგრამ  
ძალიან გაზეიადებულაღ არის დაწერილი, ვერ დავძლიე... მილი  
კი გავიგე...

ევმენილოვი შეხედულობით გამოცვლილიყო... წვერებში  
ქალარა გამოარეოდა და თავზე თმა შესთხლებოდა. მხოლოდ  
ხასიათი, რაც უნივერსიტეტში ჰქონდა, სტუდენტობის დროს, —  
ისევ ის შერჩენოდა. ის იყო მეტად გულ-კეთილი და ყველასი  
ერთნაირად პატივის მცემელი.

ევმენილოვი ხშირად იგონებდა უნივერსიტეტში გატარე-  
ბულ დროს.

— ეჰ, — ამბობდა ხოლმე ის, — იმაზედ უკეთესი დრო ჩემ  
სიცოცხლეში არა ყოფილა... რა ხალხი იყო!.. სულ ახალ-გა-  
ზდები, გულ-წრფელები, პირდაპირები და სიცოცხლით სავსე-  
ნი!.. სასიამოვნო იყო იქ ყოფნა... ისეთი ხალხი აღარსად შემ-  
ხვედრია. მართალი უნდა გითხრათ, თვითონ ისინი მინახა-  
ვან ცხოვრებაში, იქ რომ ისეთი ყოჩაღები იყვნენ, მაგრამ,  
წარმოიდგინეთ, ცხოვრებას გამოუცვლია, ისეთები აღარ  
იყვნენ სრულებით... რად ხდება ესე ნეტავი? — მეკითხებოდა  
იგი დაღვრემილის თვალებით, — რად დაეცემიან ხოლმე ყმა-  
წვილი კაცნი მერე და მერე?.. ალბათ ცხოვრების ბრალია,  
ჰა? — თქვენ რას იტყვიან?

289025 - 1935 2877  
ვლ. ედილაშვილი

# პ რ ა ზ ა ნ ა

რომანი იტალიის ცხაფურებიდან

ე. გოინანასა

ნაწილი პირველი

## I

არტური იჯდა ქალაქ პიზის სასულიერო სემინარიის სამკითხველოში და ათვალიერებდა ხელთნაწერ ქადაგებებს.

ივნისის საღამო იყო და სიცხის ბული იდგა; სარკმელნი ფართოდ დაღებული იყო და დარაბები ნახევრად ჩამოფარებული სიგრილისათვის. სემინარიის რექტორმა, კაპელლანმა\*) მონტანელლიმ ერთს წუთს შესწყევითა წერა და სიყვარულით დაუწყო ცქერა დაბლა დახრილ პატარა თავს, რომლის თვალებიც მაგიდაზე დაგროვილ ქაღალდებს ჩასცქეროდა:

— ვერ იპოვნე, ჩემო კარგო? არა უშავს-რა, მე ხელახლავ დავსწერ იმავეს. ალბად კაბადონი სადმე გადავარდა და დაიკარგა, შენ ტყუილად გაგსარჯე.

მონტანელლის ხმა დაბალი იყო, მაგრამ წკრიალა და წმინდა ვერცხლივითა. ამიტომ მის საუბარს დიდი მომხიბლველი ძალა ჰქონდა. ხმა მისი ნამდვილი ორატორის ხმა იყო, მდიდარი კილოს მიმოხვრით. მხოლოდ არტურთან მუსაიფის დროს ამ ხმას მეტი სინაზე ეტყობოდა.

\*) კათოლიკეთა მღვდელი კარის ეკკლესიისა.





ში, თუმცა აღარავინ არ აგროვებდა და აღარ ინახავდა იმის  
 თესლეულს, სხვა-და-სხვა წამლების მოსამზადებლად. შეკონი-  
 ლი გარეული ბალახები ავსებდნენ ნაპრალებს ეზოს ფიქალებ-  
 სა და ქის შოარის; იმათ შუა ამოსულიყო უბრალო ჩადუნა  
 ბალახი. ვარდები დამგზავსებოდა ტყის მცენარეებს; იმათი  
 გრძელი, ერთმანეთზე გადახლართული ღეროები მიწაზე მოძ-  
 რაობდა. ბოსტნის კვალზე ალის ფრად ჰყვოდნენ დიდრონნი  
 ყაყაჩონი. მაღალ ღეროიან ყვავილებს დაეხარათ თავები და-  
 ბურულ ბალახებზე და დაძველებული იმათი უნაყოფო ნეშოე-  
 ბი გახლართულიყო თავდანებებულ, გაოხრებულ სქელ ფოთ-  
 ლიან ხის შტოებში, რომლებიც ზანტად და მძიმედ თავს დაბ-  
 ლა ჰქინდრავდნენ. ერთ კუთხეში იდგა უზარმაზარი, კოშკის  
 მზგავსი, მუქი მწვანე მაგნოლიის ხე, თეთრი ყვავილებით მო-  
 ფენილი. მაგნოლიის ქვეშ იდგა უბრალო ხის სკამი, რომელ-  
 ზედაც ჩამოჯდა მონტანელი. არტურს შესწავლილი ჰქონდა  
 ფილოსოფია უნივერსიტეტში და ეხლა რომ ძნელი გასაგები  
 რამ შეხვდა წიგნში, მიმართა მოძღვარს ასახსნელად. მონტა-  
 ნელი მიაჩნდა ყველაფრის მცოდნედ, თუმცა ეს ყმაწვილი  
 არასოდეს არა ყოფილა მის მოწაფედ სემინარიაში.

— ახლა მე წავალ, თუ არაფერში დაგჭირდებით, — სთქვა  
 არტურმა, როცა მონტანელიმ აუხსნა, რის გაგებაც უნდოდა.

— მე მუშაობა აღარ მინდა, მაგრამ მსურდა კი აქ ვყო-  
 ფილიყავ, თუ შენც დრო გექნებოდა.

— დრო დილაღა მაქვს.

ყმაწვილი მიეყრდნო ხეს ზურგიით და დაუწყა ცქერა  
 სქელ მუქ მწვანიან ფოთლებში. ახლად გამოპკრთალ ვარსკვ-  
 ლავთ, დამშვიდებულ ცაზე მოციმციმეთ. თვისის ოცნებითა  
 და რაღაც იღუმალობით სავსე ლაქვარდის ფერ თვალებით,  
 რომელიც შავს, მოგრძო და ხშირ წამწმებ ქვეშიდან გამოი-  
 ცქირებოდა, არტური პირ-წავარდნილი დედა იყო. დედა  
 იმისი კორნვალიის გვარისა იყო გასათხოვრობისას. მონტა-  
 ნელიმ გვერდზე მიიბრუნა თავი, რომ აღარ ეცქირნა იმის-  
 თვისს.



— დაქანცულის შეხედულობა გაქვს შენა, ჩემო კარგო,  
— რა გაეწყობა!

არტურის პასუხს მართლა დაქანცულობის კილო გამოჰკრ-  
თა და ეს მოძღვარმა იმ წამსვე შეატყო.

— ასე ჩქარა არ უნდა დაბრუნებულყოფი სკოლაში, ძა-  
ლიან დაიღალე ავადმყოფის მოვლით და უძილოდ გატარებულ  
ღამეებით. მე უნდა მომეხერხებინა, რომ, მანამ კარგად არ  
დაისვენებდი, ლიგორნოდან არ წამოსულიყოფ.

— ოჰ, მამაო, რა გამოვიდოდა მაგით? დედი-ჩემის შემდეგ  
მე არ შემეძლო დარჩენა იმ საზარელ სახლში. იუღია იქამდის  
მიმიყვინდა, რომ ჭკუაზე შემშლიდა.

იუღია იყო ცოლი არტურის უფროსის ძმისა. და სულ-  
იმას ცდილობდა, რომ მოსვენება არ მიეცა მისთვის და მულ-  
მივის ჩხვლეტით გაემწარებინა მისი სული.

— მე სრულიადაც არ მინდა, რომ შენ ნათესავებთან  
სცხოვრობდე, — მორიდებით მიუგო მონტანელიმ; — ვიცი, რომ  
ეს შენთვის ძალიან მავნებელი იქნება. მაგრამ ამას კი ვწუხვარ,  
რომ არ მიიღე თხოვნა შენის მეგობრისა, ინგლისელ დოქტო-  
რისა; ერთი თვე რომ შენ იმის სახლში გაგეტარებინა, კარგად  
დაისვენებდი და ბევრად უფრო გულმოდგინედ დაუბრუნდებ-  
ოდი შენს საქმეს.

— არა, მამაო, არა. ვარენები, მართალია, გულკე-  
თილნი და თავაზიანები არიან, მაგრამ იმათ მე ვერ მიცნეს.  
იმათ ევბრალები, ამას მე კარგად ვხედავ, ვამჩნევ სახეზე; ვიცი,  
დამიწყებენ იმედების ძღვეას და დედა-ჩემზე ლაპარაკს; ამით  
ფიქრობენ ჩემს დამშვიდებას. გეგმა კი ამას არ იზამდა. ჩვენ  
ჯერ ისევ ბავშვები ყოყავით, რომ იმან მაშინაც იცოდა, რის  
თქმაც საჭირო არ იყო. მაგრამ ეჰ, მარტო ესეც არ არის მი-  
ზეზი...

— მაშ რა არის, შვილო?

არტურმა მოსწყვიტა რამდენიმე ყვავილი და დაუწყო  
მთრთოლვარე ხელით სრესა.

— მე ვერ ვიტან ქალაქის ცხოვრებას, — დაიწყო მან სიჩუმის შემდეგ. — იქ არის ის დუქნები, სადაც ჩემს ბავშვობაში სათამაშოებს მიყიდდნენ ხოლმე; იქ არის წყლის პირი, სადაც მე იმასთან ერთად ვსერირობდი, მანამ მძიმე ავადმყოფი შეიქნებოდა. საითაც უნდა წავიდე, ყველგან ერთი და იგივე მიღვას თვალ-წინ. ბაზარში პატარა გოგოები მოდიან და ყვავილების კონას მთავაზობენ, თითქო ეხლა მე ესეები მესაჭიროებოდეს! სასაფლაოც იქ არის... ოჰ, უნდა იქიდან წამოვსულიყავ, მეტად მიმძიმს იმ ადგილების ცქერა...

მან სიტყვა ველარ დაასრულა და ყვავილების ფურცკვენას მოუხშირა. ჩამოვარდა ხანგრძლივი სიჩუმე. არტურმა გაოცებით თავი მაღლა აიღო; უკვირდა, რომ მონტანელლი ხმას არ იღებდა, არასა ჰკითხავდა. მაგნოლიის შტოებ ქვეშ ჩამოზნელდა და გარშემო ყოველი საგანი ბუნდად მოჩანდა, მაგრამ სინათლე იმდენად კიდევ იყო, რომ შეიძლებოდა შეგვეჩინათ მონტანელლის პირისახეზე მომაკვდავის ფერი, რომელიც ამ ლაპარაკის დროს დასდებოდა. იმას ჩაეღუნა თავი და ათრთოლებულის მარჯვენა ხელით სკამის ნაპირს დაყრდნობოდა. გაოცებულმა არტურმა მოიხედა მისკენ, ასე ეგონა, უეცრივ მივუახლოვდი რაღაც ღვთიურს ძალასაო.

— ღმერთო! — გაიფიქრა მან, — რა წვრილმანი და მეტისმეტი თავმოყვარე ვარ მე ამასთან შედარებით. ჩემი მწუხარება რომ თვით ამისი მწუხარება იყოს, ამაზე მეტად მაშინაც ველარ შესწუხდებოდა.

ამ დროს მონტანელლიმ მაღლა აიღო თავი და მიიხედ-მოიხედა გარშემო.

— მე არ ვეცდები, რომ უთუოდ ეხლა დაბრუნდე, — უთხრა მან ალერსით, — მაგრამ უნდა მომცე სიტყვა, რომ კარგად დაისვენებ ზაფხულში, როცა საორთვეოდ დაგიბოვებ. ჩემის ფიქრით, უმჯობესი იქნება შენთვის, რაც შეიძლება, შორს წახვიდე ლიგორნოდან. მე არ შემოძლიან და არც მინდა წარმოვიდგინო, რომ შენს ჯანს არ გაუფრთხილდები.

— თქვენ სადღა წახვალთ ზაფხულში?



— მე უნდა ჩემი მოწათენი წავიყვანო მთებში, როგორც ჩვეულება მაქვს, და იქ დავაბინაო. მხოლოდ აგვისტოს შუა რიცხვებში უნცროსი გამგე დაბრუნდება და მაშინ ვეცდები გავემგზავრო ალბიის მთებზე. შენც გინდა წამოხვიდე ჩემთან? მთებზე სიარულით ვისიამოვნებდით და ამასთანავე ალბიის ხავსებსაც შევისწავლიდით...

— ოჰ, მამაო!— არტურმა სიხარულით ტაში შემოჰკრა „აღფრთოვანებულ უცხოელივით.“ — როგორც იულია იტყუა— და ხოლმე.

— მე მზადა ვარ გავცე ყოველივე, ოღონდ კი თქვენთან წამოვიდე! მაგრამ არ ვიცი...— არტური გაჩერდა.

— მაგრამ რა? შენ ფიქრობ, რომ მ—რ ბერტენი არ მოგცემს წამოსვლის ნებას?

— რასაკვირველია, იმას არ იამება, მაგრამ ძნელად თუ მოახერხებს ამ შემთხვევაში ხელის შეშლას. მე ეხლა თერამეტის წლისა ვარ და შემოდლიან თავისუფლად ვიმოქმედო. ესეც რომ არ იყოს, ჩვენ ხომ მარტო მამითა ვართ ერთნი; მაშ მანცა და მანც მე ამას რად უნდა ვემორჩილებოდე? ის ყოველთვის ავად ექცეოდა ჩემს დედას.

— ეგ ეგრეა, მაგრამ თუ ის მტკიცედ წინააღმდეგება შენს სურვილს, მგონი ემჯობინება, არ მოიქცე იმის უნებურად. თორემ, შესაძლოა, შენი მდგომარეობა იმის სახლში უფრო სამძიმო შეიქმნეს, თუ რომ...

— შეუძლებელია, ამაზე უმძიმესი რომ შეიქმნეს,— მიუგო აღშფოთებულმა არტურმა.— მე იმათ ყოველთვის ვეჯავრებო— დი და ყოველთვისაც საზიზლარი ვიქნები მათთვის, რაც უნდა გავაკეთო. ან კი რად უნდა იყოს ჯემსი წინააღმდეგი, რომ მე თქვენთან, ჩემს მოძღვართან, ერთად წამოვიდე სამოგზაუროდ?

— ის ხომ პროტესტანტია, მაგრამ მანც მისწერე და მოვუცადოთ პასუხს. შენ მომთმენი იყავ, შეილო! ეს სულ ერთია, ვუყვარვართ ხალხს თუ არა, ჩვენ მანც უნდა ყველას კარგად ვეპყრობოდეთ.

მოძღვრება მონტანელლისა იყო ისეთი მშვიდობიანი და გულის მომალბობელი, რომ არტური არც კი გაწითლდა, და ამოოხვრით მიუგო:

— მართალია, ეს მეც ვიცი, მაგრამ მეტად სამძიმო კია.

— ძალიან მეწყინა, რომ სამშაბათს სალამოს არ მოხველ ჩემთან.— მონტანელლიმ უეცრივ შესცვალა საგანი ლაპარაკისა. მე მქონდა სიები არეკოდან და მსურდა მეჩვენებინა შენტვის.

— სიტყვა მქონდა მიცემული ერთის სტუდენტისთვის, რომ იმის სახლში კრებაზე დავსწრებოდი და იქ მიმელოდნენ.

— რა კრება იყო?

არტური ცოტად დაიბნა ამ კითხვაზე.

— ნამდვილი კრება არ იყო,— უთხრა მან ცოტა არე-ვით.— გენუიდან ჩამოვიდა ერთი სტუდენტი და იმან წარმო-სთქვა სიტყვა, ლექციის მზგავსი.

— რის შესახებ?

არტური შეყოყმდა.

— ვიცი, იმის სახელს თქვენ არა მკითხავთ,— არა, მამაო? მე იმას სიტყვა მივეცი...

— არას გამოგკითხავ და, თუ სიტყვაც მიგიცია რაიმე საიდუმლოს შენახვისა, ნურას მეტყევი. მაგრამ, მგონი, რომ დრო არის, შენ სანდოდ მიგაჩნდე.

— რასაკვირველია, მამაო. ის ლაპარაკობდა ჩვენზე, ჩვენს მოვალეობაზე, ხალხის შესახებ და თვით ჩვენ შესახებ— იმა-ზე... თუ როგორ უნდა მოვიქცეთ, რა უნდა ვაკეთოთ, რომ მოვეხმარნეთ...

— მოვეხმარნეთ? ვისა?

— საწყალ ხალხს... და...

— და?

— იტალიას.

ორივ დიდხანს იყვნენ გაჩუმებულნი.

— მითხარ, არტურ, — მიჰმართა მონტანელლიმ ყმაწვილს სერიოზულის კილოთი, — დიდხანია, რაც შენ მაგაებზე ფიქ-რი დაიწყე?



— მთელ წარსულ ზამთარს ფიქრად ესა მქონდა.

— დედა-შენის სიცოცხლეშივე, და იმან ამ ამბისა არა იცოდა-რა?

— არა; მაშინ გატაცებული არა ვყოფილვარ ამ აზრით.

— ეხლა კი ხარ გატაცებული?

არტურმა კიდევ მოსწყვიტა ყვავილი ბუჩქიდან.

— აი, როგორ მოხდა ეს საქმე, მამაო, — დაიწყო მან და თვალეზი დაბლა დახარა. — როცა პირველად ვემზადებოდი უნივერსიტეტში შესასვლელად წარსულ შემოდგომაზე — ხომ გახსოვთ? — ბლომად გავიცანი სტუდენტები. ზოგიერთმა მათგან-მა დამიწყო ლაპარაკი საქმის შესახებ და მაძლევდნენ წიგნებს საკითხავად. მე ეს მაინცა და მაინც არ მებნისებოდა და სულ იმას ვცდილობდი დედასთან ხშირად ვყოფილიყავ. დედა-ჩემი ხომ სულ მარტო იყო ჩვენს სახლში, როგორც საპყრობილე-ში. იულიას ერთი სიტყვა კმაროდა, რომ დედა-ჩემი მოეკლა. როცა დედა მძიმე ავადმყოფი შეიქმნა, მე სრულიად გადამავიწყდნენ სტუდენტებიც და იმათი წიგნებიც, მას შემდეგ, თითონვე მოგვხსენებათ — აღარც ჩამოვსულვარ პიზაში. მაშინ რომ მე ეს საქმე ფიქრად მქონოდა, დედას არ დავუმაღავდი. მერე, რაკი დავინახე, დედა-ჩემი ესალმებოდა ამ ქვეყნიურ ცხოვრებას, თქვენც კარგად იცით, განუშორებლივ დედასთან ვიყავი უკანასკნელ ეამამდის. ხშირად ლამეებს უძილოდ ვათენებდი და გემმა ვარრენი მხოლოდ დღისით მოდიოდა, რომ მე დამეძინა და დამესვენა. ჰო და, აი, ეს მოხდა იმ უძილოდ გატარებულ ხანგრძლივ ლამეებში. ჩემი ფიქრი დასტრიალებდა წიგნებსა და იმას, თუ რას ამბობდნენ სტუდენტები, ვფიქრობდი, მართალი იყვნენ ისინი თუ არა და ან რას იტყოდა ჩვენი მაცხოვარი ამაზე...

— დაჰკითხებიხარ როდისმე მაცხოვარს?

მონტანელლის ხმას სიმტკიცე აკლდებოდა.

— ხშირად ვლოცულობდი, მამაო, და თანაც ვეკითხებოდი, როგორ მოვქცეულიყავ, ან და ვევედრებოდი, დედასთან ერთად მეც მოვმკვდარიყავ. მაგრამ პასუხი ვერა მივიღე-რა.

— შენ კი ერთი სიტყვაც არ გითქვამს ჩემთვის მაგის შესახებ, არტურ, მე მეგონა, რომ შენ ნდობა გქონდა ჩემი.

— მამაო, თქვენც იცით, თუ როგორი ნდობაც მაქვს მე თქვენი! მაგრამ არის ისეთი რამეც, რისი თქმაც არაფისთან არ შეიძლება. მე ვგონებ, რომ არაფის არ შეუძლიან ჩემი დახმარება ამ საქმეში, არ შეგიძლიანთ არც თვით თქვენ, და არ შეეძლო არც ჩემს დედას! მე თითონ უნდა შევიტყო პასუხი თვით ღმერთისაგან. აქ საქმე ხომ მთელს ჩემს სიცოცხლესა და ჩემს სულს შეეხება!

მონტანელი გვერდზე მიბრუნდა და წყვილად გაუშტერა თვალები. ბინდი იმის სახეს გამჭვირვალობას აძლევდა და თითონ მოქურთმებულ მოჩვენებად მოსჩანდა ჩამოპურთულ მწვანე მიდამოს შორის.

— მერე? — წყნარად ჰკითხა მან.

— მერე ის გარდაიცვალა. უკანასკნელი სამი დღე და ღამე უძილოდ გავატარე იმის საწოლთან.

არტური შეჩერდა ცოტა ხანს, მაგრამ მონტანელი ხმას არ იღებდა. არტურმა განაგრძო ნელის ხმით:

— იმ ორ დღეს, გასვენების წინად მე აღარაფრის ფიქრი აღარ შემეძლო და მერე ავადაც გაეხდი; ხომ გახსოვთ, აღსარებისთვის რომ ვეღარ შევიძელ მოსვლა?

— ჰო, მახსოვს.

— ჰო და, ერთ ღამეს მე აედექდა შეველ დედას ოთახში. ოთახი ცარიელი იყო, მხოლოდ გარდამოხსნა ესვენა ბაქანზე. მე გავიფიქრე, ეგებ, ღმერთი შემეწიოს-მეთქი, დაეიჩოქე და ასე დავყავ გათენებამდის. როცა გონს მოველ, — არა, მამაო, რა საჭიროა, არ შემიძლიან ავხსნა, რაც მოხდა, არ შემიძლიან გამოვთქვა, რაც იქა ვნახე. თითონ მეც არ მესმის... მაგრამ ვიცი კი, რომ ღმერთმა პასუხი მაღირსა. და ვერ გავბედავ, არ დავემორჩილო ღვთის ბრძანებას.

რამდენსამე ხანს ისინი ჩუმად ისხდნენ სიბნელეში. ბოლოს მონტანელი მობრუნდა და მხარზე ხელი დაადო არტურს.



— ჩემო შვილო! — უთხრა მან, — მე არ ვამტკიცებ — ღმერთმა დამიფაროს, — რომ ის შენს სულს არ დაჰლაპარაკებოდეს. მაგრამ გაიხსენე ის შენი მაშინდელი დროის გარემოება, როდესაც ეგ მოხდა და ნუ მიიღებ ავადმყოფობისა და მწუხარებისაგან გამოწყვეტულს ბოდვას — იმის ღვთაებრივს მოხმობად მოწოდებად! და თუ მართლა იყო ნება ღვთისა, მოეგო შენთვის პასუხი სიკვდილის უფსკრულიდან, მოიფიქრე, გესმის კი კარგად იმის სიტყვები? რა არის ის საქმე რაც შენ გარდასწყვიტე იმ საათს?

არტური ზეზე წამოდგა და უპასუხა წყნარად, თითქო კატეხიზმოს სიტყვებს იმეორებდა:

— ის საქმეა შეგწირო ჩემი სიცოცხლე იტალიას, ვეცადო განვათავისუფლო მონობისა და მწუხარებისაგან, განვღვინო იქიდან ავსტრიელები, რომ გარდაიქცეს თავისუფალ რესპუბლიკად და არ იცნობდნეს არავის უფროსად, გარდა იესო ქრისტესი!

— არტურ, დაფიქრდი, რას ამბობ! შენ ხომ იტალიელი არც კი ხარ.

— ეგ სულ ერთია, მე ვნახე ეს ქვეყანა და მას ვეკუთვნი. მონტანელი ერთის ხელით დაეყრდნო ხის შტოს და მეორე თვალეზე ჩამოიფარა.

— ჩამოჯექ ცოტა ხანს, ჩემო შვილო! — სთქვა მან ბოლოს. არტური დაჯდა. მოძღვარმა ორივე ხელები გამოართვა და მაგრად დაუჭირა.

— არ შემიძლიან დღეს შენ ცილობა და კამათი დაგიწყო, — უთხრა მან. — ეს ისე მოულოდნელად მოხდა... არ მოველოდი; დრო და ხანი უნდა, რომ ეგ საქმე მოვიფიქრო. ჩვენ კიდევ მოვილაპარაკებთ ამის შესახებ უფრო გარკვევით, მაგრამ ეხლა მე მსურს, რომ შენ მხოლოდ ეს გაიგო: თუ შენ რაიმე უბედურება შეგემთხვა, თუ შენ მოკვდი, ეგ ამბავი განგმირავს, დაამიწებს ჩემს გულს.

— მოძღვარო!



— არა, მომითმინე, რომ დავასრულო, რისი თქმაც მინდა. მე ერთხელაც მითქვამს შენტვის, რომ შენს მეტი მე არა მყავს-რა ამ ქვეყნად. მე მგონი, რომ შენ სრულად და სავსებით არ გესმის, რას ნიშნავს ჩემი სიტყვები. ძნელი გასაგებიცაა ეს სიყმაწვილეში. მეც ვერ გავიგებდი, არტურ, შენოდნობას. შენ თითქო საკუთარი შვილი ხარ ჩემი—გესმის? შენ ხარ ჩემი თვალის ჩინი, წადილი და სურვილი ჩემის გულისა. მე მზადა ვარ მოვკვდე, ოღონდ კი შენ აგაცდინო შემცდარის აზრის სამსახური, ცრუ ნაბიჯის გადადგმა და დავიცვა შენი სიცოცხლე. მაგრამ ეხლა არა შემიძლიან-რა. არ გთხოვ არავითარ პირობას, გვედრები მხოლოდ დაიხსომო ეს ჩემი სიტყვები და ფრთხილად იყო. კარგად მოიფიქრე ყოველივე, ვიდრე ძნელად გადასადგმელს ნაბიჯს გადასდგამდე. მოიქეც ასე, თუ ჩენი გულისთვის არა, დედი-შენის სიყვარულისათვის მაინც, რომელიც ეხლა ცაშია.

— მე მოვიფიქრებ, მამაო, ილოცეთ ჩემთვის და იტალიისათვის!

ყმაწვილი კაცი დაეშვა მუხლებზე ხმა-ამოუდებლივ და მონტანელილიმაც გაჩუმებულმა დაადო თვისი ხელი არტურს თავზე. ერთს წუთს შემდეგ არტური წამოდგა, ემთხვია მოძღვარს ხელზე და ნელის ნაბიჯით გაემართა ნამიან მწვანეზე. მონტანელილი დარჩა მარტო მაგნოლიის ქვეშ; მოძღვარი გაუწყობელად იდგა სიბნელეში თვალეზ-გაშტერებული.

ღმერთმა მოავლინა შურის ძიება ჩემდამი, ვთარცა დავითისადმი, — ფიქრობდა იგი. მე შეურაცხვეყავ საკურთხეველი მისი და წაბილწულ ხელს მეჭირა სხეული იესო მაცხოვრისა...

ის იყო მომთმენი აქამდის—ახლა კი გათავდა, „რამე თუ შენ შეასრულე იგი იღუმლად, მე კი შევასრულებ ამას ცხადად წინაშე იზრაილის შთამომავალთა და წინაშე მზისა. შვილი, შენ მიერ შობილი, უნდა მოკვდეს.“

## II

ჯემს ბერტენს სრულიად არ მოსწონდა, რომ იმისი ახალ-  
 გაზდა ძმა მიდიოდა მონტანელთან ერთად, მერე ისიც „შევი-  
 ცარიაში სახეტილოდაო.“ მაგრამ ის ვერ დაუშლიდა მოგზა-  
 ურობას საბოტანიკო აზრით ღვთისმეტყველების მოხუცებულ  
 პროფესორთან ერთად. არტური ვერ მიხვდებოდა დაშლის ნამ-  
 დვილ მიზეზს და ასეთს დაშლას ჩასთვლიდა უღმობელ საქცი-  
 ელად, მტარვლობად. დაშლის მიზეზად დასახავდა სარწმუნოე-  
 ბის სხვა-და-სხვაობას მაშინ, როდესაც მისი გვარი ამაყობდა  
 ყოველგვარ სარწმუნოების შეწყნარებითა. ამ ოჯახის ყველა  
 წევრი პროტესტანტები იყვნენ და კონსერვატორები იმ  
 დროიდანვე, როცა ამ ასის წლის წინად, ლონდონსა და ლი-  
 ვორნოში ჯემის პატრონ ბერტენისა და იმათის შეილები ფირ-  
 მამ პირველად დაიწყო მუშაობა. იმათი აზრით, ინგლისელნი  
 ღირსეულნი კაცნი უნდა სამართლიანად მოჰქცეოდნენ პაპის-  
 ტებსაც კი. ამ ოჯახის უფროსს ქვრივობა რომ მოსწყინდა,  
 ითხოვა ფრანგის ლამაზი ქალი, თავისი უნცროს შეილების  
 ამზრდელი. იმისი უფროსნი ვაჟნი, ჯეისი და ტომასი, დემორ-  
 ჩილნენ ღვთის განგებას, თუმცა დედი-ნაცვლის სახლში ყოლა,  
 რომელიც წლოვანებით იმათივე ხნის იყო, სამძიმოდ მიაჩნდათ.  
 მამის სიკვდილის შემდეგ, უფროსის ძმის დაქორწინებამ უმე-  
 ტესი არეულობა ასტეხა უიმისოდაც აწეწილ-დაწეწილ ოჯახ-  
 ში. მაგრამ ორივე ძმა პატიოსნად ექცეოდნენ დედინაცვალს,  
 ვიდრე ცოცხალი იყო და იცავდნენ იულისას დაუნდობელ  
 ენისაგან. ცდილობდნენ შეესრულებინათ თავიანთი მოვალეო-  
 ბა, რამდენადაც კი შეგნებული ჰქონდა, არტურის წინაშე. მაინცა  
 და მაინც არა ცდილობდნენ გამოემყდნათ სიყვარული მისი  
 და იმათი დიდსულოვანება არტურისადმი იყო მხოლოდ ის,  
 რომ აძლევდნენ ბლომად ფულს და სრულს თავისუფლებას,  
 ისე ეხარჯა ის ფული, როგორც სურდა. ეს იყო მიზეზი, რომ

არტურმა მიიღო წერილის პასუხად სახარჯო ფულის ასაღებად ჩეკი და ნება-რთვაც, მთაში წასვლისა, თავისუფალი დრო ზაფხულში, როგორც გინდა, ისე გაატარეო. არტურმა აღებული ნახევარი დახარჯა: მაშინვე საბოტანიკო წიგნები იყიდა და მცენარეთა გასახმობი ხელსაწყო შეიძინა. მერე გაემგზავრა მოძღვართან ერთად ალპიის მთებში სამოგზაუროდ. მონტანელი ასეთი მხიარული და უდარდელი არტურს დიდი ხანია აღარ ენახა. ის მძიმე შთაბეჭდილებანი, რომელიც წინედ, ბალში მუსაიფის დროს, აწუხებდა, თან და თან მოეშორებინა თავიდან. ახლა ბევრად უფრო დამშვიდებით უცქეროდა ყოველსავე საგანს. არტური ჯერ იმდენად ახალგაზდა და გამოუცდელი იყო, რომ იმის გარდაწყვეტილების შერყევა არ გაძნელებოდა. ეჭვი არ იყო, რომ კიდევ შეიძლებოდა იმისი შველა ტკბილის, ალერსიანის ჩაგონებით და აცილება იმ გზისა, რომელზედაც ახლად გადადგა მან ნაბიჯი.

მონტანელს და არტურს აზრად აჰქონდათ რამდენისამე დლით ქენევაში დარჩენილიყვნენ. მაგრამ გადატკეცილ გზებისა და დამტვერიანებულ ბაღების პირველ დანახვანედვე არტურს სახე მოეღუშა. მონტანელიმ შეხედა მშვიდობიანის ღიმილით.

— არ მოგწონს აქაურობა, ჩემო კარგო?

— სწორედ არ ვიცი. აქაურობა სრულიად არა ჰგავს იმას, რის ნახვასაც მე მოველოდი. თუმცა ტბა მშვენიერია და მომწონს იმისი გარშემოზღუდული მიდამო, სანაპირო ბორცვები.

ისინი იღვანენ რუხოს კუნძულზე. არტური ანიშნებდა ერთად ჩამწკრივებულს მთებს, რომლებიც მკაცრად იცქირებოდა შორიდან, სავოის მხრიდან.

— მაგრამ, — განაგრძო არტურმა, — თითონ ქალაქი კოხტაა და სუფთა, პროტესტანტული. თითქო მეტის-მეტი კმაყოფილიაო, ისე გაიყურება. არა, მე არ მომწონს ქენევის ქალაქი, იულიას მაგონებს. — მონტანელის გაეცინა.

— საბრალო ბავშვო! რა დიდი საქმეა მერე! ჩვენ ხომ ჩვენდა სასიამოვნოდ ვართ აქა, მაშასადამე არაფერს არ შეუძ-



ლიან ძალა დაგვატანოს, რომ უთუოდ აქ დაგჩეთ. თუ არ გვესიამოვნება, წავალთ კიდეც აქედან. გინდა, დღეს ტბაზე გავისეირნოთ და ხვალ კი მთებში წავიდეთ?

— თქვენ რომ გინდოდათ აქ დარჩენა?

— ძვირფასო ჩემო ბავშვო, მე ეს ადგილები არა ერთხელ მინახავს. ჩემთვის სასიხარულო ის იქნება, რომ შენ რითიმე გასიამოვნო. შენ სად ისურვებდი წასვლას?

— თუ თქვენთვის მართლა სულ ერთია, მე მინდა მდინარეს ავყოლოდი და იმის სათავემდე მივსულიყავი.

— მდინარე რონას?

— არა, ავრას. ისეთის სიჩქარით მოსჩქევს!

— მაშ, აბა, წავიდეთ შამუნიასი.

ეს დღე გაატარეს ტბაზე აფრებიან ხომალდებით სეირნობაში. საუცხოვო ტბამ ნაკლები შთაბეჭდილება მოახდინა არტურზე, ვიდრე ნაცრისფერ მღვრიე ავრამ. ის აღიზარდა ხმელთა შუა ზღვის ნაპირს და მიჩვეული იყო ლურჯის ზღვის ციმციმს. მაგრამ იმას საშინლად უყვარდა ჩქარი მდინარეობა, სასტიკი და აქაფებული მდინარე. ეს იყო იმისთვის გამოუთქმელი, დაუსრულებელი სიამოვნება.—სულ სდულს და გადმოდისო,—იტყოდა ხოლმე ამგვარ მდინარეზე არტური.

მეორე დღეს გაემგზავრნენ შამუნიასი. არტური ალტაცებული იყო ვაკე და გატკეცილ გზებზე მოგზაურობით. მაგრამ როცა ისინი დაადგნენ დაკლაკნილ მიმოხვეულ გზებს კლიუზის სიხლოვეს, და უზარ-მაზარი დასერილი ქედები გარს შემოერტყნენ, არტური ძალიან ჩაფიქრდა. სენმარტენიდან დაწყებული წყნარის ნაბიჯით მიდიოდნენ ზევით-ზევით ლამის გასათევად მიყრუებულ, განცალკევებულ სასტუმროში, ან პატარა მთა-გორიან სოფლებში. არტურზედ მოქმედებდა ბუნების გარეგანი სანახაობა, და პირველ წყალვარდნილის შეხვედრამ ისეთ ალტაცებაში მოიყვანა, რომ სასიამოვნო იყო იმის დანახვა. მაგიერად, როცა თოვლიან მთებს მიუახლოვდნენ, აღფრთოვანება მისი ოცნებად გადაიქცა და ჩაფიქრდა. მონტანელს წინად არ შეუმჩნევია მისთვის ასეთი მდგომარეობა.

თითქოს რაღაც იდუმალი ნათესაობა იყო ამ ყმაწვილსა და მთებს შორის. მთელის საათობით იჯდა ხოლმე გაუნძრევლად განცალკევებულ, ჩამობურთულ ცაცხვის ტყეში და გამოსცქეროდა იქიდან მზის მიერ განათებულ ქვეყანას და გაბრწყინვალელებს ქედებს. მონტანელი შეჰყურებდა დაღონებით და თან შურით.

— მე მინდა, რომ ჩემთვისაც დაგენახებინა ის, რასაც შენ ჰხედავ, არტურ, — უთხრა მან ერთხელ, როცა წიგნის კიბხვის დროს აინედა და არტური ისევ ისე, ბალახში მხარ-თეძოზე წამოწოლილი დაინახა, როგორც ერთის საათის წინად იყო. ყმაწვილი ფართოდ გახელილ თვალებით იცქირებოდა ცხრა თვალის მზით გაელვარებულ მტრედის ფერ სივრცეში. მოგზაურებმა გადაუხვიეს დიდ გზას, რომ ღამე გაეთიათ პატარა სოფელში, იქავე წყალ-ვარდნილ დიოზის სიახლოვეს. როდესაც მზემ გაღიხარა უღრუბლო ცაზე, ისინი ავიდნენ ტყით შემოსილ კლდეზე, რომ დამტკბარიყვნენ ალპიის მთების ელვარებით და ციცაბო გუმბათებიან, ჯაჭვივით გაბმულ მომბლანის მთების ცქერით. არტურმა აიღო მაღლა თავი, იმისი თვალები სავსე იყო იდუმალის გაცეცებით.

— რასა ვხედავ, მამო? ვხედავ დიდს, თეთრს არსებას მტრედის ფერ სივრცეში, რომელსაც არა აქვს არც დასაბამი და არც დასასრული. ვხედავ როგორ მოეღის ის საუკუნიდან საუკუნემდე სულის წმინდის მოახლოვებას. ვხედავ ამას ბუნდოდ.

— მეც ვხედავდი ოდესმე, ყოველსავე მაგას.

— ეხლა კი აღარ ხედავთ?

— აღარაოდეს. მე ეხლა სულ სხვა რამესა ვხედავ.

— რასა?

— მე, ჩემო კარგო? მე ვუყურებ ლურჯ ცას და თოვლიან მთებსა. ეს არის ყოველივე, რასაც მე ვხედავ, როდესაც ზევით ვიცქირები. მხოლოდ, როცა ძირს დავიხედავ, მაშინ სულ სხვასა ვხედავ.



არტურმა დაიჩოქა და გაღიხარა უფსკრულისაკენ, დაბურული უზარმაზარი ცაცხვები გამწკრივებულნი იდგნენ მდინარის ნაპირს დარაჯებივით. წითლად გაღაქლებული მზე უეცრივ შთაინთქა ქედებს იქით და მასთან ერთად სიკოცხლევ გაჰქრა დედა-მიწის პირიდან. მთის ქვეშ, ვაკე ადგილზე გამოჩნდა რაღაც ბნელი და შემადრწუნებელი მოჩვენება, რომელიც თითქო რაღასაც იმუქრებოდა. გადმოდრეკილი კლდეები დასაველეთის შიშველა მთებისა გავდა ვეშაპის კბილებსა, რომლებიც თითქოს მზად იყვნენ დასცემოდნენ მსხვერპლს და გადესროლათ უფსკრულში, სადაც გადაჭიმული იყო ტყით დაბურვილი ვაკე ადგილი. ცაცხვის ხეები ემგზავსებოდნენ რიგზე დამწკრივებულ, ხმლებ-ამოდებულ ჯარის-კაცთა და თითქოს ჩურჩულებდნენ: „დაგვესხენით თავსაო“. სიბნელეში მდინარე გაშმაგებული ღრიალებდა და ჰქუხდა. გააფთრებული ეხეტებოდა საპრობილეს მსგავს კლდიან ნაპირებს დაუსრულებელის თავგანწირულებით.

— მოძღვარო! — არტური წამოდგა აკანკალებული და მოშორდა უფსკრულს. — იქ თითქო ჯოჯოხეთია.

— არა, ჩემო შვილო, იქ ისეა, როგორც ადამიანის გულში.

— იმ ადამიანის გულში, რომელიც ცხოვრობს სიკვდილსა და სიბნელის ჯურღმულში.

— იმათ გულში, რომლებიც ყოველ დღე გვერდზე გაგივლიან და გამოგივლიან ხოლმე.

არტური მთლად ცახცახებდა, ჩრდილს რომ უცქეროდა დაბლა; თეთრი ბურუსიანი ღრუბელი იკრიბებოდა ცაცხვა შორის, ახმიანებულ მდინარის ზემოდ, როგორც საბრალო მოჩვენება, რომელსაც არ შეუძლიან მშვიდობის დამყარება.

— შეხედეთ! — წამოიძახა უეცრად არტურმა, — ხალხმა, რომელიც სიბნელეში დადიოდა, დაინახა გაჩაღებული სინათლე! აღმოსაველეთის თოვლიანი ქედები ანთებულიყო მზის გადმონაშუქ სინათლით. როდესაც წითელ შუქიანი ელვარება ჩაქრა,

მონტანელი მობრუნდა და ხელის შეხებით გამოარკვია ფეხ-  
ში წასული არტური.

— წავიდეთ, ჩემო კარგო! სინათლე ჩაქრა, თუ კიდევ  
დიდხანს დავრჩით აქ, გზა დაგვებნევა სიბნელეში.

— ეხლა ისწოთქო ცხედარია, — სთქვა არტურმა და თვა-  
ლი მოაშორა სიბნელეში მბზინავ თოვლიან, აჩრდილის მზგავს  
ქედებს.

დაეშვნენ დაბურულს ხეებისაკენ სასტუმროში მისასვლე-  
ლად და იქ დადგნენ ლამის გასათევად.

როდესაც მონტანელი შევიდა ოთახში, სადაც არტური  
ვახშმად ელოდა, შენიშნა, რომ ყმაწვილს სრულიად მოუშო-  
რებია თავიდან ის მოჩვენებანი, რომელნიც სიბნელეში გარს  
ეხვივნენ. ყმაწვილი კაცი სრულებით გამოცვლილიყო:

— ოჰ, მამაო, მოდით აქ, მოდით ჩქარა და დაინახათ ეს  
სასაცილო ფინია! ერთი შეხედეთ, როგორ თამაშობს უკანა  
ფეხებზე.

არტური ისე იყო გატაცებული პატარა ძაღლის თამა-  
შობით, როგორც ალპიის მთების ელვარებით. სასტუმროს  
პატრონი, ლოყებ ლაქლაქა ქალი, თეთრის ფეშტამლით, იდგა  
დოინჯ შემოყრილი და იღიმებოდა არტურს რომ ფინიასთან  
მოთამაშეს ჰხედავდა.

— ეტყობა, საზრუნავი ცოტა აქვს, რომ ასე გატაცებუ-  
ლია ფინიასთან თამაშით, — უთხრა მან თავის ქალს, თავიანთ  
ენაზე. — მერე რა ლამაზი ბავშვიც არის!

არტური გაწითლდა პატარა მოწაფესავით. ქალმა შეატყო,  
გაიგო, რაცა ვთქვიო, გაეცინა იმის მორცხობაზე და გავიდა  
ოთახიდან.

ვახშმად საუბარი ჰქონდათ მხოლოდ ეკსკურსიის გეგმის  
შესახებ, მთებზე მოგზაურობასა და საბოტანიკო ეკსპედიციე-  
ბის თაობაზე. ცხადად ეტყობოდა, რომ ათასმა ლანდებმა,  
ცუდმა სიზმრებმა, რომელიც იმას მოეველინა მთებში, არ და-  
კარგვინა არც სიმხიარულე და არც მადა. მეორე დილით მონ-  
ტანელიმ რომ გაიღვიძა, არტური სადღაც გამქრალიყო. წა-



სულიყო მზის ამოასვლამდე მთებში, რომ მოხმარებოდა განსა-  
რას თხების გარეკაში. მაგრამ საუზმე ახლად დაწყებული იყო,  
რომ არტური შემოეარდა ოთახში თავშიშველი. მხარზე შეესვა  
პატარა, სოფლელი გლეხის გოგო, სამის წლისა და ცალ ხელ-  
ში ერთად შეკრებილი მრავალი ტყის ყვავილები ეჭირა.

მონტანელიმ შეხედა ღიმილით და გაიფიქრა: რა საო-  
ცარი ცვლილებაა პიზაში და ლიგორნოში ჩაფიქრებულსა და  
აქ სიცოცხლით სავსე არტურს შორის!

— სად იყავ, ჩემო ცელქო? მთა-მინდორში დახტოდი  
მშიერი?

— ოხ, მამაო, რა კარგი იყო! მთები საუცხოვოა მზის  
ამოსვლის დროს. ნამი მთებზე ისეთი სქელია, ისეთი... აი ნა-  
ხეთ!—მან გამოიწვდინა ფეხი და აჩვენა ნამისაგან დასველებუ-  
ლი, ტალახიანი ფეხსაცმელი.

— ჩვენ წავიღეთ თან პური და ყველი, ვიშოვნეთ თხის  
რძე—უჰ, რა კარგი ყოფილა! თუმცა ეხლაცა მშიან. და აი,  
ამსაც უნდა ვაჭამო, პატარა ანნეტს.

— გინდა თაფლი?

დაისვა ბავშვი მუხლებზე და მოეხმარა ყვავილების ერთად  
შეკვრაში.

— არა, არა,—ჩაერია მონტანელი,—მე არ მინდა, რომ  
გაცივდე. გაიქეც, ტანისამოსი გამოიცვალე.

— მოდი ჩემთან ანნეტტ!—სად შეჰხვდი ამ ბავშვს?—ჰკით-  
ხა არტურს მონტანელიმ.

— იქ, სოფლის განაპირას. მაგისი მამა ის კაცია, გუშინ  
რომ ჩვენ ენახეთ,—სოფლის მექალამნე. შეხედეთ, საუცხოვო  
თვალეები აქვს, არა? ჯიბეში კუ უძევს და კაროლინას ეძახის.

როცა არტური დაბრუნდა ტანისამოს გამოცვლილი სა-  
უზმედ, ბავშვი მონტანელის უჯდა კალთაში და მხიარულად  
ტიტინებდა, თავის კუს შესახებ, რომელიც ხელის გულზე ეჭი-  
რა გადაბრუნებული, რომ ბატონს მონტანელს კარგად დაე-  
ნახა იმისი დახლართული ფეხები.



— შეხედეთ! — ეუბნებოდა ძლიეს გასაკების ენით, — შეხედეთ კაროლინას ფეხსაცმელებს!

მონტანელი ეთამაშებოდა ბავშვს, თავზე ხელს უსვამდა, უამბობდა საოცარს ზღაპრებს და ულოლიავებდა იმის კოროლინას.

სასტუმროს პატრონი, მოსული სუფურის ასალაგებლად, შესდგა გაოცებული ბავშვის დანახვაზე, რომელსაც ძირიანად გადმოებრუნებინა ჯიბეები პატივცემულ ანაფორიან ბატონისათვის.

— ღმერთი თითონ ასწავლის ბავშვებს კეთილ ხალხის ცნობას, — სთქვა მან. — ანეტს ეშინიან უცხო ხალხისა, აქ კი, დახეთ, სრულიად არ უცხოვობს ამ ღირსეულ მამას. — აი, ტუ-ტუცი! დაიჩოქე, ანეტტ, სთხოვე კეთილ ბატონს ლოცვა-კურთხევა, მანამ წაბრძანდებოდეს. მაგისი ლოცვა-კურთხევა ბედნიერება იქნება შენთვის.

— არ ეგონა, თუ ასე შეგეძლოთ ბავშვებთან დროს გატარება, — უთხრა არტურმა ერთის საათის შემდეგ, როცა ისინი დასეირნობდნენ მზისაგან გაბრწყინვალებულ ხავერდით მწვანეზე. ბავშვი თვალს არ გაშორებდათ. იცით, მე ვფიქრობ რომ....

— რასა?

— მე მხრლოდ მინდოდა მეთქვა.... მე მგონი არ არის კარგი, რომ ეკლესია უკრძალავს სამღვდელოთ ცოლის შერთვას, ვერ გამიგია კარგად, რა უნდა იყოს ამის მიზეზი. ბავშვების აღზრდა ისეთი ძნელია და უმთავრესი აზრი აღზრდისა ის არის, რომ სიყრმიდანვე კეთილ საზნებობრიო გავლენის ქვეშ იზრდებოდნენ პატარა არსებანი. მე მგონია, რამდენადაც მაღლა სდგას წოდება კაცისა და რამდენადაც უფრო წმინდაა იმისი ცხოვრება, იმდენად უმეტესად შეუძლიან ამისთანა კაცს იყოს ნამღვილი მამა. დარწმუნებული ვარ, თქვენ რომ არ აღგეთქვათ უცოლობა და მეუღლე გყოლოდათ, თქვენი შვილები იქნებოდნენ ძალიან...

— სუ!....

მონტანელომ ეს „სუ“ სწრაფად და ჩურჩულით წარმო-  
 თქვა, რამაც კარგა ხნის სიჩუმე გამოიწვია.

— მოძღვარო, — დაიწყო ისევ არტურმა დაღონებით, მონ-  
 ტანელოს დაღვრემილ სახეს რომ შეხედა. — განა მე ცუდი ვთქვი  
 რამე? იქნება ვტყუებდებოდე, მაგრამ არ შემძლიან დავფარო  
 და არ წარმოვთქვა ის, რაც ფიქრად მომდის.

— შეიძლება, შენ სრულიად არ გესმოდეს აზრი იმისა, რაცა  
 სთქვი. — უპასუხა მონტანელომ ტკბილის ხმით, — შენ სულ-  
 სხვა თვალთ დაუწყებ ცქერას ამ საგანს, რამდენიმე წლის  
 შემდეგ. მანამდის კი სხვა რამეზე ვილაპარაკოთ; ის ემჯობი-  
 ნება.

ეს პირველი დარღვევა იყო სრულის ჰარმონიისა მთელს  
 იმათ იდეალ-მოსილ, საუცხოვო მოგზაურობის დროს. შამუნი-  
 დან ისინი გაემგზავრნენ მარტინს, სადაც გაჩერდნენ დასასვენ-  
 ნებლად, რადგან ძალიან ჩამოცხა. ისინი დასხდნენ სასტუმ-  
 როს აივანზე. საიდანაც საუცხოვო დასანახი იყო მთები. არ-  
 ტურმა ამოიღო საბოტანიკო კოლმექციები და დაიწყო მსჯე-  
 ლობა ბოტანიკის შესახებ იტალიურს ენაზე. იქვე ახლოს იჯ-  
 და ორი ინგლისელი მხატვარი. ერთი იმათგანი ხატავდა და  
 მეორე ხმა-მალლა ლაპარაკობდა. არტურს ფიქრადაც არ მოს-  
 დიოდა, რომ უცხოელნი გაიგონებდნენ იმის ლაპარაკს.

— ვილლი, დაანებე მაგ პეიზაჟების თხუპუნას თავი, — უთხ-  
 რა ერთმა ამხანაგს, — და დახატე აი, ეს იტალიელი ყმაწვილი,  
 რომელიც ალტაცებაში მოდის რალაც ხავსების ნაკუწებით. შე-  
 ხედე იმის ისარივით მოხრილს წარბებს! მიეც იმას ხელში მიკ-  
 როსკობის მაგიერ ჯვარცმა, შემოსე, მთიულის ტანისამოსის  
 მაგიერ, რომაელთა \*) ტოვით, და გამოვა ნამდვილი ქრისტი-  
 ანი პირველის საუკუნოებისა!

— კარგი ქრისტიანია! მე მაგ ყმაწვილის გვერდით ვი-  
 ჯექ სადილად და ასეთსავე ალტაცებაში მოჰყავდა შემწვარ ჩიტს,

\*) უწინდელ რომაელთა თეთრი სამოსელი, რომელიც მთელის ნაჭ-  
 რისაგან არის შემდგარი და რომლის წამოსხმის დროსაც მარჯვენა მკლავი  
 შიშველი რჩება.

როგორც ეხლა მტერიან ბალახებს მოჰყავს. მაგისი, სახე ზეთის ხილის ფერი, მშვენიერია, მაგრამ მამა მაგისი ორჯელ მაგაზე უკეთესია.

— მამა?

— ჰო, მამა, იმის პირდაპირ რომ ზის, ნუ თუ ვერ შენიშნე? გასაოცარი სახე აქვს.

— აი, შე გამოჩერჩეტებულო, ფრანგების მღვდელიც ვერ გიცვნია.

— მღვდელი? აი, ეშმაკმა წაიღოს! მართლა მღვდელი არ ყოფილა. მე კი დამავიწყდა — „აღთქმა უმანკოებისა“, და სხვ... და სხვ...

— ჰო, კარგი, ვიყვნეთ მოწყალენი და ეს ყმაწვილი იმის ძმისწულად ჩავთვალეთ.

— რა სულელები არიან! — წასჩურჩულა არტურმა მონტანელლის, მომლიმარის თვალებით. — თუმცა კარგია იმათ მხრივ, რომ მე და თქვენ ერთმანეთს გვამგზავსებენ. მართლაცა და, ჩემთვის სასურველიცაა, რომ თქვენი ძმისწული ვიყო; მამაო, რა მოგივიდათ? როგორ გაფითრდით!

მონტანელი წაშოდგა და შუბლზე ხელი გადასვა.

— თავს ბრუ დამეხვა, — სთქვა მან ჩახლეჩილის ხმით, — ალბად დიდ ხანს ვიყავ მზეზე დღეს. წავალ ცოტა ხანს წამოვწვები. ეს მხოლოდ სიცხისაგან მომდის, ჩემო კარგო!

ორის კვირის შემდეგ, რომელიც გაატარეს ლიუცერნის ტბაზე, დაბრუნდნენ იტალიაში. ილბალზე დარიც კარგი დაუდგათ და სიამოვნებით იმოგზაურეს. მაკრამ პირველ მოგზაურობის მომხიბლველი შთაბეჭდილება კი გაჰქრა ახლა.

მონტანელს სულ ის ფიქრი აწუხებდა, რომ მანამ ისინი ერთად მოგზაურობდნენ, უნდა არტურთან „უფრო გაგებით ელაპარაკნა“. აერაში განგებ არ ენებოდა იმ საგანს, რაზედაც მაგნოლიის ქვეშ ილაპარაკეს.

ულმობელობა იქნება ჩემის მხრივ, — ფიქრობდა მონტანელი, — რომ ჩავამწარო არტურს ალპის მთების მშვენიერ მღე-

ბარეობით გამოწვეული აღტაცება; ჩემი გამომგლავებული ლაპარაკი აუცილებლად სამძიმო იქნება მისთვის! მხოლოდ მარტინში ჩამოსვლის პირველ დღიდან ყოველ დილას სულ ამას ფიქრობდა: იმას ხვალ მოველაპარაკებო. დაბინდებოდა და საღამოსაც იმასვე იმეორებდა:—მოველაპარაკები ხვალაო. იმათი მოგზაურობა თავდებოდა კიდევ და ის კი იმეორებდა: ხვალ! ხვალაო! შემაძრწუნებელი წინაღ-გრძნობა, რაღაც უხილავი დამაბრკოლებელი მიზეზი, რომელიც უნდა ჩამდგარიყო მათ შორის, აშინებდა მონტანელის და სდუმდა. ბოლოს, მოგზაურობის გათავების უკანასკნელ დღეს, მონტანელი მიხვდა, რომ, თუ ეხლა არ მოველაპარაკე, სხვა დროს სულ ვეღარ მოვახერხებო. იმ დამეს ჩამოხდნენ ლუგანოში და მეორე დღეს უნდა გამგზავრებულიყვნენ პიზას. მონტანელის უნდოდა გაეგო ყოველივე თუ არა, ის მაინც, იმისმა საყვარელმა არტურმა, რამდენად შესტობა იტალიის პოლიტიკის მორევში.

— წვიმამ გადილო, ჩემო კარგო, — უთხრა მან მზის ჩასვლის შემდგომ, — და თუ ტბის ნახვა გვინდა, უნდა ავჩქარდეთ. წამოდი, მე შენთან ლაპარაკი მინდა...

გაიარეს მდინარის ნაპირი, მივიდნენ მიჩუმებულ—მყუდრო ალაგს და ჩამოხდნენ ჭვითკირის დაბალს კედელზე. იმათ პირდაპირ ამართულიყო ბუჩქი ჯიგრის ფერის ვარდებით. რამდენიმე დაგვიანებული, მალალ-ღეროიანი კუკური გადმოხრილიყო, წვიმის წვეთებით დამძიმებული. მწვანე ტბის ნაპირად სკურავდა პატარა თეთრ-აფრებიანი ნავი. ეს ნავი ისეთი სუბუქი და ადვილად გასატეხი მოსჩანდა, როგორც ვერცხლის ყვავილების კონა, წყალში ახლად გადაგდებული. მონტე-სალვადორის მალლობზე რომელღაც ქოხის ფანჯარა მოსჩანდა. ვარდებს დაეხარათ თავები და სთვლემდნენ ენკენისთვის ღრუბლიან ცის ქვეშ. წყალი კი ქანაობდა, ხვდებოდა ნაპირზე მიყრილ-მოყრილ კენჭებს და ციმციმებდა.

— დღეს უკანასკნელი შემთხვევა მაქვს, მშვიდობიანად მოველაპარაკო — დაიწყო მონტანელი. — შენ ეხლა დაუბრუ-

ნდები სკოლას, მუშაობას და შენს მეგობრებს. მეც ამ ხან-  
თარს ბევრი სამუშაო მექნება. მე მინდა კარგად გავიგო, თუ  
როგორია ჩენი ურთი-ერთ შორის დამოკიდებულება,—და ამ  
გვარად, თუ შენ,—მღვდელი შეჩერდა და ისე განაგრძო უფ-  
რო ნელა;—თუ შენ გრძნობ, რომ შეგიძლიან მენდობოდე  
წინანდებურად, მინდა მითხრა გადაჭრით, უფრო გაგებით, ვი-  
დრე იმ საღამოს სემინარიის ბალში, თუ რამდენად შორს წა-  
ხვედი.

არტური წყალს დასცქეროდა, წყნარად უსმენდა და ხმას  
არ იღებდა.

— მე მინდა ვიცოდე,—განაგრძო მონტანელლიმ,—აღთ-  
ქმა ხომ არა გაქვს დადებული, ან სხვა რამ პირობა?

— რა ვთქვა, ძვირფასო მამავ, მე არა მაქვს-რა სათქმე-  
ლი. ჩემი თავი მე არ შემობოჭავს, მაგრამ ვარ კი შებოჭვი-  
ლი.

— ვერა გამიგია-რა.

— რა აზრი აქვს აღთქმას? ის ვერ შეჭბოჭავს ადამიანს.  
კაცი თუ მტკიცედ ეკიდება საქმეს, მით თითონ უკავშირებს  
თავის თავს საქმეს. და თუ გულითადი მისწრაფება არა აქვს,  
აღთქმა ვერ შეიძლება იმის შებოჭვას,

— შენ ის გინდა სთქვა, რომ ეგ საქმე, ანუ გრძნობა  
მტკიცე და შეურყეველია? არტურ, მოიფიქრე, რასაც ამ-  
ბობ.

არტური მობრუნდა და შეჭხედა პირდაპირ თვალეში  
მონტანელლს.

— მოძღვარო, თქვენ მეკითხებოდით, შემოძლიან თუ არა  
გენდობოდეთ. თქვენ კი მენდობით? თუ რამ სათქმელი იყოს,  
მე კიდევ გეტყოდით, მაგრამ ამ საგანზე ლაპარაკს არავითა-  
რი აზრი არა აქვს. მე არ დამვიწყებია და არც არასოდეს  
დავივიწყებ, რაც თქვენ იმ საღამოს მითხარი. მაგრამ უნ  
და კი ვიარო ჩემის გზით, გავყვე იმ ნათელს, რომელსაც მე  
ვხედავ.



მონტანელი მოსწყვიტა ვარდი ბუჩქიდან, შემოჰგლი-  
ჯა ერთი მეორის მიყოლებით ყველა ფურცლები და გადის-  
როლა წყალში.

— შენ მართალი ხარ, ჩემო კარგო... ნულარ ეილაპარა-  
კებთ ამაზე. მართლაცა და, ბევრი სიტყვები აღარას გვიშველის,  
სულ ერთია, წავიდეთ შინ.

(შემდეგი იქნება)

*[Faint, illegible text, likely bleed-through from the reverse side of the page]*

# და მონეგულნი

რომანი ბოლშევიკთა ცხოვრებიდან

ავ. ვაზოვისა

XVIII\*)

## ზოლიტიკა და თეატრი

წარმოდგენის შემდეგ მესამე თუ მეოთხე დღეზე განკის საყავეში, როგორც ყოველთვის, დილიდანვე ხალხის ტევა არ იყო. აქ იკრიბებოდნენ ყველანი, როგორც მოხუცი, ისე ახალგაზდა; აქა ჰქონდათ ლაპარაკი საზოგადო საქმეთა შესახებ, აქ უნდა განეხილათ ევროპის საგარეო და საშინაო პოლიტიკის შესახები კითხვები, — ერთი სიტყვით, ეს საყავე პატარა პარლამენტსა ჰგავდა. მაგრამ ახლა „გენოვევას“ წარმოდგენა ჰქონდათ სალაპარაკოდ და ეს ყველაზე მეტ მასალას აძლევდა იქ დამსწრეთ. ბევრს რასმე ამბობდნენ წარმოდგენის დარბაზში ნამდერებ სარეგოლიუციო სიმღერის შესახებ და ყველანი ერთი-მეორეს გაცხარებით ებაასებოდნენ. ახლა, როცა ყველანი დამსვიდნენ, ზოგიერთებმა ოგნიანოვის საქციელს დაუწყეს კიკცვა. ოგნიანოვის პიესის გმირის გრაფის სახელი შერჩა, როგორც ეს საზოგადოდ იმ სცენის მოყვარე მოთამაშეებს ემართებათ ხოლმე, რომელთაც თამაში მაყურებლებს საშინლად მოეწონებათ; ამნაირადვე, ფრატიუს თავისი სახელი

\*) იხ. „მომბე“ 1899 წ. № V.



„გალოსი“ შერჩა, და ჯერ ამ დილასაც კი მოხუცნი მტროვლის თვალით უყურებდნენ და გულმოსულნი იყვნენ მაზედ, — გენოვევას ისე უდიერად რად მოექცაო?

ერთმა დედაბერმა ქუჩაში გააჩერა და უთხრა:

— შვილო, ერთი ეს მითხარ, ასე რად მოიქეცი? ცოდვა არ არის!

ამ დროს საყავეში პატივცემული მიჩო ბეიზადეტი შემოვიდა, და ლაპარაკის საგანი პოლიტიკა შეიქნა ყველასათვის.

მიჩო ბეიზადეტი მოხუცებული, დაბალი, შავგერემანი კაცი იყო. როგორც ყველა მისი ხნის მოხუცი, მიჩო უსწავლელი იყო, მაგრამ ცხოვრებამ და სხვა-და-სხვა ტანჯვა-განსაცდელმა ჭკუა-გონება განუვითარა. შავი, ცოცხალი, მოძრავი და ჭკუით საესე თვალები გამხმარსა და დანაოკებულ სახეზე უბრწყინავდა. ერთი უცნაური ხასიათი ჰქონდა და ამ ხასიათისა გამო ყველასათვის თითოთ საჩვენებელი გახდა: საშინლად უყვარდა პოლიტიკის შესახებ ლაპარაკი და მეორეც ისა, რომ დარწმუნებული იყო — დღეს არა, ხვალ დაემხოზა ოსმალეთიო. რა თქმა უნდა, ამასთან, რუსების თავგამოდებულ მომხრედ ითვლებოდა და ხანდისხან იქამდე მივიდოდა საქმე, რომ ადამიანს სიცილს მოჰგვირდა მისი ყურება. ყველას ახსოვდა მისი საქციელი ერთს ეგზამენზე. ერთმა მოსწავლემ სთქვა, სებასტოპოლის ომში მტრებმა რუსები დაამარცხესო. — „შენ სცდები, შვილო, არ შეიძლება, რომ რუსები დამარცხდნენ; მასწავლებლისათვის რაც ფული მიგიცია, უკანვე გამოართვი, ტყუილად დრო დაუკარგვინებია შენთვის,“ — უთხრა გაბრაზებულმა მიჩომ. მაგრამ ამ დროს მასწავლებელი მივიდა მიჩოსთან, გადაუშალა ისტორიის სახელმძღვანელო და დაუშტკიცა, რომ რუსები ყირიმის ომში დამარცხდნენო. მაშინ მიჩომ ყვირილი დაიწყო, ისტორია სტყუისო. და რადგან მაშინ სასწავლებლის მზრუნველი იყო, მასწავლებელი დაუყონებლივ დაითხოვა ადგილიდან.

ბუნებით ნერვიანი იყო მიჩო, თუ ვინმე მის და ან მისის რწმენის წინააღმდეგ რასმე იტყოდა, მაშინათვე თოფის წა-



მალსაით იფეთქებდა. აპილობილდებოდა, მოწინააღმდეგეს მი-  
ვარდებოდა, ილანძლებოდა. განკოსთან მიჩო მხიარული შემო-  
ვიდა და ძლევამოსილი სახით წამოიძახა:

— ისევ ჩვენებმა გაიმარჯვეს!

— როგორ?—დაიძახეს სიხარულის ხმით იქ დამსწრეებმა.

— ლიუბობრატიჩსა და ბეჟო პეტროვიჩს რამდენიმე ათა-  
სი ოსმალო აუკუწნიათ,—სთქვა ბი მიჩომ. ახალ ამბავს ნაწ-  
ყვეტ-ნაწყვეტად ამბობდა, რომ იქ მყოფნი დიდხანს დაეტკბო  
სასიამოვნო ამბის სმენით.

— ვაშა! გაუმარჯოს!—დაიძახა რამდენიმე ერთხმად.

— პოდგორიცაც აუღიათ,—განაგრძო ბი მიჩომ.

ყველანი ისე გაოცდნენ, თითქო პოდგორიცა კი არა,  
ვენა აუღიათო.

— თავისნებით მებრძოლნი და თოფ-იარაღი რამდენიც  
გინდა, იმდენი მოდის ავსტრიიდან.

— მართლა?!

— ბოსნიაში ხელახლა იფეთქა ცეცხლმა, სერბიაც ჩუ-  
ჩუნებს და ჯარებს ამზადებს. თუ სერბია ადგა, ჩვენც ფეხზე  
დაგვაყენებს. მაშინ—ბოლო მოეღება ჩვენს ბატონებს..

— ჯანდაბას მათი თავი და ტანი!

— ავსტრია თავისთვის უნდა იღვეს, ამიტომ რომ გორ-  
ჩაკოვი პეტერბურგიდან უბრძანებს: გაჩერდი, დეე ერთმანეთს  
ეძინძგლავონ, ეს მათი შინაური საქმეაო. წესი აეგებათ, წესი...

ყველამ ყურები სცქვიტა და კეთილშობილურის სიამოვნ-  
ებით ისმენდნენ ჩორბაჯი მიჩოს ნაამბობს.

— რამდენი სულია დახოცილი?—ჰკითხა ნიკოდიმმა.

— ოსმალები? აკი გითხარი, ათასობითაა დახოცილი-მეთქი!  
ჩაადე ორი, სამი, ათი ათასი,—სულ ერთია, შეცდომა არ  
მოგივა. ვაშა, გერცოგოვინელნო! ბიჭებიც იმათთანა უნდა!

— საუცხოვოა, თუ მართლა ასეა.

— გეუბნები, მართალია-მეთქი.

— მერე სად გაიგე ეს ამბავი?—ჰკითხა ჩორბაჯი მარკომ.



— სანდო კაცისაგან გავიგე, ჩემო კარგო! კირ გირჩევი იზმირლიატს ამ სამის დღის წინად კარლოვოს მეთუთქემ, იანაკი დაფნისმა, უამბო, ეს ამბავი ტრიესტის გაზეთშია დაბეჭდილიო.

— არა მჯერა, გერცოგოვინელებს დიდის საქმის გაკეთება შეეძლოთ... იბრძოლებენ, იბრძოლებენ, სანამ არ დაიღლებიან. რა ბევრნი ისინი არიან?—სულ ერთი მუქა ხალხია,—სთქვა პავლაკიმ, და სხვებმაც თანხმობის ნიშნად თავები დაუკანტურეს.

— აკი გითხარი, პავლაკი; რამდენია გერცოგოვინელები?—ერთი მუქა ხალხია. ოსმალებს იმათი არ შეეშინდებათ,—სიტყვა ჩაურთო ჰაჯი სმიონმა და თან სწორება დაუწყო მარცხენა ფეხე ჩაცმულ წინდასა.

ჩორბაჯი მიჩომ გაცხარებულად უპასუხა:

— შენ, პავლაკე, მაპატივე, და შენც ჰაჯი, არაფერი გაგებათ... პოლიტიკაში „არაფრისაგან“ „რაღაც“ გამოდის... თვითონ გორჩაკოვმა სთქვა, გერცოგოვინია ისეთს ნაპერწყალს ისვრის, რომ მთელს ოსმალეთის სახელმწიფოს უშველებელ ცეცხლად მოედებაო.

— ჩემის აზრით, ამას დერბი იტყოდა,—ჩაერია ლაპარაკში საქმის მკოდნე კაცის სახით ფრატიუ.

ჩორბაჯი მიჩომ კოპები შეიკრა.

— დერბი, როგორც ინგლისელი, სულთნის საწინააღმდეგო სიტყვებს ვერ იტყოდა... ვიცით, რაც არის ინგლისის პოლიტიკა: ოსმალეთში ყველაფერი მშვენიერადაა, ოსმალეთში—ყველაფერი ჰყეაყისო. მე შენ გეუბნები—დერბი ამებს არ იტყოდა-მეთქი.

— ასეა, ფრატიუ, ასეა, არ უთქვამს,—კვერი დაჰკრა ჰაჯი სმიონმა.

— როცა ცეცხლი იფეთქებს და ცარგრადს გადაჰბუგავს, მაშინ სამარადისოდ მოვწყდებით ამ ურჯულოებს,—სთქვა ივანჩო დუდომ, მეწაღემ, რომელიც, უნდა გამოვტყდეთ, პოლიტიკაში ხამი იყო.

— ჩვენ სხვა ცეცხლის შესახებ ვლაპარაკობთ, ივანჩო, — უთხრა სერიოზულის სახით პავლაკიმ.

— ნამდვილი ცეცხლი ჯერ წინაა, როცა აინთება ბოლგარეთი, — შენიშნა ფრატიუმ.

— ბოლგარეთი რად-ღა უნდა აენტოს? არა ხამს, ბოლგარეთი ცეცხლში ჩაეარდეს. ჩვენ ჭკუიანად უნდა ვისხდეთ. ხომ დანახეთ, ზაგორაში რა ღეთისრისხვა დატრიალდა? — წარმო-სთქვა პირქუშად ჩორბაჯი დიმომ.

— შენ, ფრატიუ, ასე იმიტომ ამბობ, — უთხრა დონჩო ფურნაჯიატმა, — რომ როცა ასეთი ამბავი მოხდება, რუმინიაში გაიქცევი და იქ დაიწყებ ყვირილს: გამაგრდით! და აქ ჩვენ თავებს დაგვჭირან...

— ამას ნუ მეუბნები. ბაი დიმომ აღამიანის ფასი იცის...

— სცდები, მე აქ დავრჩები და მსხვერპლსაც შევსწირავ ქვეყანას.

— ცეცხლი თუ ასანთებია, დეე ახლავე აენტოს. ოსმა-ღეთი განა სამეფოა? იმას ცეცხლი ახლაც უკიდია, კვამლი არა სჩანს თორემ. ეს სამეფო კი არა, ნაგავია, ნეხვია...

— ფიქრი ნუ გაქვთ, დიდხანს არ დაგვჭირდება ლოდინი, — სთქვა ბაი მიჩომ, — გადაწყვეტილია, ოსმალეთი უნდა დაემხოს.

— აგრეა, აგრე, — ჩაერია ლაპარაკში მღვდელი სტავრი, — მათი აღსასრულის დღე დადგა. საითკენაც არ მიიხედავ, — დი-დი და პატარა — სულ ამის შესახებ ლაპარაკობენ. ცოლებსა და ქალებსაც კი ეს გახდომიათ სალაპარაკოდ. თქვენ მათი სიმღერები უნდა გაიგონათ. წინად სულ სტიროდნენ, ვიშვი-შებდნენ, ახლა კი სიმღერებში ის-ღა გესმით — თოფები იცლე-ბა, ხმლები ელავენ, ოსმალეები იეუეებიანო და სხ. მისთანები. ყმაწვილკაცები კი მთელი დღე მონასტრის ევლზე არიან: თო-ფები უჭირავთ და სროლას სწავლობენ. ჩემ განკოს დამბაჩე-ბისა და თოფებისათვის საიდანლაც თავი მოუყრია და, ბავშ-ვებს სკოლიდან დაითხოვეს თუ არა, ჩაუჯდება და იარაღს ეა-ღერსება. ვკითხე, ესენი რად გინა, შეილო-მეთქი? „მალე სა-ჭირო იქნება, მამილო,“ — მიპასუხა, — „მალე ისეთი დრო და-



დგება, რომ თოფები ოქროს ფასად გაიყიდებაო.“ ჩვენ უნდა ვთქვათ, რომ ეს არის კი ღირსი და, ამ ბუნდ დროებას უყველად რამე მოჰყვება. ღმერთო, შენ დაგვიფარე!

გულ-კეთილი სტაერო მართალს ამბობდა. სტეფანოვის აზრით, რაც ოგნიანოვი გაჩნდა, ეს რამდენიმე თვეა, ყმაწვილ-კაცობას რაღაც მოძრაობა დაეტყო, ეს მოძრაობა თან-და-თან იზრდებოდა, განსაკუთრებით მას შემდეგ, რაც ენკენისთვეში ამბოხება მოხდა ძველ-ზაგორაში.

ლხინისა და დროს-გატარების დროს ახალ-გაზდები პატრიოტულ სადღეგრძელოებსა სვამდნენ და გამოჩინებულად ლაპარაკობდნენ ამბოხების შესახებ; მონასტრის მიდამოში მთელი დღე თოფებს ისროდნენ და ახალ-გაზდობა ნიშანში სროლას სწავლობდა. სარევიოლუციო სიმღერები მოდაში შემოვიდა და ყველგან მღეროდნენ: სახლებში, ღამის თევაში, ქუჩებში. გამეღვლე-გამომეღვლეს ყოველს ნაბიჯზე ესმოდა, როგორ იმღეროდნენ ქალები:

„ნუ სტირ, საცოდავო დედავ,  
ნუ ნაღვლობ და ნუ ღერი ცრემლსა,  
რომ გაიდუკად ვიქეცი,  
გაიდუკად, მუამბოხედი!“

ან და პატივცემული დედა რამდენისამე შვილებისა გატაცებით მღეროდა:

„ვასწით წინ, ძმანო მებრძოლნო,  
ურთგულევით დროშებსა:  
ჩვენ ეხლა უკვე აღარ ვყმობთ,  
არცა ვმორჩილებთ ჩვენს მტრებსა.“

მაგრამ ამ პლატონურ სიტყვებს ოსმალები დიდს ყურადღებას არ აქცევდნენ იმიტომ, რომ სძულდათ ბოლგარები და მათი სიმღერებიცა. რაც სექტემბერში ბოლგარელნი მუამბოხენი ძველს-ზაგორაში დამარცხდნენ, ოსმალთ გამოიღვიძეს და ბოლგარების თავზე ღვთის რისხვა დაატრიალეს.

ხევებში სულ რამდენიმე თოფი დაიცალა და ამისთვის ოსმალებმა უსულ-ღმერთოდ დაუშინეს სეტყევასავით ტყვიები

ბოლგარეთის მშვიდობის მოყვარე მცხოვრებლებს; ბოლგარელი ქალები სარევოლუციო სიმღერებს რისთვის მღერიანო და ყველას ნამუსი აჰხადეს, ბავშვები ამოჟლიტეს. ოსმალები ელექტავდნენ უიარალო მგზავრებს, სწვავდნენ მცხოვრებთა კარმიდამოსა, ტყვედ მიჰყავდათ, ვისაც მოახელებდნენ, ნადაელს პოლიციელებს უყოფდნენ. მთელი ფრაკია ჰვენესოდა და ჰგმინავდა ოსმალების მხეცობისა და ძალ-დატანებისაგან.

ბაი მარკო ბევრ რაშიმე ეთანხმებოდა ბაი მიჩოს, მაგრამ აჯანყების შესახებ სულ სხვა აზრისა იყო.

თვით ფიქრი აჯანყების შესახებ სისულელედ მიაჩნდა და ყოველ საშიშ სიტყვისათვის, რომელსაც ოგნიანოვისაგან გაიგონებდა, ამ უკანასკნელს საშინელს საყვედურს ეუბნებოდა, თუმცა ოგნიანოვი ძალიან უყვარდა და ყველგან და ყველასთან ხელს აფარებდა და ეხმარებოდა,

— ეს თავქარები, მონასტრის მიდამოებში საბრძოლველად რომ დაწინააღმდეგებენ, სრულებით არ მაკვირვებენ, მაგრამ ის კი ვერ გამიგია, ჭაღარა-შერთული ადამიანები როგორ აჰყოლიან მათს ფეხის ხმასა!... სახუმარო საქმე კი ნუ გგონიათ ცეცხლთან თამაში! როგორ, ხუთი საუკუნე მეტია სახელმწიფო არსებობს, მთელს ქვეყნიერებას თავზარსა სცემს, და ახლა, რამდენსამე ბიჭ-ბუჭებს კაჟიანის თოფებით უნდათ დაამხონ?! ჩვენ შიგ ჯოჯოხეთში ვზივართ. აჯანყებო? ღმერთმა დაგვიფაროს, თორემ სუყველანი დავიღუპებით!... ქვა-ქვაზე აღარ დარჩება აქ!...

დალაქი განკო გამოეხმაურა:

— ბაი მარკო მართალს ამბობს, აჯანყება ყველას წაგეწყმენდავს სულითა და ხორციით...—ეს რომ სთქვა, განკომ ჰერს შეხედა, რომელზედაც ეწერა—ვის რამდენი ემართა მისი.

ბაი მარკოს საყვედური მიჩოს ეწყინა და გულმოსულმა უთხრა:

— შენ, მარკო, ჰკვიანურად ლაპარაკობ, მაგრამ შენზე უფრო ჰკვიანებიცა გყავს და ისინი ამბობენ, ყოველივე ეს ახდებოა, ოსმალებს ასე, თუ ისე, ბოლო უნდა მოეღოს.

— თქვენის წინასწარმეტყველებისა მე არა მრწამს-რა, — უთხრა ბაი მარკომ და წარმოიდგინა მარტინ ზადეკი, რომელსაც მიჩო ისე ენდოლოდა, როგორც „მამა ჩვენ“-ს. — არამც თუ შენი ზადეკა, თვით სოლომონ ბრძენი რომ მოვიდეს და მითხრას, მაინც არ დავიჯერებ, რომ ჩვენ რისამე გაკეთება შეგვიძლია .. ხოლო ბავშვური თამაშობისა მე არა მრწამს-რა.

— მარკო, თუ კი ეს ღვთისაგან არის ნაბრძანები? — უთხრა მღვდელმა სტავრიმ.

— ღმერთმა გვიბრძანა, მამაო, ქუუიანად ისხედითო. თუ მართლა ღმერთმა გადასწყვიტა ოსმალეთის დამხობა, ჩვენისთანა ქიებს არ მიანდობს ასეთის საქმის ასრულებას.

— ღმერთი ვისაც მიანდობს, ახლაც ვიცით, ჩემო მეგობარო! — უთხრა პავლაკიმ.

— პაპა ივანეს, პაპა ივანეს! \*) — დაიძახა უმრავლესობამ.

მიჩოს სახეზე კმაყოფილება გამოეხატა. საჩქაროზე დაიწყო ისევ ლაპარაკი:

— მე რაღას ვამბობ? მე ვამბობ და მესმის კიდევცა, რასაც ვამბობ. ჯერ ჩვენ დავიძვრით და მერე რუსები მოგვყვებიან თვით წმიდა სოფიომღე. \*\*) იმათ დაუკითხავად როდის რა გვიქნია? ლიუბობრატიჩს ამათვან რომ არა ჰქონოდა ზურგი მომაგრებული, განა შეეძლო ეს ქოფაკები ათასობით აეკუწა? მითქვამს და დამიჯერეთ: ოსმალეთის დღენი დათვლილია, როგორც დღენი ქლექიანისა. ეს გადაწყვეტილია, წინ არა უდგას-რა... ვისაც არა სჯერა, ყური მიგდეთ ისევა: „სტამბოლი, სულთნის სატახტო ქალაქი, ისე იქმნება აღებული, რომ ერთი წვეთი სისხლი არ დაიღვრება“...

ბაი მიჩო ისე შევიდა ლაპარაკის ეშხში, რომ ზეზე წამოიქრა და დიდის აღელვებით ხელების ქნევა დაიწყო.

\*) ბოლგარეთში იმედი ჰქონდათ — რუსები განგვათავისუფლებენ ოსმალთა მონობისაგანო და „პაპა ივანეს“ ეძახდნენ თავიანთს მომავალ განმათავისუფლებელთ.

\*\*) სტამბოლში ტაძარს ეძახიან.

— ეს როდის უნდა ასრულდეს? — ჰკითხა მღვდელმა სტაერომ.

— მე თქვენ მოგახსენებთ — ჩქარა-მეთქი, მოახლოვდა ქამი. სწორედ ამ დროს კარი შემოიღო და შემოვიდა ნიკოლაი ნეტკოვიჩი; ახალი ნომერი გაზეთ „საუკუნე“-სი, ის-ის იყო, მისვლოდა და ხელში ეჭირა.

— ნიკოლა, ახალი რა სწერია? — ჰკითხეს რამდენმამე ერთად; — წაგვიკითხე, წაგვიკითხე!

— აბა ერთი ყური დაუფუგლოთ, ბევრს ოსმალოს გააგდებინა თავი ლიუბობრატიჩის დანამა? — წარმოსთქვეს სხვებმა მოუთმენლად.

— აკი გითხარით, ათასი-მეთქი! აბა აქ დაჯექი, ნიკოლა, — და ბაი მიჩომ თავის გვერდით დაუცალა ალაგი.

ნიკოლაი ნეტკოვიჩმა გაზეთი გაშალა.

— ჯერ გერცოგოვინელების აჯანყების ამბავი წაგვიკითხე. — უთხრა მიჩომ.

ბუზის ფრენას გაიგონებდნენ, ისეთი სიჩუქე ჩამოვარდა. ნეტკოვიჩმა გაზეთის კითხვა დაიწყო. ყველამ ყურები სცქვიტეს, რომ კლიოში გამარჯვებულთა ამბები მოესმინათ.

მაგრამ, სამწუხაროდ, მხოლოდ დამარცხების ამბავი კი გაიგონეს: არამც თუ პოდგორიცა არ აუღიათ, პირიქით მთელი რაზმი ლიუბობრატიჩისა მტერს დაუმარცხებია და თვითონ ლიუბობრატიჩი ავსტრიაში გაქცეულა.

ყველამ ყურები ჩამოჰყარეს. სახეზე მწუხარება და უნუგეშობა გამოეხატა სათითაოდ ყველას. თვითონ ნეტკოვიჩიც აღელდა და ხმა ჩაუწყდა.

მიჩო ბეიზადეტი, რომელსაც ერთბაშად ოფლი წამოასკდა სახეზე, გაფითრდა და, სიბრაზისგან აკანკალებულმა, დაიძახა:

— სიცრუევა, სიცრუევე, სიცრუევე, ასეთი ზღაპრები თავიანთ ბაღლებს უამბონ და ისინი დააჯერონ! ლიუბობრატიჩმა ისინი დაამარცხა, მიწასთან გაასწორა. ამ გაზეთს არაფერი დაუჯეროთ!

ბაი მიჩოს სიტყვებმა ცოტათი დაამწვიდა საზოგადოება.

მიჩოს სიტყვები უფრო იმიტომ დაუჯდათ ქკუაში, რომ გული-გულში ნატრობდნენ—ასე ყოფილიყო საქმე. იმათის აზრით, გაზეთში რაც ეწერა, ტყუილი უნდა ყოფილიყო, იმიტომ რომ კულის მეტი კარგი არაფერი ეწერა. ასე და ამ გვარად, ამ გაზეთის არავის სჯეროდა. მაგრამ, როცა ამავე გაზეთმა აუწყა ყველას, ლიუბობრატიჩმა გაიმარჯვაო, ექვი არავის შეუტანია—ტყუილიაო.

თუმცა მიჩომ ანუგეშა, მაგრამ გინკას სტუმრები მაინც დაღონდნენ. ლაპარაკს თავი ანებეს, ყველას მძიმე ლოდსავეთ შემოაწვა რალადა გულზე. თვით ბაი მიჩო ცუდს გუნებზე დადგა. ბრაზობდა თავის თავზე, გაზეთზე, მთელს ქვეყანაზე, იმიტომ რომ ვერავინ უთხრა, „კლიოში“ აწერილი ამბავი მართალია. ამიტომ ცეცხლი მოიკიდა, როცა პეტარკი შიიკოვმა დაჩუმებულის ხალხის წინაშე დაცინვის კილოთი წარმოსთქვა:

— როგორც ეტყობა, ბაი მიჩო, შენი გერცოგოვინის ნაპერწკალი ნაპერწკალადვე დარჩება და მეტი არაფერი გამოვა... შენ მე მიგდე ყური: ოსმალეთი ცოცხალი და უფნებელი დარჩება ამ წელიწადსაც, მერმისსაც და კიდევ ერთს საუკუნეს... ჩვენ კი მანამდე ვატყუებთ ერთმანერთს შენის წინასწარმეტყველობით, სანამ არ დავიხოცებით.

— შიიკა,—დაუყვირა გაშმაგებულმა მიჩომ,—შენ ხის გოგრას ამის გაგება არ შეუძლია, გაჩუმდი! შენისთანა პირუტყვებს ჯოხით თუ გააგებინებს რასმე ადამიანი.

ჩხუბი ასტყდა, მაგრამ სტეფნოვის შემოსვლამ ამ ჩხუბსაც და ოსმალეთის დამხობის შესახებ საშიშო ლაპარაკსაც ბოლო მოუღო.

ისევ გაჩუმდნენ ყველანი. სტეფნოვის შემოსვლა ყველასა სწყინდა, ყველანი უხერხულად ჰგრძობდნენ თავს. სტეფნოვი დაჯდა, ზოგიერთებს თავი დაუკრა და დიდ-კაცურად დაუწყა ლოდინი, რას იტყვიანო. იმას ეგონა, რომ ოგნიანოვსა და სოკოლოვს დასცინიანო. მაგრამ არავის უთქვამს—რა ამის შე-



სახებ, იქნება, იმიტომ, რომ არა იცოდნენ-რა, იქნება იმიტომაც, რომ ყურადღება არავის მიუქცევია.

ბაი მიჩო გულ-მოსული გავიდა საყავედან; მის შემდეგ რამდენიმე სხვა სტუმარიც გავიდნენ. ამავე დროს ორი ახალი სტუმარი შემოვიდა: ოგნიანოვი და სოკოლოვი. დასხდნენ თუ არა, ჰაჯი სმიონი ოგნიანოვს მიუბრუნდა და ჰკითხა:

— გრაფო, საშობაოდ ახალს კომედიას რასმე არ წარმოადგენთ?

— „გენონევა“ კომედია კი არა, ტრაგედია არის,— შენიშნა ფრატიუმ;— კომედია ისეთს წარმოადგენსა ჰქვიან, სადაც იცინიან, ხოლო ტრაგედიას ისეთს ეძახიან, სადაც სატირელი და სამწუხარო სურათებია... ჩვენ ტრაგედია ვითამაშეთ, მე ტრაგიკული როლი მქონდა...— მრავალ-მნიშვნელოვანის ხმით განუმარტა ფრატიუმ.

— ვიცი, ვიცი, მე თვითონ რამდენჯერ მინახავს ასეთი წარმოდგენები ბუხარესტში; ეჰ, შენ რა კარგად წარმოადგინე შეშლილის როლი!

— ფრატიუმ, ჯვარი გწერია და ნამდვილი შეშლილი იყავი... გრძელმა და აჩეჩილმა თამაც ბევრი გიშველა,— შეაქო ჰაჯი სმიონმა.

ამ დროს ივანჩო იოტა შემოვიდა და ისიც ჩაერია ლაპარაკში.

— რა არის, თეატრის შესახებ ლაპარაკობ?— ჰკითხა ივანჩომ.— ამ სამის წლის წინად კარლოვოს თეატრში ვიყავი, როცა... არ მახსოვს, რას თამაშობდნენ... ჰო! „ივანე გაიდუკი“.

— „ივანე კაციკალია!“— გაუსწორა ფრატიუმ.

— ჰო, ისეა, ისე... კაციკალია. მაგრამ ჩვენთან უკეთესად ითამაშეთ... ჩემი ლალა მთელი ღამე ძილში იძახდა: „გოლოს! გოლოს!“ და შიშისაგან მთელის ტანით კანკალებდა...

ფრატიუმ ქედ-მალღურად შეხედა, თუმცა ეამა კი მისგან ქების გაგონება.

— ჰო, ჰო, მეც იმას ვეუბნები გრაფს, კიდევ დასდგი რამ კომედია-მეთქი... ღმერთმანი, ეხლა უფრო უკეთესად ითამაშებ...



მხოლოდ სიმღერა სხვა რამე სთქვი,—უთხრა ჰაჯი სმიონმა, რომელმაც ჯიბეებში დაუწყო ხელებს ფათური, რომ წინანდელი საყვედური დაევიწყებინებინა და გული მოეღობო როგორმე.

— „გენოვევა“ კომედია კი არა, ტრაგედიაა,—მკაცრად უთხრა ხელ-ახლა ფრატოუმ.

— დიად, დიად, ტრაგედია... ერთის სიტყვით—წარმოდგენა გააკეთეთ.

— დიად, ეს კომედია იყო, რომ ხალხს ეცინებოდა,—სიტყვა ჩაურთო კუთხეში მიმჯდარმა სტეფროვმა და გესლიანად გაიღიმა.

ოგნიანოვმა სოკოლოვთან ლაპარაკი შესწყვიტა და უთხრა: — მეშინიან, ძმაო, ისევ სასაცილოდ არ ამიღონ...

სტეფროვს ხელში ვაზეთი ეჭირა და სულ შიგ ჩასცქეროდა თავ-აუღებლად.

— სასაცილოდ ვინ ავიღებს, ვერაფერს გაგიბედაეს!—უთხრა ჰაპა ნესტორმა,—გენოვევა კიდევ წარმოგვიდგინე... ბავშვებს ძალიან გულით უნდათ მისი ნახვა. ჩვენი კენკა მაშინ ავად იყო და ვერა ნახა. ესლა იმას-ლა გაიძახის: მიმილო, გენოვევა მაჩვენე, გენოვევა მაჩვენეო.

— კარგი, პატა ნესტორ, მხოლოდ დასტვენისა მეშინიან,—უბასუხა ოგნიანოვმა და თვალები ისარივით დააშტერა სტეფროვს.

— განსაკუთრებით, როცა სტვენის ხმა ნეხვიდან გამოდის,—დაუმატა გესლიანად სოკოლოვმა.

სტეფროვს გული მოუვიდა და გაწითლდა, მაგრამ თავი შეიმაგრა და ვაზეთს თვალი არ მოაშორა. ატყობდა, ოგნიანოვს თვალები ჩემსკენ აქვს მოშტერებულიო და იმის შიშით თავ-ტანი ეკარგოდა. ოგნიანოვს თვალები საოცრად ენთებოდა.

— მეც შენსავით მინდა, ჰაპა ნესტორ, „გენოვევას“ ნახვა,—ბანი მისცა ჩონუ დაიჩინოვმა.—მხოლოდ გოლოსის როლი კირიაკმა აიღოს, იმას უფრო უხდებაო. ფრატოუ თუმცა ბრაზობს, მაგრამ მაინც კაი კაცია: ტყუილად ლანძღავენ.

ამ გულუბრყვილო და თან გესლით სავსე ქათინას სტეფნოს საშინლად შერცხვა. ამავე დროს ქება ფრატიუსაც ეწყინა...

ოგნიანოვმა და სოკოლოვმა ძალაუნებურად გაიღიმეს. გაიღიმა აგრეთვე ჰაჯი სმიონმაც, რომელიც ვერ მიხვდა, რა სიტყვებს.

სტეფნოვმა თავი მალლა აილო და გულმოსულად შეხედა ოგნიანოვსა და სოკოლოვს.

— დიად, — წარმოსთქვა მან ძალდატანებულის გულგრილობით, თუმცა ბრაზისაგან ხმა უკანკალებდა, — იმედი მაქვს, ლოზენგრადელი ბაი ოგნიანოვი მალე ტრაგედისაც გვაჩვენებს. ის დარწმუნებული უნდა იყოს, რომ ამ ტრაგედიის დროს არაფერს გაიცინებს, და ყველაზე ნაკლებ — თითონ.

სტეფნოვმა უფრო ტკეპნით სიტყვა „ლოზენგრადელი“ (ოგნიანოვი ამბობდა, ლოზენგრადელი ვარა) წარმოსთქვა. ოგნიანოვმა ეს შენიშნა და სახეზე ფერი ეცვალა. მაინც რიხიანი კილოთი უთხრა:

— საცა სცენის უკან ისეთი გაწვრთნილი მაშინისტები, მე მინდა ვთქვა — ჯაშუშები, როგორც სტეფნოვი, გვყავს, საკვირველი არ იქნება, თუ ტრაგედიაც დაეინახეთ.

ეს რომ უთხრა, ზიზღით შეხედა. სოკოლოვმა თავის ამხანაგის ტანისამოსის სახელოს ჩამოსწია:

— თავი დაანებე, — ჩურჩულით უთხრა.

— საზიზღრებს არ შემიძლიან მათი საზიზღრობა მოვეუთმინო, — წარმოსთქვა ოგნიანოვმა ხმა-მალლა, იმდენად ხმა-მალლა, რომ სტეფნოვს გაეგონა.

ამ დროს ბოიჩომ საყავეს კარებთან მუწჩო დაინახა. მუწჩო თვალს არ აშორებდა ბოიჩოს, თავს უქნევდა და მეგობრულად უღიმოდა. სულელს კეთილი, მშვიდი და ბედნიერი სახის გამომეტყველება ჰქონდა. ბოიჩოს აღრევაც არა ერთხელ შეუნიშნავს, რომ მუწჩო გულმოდგინედ და აღერსიანად მიყურებსო. მაგრამ ვერც კი გაეგო ამ მეგობრობის მიზეზი. როცა ბოიჩოს თვალები მუწჩოს თვალებს მოხვდა, სულელს სახეზე



ნეტარების ღიმილი გადაეფინა და თვალები გაუგებარისა და უაზრო აღტაცებით გაუბრწყინდა. საყავეში თავი შემოჰკყო, ოგნიანოვისაკენ დაიხარა და თან მთელის სახით გაიღიმა და თანაც გაბმით წარმოსთქვა:

— რუს-ი-ან!—ამის თქმაზე თითი კისერში გამოისევა, თითქო ის უნდა აჩვენოს, როგორა ლადრიან ადამიანს კისერსაო. ყველანი გაოცებით უყურებდნენ მუნჩოს.

ოგნიანოვიც გაოცდა. ამ ნაირი ქცევა მუნჩოსაგან პირველი არ იყო.

— გრაფო, მუნჩო რაღას გელაპარაკება?—ჰკითხეს ზოგიერთებმა.

— მეც არ ვიცი, — უპასუხა ღიმილით ოგნიანოვმა, — ძალიან უყვარვარ.

ეტყობოდა, მუნჩო მიხვდა, რომ დამსწრენი გაოცებულნი შესტკეპროდნენ და მისი ვერა გაეგოთ-რა, შეეცადა უკეთესად აეხსნა, რისთვის უყვარდა ოგნიანოვი. ჯერ ყველას მიმოავლო თვალები სულელურად, თითით ოგნიანოვი ანიშნა და უფრო ხმა-მაღლა დაიძახა:

— რუს-ი-ან!—მერე ხელი ჩრდილიეთისკენ დაიქნია და უფრო მძლავრად დაუწყო თითით ყელს გამოლაღვრა.

მუნჩოს საქციელმა ძალა-უნებურად შეაშინა ოგნიანოვი: იფიქრა, იქნება, ღმერთი გაწყრა და როგორმე ნახა და იგრძნო მუნჩომ, რაც მოხდა პაპა სტოიანის წისქვილშიო. კანკალით შეხედა სტეფნოვს, მაგრამ ისევ დამშვიდდა, როცა დაინახა, რომ სტეფნოვმა ზურგი შეაქცია და ვიღასთანაც ჩურჩული დაიწყო, მუნჩოსათვის ყურადღებაც არ მიუქცევია.

ამ დროს სტეფნოვი წამოდგა, მუნჩო კარებს მოაცილო და გავიდა, თან ოგნიანოვს ბოროტისა და შურისძიებით სავსე თვალებით შეხედა.

სტეფნოვს სიბრაზისაგან ცეცხლი ეკიდებოდა. ჩემი თავმოყვარეობა ეს რამდენჯერ შემილახა ოგნიანოვმა და მე კი ჯერ შემთხვევა არა მქონია მაგიერი გადამეხადნაო. უნდოდა შური ეძია ბოიჩოსი, მაგრამ იღუშალოდ, ამიტომ რომ მასთან

გამოჩინებით ბრძოლისა ეწინოდა. როცა თეატრში საბუნების  
 ლიუციო სიმღერა გაიგონა, სთქვა, ეს არის, ახლა ვიყრი გუ-  
 ლის ბუხარსაო, ამაზე უკეთესი იარაღი არ მინდაო; დააბეზლა  
 კიდეცა, მაგრამ ცდამ ამაოდ ჩაუარა. ჩემთან როგორ გაბედავ-  
 და ოგნიანოვი მემამბოხეთა სიმღერა ემღერნაო, — სთქვა ბეიმ,  
 და სტეფნოვის ნათქვამი არ დაიჯერა. სტეფნოვიც არ აუხი-  
 რდა. მაგრამ რამდენისამე დღის უკან ერთი კარგი ამბავი გაიგო:  
 შემთხვევით გაიცნო ერთი ლოზენგრაღიდან მისული კაცი და  
 იმან უთხრა, ამ ქალაქში თავისდღეში არა ყოფილა ისეთი  
 ვინმე, რომ ბოიჩო, ან ოგნიანოვი რქმეოდესო. ძაფის წვერი  
 ხელში ჩაეიკდევო, სთქვა სტეფნოვმა, და ახლა ბევრს რასმე  
 გავიგებ ახალსაო. ალბად, ფიქრობდა სტეფნოვი, ოგნიანოვს  
 თავისი სახელი და გვარი მოგონილი აქვსო, და, მგონია, სა-  
 ბუთიცა მაქვს ამისიო. ოგნიანოვს სოკოლოვი ჰყავს მეგობრად  
 და ეს კაცი ხომ, დიდიხანია, მოუსვენარ კაცად არის ცნობი-  
 ლიო. უეჭველია, ამ ორ კაცს რაღაცა უდევს გულში, მაგრამ  
 რა? რა თქმა უნდა, სასიკეთოს არას ჰფიქრობენო. ამ ფიქრებ-  
 ში გართულება სტეფნოვმა ინსტიქტიურად იგრძნო, რომ ოგ-  
 ნიანოვმა პეტკანჩევის ქუჩაზე მომხდარ ამბისა, არ იქნება, რა-  
 მე არ იცოდესო; სწორედ მაშინ გაჩნდა ოგნიანოვი ქალაქში,  
 სწორედ ოგნიანოვის მისვლის შემდეგ დაიწყეს ქალაქში მთავ-  
 რობის საწინააღმდეგო მოძრაობაო. კირიაკმა გადასწყვიტა,  
 რაღაც უნდა დასჯდომოდა, ფარდა აეხადნა ოგნიანოვის საექ-  
 ვო ცხოვრებისათვის და ამისათვის სავსებით მოიშველია თავისი  
 ბოროტი და შურიანი გული... მოკლე ხანში სტეფნოვმა ახა-  
 ლი საბუთები ჩაიგდო ოგნიანოვის გასაბმელად ხაფანგში.

XIX

შ ა შ ა

ოგნიანოვის თავზე საშიშო ღრუბლები თავს იყრიდა. მაგ-  
 რამ თვითონ ვერაფერს ამჩნევდა, ეჭვი არაფრისა ჰქონდა. მთე-



ლი ექვს თვეს სცხოვრობდა ბელაია-ცერკოეში უშიშრად და უღარდელად და ამ გარემოებამ მეტის-მეტად გაათამამა, იმ ზომამდე გაათამამა, რომ გაფრთხილებაჲ კი მეტ ბარგად მიაჩნდა. მისის დარდისა და ფიქრის საგანი—თავის ხალხის კეთილ-დღეობა და ასაჯანყებლად მომზადება იყო. ასეთს ფიქრში გართულს, დროც კი არა ჰქონდა ისეთის წვრილმან რისთვისმე ფიქრნა, როგორიც, მისის აზრით, პირადი კეთილდღეობა იყო. ყველა გრძნობაზე ნაკლებ — შიშის გრძნობა ჰქონდა განვითარებული.

მაგრამ ეხლა ცოტათი შეეპარა შიში და საყავედან გამოსვლის დროს ექიმს უთხრა:

— შენ როგორა ფიქრობ, სტეფნოვი თავის მუქარით დაგვაკლებს რასმე?

— სტეფნოვი შენზე კბილებს იღესავს, და ამ საზიზღარს რამე რომ შესძლებოდა, აქამდე ხელს არ დაგაკლებდა. მარტო სასაცილო ლექსის მოგონებას არ დასჯერდებოდა.

— მუნჩოს ქცევა რაღასა ნიშნავს? ცოტა არ იყოს, მეფიქრება.

ექიმმა გაიცინა.

— ბავშვი ნუ ხარ.

— მართალია, მუნჩოზე ლაპარაკი არც კი ღირს, მაგრამ სტეფნოვი, სტეფნოვი! ჩემი ამბავი ხომ არაფერი იცის?

— აბა საიდან ეცოდინება? ალბად, ჰაჯი როვოამა მოგვიგონებდა ახალს რასმე. ხომ იცი, ეს ქორიკანა დედაკაცი ისე ერთს საათსაც ვერ გასძლებს, თუ რამე არ მოიგონა.

— არა, ეს კუდიანი საშიშოა. საცა სხვას დანახვა ან გაგონება შეუძლია, ის სუნით გაიგებს ხოლმე. ის აძლევს დარიგებებს სტეფნოვს, იგივე აწვალებს და სულსა ჰხდის საწყალ რაღას...

— არ გახსოვს, შენც მოგიგონა, ჯაშუშიაო? გეუბნები — უბრალო ენა-ტარტარა დედაკაცია-მეთქი.

— მაგრამ შენზე რაცა სთქვა, ხომ მართალი იყო... იცი? სტეფნოვს ხვალ დილას ნიშნობა აქვს.

ექიმს ფერი ეცვალა.

— ლალკასა ნიშნავს?

— ჰოდე.

— შენ საიდან გაიგე?

— რადასაგან .. ჰაჯი როვოამა, რა თქმა უნდა, მაქანკალია. ხოლო მძახლებად ჰაჯი სმიონი, ეს ყველგან არსი, და ალაფრანკა არიან.

ექიმი თავს ვერ იმაგრებდა მღელვარებისაგან და ფეხს მოუჩქარა. ოგნიანოვმა გაოცებით შეჰხედა.

— ექიმო, შენ ჩემთვის არ გითქვამს, რომ გული თავისუფალი არა გქონდა.

— მე ლალა მიყვარს, — წარბ-შეკვრით უპასუხა ექიმმა.

— იმანაც იცის, რომ გიყვარს?

— იმასაც უყვარვარ... ანუ უკეთ რომ ვთქვათ, სტეფჩოვზე მეტად მოვსწონვარ. მხოლოდ არა მგონია, რომ თავდავიწყებით ვუყვარდე. — ეს რომ სთქვა, სოკოლოვს ძალაუნებურად სახე წამოუქარხლდა.

შენს საბედნიეროდ, თუ საუბედუროდ, ლალას, შენ რომ გგონია, იმაზე მეტად უყვარხარ, — კარგად ვიცი ეს ამბავი, — უთხრა ოგნიანოვმა და თანაგრძნობით დაუწყოა ყურება ექიმს.

— შენ საიდან იცი? — ჰკითხა ექიმმა და უარესად გაწითლდა.

— რადამ მითხრა, ხომ იცი, მეგობრები არიან. ლალკას რაც გულში აქვს, რადას ყველაფერს ეუბნება. შენ ვერ წარმოიდგენ, რამდენი ცრემლი დაღვარა საბრალო ქალმა, როცა შენ კარლოვოში წაგიყვანეს და ან რა რიგ ცას ეწია სიხარულით, როცა გაგათავისუფლეს! რადა ყველაფერსა ხედავდი.

— საწყალი გოგონა, — ჩაილაპარაკა ყრუდ ექიმმა, — თავს მოიკლავს, თუ იმას მიათხოვეს...

— რატომ აქამდინ არ დანიშნე? — ჰკითხა გულმტკივნეულად ოგნიანოვმა.

ექიმმა გაოცებულის თვალებით შეხედა.



— განა არ იცი, რომ იმის შამას თვალის დასანახად ვე-  
ჯავრები?

— მაშ მოიტაცე!

— ახლა? როცა ხალხი უნდა ავაჯანყოთ? შეიძლება ამ  
ორის წლის უკან მოხდეს აჯანყება, მაგრამ ისიც შეიძლება,  
რომ ხვალაც მოხდეს ეს ამბავი, ვინ იცის? ასეთს არეულ დროს  
აზრადაც არ მომდის—ცოლი შევიერთო... ცოდვა არ არის,  
საწყალი ქალი ჩემი გადამკიდე, დაიღუბოს?

— მართალი ხარ,— ფიქრის შემდეგ უთხრა ოგნიანოვმა,— აი  
ამ მოსაზრებით ვერც მე ვბედავ რაღაზე ჯვარი დავიწერო; ეს  
გარემოება რომ არ მიშლიდეს ხელს, ამ საუცხოო ობოლს  
ქალს ათას ტანჯვა-წვალებისაგან ვინსნიდი და გავაბედნიერებ-  
დი... ღირსია ბედნიერებისა— მეტად კარგი რამ არის, ძმაო!  
ახლა კი თავს იკლავს, ხელ-ფეხ შეკრულია, თავისი ბედი ჩემს  
ბედს გადააბა... საწყალი!

ოგნიანოვს სახე მოეღრუბლა.

ხედავდა, ეჭიმს ძალიანა სტანჯავს ლალკას მდგომარეო-  
ბაო, და მისის ტანჯვით თითონაც იტანჯებოდა.

— ეს საზიზღარი დუელში უნდა გამოვიტხოვო! უნდა  
მოვკლა!... თუ მზე არ დავუბნელო, სხვებს დალუბავს!— ცეცხ-  
ლივით იფეთქა ერთბაშად ოგნიანოვმა.

ორივე მეგობარი სახე-მოღუშულები იდგნენ.

— გინდა, წავალ და საყავეში სილას გავარტყამ?

— იმასაც ისე მოინელებს, როგორც ბევრი სხვა მოინე-  
ლა... ამ კაცმა სირცხვილ-ნამუსზე, დიდხანია, ხელი აიღო...  
გარდა ამისა, ამით საწადელს ვერ ვეწევით.

— მთელს ქალაქში თავი მოექრება.

— იურდან დამიანდსა რომ ჰკითხვო, სილა კაცისათვის  
სასირცხვილო სრულებით არ არისო.

— მაგრამ თავის საცოლოს თვალში თავს შერცხვენილად  
ჩასთვლის.

— ლალკას ვინ რასა ჰკითხავს! გარდა ამისა, მამის სიტ-  
ყვა კანონად მიიჩნია,— უბასუხა დაღონებული სახით ეჭიმმა  
და ხელი გაუწოდა.



— მიდინარ? არ დაგავიწყდეს, საღამოს მღვდელ სტავროს-  
თანა ერთ დაბატილებულნი.

— არა, მე იქ წასვლის გუნებაზე არა ვარ, შენ მარტო  
წადი.

— არა, ორივე ერთად უნდა წავიდეთ. დავპირდით. მღვდე-  
ლი სტავრო, მართალია, დიდი ჭკუის პატრონი კაცი არ არის,  
მაგრამ პატიოსანია... იმასთან, შეიძლება, რამე გზას დავადგეთ.

— კარგი, გელოდები.

ესა სთქვეს და მეგობრები ერთმანეთს გამოარდნენ.

ოგნიანოვი სასწავლებელში წავიდა. ოთახში მარტო მერ-  
დვენჯივეი დახვდა, რომელიც დიდი გულმოდგინებით კითხუ-  
ლობდა რაღაც ოსმალურს წიგნს. ოგნიანოვმა გამარჯვებაც  
არ უთხრა. იმ თავითვე შეეზიზღა ეს კაცი, რომელსაც ერთი  
ხელით საარშიყო ლექსების წიგნი დაჰქონდა და მეორე ხელ-  
ში ოსმალური გრამმატიკა ეჭირა. მისმა წერილმა, რადასთან  
გაგზავნილმა, აგრეთვე სტეფნოვის წინ მლიქვნელობამ ეს გრძობ-  
ბა ზიზღისა უფრო გაუძლიერა. ოგნიანოვი აღელვებით დადი-  
ოდი ოთახში და თუთუნის კვამლს ბოლქვა-ბოლქვად უშვებდა  
პირიდან.

ექიმთან ნალაპარაკევი თავიდან არა შორდებოდა და მგა-  
ლობელს ერთი ბეწო ყურადღებასაც არ აქცევდა; მაგრამ ამ  
დროს მაგიდაზე თვალი მოჰკრა გაზეთ „დუნაი“-ს უკანასკ-  
ნელ ნომერს. ეს გაზეთი მხოლოდ ერთი ცალი მოდიოდა ქა-  
ლაქში და იმასაც მერდვენჯივეს უგზავნიდნენ მისნი მფარველნი  
ოსმალონი.

ეს გაზეთი ნახევარი ოსმალურად იბეჭდებოდა და ნახევარ-  
რი—ბოლგარულად. ოგნიანოვმა ბოლგარულ ნაწილს უგუ-  
ლოდ გადაავლო თვალი და, ის იყო, უნდა წასულიყო, მაგ-  
რამ მსხვილის ასოებით დაწერილმა ამბავმა ერთბაშად მიიპყრო  
მისი ყურადღება. მღელვარებისაგან თავს ძლივას იკავებდა, მაგ-  
რამ მაინც შემდეგი წაიკითხა:

„დაარბექანის ცახადან ტუსადის გაქცევა. ივანე კრალი-  
ჩი, ქალაქ ვიდინოელი, დუნაის თემისა, 28 წლისა, მაღალი,



შეთვალებიანი, გრუზა თმიანი, შავგვრემანი, 1868 წელს მომხდარ ამბოხებაში მონაწილეობას იღებდა, ამისათვის მიუსაჯეს საუკუნო დამწყვდევა ღიარბეკირის ციხეში და იქიდან გამოიქცა ამ წლის მარტში; ახლა მისი დიდებულების სულთანის სამპრობელოში იმალება; მთავრობა ეძებს და ამ გაქცეულის ნიშნებიც იმან გამოაცხადა. მაშასადამე, ფადიშაჰის ერთგულნი ქვეშევრდომნი ვალდებულნი არიან, თუ არ უნდათ სასტიკად დაისაჯნენ ურჩობისათვის კანონის მიერ, უჩვენონ მთავრობას ან მიჰგვარონ ხსენებული გამოქცეული დამნაშავე, თუ ნახეს სადმე და იცნეს, რათა ღირსეულად დასჯილ იქმნეს იმპერატორის სამართლიან კანონის თანახმად.“

ოგნიანოვმა თავს ძალა დაატანა, მაგრამ თავი მაინც ვერ შეიმაგრა: სახე გამოეცვალა, ტუჩები გაუფითრდა. სრულებით მოულოდნელი იყო მისთვის ამ ამბის წაკითხვა. უცბად მგალობელს შეხედა. მერღვენჯიევი არც კი განძრეულა, სულ წიგნებს ჩაჰკირკიტებდა. ეტყობოდა, ოგნიანოვს მღელვარება ვერ შეამჩნია და, ალბად, ეს სტატია საინტერესოდ არ ეჩვენა და ყურადღება არ მიაქცია. ოგნიანოვს ცოტ-ცოტად დაუბრუნდა გულის სიმშვიდე. პირველადვე ის იფიქრა—ეს საშიში საბუთი უნდა გავაქროვო. თავს ძალა დაატანა, დაივიწყა მგალობლისადმი ზიზღი და გამოეხმაურა.

— ბაი მერღვენჯიევი, — უთხრა დამშვიდებულის კოლოთი, — ეს ნომერი ხომ არ წაგიკითხა? თუ წაიკითხეთ, მათხოვეთ. სახლში წაეიღებ და იქ გადავათვალიერებ. საინტერესო ახალი ამბები სწერია.

— ჯერ არ წამიკითხავს, მაგრამ შეგიძლიათ წაილოთ, — უპასუხა ზლაზვნით მგალობელმა და ისევ გაერთო წიგნის კითხვაში.

ოგნიანოვმა საბედისწერო ნომერი „დუნაი“-სა ჯიბეში ჩაიღო და წავიდა. უხაროდა, ეს ერთად-ერთი ნომერი მოდის ბელაია-ცურკოვში და ამასაც მე გავაქრობო.



ხ ა ფ ა ნ გ ი

კირიაკ სტეფანოვმა დღეს საყავეში ბრძოლის ველი იმიტომ დასტოვა, რომ მერე ისევ დაჰბრუნებოდა ამ ველს, უფრო საიმედო იარაღით აღჭურვილი.

მთელი არსება მისი მოიცვა სიძულვილმა. მთელი ცხოვრება ბოროტების მეტი არა უქნია-რა, ასე რომ მის გულში სათნოებას მეტად ცოტა ადგილი ექირა. ახლა კი ამ კაცის სიძულვილმა ეს მცირედი პატიოსნებაც განუდევნა გულიდან. ახლა თვალში ამოიღო ოგნიანოვი და იმას-ლა ცდილობდა— დაეღუპნა ეს კაცი, მისი ხსენება გაექრო. საშუალებაცა ჰქონდა გულის ნადების ასასრულებლად. რა ჭორები არ გაავრცელა ოგნიანოვის შესახებ, რა არ მოუგონა, მაგრამ ამან ვერაფერი უშველა; პირიქით, ბოიჩომ ეს ცილისწამებანი და ჭორები ძღვევამოსილობით გააქარწყლა და საზოგადოების თვალში უფრო ამალდა, გული მოიგო ყველასი, ყველანი მისი მომხრენი შეიქმნენ. განსაკუთრებით, „გენოვევას“ წარმოდგენის ღამეს დარწმუნდა კირიაკი, რომ საზოგადოება ოგნიანოვს ექამაგება და იმას უქერს მხარსაო. სტეფანოვის ალაგას მიხალაკი ალაფრანკა რომ ყოფილიყო, დამშვიდებული სინიდისით გასცემდა ოგნიანოვს, თანაც იტყოდა, სიკეთესა ვშვრებიო. კირიაკი კი, თუმცა სულმდაბალი იყო, მაინცა ჰგრძნობდა, რომ ასეთი საქციელი საზიზღარია, არავინ მოუწონებსო; დიად, ჰგრძნობდა, მაგრამ მაინც თავი ვერ შეიმაგრა. შურისძიების წყურვილი ახრჩობდა, გონებას უკარგავდა. გადასწყვიტა ოგნიანოვის დაღუპვა, მაგრამ ისე კი, რომ არავის გაეგო მისი სისაძაგლე...

— დიად, ამ მაწანწალის გვარი ოგნიანოვი არ არის და არც ლოზნენგრადელია, — ეს ერთი; მეორედ, ეს იყო, პეტკანჩევის ქუჩაზე რომ გამოეკიდნენ პოლიციელები, აკრძალული



წიგნებიც იმისი იყო... ექიმი სოკოლოვი სწორედ იყო მანის ბეის ცოლთან... ჰაჯი როვოამა მართალს ამბობს... ამის შესახებ ცოტა რამ პოლიციელმა ფილუმაც მითხრა... აღკრძალული წიგნები ბეის ცოლმა გამოსცვალა... როგორ—ის კი არ ვიცი... მესამეც, მაგრამ ამასაც მალე გავიგებთ... იმისთვის ყველაზე უარესი ის იქნება—დიარბექირის მაგიერ სახრჩობელაზე აგზავნონ... შევმუსრავ, გავაქრდბ ამ უკადრისსაო!

სტეფანოვმა მერდვენიჯევს პირობა მისცა, საქალებო მონასტერში გნახავო, და ახლა იქითკენ მიდიოდა.

— შენ მართალი გითქვამს,—უთხრა კირიაკმა როვოამას, როცა მის ოთახში შევიდა.

— ღმერთმა გიშველოს, კირიაკ, მე კი მეგონა, ცოტათი აეცდინე ნიშანსა-მეთქი,—ხუმრობით უბასუხა მონაზონმა, რომელიც კარგად ვერ მიხვდა, რის შესახებ ელაპარაკებოდა სტეფანოვი.—უკან ვინ მოგდევდა, რომ საბერველივითა ქშინავ?

— ეს-ეს არის, ოგნიანოვს წავეჩხუბე...

— ამ წყეულმა ყმაწვილმა სულ გადარია ჩვენი სულელი რადა...—უთხრა გაკაპასებულმა მონაზონმა,—რადაც აღკრძალული ლექსები მისცა გასაზებირებლად... სწორედ ღვთის რისხვა დატრიალდა! ახლა მოხუცი, თუ ახალგაზდა ამ ლექსებსა მღერიან... საცაა, მთელს ქვეყანას მოედება ცეცხლი. ერთნი სწვალობენ, წელებზე ფენს იღებენ, ჭიანჭველებსავით მუშაობით სულს ირთმევენ, მეორენი კი მოდიან, პირველთა მონაგარს ანაცარმტუტებენ და ქარს აძლევენ... მერე იტყვიან კიდევცა—ადამიანებიცა ვართო! ადამიანები კი არა—ავაზაკები ჭ ჩამოსახრჩობები არიან... ჩვენი რადაც იმათში ერევა!... წმიდაო დედაო ღვთისაო! ან-და იმ ღამეს, რა საზიზღარი სიმღერებსა მღეროდნენ თეატრში; ნეტავ ვიცოდე, ოსმალოს მთავრობას სძინავს თუ რა ემართება?

— მე ოგნიანოვს ძალიან წავეჩხუბე და გადავწყვიტე, რადაც უნდა დამიჯდეს, უნდა გავაქრო,—წარმოსთქვა ბრაზ-მორევით სტეფანოვმა, მაგრამ მოაგონდა, უქკუობა რამ იქნება ასეთს ენაქარტალა მონაზონს მივიწოდო. და დაუმატა:—ესე

იგი, პოლიცია გამოიძიებს და გაიგებს ყველაფერს... მხოლოდ თქვენ კი არსადა სთქვათ!

— ნუ თუ არ მიცნობ?!

— გიცნობ და კიდევაც იმიტომ გეუბნები, არსადა სთქვა-მეთქი.

ამ დროს გარედან ნაბიჯის ხმა შემოისმა. სტეფანოვმა სარკმელში გაიხედა და სიხარულით წამოიძახა:

— მერდვენჯიევი მოდის! აბა რა ჰქენი?—ჰკითხა სტეფანოვმა მგალობელს.

— დათეი ხათანგში გაეაბით, — უპასუხა მერდვენჯიევმა.

— როგორ? რა გითხრა?

— გაყვითლდა, ხუთას ნაირად ფერი ეცვალა, კანკალი აუფარდა... ის არის!

— მერე და რაღა გითხრა?

— წასაკითხად მათხოვეო. პირველად მთხოვა გაზეთი, თორემ მანამდე არც გაზეთი უთხოვნია, არც ჩემთვის ხმა გაუცია.

სტეფანოვი ტანში გასწორდა და სიხარულისაგან ტაში შემოჰკრა.

— რა იყო?—ჰკითხა გოცებულმა ჰაჯი როგოამამ.

— და იქვიც არა აქვს, რომ განსაცდელი მოეღოს?—ჰკითხა კირიაკმა.

— სულაც არა... მე თავი მოვიკატუნე, ვითომ წიგნსაკითხულობდი და ვერაფერს ვხედავდი, ის კი არა—ყველაფერი დავინახე: დათეს ვითომ ეძინა, მაგრამ ყურები დაცქვეტილი ჰქონდა, — დაუმატა ამაყად მერდვენჯიევმა.

— ყოჩაღ! ამბავიც ოსტატურად არის დაწერილი. ეტყობა, საუცხოვო რედაქტორი ჰყავს გაზეთსა!

— მხოლოდ შემდეგშიაც არ დამივიწყოთ... მომეხმარეთ და ადგილი რომ განთავისუფლდება, მე არ ამცდეს.

— არხენად იყავი.

მგალობელმა ხელით გადაუხადა მადლობა, ოსმალურად.



— მე მგონია, ურიგო არ იქნება, იმ პოპოვსაც მოვდოთ რამე შარი... შენ ისე გიყურებს, როგორც მგელი, ისიც კრალიჩის ხროვისაგან უნდა იყოს გამოსული.

— კრალიჩი ვილაა?—ჰკითხა ხელახლა ჰაჯი როვოამამ, გაკვირვებულმა,—ამდენი ამბავი ყოფილა და რატომ მე არაფერი ვიცოდით!

სტეფანოვმა პასუხი არ გასცა მონაზონს. ფიქრებში გართული, გონება დაფანტულსავეთ იყურებოდა სარკმელში.

— იცი? გუშინ სამოსწავლო საბჭოს კრება ჰქონდა,—უთხრა მერდვენჯიევმა.

— ვინ და ვინ დაესწრო?

— ყველანი იყვნენ... მიხალაკიმ წინადადება შეიტანა, ოგნიანოვი სკოლიდან დაეითხოვოთო. მაგრამ სხვები გამოექომადნენ. ყველაზე მეტად მარკო ივანოვმა გამოიღო თავი... გადასწყვიტეს ნხოლოდ, იმ სიმღერისათვის შენიშვნა მივცეთო. ერთის სიტყვით, არაფერი გამოვიდა.

— ბაი მარკოს ეს კრალიჩი შეუყვარდა, მაგრამ, როცა იქნება, ინანებს... ნეტავ ვიცოდდე, ამ ხეპრეს რა უნდა! მიჩომ რაღა სთქვა?

— ბაი მიჩოც ოგნიანოვის მომხრეა.

— აბა მე კი არ ვიცოდი!... ძაღლი ძაღლის ტყავს დახვეს! მიჩოც, საცა შევა, მთავრობასა ლანძღავს, მარკოსავით.

— ეტყობათ, წერას აუტანიათ,—ჩაერია მათს ლაპარაკში ჰაჯი როვოამა.

— გრიგორი? პენკოვი?

— ისინიც ოგნიანოვს ეტმასნებიან.

— მაშ შეჩვენებული ვიყო, თუ იმათ სკოლა არ დავახურვინე... მაშ უღვაშები არ მსხმია, თუ მათი სკოლა მხოლოდ ბუებისა და ლამურების საცხოვრებლად არ გავხადე!—დაიყვირა გაშმაგებით სტეფანოვმა და სენაკში აჩქარებულად ბოლთის ცემა დაიწყო.

— ისე, ისე, მღვდელი ალაგმე, თუ გინდა მრევლი დამშვიდდეს! ამ სკოლიდან ვრცელდება გარყვნილი და საწინააღ-

შდევო ლექსები, — ბანი მისცა მონაზონმა; — მაგრამ ერთი ეს მითხარ, კირიაკ, ე კრალიჩი ვილაა?

— კრალიჩი? მეფე, მომავალი მეფე ბოლგარეთისა, — უპასუხა დაცინვით სტეფნოვმა.

მერღვენჯიევმა ქუდი ხელში დაიჭირა და კარი გააღო.

— მაშ ჩემი საქმისა არ დაგავიწყდეს, კირიაკ, — უთხრა მუდარის კილოთი მგალობელმა. საწყალ მერღვენჯიევს ეგონა, რომ ოგნიანოვს მხოლოდ დაითხოვენ მასწავლებლობისაგან და იმისი ადგილი მე დამრჩებაო.

— ეს გადაწყვეტილი საქმეა...

სტეფნოვი მარტო დარჩა მონაზონთან, რომ მეორე მძიმე საქმის გამო მოჰლაპარაკებოდა, სახელდობრ ლალკის დანიშნის შესახებ... ბინდისას კირიაკი კონაკში წავიდა.

პიპერკოტის ქუჩაზე სტეფნოვს მიხალაკი ალაფრანკა შემოხვდა.

— საით? — ჰკითხა მიხალაკიმ.

— იცი? „დუნაიმ“ ოგნიანოვს ნილაბი ახადა: მთელი მისი ცხოვრებაა აწერილი შიგ! დიარბეჭირიდან გამოქცეული ყოფილა და ეხლა ყველგან დაეძებენ... ხატსა და ჯვარზე დავიფიცავ, რომ ის არის... სახელიც სხვა რქმეფია...

— ეხლა რაღას ჰფიქრობ, კირიაკ? ოგნიანოვი — საშიში კაცია, ის უდანაშაულოებსაც ჩაითრევს და დაჰლუბავს... მე გუშინვე ვუთხარი სხვებს, ეს კაცი დავითხოვოთ, ჩვენთვის გამოუსადეგარია-მეთქი. ეხლა სადღა მიდიხარ? დაუყოვნებლივ ბეის გამოუცხადე, რომ იმან მოუხერხოს რამე...

— ეს ჩემი საქმე არ არის, მე გაზეთიც არა მაქვს, გაზეთი მერღვენჯიევთან არის და იმან იცის ყველაფერი, — უპასუხა სტეფნოვმა; უნდოდა, მე არ დამწამონ ოგნიანოვის გაცემაო, და ცბიერულად მერღვენჯიევს ახვევდა ყველაფერს თავზე, იმისი სახელიც განგებ ახსენა.

— გამოუცხადე, გამოუცხადე ბეის, ამით დიდს სამსახურს გაუწევ მოქალაქეთ, — განიმეორა მიხალაკიმ სრულიად ბუნებრივის სახით, თითქო სტეფნოვს ბაზარში გზავნის და

თევზის ყიდვას ავალებსო.—დიად, ხვალ კი მე და ჰაჯი ჰაჯი იურდანთან მიედივართ... კვანძი გამონასკულია.—ეს უთხრა და მიხალაკიმ ხელი ხელზე მოუჭირა.

— მერსი, მერსი.

სრულიად ჩამობნელდა. სტეფნოვმა და მიხალაკიმ ურთხანს კიდევ იჩურჩულეს ბნელაში და ერთმანერთს გაშორდნენ.

სტეფნოვი გზას დაადგა და თავისი საყვარელი ოსმალური სიმღერა შემოსძახა. აქედან პირდაპირ კონაკში მიდიოდა.

## XXI

### სტუმრად მღვდელ სტავრასთან

საუცხოეო სალამო იყო, როცა ოგნიანოვი და სოკოლოვი მღვდელ სტავრის სახლში სტუმრად წავიდნენ.

მღვდელი სტავრი თითქმის ქალაქის განაპირას სცხოვრობდა. ორთავე მეგობარმა ჩუმად გაიარეს რამდენიმე ბნელი ქუჩა. ორივე თავ-თავიანთს ფიქრებში იყვნენ გართულნი, ოგნიანოვმა გაზეთი „დუნაი“ დახია და ამიტომ ცოტათი დამშვიდდა. მერღვენჯიევი მეორედაც დაინახა და მის სახეზე საექვო ვერაფერი შეამჩნია. მაინც იჭვი შეეპარა გულში და ეს მოსვენებას არ აძლევდა. ექიმი, რა თქმა უნდა, ოგნიანოვზე ნაკლებ არ იყო დადარდიანებული.

რაც უფრო შორდებოდნენ ქალაქის შუაგულს, ქუჩებზე მოძრაობა თანდათან სწყდებოდა. ვიწრო და მრუდ ქუჩებზე არცარავინ მიდიოდა და არცარავისი ხმა ისმოდა. მხოლოდ ძაღლების ყეფა ხშირდებოდა.

— შეხე, ვილაცაა!—უთხრა ექიმმა და კაცის ჩრდილი ანიშნა, რომელიც კედელს ეფარებოდა. იმავე წუთას უცნობი გაიქცა კიდევ.

— შეეშინდა! მოდი, დავეწიოთ და გამოვკითხოთ,—გამარჯვება რისთვის არ გვითხრა,—უთხრა ოგნიანოვმა და უცნობს გამოუდგა.



ექიმს თავისი დარდი აწუხებდა და გაქცევის გუნებზე სრულებით არ იყო, მაგრამ ისიც დაედევნა ოგნიანოვს.

უცნობი ძალიან ჩქარა მირბოდა. ეტყობოდა, კაი კაცი არ იყო, ან და ჰფიქრობდა, ცუდი კაცები მომდევნო. ძალიან ჩქარა გაუსწრო თავის მდევრებს იმიტომ, რომ თუ გამბედაობა მკლავებს ფრთას ასხამს, შიში ფეხებს აქცევს ხოლმე ფრთებად. მეგობრებმა დაინახეს, ქარს მივსდევთო და თავი დაანებეს. უცნობმა რომელიღაც ქიშკარში თავი შერგო და მიიჩქმალა. ორივე მეგობარმა გაიცინეს.

— ამ საწყალს კაცს რისთვის მივსდევთ?— ჰკითხა ექიმმა.

— მე მეგონა, სტეფიოვის ჯაშუშია-მეთქი... სალამ-სალამობით დაცინვის ლექსებს ჰფანტავენ ქალაქში. ახლა მინდოდა ქურდი ქურდობაზე დამეჭირა.

სოკოლოვმა ისევ ფიქრებს მისცა თავი.

— სადღა მიდიხარ, ექიმო? მღვდლის სახლი ხომ აქ არის!— დაუძახა ოგნიანოვმა და ქიშკარი დაარახუნა.

გონება-დაფანტული ექიმი დაბრუნდა.

ქიშკარი გაიღო და სიბნელეში გამოჩნდა მღვდელ სტავრის ტანი.

— ირეკდით და განგელოთ! შემოდით! ექიმო! გრაფო!— მიეგება მხიარულად მღვდელი სტავრი.

როგორც უკვე ვთქვით, ოგნიანოვს გრაფის სახელი შერჩა; მხოლოდ ბეი ეძახდა კონსულს. თეატრში საზოგადო თანაგრძნობა მოიპოვა გენოვევის ქმარმა და, რადგან ქმრის როლს ოგნიანოვი ასრულებდა, ხალხი იმას წარმოდგენის შემდეგაც თანაგრძნობით ეკიდებოდა. ქუჩაში რომ დაინახაენდნენ ბავშვები ოგნიანოვს, დაუწყებდნენ ძახილს: „გრაფ, გრაფ“; და მისცვივდებოდნენ, — თავზე ხელი გადაგვისვი და მოგვიალერსეო. მღვდელი სტავრი პირველში ოგნიანოვის წინააღმდეგი იყო, მაგრამ წარმოდგენის შემდეგ იმის მომხრე შეიქნა.

ზევითა ოთახიდან სალამურის ხმა გამოდიოდა. როცა მღვდელმა სტუმრები შეიყვანა, ოთახში უკვე დიდძალ ხალხს მოეყარა თავი. სტუმრებმა, სხვათა შორის, დაინახეს კანდო-



ვიც, ნიკოლა ნეტკოვიჩიც და უსინათლოც. განჩომ, მღვდელ-სტავრის შვილმა და ბოიჩოს მეგობარმა, კიდევ მოიტანა არა-ყი და მეზე, —მწვანლისაგან გაკეთებული საქმელი, —რომელ-საც ზეთუნის ზეთი ჰქონდა მოსხმული და სქლად წინაქა-მო-ყრილი. სალამურის ხმა შესწყდა.

— კოლჩო, — დაუძახა ნიკოლა ნეტკოვიჩმა, — კიდევ და-უყარი.

კოლჩომ ისევ აიღო სალამური ხელში და რამდენიმე ევ-როპიული სიმღერა საუცხოვოდ დაუკრა.

— ეი, მოიტათ არაყი და მეზე, რომ სალამურს ხმა მო-ვუვიდეს; მე კი სულ დაგაეიწყდით, — უთხრა ბრამ და სალა-მური გვერდზე გადასდო.

— ბარაქალა, კოლჩო! ვისაც თავისი თავი ახსოვს, იმას სხვაც არ ივიწყებს, — უთხრა მღვდელმა.

კოლჩომ ხელი მოუსვა და ჰკითხა;

— ბაი ოგნიანოვი, შენა ხარ? გმადლობ... ყველანი გრაფს-გეძახიან, მაგრამ, ერთის მცირედის მიზეზის გამო მე არ შემე-ძლო თეატრში გრაფად დამენახე.

სტუმრებმა სიცილით ერთმანერთს გადახედეს.

— ბაი კოლჩო, ერთი ბერების საგალობელი გვიგალობე, — სთხოვა ოგნიანოვმა.

კოლჩომ დიდებულად დაიჭირა თავი, ჩაახველა, ხმა ჩაი-წმინდა და დაიწყო გალობა. თანაც ცდილობდა მიებაძნა მო-ხუც დიაკვან ჰაჯი ათანასესათვის:

— აკურთხე, უფალო, მონანი შენნი: ქალბატონი სერა-ფიმა და მშვიდი ქერუბიმა; მავგვრემანი სოფიო და ბამბიქუ-ლა რიპსილია; ბუთხუზა მაგდალინა და მიკნავებული ირინე; ქალბატონი პარასკევა — უმზაკერო ქალწული, და ჰაჯი როვო-ამა — უცოდველი ქალბატონი...

კოლჩომ ყველა მონაზნები ჩამოსთვალა. თვითეულ მა-თვანს სულ წინააღმდეგი თვისება და ხასიათი მიაჩემა, ვიდრე ჰქონდათ.

საზოგადოება სიცილით იქაქებოდა.

— ძალიან თავი აუწვიეთ, სუფრას მოუსხედით! არა გრცხვე-  
ნიათ, ღვთის რძლებს დასცინით!—ხუმრობით შეუტია სტუმ-  
რებს მღვდლის ცოლმა.

ყველანი ეახშმად დასხდნენ.

მღვდელმა სტავრიმ სუფრა აკურთხა და ყველანი მადია-  
ნად ჭამას შეუდგნენ; მხოლოდ სოკოლოვი სჭამდა უკულოდ.  
მღვდელს წინ ედგა უშველებელი ბოთლი, ქარვისფერ ღვინით  
სავსე, და ისიც ყველას უსხამდა.

— ღვინო ახარებს გულსა კაცისასა და განამაგრებს სხე-  
ულსა,—იძახდა მღვდელი და ყველას რიგ-რიგად უვსებდა თა-  
სებს.—გრაფო, დალიე!—ნიკოლოზო, კარგად დაეწაფე, არ შე-  
მარცხვინო!—კანდოვ, გამოსცალე, შენ რუსი ხარ, სმა უნდა  
იცოდე!—ეჭიმო, კარგად დაისველე ხახა, ეს წამალი არ გეგო-  
ნოს, მადლია უფლისა.—კოლოზო, გადუძახე, შვილო, გადუძა-  
ხე, მერე რუმინული სიმღერა გვიმღერე: „ლინო, ლინო, აქეთ  
გადმომხედე“...

მღვდელმა სტავრომ მეტად გაამხიარულა თავის ოხუნჯ ო-  
ბით საზოგადოება, უსხამდა და ხელ-ახლა უღვიძებდა ღვინის  
სმის მადას მოსუფრალთ, თასები ივსებოდა, ერთმანერთს ეჯა-  
ხებოდა, ერთი ადგილიდან მეორეზე გადადიოდა.

ეახშმის შემდეგ უფრო გაცხოველდა ლაპარაკი; ბევრ რა-  
ზედმედაც ჩამოაგდეს ლაპარაკი. რა თქმა უნდა, მოიგონეს  
„გენოევეა“ და სტვენა სტეფნოვისა, რომელიც მღვდელმა სტა-  
ვრიმ უბოდიშოდ შესაფერის სახელით მოჰნათლა. ოგნიანოვმა  
ოსტატურად გამოსცვალა ლაპარაკის საგანი და, სხვათა შო-  
რის, ღვინოების ღირსების შესახებ დაიწყო სჯა-ბაასი. მღვდელ  
სტავრისაც ეს უნდოდა და მაშინადვე ჩამოსთვალა—რომელი  
ღვინო რა ღირსებისა იყო. პიკლინდოლის ღვინო ყველა შამ-  
პანურ ღვინოებსა სჯობიანო.

— ეს ღვინო მზესავით ათბობს კაცს, ოქროსავით ენ-  
თება, სამართებელსავით სჭრის. ეს ღვინო რომ დაელია, და-  
ვით წინასწარმეტყველი გაახალგაზდავდებოდა... ათი წვეთი  
ამ ღვინისა კაცს ფილოსოფოსად აქცევს, ორმოც და ათი—



მეფედ, ასი წვეთი—წმიდანად!—ისე აღტაცებულად თქვა სტავრიმ, რომ დაყუდებულ ბერსაც კი ნერწყვს მოჰგვრიდა პირზე.

მალე ყველამ აიდგა ენა, მოულოდნელად ქუჩიდან მხიარული სიმღერა მოისმა. რომელიღაც ახალგაზდა კაცი, რაც ხმა ერჩოდა, გასძახოდა.

„ვინ უყიდის მძივებსა  
ტუდურკინის ლამაზ მილკას,  
ლამაზ ვერცხლის მძივებსა?“

„მე მიყიდის კირიაკი,—  
სულერთავად ვატარებ,  
იმას კი გავახარებ!“

„ვინ უყიდის თეთრსა კაბას  
ტუდურკინის ლამაზ მილკას,  
თეთრსა კაბას—ატლასისას?“

„მე მიყიდის კირიაკი,—  
სულერთავად ვატარებ,  
იმას კი გავახარებ!...“

სიმღერა გაათავა ყმაწვილმა და ქუჩაში სიჩუმე ჩამოვარდა. მაგრამ ამ სიმღერამ ყველა აალაპარაკა მღედელ სტავრის მეზობელ მილკა ტუდურკინის შესახებ. მილკა ლამაზი ქალი იყო, მაგრამ თავი ნამუსიანად არ ეჭირა. ქალაქში, ვინ იცის, რაებს არა ლაპარაკობდნენ მას შესახებ და რაკი ერთი და ერთი გაუტყდა სახელი, ყველას ისა ჰყავდა ყბად აღებული. პატივცემული მამები ამ ქუჩისა საგონებელს მიეცნენ: ჩვენც გვყავს ქალები და ვაი თუ ბაძით ისინიც გაურცხვდნენო. მილკას მშობლებს ურჩიეს მეზობლებმა, ლილო ბაკირჯიჩის შვილს ჩაჩკოს შენი ქალი გაგიყვებით უყვარს და მიათხოვეო. მაგრამ ჩაჩკოს მშობლები უარზე იდგნენ: ჩვენ შვილს იმ უნამუსოს როგორ შევრთავთო?

მიზეზი რა არის, რომ ლილო ბაკირჯიჩის მილკას სახელის გაგონებაც კი არ უნდა?—იკითხა მღედლის ცოლმა,—მერე

და ვინ უნდა შერთოს თავის კოლოს მსგავს რაჩკოს? იქნება, ჩორბაჯისა ან ვინმე დიდკაცის ქალი სურს რძლად? მილკას რას უწუნებს, ნეტავი: ახალგაზდაა, ლამაზია... მართალია, შესცდა, მაგრამ უქკუობით მოუვიდა, მთელი სიცოცხლე უქკუო ხომ არ დარჩება! რაც ხანი გავა, უფრო კკუას მოიკრეფს... თუ კი ერთმანეთი უყვართ, რაღას უცდიან, დაიწერონ ჯვარი და მორჩება... იცხოვრონ ერთად სიყვარულით, როგორც ღმერთმა ჩააგონათ. ახლანდელზე უარესად ხომ არ იქნებიან?

— თითონ ვაჟიკ სულელია, სხვებიც არ უსვენებენ, — სთქვა მღვდელმა სტავრიმ; — საცა კი კინტო-ბიჭები მოიყრიან თავსა, მაშინათვე იმაზე დაიწყებენ ლაპარაკს, ხან ლექსს გამოუთქვამენ... რას იზამ? ქვეყანას პირს ვინ აუკრავს? ხომ მოგეხსენებათ ზოგიერთის ამბავი, — ერთს ასად აქცევენ, რწყილს აქლემს აშობინებენ! არც მილკა ტუდურჩინისამ მოიხევეკა კაი სახელი! იმის მამას ვუთხარი, როცა ვაჟი მოვიდეს შენს ქალთან, დაიჭირე და ჯვარი გადასწერე-მეთქი. ჯვარის-წერის შემდეგ ყველაფერი დააიწყდება ხალხსა-მეთქი.

— წინად კი ამბობდნენ, ჩორბაჯი სტეფნოვის შვილს უნდოდა მისი შერთვაო. — სთქვა ერთმა დედაკაცმა; — მაშინ ქალიც ნამუს-ახილი არ იყო.

— ვინ იცის, ვის არ ურიგებდნენ!... მაგრამ, ბოლოს, გატეხილი სახელი შერჩა ხელში, — ჩაერია მეორე ქალი.

— იცით, კირიაკ სტეფნოვი ხვალ ლალკა იურდანოვისას ნიშნავს? — ხმა გასცა მესამემ.

ამ სიტყვებმა ექიშს გველსავით უკბინა გულზე.

— ვინ არ იცის, რომ სტეფნოვს ხარბი თვალები აქვს?! — სთქვა მღვდელმა სტავრიმ.

— მილკას კი მოსწონს რაჩკო? — იკითხა ოგნიანოვმა და უნდოდა სიტყვა ბანზე აეგდო.

— აბა როგორ გითხრათ? — ჩუმჩუმად კი დაძვრებოდა ქალთან. ეტყობა, ქალსაც მოსწონდა, თორემ რა შვილს გაატარებდა თავისთან!... ამდენი ლარი და ხაზი რა საჭიროა! კაცმა



ორივე უნდა დაიჭიროს და ციმციმ ჯვარი გადასწეროს, მაშინ ხალხიც გაჩუმდება, სალაპარაკო შემოელევა... უფალო იესო ქრისტე... დამიფარე მე ცოდვილი... ხეალ ანდრიობაა და მე კი სულის წასაწყმენდ საგნების შესახებ ვლაპარაკობ. განჩო, აბა ერთი დოღნორეჩული ღვინო დაგვისხი ჯამზე, უნდა ყელი დავისველო, თორემ სულ გამიშრა... ანკო, მიხალჩე, წადით, შეიღებო, პატარები ხართ, დაიძინეთ... — უთხრა მღვდელმა შეიღებს.

კარი გაიღო და ერთბაშად განჩო შემოვიდა.

— მილკინის სახლში რაღაც საშინელი ყვირილია, — სთქვა განჩომ.

— რა ყვირილია?

— მეც არ ვიცი კარგად, — უბასუხა განჩომ ენის ბორძიკით, — მაგრამ, მე მგონია, რაჩკო ლიდოვი დაიჭირეს. აუარებელ ხალხს მოუყრიხ თავი.

— თუ რაჩკოა, წავიდეთ, ვნახოთ — რა იქნება. — უთხრა სტუმრებს მღვდელმა. — აბა, შეიღებო, წავიდეთ... შეიძლება, მე, როგორც მღვდელი, საჭირო შევიქნე... ხომ იცით, თუ მღვდელმა არ დალოცა, ისე არაფერი იქნება...

ყველანი გავიდნენ.

## XXII

### ხაფანგში ერთის მაგაერ მეორე გაება

მილკა ტუღურჩინისა მღვდელ სტავრის მეზობლად იდგა. ვიწრო ეზოში, კიბესთან, ოციოდე კაცს თავი მოეყარა და ყაყანებდა. ხალხი თანდათან უარესად ირეოდა. მეზობლებს თანდათან ემატებოდნენ ცნობის მოყვარენი, ორიოდ ლიფლიფაცა სჩანდა. მილკას მამა ყვიროდა; დედა ჰკიოდა და შეშინებულ ქათამსავეით იქით-აქით ეწყვეტებოდა. მალე რაჩკოს მამაც მოიჭრა, მისწი-მოსწია ხალხსა და კარებისაკენ

გაექანა, რომ იქიდან შვილი გამოეხსნა. მაგრამ რამდენიმე  
 ღონიერი მეზობელი მივარდნენ და უკან დაახვედნენ.

— ეს რა ჯაჯგურია, ძმებო, — ჰყვიროდა რაჩკოს მამა და  
 ისევ წინ იწევდა.

— ბაი ლილო, გაჩერდი, — დაუყვირა ვილამაც, — ვერა ხე-  
 დავ, რა ამბავია?

— შვილო! — წიოდა დედა მისი, — ამისთანა ქალს არ შე-  
 ვრთავ ჩემ შვილს! — და თან გამწარებით ეცემოდა იმათ, ვინც  
 იჭერდნენ და არ უშეგებდნენ წინ.

— რა უნდა უყოთ? უნდა ჩამოახრჩოთ? კაცი ხომ არ  
 მოუკლავს? — ჰკიოდა დედა და თმა-გაწეწილი, გონება-დაკარ-  
 გული ისევ იწევდა კარებისაკენ.

— როგორც რიგი და წესია, ჯვარს გადავწერთ.

— ასეთი ქალი რძლად არ მინდა!

— შენს შვილს უნდა და ჩვენც ჯვარს გადავწერთ.

დედამ არ იცოდა, რა ექნა. ჰგრძნობდა, რომ საზოგადო-  
 ების გადაწყვეტილებას ვერას გზით ვერ ეუბრებოდა.

დაიწყა ყვირილი და მოთქმა: „ჩემს შვილს ყელი გამოს-  
 ქრეს! მომიხსნეს სიცოცხლე!.. აი, შავი ჭირი ეცეს, ვინც ჩემს  
 შვილს თვალი ჰკრა და გადამირია!“

ხალხთან ერთად აურზაურსაც ემატებოდა. ამ საერთო  
 არეულობაში ზოგიერთის მაღალი ხმა ისმოდა და ყველანი  
 სხვა-და-სხვას გაიძახოდნენ:

— ჯვარი დასწერთ! ჯვარი დასწერთ! სამის ღლის უკან  
 ყველაფერი დაავიწყდებათ! — ჰყვიროდა ერთი.

— შეხეთ, ჟანდარში მოდის! — დაიყვირეს ერთხმად.

შერიფ-ალამ და ორმა პოლიციელმა ხალხი გააპეს.

— ახლავე დავსწერთ ჯვარი, — დაიბღვლა ვილამაც.

— მღვდელთან კაცი გაგზავნეთ? — იკითხა გენჩო სტოიან-  
 ნოვმა.

— მე აქა ვარ! — ხმა გასცა მღვდელმა სტავრიმ და თავის  
 სტუმრებითურთ ხალხს გაატანა და წინ წამოდგნენ. — ფიქრი

ნუ გაქვთ, ქრისტიანული წეს-რიგი ყველაფერი ვიცი... განჩო, წადი და კურთხევანი და ოლარი მომიტანე.

ამ დროს კარიც გააღეს.

— გამოდით! — დაუყვირა ქანდარმმა.

— მილკა, რაჩკო! გამოდით! — დაუყვირეს სხვებმაც. ყველას უნდოდათ ქალისა და ვაჟის ნახვა, თითქო მანამდე არც კი უნახავთო. ლიფლიფებს მალლა ასწიეს და გაღებულ კარები კარგად გაანათეს. პირველად მილკა გამოვიდა. თავი დახრილი ჰქონდა და ძირს იყურებოდა. ქალმა თავ-ტანი სრულელებით დაჰკარგა და ვერაფერი უზასუხა თავის დედას, რომელიც რაღაც გაუგებარ სიტყვებს მოსთქვამდა. მაგრამ ერთბაშად თავი მალლა აიღო და გოცებულისა და შეშინებულის სახით შეჰხედა ყველას. მილკა ეხლა უფრო მშვენიერადა და გაბრაზებულ მეზობლებს გული მოუღბო. ახალგაზდობა და სილამაზე ბრბოის სიბრაზეს მსწრაფლად აცხრობს ხოლმე. უმეტესობას სახეზე შენდობა და პატიება გამოეხატათ.

— კაი ცოლი იქნება! — ჩაილაპარაკა ვიღაცამ.

— რაც იქნება, იქნება... ოღონდ ბედნიერად კი იცხოვრონ, — სთქვა ნესტორ ფრიკალცემ.

მღვდელი სტავრი და მისი სტუმრები წინ იდგნენ და ზოგ მათგანს ქალი ჯერ არ ენახა.

— რაჩკო, შენც გამოდი! — დაუძახა მღვდელმა სტავრიმ და ბნელს ოთახში შეიხედა.

— ნუ გრცხვენიან, ყმაწვილო, — უთხრა მეორემ, — ჩვენ ყველანი გაპატივებთ და მღვდელი სტავრიც საუკუნოდ დაგლოცავთ.

ვაჟი არ გამოდიოდა.

— შიგნით არის? რატომ არ გამოდის? — ჰკითხა მღვდელმა მილკას.

თავით ანიშნა ქალმა, შიგნით არისო, და თან გოცებით კარებს შეხედა.

ქანდარმმა ველარ მოითმინა ამდენი და დაუყვირა:

— გამოეთრიე!



სხვებმაც დაუძახეს რაჩკოს. ხალხი კარებს მიუახლოვდა. ცნობისმოყვარეობა ყველას საშინლად გაუცხოვლდათ. მაინც არავინ გამოჩნდა.

მაშინ ჟანდარმი ოთახში შევიდა და ხალხიც შიგ შეჭყვა. კუთხეში გაუნძრევლად ყმაწვილი კაცი ატუზულიყო.

მაგრამ ეს რაჩკო ბაკირჯიჩი არ იყო.

ეს იყო სტეფჩოვი.

ყველანი სახტად დარჩნენ. ჟანდარმმა უკან დაიხია. თავის თვალებს არ უჯერებდა. თავიანთს თვალებს არც სხვები უჯერებდნენ. მღვდელმა სტავრიმ ოლარი ძირს დაუშვა; მისი სტუმრები ერთმანეთს გაოცებით შესცქეროდნენ. სოკოლოვმა გესლიანისა და თან გამარჯვებული სახით შეხედა თავის მეტოქეს; ტუჩებზე ღიმი შეუთამაშდა და ამ ღიმილით ნიშნს უგებდა მტერს; დიდი სიამოვნებით უცქეროდა ამ ამბავს. სტეფჩოვი მოკვდა, შერცხვენილი და მიწასთან ვასწორებული, თავის თავს არა ჰგავდა. შეშინებული იყურებოდა იქით-აქეთ. „სტეფჩოვი, სტეფჩოვი, სტეფჩოვი!“ ჩურჩულებდნენ მის სახელს გარშემო. სტეფჩოვმა ხელახლა მიმოიხედა, თითქო ეძებს — სად დავიძალა. ან როგორმე ჩქარა გამისკდეს მიწა და თან ჩამიტანოსო!

ამ სახლში როგორ გაჩნდა სტეფჩოვი? მისმა უიღბლობამ მოიყვანა აქ შემთხვევით.

იმ საღამოს, მიხალაკის რომ გამოეთხოვა, პირდაპირ კონაკისკენ წამოვიდა. მაგრამ კონაკის კარებთან რომ მივიდა, გაჩერდა და ყოყმანი დაიწყო. ძალიან გაბოროტებული იყო ბაიჩოზე, მაგრამ პატრიოტიზმის გრძნობამ ამხილა და საგონებელს ჩააგდო. შეეშინდა თავის საქციელისა და გადასწყვიტა მეორე დილას მისულიყო: დილამდე კიდევ ვიფიქრებ, იქნება, უკეთესად წავიყვანო საქმეო. ძონაკიდან ერთ თავის ნათესავთან წავიდა, ქალაქის განაპირად, მაგრამ შინ არ დაუხვდა, და უკანვე გამობრუნდა. სწორედ ამ დროს შემოხვდნენ ექიმი და ოგნიანოვი, რომელნიც მღვდელ სტავრისთან მიდიოდნენ სტუმრად. სტეფჩოვმა იცნო, თანაც შეეშინდა, ამ უკაცურ ქუჩაზე არაფერი მიყონო, და უკან გამოტრიალდა. რომ გაი-



გონა, მომდევნო, თავზარდაცემული, რაც ღონე ერჩოდა, გაიქცა. მილკას სახლის ქიშკარს რომ მიატანა, შიგ შეიქრა და ეზოში ამოსულ სქელ შამბში თავი შერგო. როცა გარედან ჩამი-ჩუმი მისწყდა, საფარიდან გამოსვლა დააპირა. მაგრამ ამ დროს ეზოში ვიღაც ქალმა გაიარა და კიბეზე ავიდა. სტეფ-ჩოვმა მილკა სიარულზე იცნო. ერთ დროს მილკა შეაცდინა და მერე თავი დაანება. ახლა მოაგონდა, მილკას ჩემი მონა-წერი წერილები აქვსო, ჩემი ნიშნები თუ გაიგო, შეუძლია ეს წერილები გამოაჩინოს და საჯაროდ შემარცხვინოსო. ეინმე ჩემი მტერი გამოჩნდება და ქალს ურჩევს ასეთ ნაირად იძიოს ჩემი შურიო. სტეფჩოვმა გადასწყვიტა, როგორმე დაეტყუენა ქალისათვის წერილები, და, თუ შეიძლებოდა, იმაე დაშესვე. ჩუმად მიიპარა კართან და ქალის ოთახში შევიდა.

ეს შეამჩნია მილკას ერთმა ნათესავმა, რომელიც რაჩკოს სდარაჯობდა და უნდოდა მეზობლების რჩევისამებრ მოჰქცეოდა. საბნელეში სტეფჩოვი რაჩკო ეგონა და მილკასთან ერთად ჩაჰყეტა. მერე გაიქცა მეზობლების დასაძახებლად და ის აურზაური ასტყდა, რომელიც უკვე დავინახეთ.

• • • • •  
 ჟანდარმმა მალე მოისაზრა, როგორ მოქცეულიყო.

— ეი, გზა გვიტოვებ, ბატონს პოლიციაში წაიყვან და იქა ვკითხავ ყველაფერს! — შეუტია მრისხანედ ხალხს. ხალხმა ჩოჩ-ქოლი შექმნა.

— პოლიციაში ნუ მიგყავთ, ნუ მიგყავთ! რაც საჭიროა, ყველაფერს აქვე ვიზამთ! — დაიძახა ვიღამაც უკანიდან. აღბად ვერ შეამჩნია, რომ რაჩკოს მაგივრად სტეფჩოვი გაება ხაფანგში.

— კაცო, ეს სტეფჩოვია! — სტქვეს ზოგიერთებმა.

— სტეფჩოვი?! როგორ?

ხალხი უარესად აყაყანდა.

— რა ვუყოთ მერე! თუ ჩორბაჯის შვილია, — დაიყვირა ვიღამაც, — იმასაც ისე უნდა ვუყოთ, როგორც რაჩკოს: ის ეითომ ვინა ბრძანდება!

ოგნიანოვმა ჩუმად უთხრა ჟანდარმს:

— შერიფ-ალა აქედან მალე წაიყვანეთ როგორმე, ამდენი ხალხი სულ იმას უყურებს... კაცი სირცხვილით დაიწვა.

ოგნიანოვს დაავიწყდა თავისი მტერი და მხოლოდ მსხვერპლსა ჰხედავდა, სირცხვილით მიწასთან გასწორებულს. მისმა გულმა ვერ გაუძლო კიდევ ეცქირნა ადამიანის დამცირებისათვის.

ჟანდარმმა იქვის თვალით შეხედა ოგნიანოვს.

— თავი დაანებე, შენ რა გინდა? დეე დაიწვას სირცხვილით! — სახელოზე ჩამოსწია სისხლ-მოწყურებულმა სოკოლოვმა.

სტეფნოვმა მხოლოდ ახლა დაინახა თავისი მდევნელი. იფიქრა, ალბად ამათ მომჭრეს თავი და ამ სირცხვილში ამათ ჩამაგდესო; მათს პირზე ლიმილიც შეამჩნია. გული ბრაზით აღევსო და ისე საშინლად შეხედა ორსავე, რომ, არ დაუნახავთ, თორემ უეჭველად გულს შეჰზარავდა ერთსაც და მეორესაც...

ჟანდარმმა ხელი მოჰკიდა სტეფნოვს და გაიყვანა...

— გზა, — დაიყვირა ჟანდარმმა, — ეს თქვენი საქმე არ არის... თქვენ აქ რაჩკო ბაკირჯიჩს ეძებდით. გზა უტიეთ, ბატონებო! ხალხმა გზა უტია.

— როგორ დაგემართათ? — ჩუმად ჰკითხა გულ-მტკივნეულის სახით შერიფ-ალამ.

— ოგნიანოვმა და სოკოლოვმა გამცეს, — ჩურჩულით უბასუხა სტეფნოვმა.

ხალხმა იხუვლა და უკან გაედევნა.

### XXXIII

#### ერთი მოჩვენება

მეორე დღეს უქმე იყო. წინამძღვარი ნათანაილი ეკლესიაში იდგა და ტროპარსა ჰგალობდა. ვიღამაც ხელი ახლო და მოიხედა.

მის წინ მუნჩო იდგა.

— რა გინდა, მუნჩო? გასწი აქედან! — უთხრა წყრომით წინამძღვარმა და ისევ ტროპარის ვალობა განაგრძო.

მაგრამ მეორეჯერ უფრო ღონივრად მოუჭირა მკლავზე უსინათლომ და ხელს არ უშვებდა. წინამძღვარი ხელ-ახლა მობრუნდა გულ-მოსული და შეამჩნია, რომ მუნჩო მეტად აღელვებული იყო: მოელვარე თვალები შიშით გაესებოდა და მთელი ტანი უკანკალებდა.

— მუნჩო, რა დაგემაართა? — მრისხანედ ჰკითხა წინამძღვარმა.

მუნჩომ საზარელის სახით დაატრიალა თავი, თვალები უარესად გადმოკარკლა, გაიბერა და რის წვალებით წამოიყრანტალა:

— რუს-სი-ან... წის...ქვილ...თან... თურ...ქე...ბი!.. — და, იმის მაგივრად, რომ ეთქვა თავისი სათქმელი, ხელების ქნევა დაიწყო, თითქო მიწასა სთხრისო.

წინამძღვარი ჯერ გაოცებული უყურებდა, მერე, ერთბაშად, საშინელმა აზრმა გაურბინა თავში. მუნჩომ, ალბად, იცის რომ წისქვილთან თურქებია დამარხული; და რადგან რუსიანც ახსენა, მთელი საიდუმლოებაც ეცოდინებოდა. როგორ! ამას როგორ ვერ მივხვდითო... მხოლოდ ის მოისაზრა, რომ საიდუმლოება მთავრობას შეტყობილი აქვსო!..

— ბოიჩო დაილუპა! — ბუტბუტებდა განწირულის სახით ნათანაილი; დაავიწყდა ტროპარიცა, ვალობაცა, ვერც მამა გედეონსა ხედავდა, რომელიც მეორე მხარეს იდგა და თავითა და ხელებით თავგამოდებით ანიშნებდა, ახლა თქვენ უნდა იგალობოთო.

ნათანაილმა საკურთხეველში შეიხედა, სადაც მამა ბიკენტი სამწირველოდ ემზადებოდა, მამა გედეონს მიანდო ტროპარები და ეკკლესიიდან გავიდა. ერთ წამს უკან თავლაში გაჩნდა, ხოლო მეორე წამში ისარივით მიჰქროდა ქალაქისაკენ.

იმ დღეს საშინლადა ჰყინავდა. ღამით რთვილი დასდო და მდელი და ხის ტოტები თეთრად შეჰჰენტა. წინამძღვარი განუწყვეტლივ უჯავრდებოდა თავის შავს ლურჯასა, რომელ-

საც ნესტოებიდან ბოლქვა-ბოლქვად გამოსდიოდა ორთქლი. იმასა სჩქარობდა, თუ კი უკვე დაგვიანებული არ იქნებოდა, ოგნიანოვი ეხსნა განსაცდელისაგან. ადრე, ოსმალების მოკვლის შესახებ ნამდვილი მიზეზი არავენ გაიგოსო და ისეთი ზღაპარი შესახვა და გაავრცელა, რომ ყველამ დაიჯერა და ყველაფერი მიჩუმდა. ახლა ის უკვირდა, ეს მივიწყებული საქმე ვინ გააღვიძა და მკონარა და უმაქნისი უფროსი პოლიციისა ვინ დააყენა ფეხზეო? არა, უეჭველია, ამ საქმეში მოლაღატის ხელი ჟრევიანო. მუნჩო, თუ მართლა იცის კიდევ საიდუმლოება, ამას არ იზამდა, ამიტომ რომ ოგნიანოვს აღმერთებსო! იქნება, ამ იდიოტმა ისე გასცა თავისი საყვარელი კაცი, რომ თითონაც ვერ მიხვდა, რასაც შვრებოდა! მაგრამ, ყოველსავე შემთხვევაში, საიდუმლოება გამეღავნდა და ოგნიანოვს მწარე დღე მოეღისო.

ქალაქში ჩასვლას მეოთხედ საათის მაგიერ ოთხი წუთი მოანდომა. ცხენი მთლად აქაფებული იყო. ცხენი ძმასთან დასტოვა და ოგნიანოვის სახლამდე ფეხით მივიდა.

— ბოიჩო აქ არის?—იკითხა ნათანაილმა შეშინებულის ხმით.

გავიდა. ეს-ეს არის, სამი პოლიციელი მოვიდნენ და ყველგან ეძებდნენ. ნეტავ, რა უნდათ, ამ წყეულებს? თითქო კაცი მოეკლასო!—უზასუხა გულმოსულმა სახლის პატრონმა.

— რად წავიდა?

— არ ვიცი.

— საქმე ცუდადაა, მაგრამ იმედი კიდევ არის,—თავისთვის უთხრა წინამძღვარმა და სოკოლოვისაკენ გაიქცა. ოგნიანოვი მაინცა და მაინც გულმოდგინედ არ დადიოდა ეკლესიაში და ამიტომ აზრდაც არ მოსვლია—იქ წასულიყო და მოეკითხნა. განკის საყვესთან რომ გაირა, შიგ შეიხედა, მაგრამ ოგნიანოვი არც იქ იყო.

— შინ არის ვინმე, დედი?—ჰკითხა ბერმა, როცა სოკოლოვის ეზოში შეიქრა.



— არავინ გახლავთ, თქვენო კურთხევავ, — უბასუხა დედაბერმა და ხელიდან ცოცხი გაავლო, რომ ბერთან ხელზე სამთხვევლად მისულიყო.

— ექიმი სადღაა? — ჰკითხა გაჯავრებულად ნათანაილმა.

— რა მოგახსენოთ, მამაო, — უბასუხა დედაბერმა ენამოკიდებით და შეშინებულსავით დაიწყო ყურება.

— უჰ! — ამოიოხრა წინამძღვარმა და უკან გამოტრიალდა.

— დაიცა! დაიცა! — მიაძახა დედაბერმა.

— რა გინდა? — ჰკითხა მოუთმენლად ბერმა.

დედაბერმა იღუმალი სახე მიიღო და ჩუმად უთხრა:

— აქ არის, მაგრამ იბალება, წყეული თურქები დაეძებდნენ... მაპატივე, მამაო?

— მე ის არ დამემალება, რატომ მაშინათვე არ მითხარი, — უთხრა წინამძღვარმა და კარებისკენ გაექანა. დააკაკუნა თუ არა, კარი მაშინათვე გაეღო და დაინახა ექიმი.

— ბოიჩო სად არის? — პირველადვე ჰკითხა წინამძღვარმა.

— რადასთან... რა იყო? — სოკოლოვი მიხვდა, საზარელს რასმე გავიგონებო და გაფითრდა.

— წისკვილთან საფლავსა სთხრიან. ვიღამაც გავცა.

— ვაიმე, დაიღუპა ოგნიანოვი! — განწირულის ხმით წამოიძახა ექიმმა. — ახლავე უნდა შევატყობინოთ...

— პოლიცია ეძებდა, მაგრამ ვერ იპოვა, — განაგრძო აღელვებულმა წინამძღვარმა, — მე ცხენით მოვირბინე, რომ გამეფრთხილებინა... ღმერთო ჩემო, ვინ იცის, რა მოუვა საწყალ ბიქს! დაღუპა ვიღამაც... სად მირბინარ? — ჰკითხა გაოცებულმა ნათანაილმა ექიმს.

— ბოიჩოსთან... უნდა ვიხსნა როგორმე, თუ კი დაგვიანებული არ არის, — უთხრა ექიმმა და კარი გააღო.

წინამძღვარმა უარესად გაოცებულის სახით შეხვდა.

— განა შენც არ გეძებენ? — სჯობს, მე წავიდე...

— არ შეიძლება. შენ რომ რადასთან მიხვიდე, ან ეკლესიაში გამოჩნდე, შეგნიშნავენ და შეიძლება უარესად გაფუჭდეს საქმე.

— შენ თუ გნახეს, ხომ დაგიჰერენ?

— შეიძლება, მაგრამ ასეა თუ ისე, უნდა შევატყობინო. ზოიჩოს მეტად ცუდი დღე მოეღოს. მიყრუებულ ქუჩებით მივალ.

ესა სთქვა და სოკოლოვი გაიქცა.

წინამძღვარს თვალეზზე ცრემლები მოერიო და ისე დალოცა ექიმი.

ოგნიანოვი ამ დილით საქალებო სასწავლებელში უნდა მისულიყო, რადგან აქ უცდიდა ერთი დღეღეგატი პოლ—ელთა სარევიოლუციო კომიტეტისა. ეს სოკოლოვი იცოდა. რამდენისამე წუთს უკან ეკკლესიის ეზოში გაჩნდა, აირბინა კიბეზე და რადას ოთახში გრიგალივით შეეარდა. რადა ფრიად გააკვირვა სოკოლოვის ასე მოულოდნელად, და ისიც ასე აღრე მოსვლამ.

— ზოიჩო იყო აქა?—ჰკითხა ქალს და გამარჯვების თქმა არც კი გახსენებია.

— ეს-ეს იყო, გავიდა,—უპასუხა რადამ.—რა იყო?

— სად წავიდა?

— ეკკლესიაში... რა დაგემართა? ღმერთო ჩემო!

— ეკკლესიაში?—ძამოიძახა სოკოლოვი. მეტი არაფერი უთქვამს, ისე გააღო კარი, რომ ეკკლესიაში გაქცეულიყო. მაგრამ მაშინათვე უკან შემოტრიალდა: დაინახა ჟანდარმი, რომელიც ეკკლესიიდან გამოსასვლელ კარებთან პოლიციელებს აყენებდა.

— რა დაგემართა?—დაიკვილა მასწავლებელმა და იგრძნო, უბედურება დატრიალდებო.

სოკოლოვი საარკმლიდან პოლიციელები აჩვენა.

— ხედავ, ზოიჩოს ჰყარაულობენ. ვიღამაც გასცა, რადა! მეც მეძებენ... ახ! დავიღუპეთ, დავიღუპეთ!—წამოიძახა კენესით ექიმმა და ხელები თავს იტაცა.

რადა სკამზე დაეშვა მოდუნებული. მისი მრგვალი სახე, შიშისაგან გაფითრებული, შავ თავ-ჩითში უფრო ფერ-წასულად მოსჩანდა. ამ წუთას მარმარილოს უგავდა სახე.

სოკოლოვი სარკმელს არა სცილდებოდა. პოლიციას ვერ ეჩვენებოდა და თვალებით ვინმე სანდო კაცს ეძებდა, რომ ოგნიანოვთან მიეგზავნა და გაეფრთხილებინა. მოულოდნელად ფრატიუ დაინახა, რომელმაც სარკმელთან ჩაიარა ეკკლესიაში შესასვლელად.

— ფრატე, ფრატე, — დაუძახა ჩუმად, — მოდი აქ!

ბატონი ფრატიუ შორიახლო გაჩერდა.

— ფრატე, მამაკაცების ეკკლესიაში მიდიხარ ხომ?

— ჰოდე, — უბასუხა ფრატიუმ.

— გეხვეწები, თუ ძმა ხარ, მიდი ბოიჩოსთან და უთხარი, კარებთან პოლიცია გელის და თავს უშველე-თქო.

ბატონმა ფრატიუმ შეშინებულის თვალებით შეხედა ეკკლესიას და დაინახა, რომ სამივე კარებთან, მართლაც პოლიციელები იდგნენ. პატარა სახეზე სულელური შიში გამოეხატა.

— მაშ ეტყვი? — ჰკითხა მოუთმენლად ექიმმა.

— მე?... კარგი, ვეტყვი, — უბასუხა ყოყმობით წინდახედულმა ფრატიუმ... მერე იქნენულად დაუმატა:

— კარგი და, რატომ შენ თვითონ არ ეტყვი, ექიმო?

— მეც მეძებენ, — ჩურჩულით უთხრა სოკოლოვმა.

ბატონს ფრატიუს სახე უარესად გამოეცვალა და თავი საჩქაროზე მოარიდა ასეთს საშიშს მოსაუბრეს.

— ფრატე, მალე, მალე, გესმის! — მიაძახა სოკოლოვმა.

ბატონმა ფრატიუმ თანხმობის ნიშნად თავი დააქნია, რამდენიმე ნაბიჯი ეკკლესიისაკენ გადასდგა და მერე ერთბაშად მოუხვია ქალების მონასტრისაკენ.

ექიმი ხედავდა ფრატიუს საქციელს და გამწარებული თმას იგლეჯდა. ხედავდა, აი, საცაა, ოგნიანოვს დაუგვიანდება ამბის შეტყობა და მაშინ ღეთის განგება თუ გადაარჩენს უბედურებასაო.

ოგნიანოვი მართლა გასცეს. იმავე ღამეს, სტეფანოვმა კონაკში, სადაც ის მილკა ტუდუორჩინის სახლიდან მოიყვანეს, ბეის ყველაფერი უამბო, რაც რამ გაიგო ოგნიანოვის შესახებ. ამ ლაპარაკის დროს ერთბაშად შემდეგმა აზრმა ვაუწყელა თავ-



ში. მოაგონდა მოკლულ ემექსიზის ძაღლის ამბავი, რომელმაც თვითონ შერიფ-ალამ უთხრა. მაშინ არც ისა და არც ჟანდარმი კარგად არ ჩაჰკვირვებოან ამ საოცარ გარემოებასა. ახლა სტეფ-ჩოვს ყველაფერი ნათლად წარმოუდგა. ძაღლი ისე ჩაცივებით რადა სთხრიდა წისკვილთან მიწას, ოგნიანოვს ისე გაშმაგებით რატომ შეუტია? განა აქ არ უნდა ეძებოს კაცმა იმ ორის თურქის დაკარგვის მიზეზი? ისინი ხომ სწორედ მაშინ დაიკარგნენ, როცა ოგნიანოვი გამოჩნდა ბელაია ცერკოვში? უეჭველად ოგნიანოვი იზამდა ამასაო. სტეფჩოვის ბოროტებით სავსე ჭკუამ ელვის სიმალეზე მოისაზრა ყოველივე ეს და, რაც რამ იქვი და გუმანი ჰქონდა, ურყეველ ქეშმარიტებად აღიარა.

სტეფჩოვმა ურჩია, ეხლავე მოათხრევინე მიწა ძველ წისკვილის გვერდითაო. ბეიმ მაშინადვე დიდის ამბით ბრძანება გასცა. გადასწყვიტა, დილა-ადრიანად დაეჭირა ოგნიანოვი, — არსად დაიმალოს, ან კიდევ სხვა არავინ მოჰკლასო... ამავე დილას იპოვეს ორი თურქის გვამი და ოგნიანოვის ბედი გადასწყდა. ეკკლესიის კარებთან, როგორც მხეცს, ისე სდარაჯობდნენ. ჟანდარმმა არჩია — კარებთან დაეჭირა და არა შიგ ეკკლესიაში. შიგ რომ ხელი მოგვიდო, შეიძლება, ხალხი აშფოთდეს და ოგნიანოვმაც თავი გამოიღვას და ძალზე დადგესო. მოულოდნელად შევიპყრობ, ეს უკეთესი იქნებაო.

იმ დროს, როცა სოკოლოვი ოთახის ერთს კუთხეში თმას იგლეჯდა და მეორე კუთხეში რადა იწვა უგრძობლად, კიბეზე ფეხის ხმა გაისმა.

ექიმი შეკრთა და ყური დაუგდო. ფეხის ხმა ჯოხის კაკუნთან ერთად თანდათან ახლოვდებოდა და კარებთან შესწყდა კიდევ. ვილამაც საეკკლესიო კალოზე მონოზნების ცნობილი ტროპარის გალობა დაიწყო: „აკურთხე, უფალო, მონანი შენნი. წმიდა სერაფიმა და მშვიდი ქერუბინა; შავთვალა სოფია და ბამბიქულა რიფსილია; ბუთხუზა ირინე და მიკნავებული მაგდალინა; ქალბატონი როვოამა, რომელიც, დიდი ხანია, სახლში არ არის“...

— კოლჩო! — დაუძახა ექიმმა და კარი გააღო. ბრმა თამამად შემოვიდა.

— ეკლესიიდან ხომ არ მოდიხარ, კოლჩო?

— ჰოლდე...

— ოგნიანოვი ხომ არ გინახავს?—ჰკითხა მოუთმენლად ექიმმა.

— სათვალეები ჯერ არ მომსვლია ამერიკიდან, ასე რომ არ დამინახავს. მაგრამ ვიცი კი, იქ არის, ყველაზე წინ დგას. ექიმმა სერიოზულის კილოთი უთხრა:

— კოლჩო, ხუმრობას თავი დაანებე. ოგნიანოვს პოლიცია დასდევს და ჟანდარმი ეკლესიის კარებთან მისს გამოსვლას ელოდება. იმან კი არაფერი იცის. თუ ახლავე არ შევატყობინეთ, შექველად დაილუპება.

— მივდივარ!

— გეხეწები, კოლჩო!—შეევედრა რაღა, რომელსაც ცოტა იმედი მოეცა.

— მე თვითონ წავიდოდი, მაგრამ პოლიცია მეც დამეძებს, შენ კი ყურადღებას არაფერს მივაქცევს,—უთხრა ექიმმა.

— ოგნიანოვისათვის, თუ საჭირო იქნა, ჩემს საცოდავ სიცოცხლესაც არ დაეიშურებ... რა ვუთხრა?—ჰკითხა თანაგრძნობით უსინათლომ.

— ასე უთხარი: „ყველაფერი გაიგეს; პოლიცია ეკლესიის კარებთან გელოდება, თავს უშველე!“—მერე წარბ-შეკრით დასძინა:—თუ კი ვინმე არ მიუგზავნეს და ეკლესიიდან გარედ არ გამოიტყუვეს...

კოლჩო მიჰხვდა, რამდენად ძვირფასი იყო ყოველი წუთი და საჩქაროზე გავიდა.

(შემდეგი იქნება)



# მასხარა კავშალონი

ძველებური მოთხრობა

ნ. ს. ლესკაუვისა

(თარგმანი)

◆◆◆ \*)

რომ არ შემომხარჯოდა ფული, მე აღარ გავგზავნე დავრ-  
დომილი მხედარი სამშობლო ქვეყანაში და იმ ღამის ნაშოვნე  
ოქრო სულ ჩავფალი მიწაში ჩემ საწოლ ქვეშ. დილით ჭილო-  
ბი აღარ ავწიე კარებსა და მოვიავადმყოფე თავი,—არ მინდო-  
და არსად წასვლა ჩვეულებრივ შესაქცევრად. ვინც კი მოდი-  
ოდა დასაძახებლად, ვეუბნებოდი, რომ ავადა ვარ და ამისა-  
თვის მინდა გავიდე ქალაქ გარედ სუფთა ჰაერის ჩასაყლაპა-  
ვად და სამკურნალო ბალახების საძებნელად-მეთქი. მე კი ჩუ-  
მად გავიპარე დალაღთან, ისრაელ კაპიტონთან, რომელმაც  
კარგად იცის სად რა ისყიდება, და ვთხოვე მოეძებნა გასასყი-  
დი მინდორი, სადაც წყარო მომდინარებდეს და ბზის ჩრდი-  
ლიც იყვეს. დალაღმა კაპიტონმა დიდად გამახარა.

— მე მაქვს სახეში სწორედ იმ გვარი მამული, როგო-  
რიც შენ გინდაო. და ისე ქებით ამიწერა ის მინდორი, რომ  
ვერც კი წარმოვიდგენდი. მშვენიერი წყაროც არისო, ბზაცა  
სდგას და ამასთან ამომცენარებს ერთი ბალაზინის ბუჩქიც,  
რომელიც გარე მოჰყენს მშვენიერ სუნნელებასაო.

\*) იხ. „მოამბე“ № V, 1899 წ.

— მაშ წადი და მიყიდე-მეთქი ეგ მინდორი.

ისრაელი დამპირდა—ამ საქმეს უეჭველად გაგირიგებო.

— აი, ვფიქრობდი, ახლა კი მოვა დასასრული ჩემი უწყესო ყოფა-ცხოვრებისა, ახლა კი გავანებებ თავს ყვირილსა და სტვენას, ავიხსნი სამახარო შესამოსსა, ჩავიცვამ დარბაისლოურ ლევიტონსა და თავზედ გადავიკრავ ხელცახოცსა, დღისით ვიმუშავებ მინდორში, საღამოობით ჩამოვჯდები ჩემი ტალავრის წინ და სტუმართ-მოყვარეობაში მივბაძავ აბრაამსა.

არ დავიძალავ შენა, რომ თუმცა მე ესე ვაპირობდი ჩემის ცხოვრების მოწყობასა, მაგრამ გული თითქო კი მეუბნებოდა, რომ ეს ჩემი დაწყობილება ამაოდ ჩაივლიდა.

კაპიტონიდან რომ გამოვბრუნდი, რალაც შიშმა ამიტაცა: ვაი თუ გაიგო ვინმემ, რომ მე ბლომა ფული მაქვს, შევიდა ჩემს სახლში და მომპარა ეს ფული?.. გულ-გაშფოთებული გავიქეც სახლისაკენ რაც ძალი და ღონე მქონდა, მივედი თუ არა შინ, დავემხე მიწას და ამოვთხარე ჩემი შენახული; დავთვალე ფული და დამიხედა ხელ-უხლებლად ორას ოცდა ათი ოქრო, რომელიც კორინთელმა მაჩუქა. ხელ-მეორედ წავფალი ეს ზინათი მიწაში და მეც, როგორც ძალღი, ზედ წავაწექი.

გინდა, რომ ჭეშმარიტად გაიგო, ვისი უფრო მეშინოდა? მარტო იმ ქურდებისა კი არა, რომელნიც სახლებს ამტვრევენ,— მე უმეტესად მეშინოდა იმ შინაგანა ქურდისა, რომელიც განუწყვეტლად სცხოვრობდა ჩემთან ერთად და მეფობდა ჩემს გულში. მე ვცდილობდი თვალ-წინ აღარ წარმომედგინა სხვისი უბედურება და გაჭირვება: მეშინოდა არ მომაკლდეს ამითი გულის სიმტკიცე და ამ გვარი სიმტკიცე კი ჩემთვის დიდად საჭირო იყო გასასწორებლად ჩემის ცხოვრების კვალისა.

იმ დღეს დაღალის ძებნაში და სირბილში ძალიან მოვიღალე, ისე რომ მალე მომეკიდა ძილი, მაგრამ ძილი მქონდა მოუსვენარი: სიზმარში ვნახე, ვითომ მეყიდნა კიდევ კაპიტონის ნაქები მამული; ვიდექი ნათელ სახლში, წინ წამოჩქერდა კამკამი წყარო, ბალაზინის ბუჩქი აესებდა გარემოს საოცარის კეთილ-სუნნელებითა და ტოტებ-გაშლილი ბზა მიჩრდილებდა.

საკვირველია, ამ ყოველ მშვენიერებას თითქო რაღაც აფუჭებდა: ჩაიხედე წყაროში—შიგ უთვალავი წურბლები ირევოდნენ, ბზის გარემოში დახტოდნენ საზიზლარი და უშველებელი მიწის ბაყაყები, ბალახინის ბუჩქის ქვეშ კი იკლაკნებოდა შხამიანი ასპიდი. დავინახე თუ არა ასპიდი, ისე შევშინდი, რომ ძილიდან რეტყანივით წამოვხტი და მაშინვე ფულს მივევარდი—ხომ არავინ მომპარა-მეთქი? ფული იქვე იყო და მეც ზედ ვაწეკი და ძალ-დაუტინებლივ იმას ვერაფერ წაიღებდა. მაგრამ, ვამბობდი, ეხლა დამასკოში არავისთვის დაფარული აღარ იქნება ჩემი ესე უცბად გამდიდრება. კორინთელმა იმისთვის კი არ გამამდიდრა, რომ საიღუმლოდ დარჩენილიყო ეს,—რასაკვირველია, იმას უნდოდა ხმა გავარდნილიყო დამასკოში, რომ ის უხვი და ფრიად მდიდარი კაცია. გამაყებულ მდიდარს უყვარს, როდესაც შენატრიან და შეაქებენ იმის სიმდიდრესა. მაშ, უეჭველია, ეხლა ყველამ იცის, რომ მე ფულები მაქვს, შემომიცივინდებიან ღამე, ამიკლებენ და ბევრსაცა მცემენ და თუ წინ აღუდგები, იქნება კიდევ მომკლან-მეთქი.

რადგანაც კარები ჩამოფარებული მქონდა, ძალიან დაცხა ოთახში, ავდეკი და ცოტათი გადავწიე ქილოზი. ქუჩაში ორი ხაბაზის ბიჭი მიდიოდა, გასასყიდად პურით საესე კალათები ეჭირათ ხელში, წინ მიუდიოდათ სახედარი და იმასაც გოდრებით პური ეკიდა. ბიჭები მიერეკებოდნენ სახედარს და ლაპარაკობდნენ—იცი ვისზე? ჩემზედ!

— შეხედე,—სთქვა ერთმა:—ჩვენი ჰამფალონი ქილოზსაც აღარც კი ხდის კარებსა.

— ეხლა რაღა საჭიროა მაგისთვის ფარდის აწევა,—უთხრა მეორემ:—რაღად უნდა გრება და ყირამალა დგომა: ეხლა მდიდარია და შეიძლება ეძინოს რამდენიც სურს. შენ ხომ კარგად გაიგონე რაებს ლაპარაკობდნენ დღეს ჩვენს სახაზაოში.

— როგორ არა, მე ისე პირ-დადებული ყურს ვუგდებდი, რომ ჩვენმა ოსტატმა ერთი კარგიც წამკრა კისერში. ვილაც კორინთელს, რომ დაემცრო ჩვენი დამასკელი მდიდრები, უჩუ-

ქებია ჰამფალონისთვის ათასი ოქრო. ეხლა ეს იყიდის კარგ სახლს, ვენახებს და გაინადიმებს შადრევანთანა.

— ათასი კი არა, ოცი-ათასი ოქრო, — გაუსწორა მეორე ბიჭმა: — და ეს ფული წყობილა მარგალიტით მოჭედნილ ყუთში. აუცილებლივ, ჰამფალონი შეიძენს მინდორს და სასახლესაც; მოიწვევს ხოლმე მეცნიერთ და დასტკებება იმათი საუბრობით სული-წმინდაზე.

ამ ლაპარაკიდან ცხადად სჩანდა, რომ მთელმა დამასკმა ზედ-მიწევნით იცოდა ჩემი მოულოდნელი გამდიდრება, და ამასთანავე საჩუქარი კორინთელისა, ერთი ათადაც ექციათ.

და ვის უნდა სცოდნოდა, რამდენი ფული მომცა კორინთელმა, ამ უკანასკნელმა თითონაც კი ნამდვილად არ იცოდა რამდენი ჩამიყარა ხელ-მანდილში. მხოლოდ ზედ-მიწევნით ერთად-ერთმა მე ვიცოდი, საჩუქარი რამდენს შეადგენდა...

მარტო ამითი არ იყო შესანიშნავი ბიჭების ნალაპარაკევი. ერთმა ბიჭმა წარმოსთქვა — ეხლა ყველანი იმასა ლაპარაკობენ, სად შეინახა ჰამფალონმა ამოდენა სიმდიდრე — ოცი ათასი ოქრო. ვითომ ამის გამოძიებაში ყველაზე მეტად იყო შესული მესალამურე ამმუნნი. უნდა გითხრა, რომ ეს ბატონი დაუდევარი და თავზედ ხელ-აღებული კაცია; ჯერ იყო მხედრად და ხან ერთ და ხან მეორე ერთმანეთის მოწინააღმდეგე ჯარში ჩადგებოდა; შემდეგ მიჰყო ხელი ავანაკობას და გზებში ძარცვასა, მერე ბერად შევიდა ნიტრიის უდაბნოში. ბერობა მოსწყენოდა და მალე დაბრუნდა დამასკში თავის სალამურით და ერთი შავი უნამუსო ქალიც თან მოიყვანა შიშველი და ნიტრიის ბერის მილოტში წახვეული. აუცილებელია, მილოტი გაუხდია თავის მოძმე ბერისათვის, როდესაც მოუკლავს ისა. მოყოლილი დედაკაცი გაჰყიდა შიშველივე ერთ საუნამუსო სახლში, მილოტი თითონ წამოისხა და ღამეობით ამ გვარ სახლების წინ იღვა და უწმენდა მტერიან ფეხებსა გარყენილ ქალებთან მომავალ ღოთებსა. ჩემი წარმოდგენის დროს ამმუნნი ხშირად უკრავდა სალამურსა, მაგრამ გოგოებს კი ძალიან ეჯავრებოდათ ისა და ხშირადაც გააგდებდნენ ხოლმე სახლი-



დან. თითონვე სტყუოდა ამმუნი, ამისათვის რომ თითქო გვა-  
მათებოდა ქალებსა და იმათნაირად წარბებს იღებავდა და ფერს  
ისვამდა ლოყებზედა. ამ გვარი მიბაძვა და კამათობა დიდად  
ეზიზღებოდათ ქალებსა. ამმუნს მე საშინლად ეძულდი. მე კარ-  
გად ვიცოდი, რომ ის აქეზებდა ქუჩის ლოთებსა, დამცემოდნენ  
ლამე და ევნოთ რამე ჩემთვისა.

ეხლა, რასაკვირველია, ამმუნს უფრო გაუძლიერდებოდა  
სურვილი, რომ მოეყენებინა ჩემთვის რაიმე უბედურება. ამისა-  
გან ყველას უნდა მოლოდინებულიყო კაცი—ავაზაკობაში ყოვე-  
ლად დახელოვნებული და გამოცდილი იყო ისა. ამმუნს ფუ-  
ლიც ეშოვნა, ფულის გასესხებით ბევრ კაცს იმონავებდა და  
რასაც კი უბძანებდა, უარის ყოფა არ შეეძლოთ იმათა.

#### XIV

ამმუნის სახელი გავიგონე თუ არა, მსწრაფლ გამიელვა  
აზრმა — რა საშიშ მდგომარეობაში ვიმყოფებოდი იმ უამად-  
კარგა ხანი ვიდრე გაჩუმებული და გონზედაც ველარ მოვედი,  
რომ ახალი გამომცხვარი პური მეყიდნა იმ ბიჭებისაგანა.

ჩემი ხელობით მე ყოველთვის მაძლარი ვიყავი, ღვინოც  
ხშირად შერგებოდა ხოლმე, და ეს პირველი დღე იყო, როდეს-  
საც, თუმცა ოქრო მრავალი მქონდა, უქმელ-უსმელი დავრჩი.  
ამასთან გული მოუსვენრდა მქონდა, და შიში თანდათან მი-  
ძლიერდებოდა.

ჭამა ვიღას აგონდებოდა, მე ვკანკალებდი—დარჩება თუ  
არა ჩემი სიმდიდრე და სიცოცხლეც კი ხელუხლებლად და  
უვნებლად. სული ჩემი და ყოველი გრძნობანი აღვსილნი იყვ-  
ნენ მხოლოდ ერთი აზრითა: თვალწინ განუშორებლივ მელან-  
დებოდა გაშმაგებული ამმუნი თავის ფულით დაკავებულ მო-  
ნებითა. აი, ვფიქრობდი, ამმუნს აქამდის მოლაპარაკებულიცა  
აქვს თავისავე მსგავს ავაზაკებთანა, რომ დამლუპოს მე. ეხლა  
ისინი შეკრებილები იქნებიან სადმე სამიკიტნოში და ჩამობ-  
ნელდება თუ არა, დამესხმიან და მომთხოვენ მე ოცი ათას ოქ-



როსა. ამდენ ფულს ისინი ვერ იპოვიან ჩემს სახლში, დამიჯერებენ, რომ კორინთელს ამდენი არ უჩუქებია და დამიწყებენ ტანჯვასა. დამდალავენ, რომ გამომათქმეინონ, სადა მაქვს დამალული ოცი ათასი ოქრო!..

აი, მოხუცო, რა გაჭირვებულ მდგომარეობაში ვიმყოფებოდი მაშინა.

უცბად წარმომიდგა, რომ მე თავისდღეში არ მქონია ზრუნვა რიგიანად კარებისა და ფანჯრის დაკეტისა. როცა შინ არ ვიყავი, ტყუილუბრალოდ გამოვიხურავდი ხოლმე კარებსა და ძილის დროს ურდულს არც კი ვუკეთებდი.

ეხლა კი, აბა რაღას გამოდგებოდა ამ გვარი ჩემი დაუდევრობა. დავათვალიერე რაც კი მეზადებოდა და მოვისახრე როგორ ჩაეიკეტო, რომ ადვილი აღარა ყოფილიყო ავაზაკების შემოცვივნა.

შევუდექ თუ არა საკეტების თავდარიგსა, ანაზღეულად აფრიალდა კარების ქილობი და ოთახში კი არ შემოვიდა—თითქო შემოსტყორცნა ვინმემაო ვილაც თავით ფეხებამდინ წახვეული კაცი. შემოვარდა თუ არა, მაშინათვე მეცა მე, ყელზე გადამეხვია და ჩამაკვდა ზედა, და ერთი საძრწუნველის ხმით ამოიოხრა:

— ჰამფალონ, მიშველე!

## XV

აბა, რა რეტი დამესხა თავზედა, რა ნაირი აღშფოთებული ვიყავი და ასე მოუღწელი შემოვარდნა ჩემს სახლში რაღა კარგს დამაყრიდა. აირია ჩემი სული და გული. ვთქვი: ეხლა კი მოვიდა ჩემი უკანასკნელი საათი—ეს კაცი გამოგზავნილია ამმუნისაგან, ეს იმის ცბიერობაა და ამაში სჩანს იმ წყეულ ავაზაკის ხელოვნება და გამოცდილება.

მე თითქო ვგრძნობდი კიდევ ტკივილსა, მეგონა ხანჯალი კიდევ დამაძგერა გულში ამ უცხო კაცმა,—ყელზე მოხვევა მხოლოდ ხერხი იყო იმის მხრით... მოვიკრიფე ძალა—სუ-



ლი ტკბილია, არ მინდოდა უდროვოდ სიკვდილი — და ისე ღონივრად ვკარი ხელი ამ მოულოდნელ სტუმარსა, რომ გადავტყორცნე კედლისაკენა: იქ ეროი კუნძი ეგდო, წამოჰკრა იმას ფეხი და იქვე ჩაიჩოქა. მე ვიფიქრე, ეს ხომ მარტოკა არ იქნება, ამას სხვებიც მალე მოჰყვებიან და ამის დამარცხებაკი მე არ გამიძნელდება — ისე უღონოდ მეჩვენა მე ისა. მივეარდი და მაგრა ჩავკეტე ფანჯარა და კარებსაც ურდული გავუგდე. წამოვავლე ხელი ცულსა და გადავწყვიტე, რომ დავცხებ, ვინც კი გაბედებს და შემოვა სახლში, და ამ უცხო სტუმარსაც, რომელიც ისევ კუთხეში ეგდო, თვალს არ ვაშორებდი.

გასაშტერებელი იყო: ეს ვილაც უცნობი გაუძრევლად ეკუნტა კუთხეში და ისე პატარა ალაგი ეჭირა, თითქო ბავშვიყო. არაფრიდან არა სჩანდა, რომ იმას რაიმე ცუდი განზრახვა ჰქონოდა ჩემზედ; თითქო ეტყობოდა, რომ ჩემი მომხრე იყო ისა. ბეჯითად თვალს ადევნებდა ყველა ჩემს მოძრაობას, სული ველარ მოებრუნა, ისე უფთხრიალებდა გული და ნელის ხმითა სთქვა:

— მაგრა ჩაკეტე... მაგრა!... ჰამფალონი!

მე ძალიან გამიკვირდა და გაჯაერებით ვუთხარი:

— მერე! რა გნებავთ ჩემგანა?

— ხელი ზომამეფლე და დამსვი შენი ლამპარის წინა და მაშინ გეტყვი შენ, რაც მინდა.

— კარგი, — ვუთხარი მე: — სულ ერთია რაც უნდა გწადდეს, აი ჩემი ხელი და აი ალაგი ჩემს ლამპართან.

მივაწოდე ხელი და ფეხზე წამოვაცენე პატარა და ბავშვით მსუბუქი გვაში.

— შენ კაცი კი არა, ქალი ყოფილხარ! — განცვიფრებით წამოვიძახე მე.

ჩემმა სტუმარმა ნაზის ხმით მიპასუხა:

— დიად, ჰამფალონი, მე ქალი ვარ, — და მაშინათვე გადაიხადა შავი წამოსასხამი და წინ წამომიდგა ახალგაზდა და მშვენიერი ქალი, რომელიც მე თითქოს სადღაც უწინაც მენახა. ტურფა და ლამაზ სახეზე აღბეჭდოდა რაღაც საშინელი დარ-



დი. თმა ხელოვნებით ჰქონდა დაწული და ტანზე ესუა-  
ნელი საცხები ამბრა, მაგრამ, ეტყობოდა, ცუდი ყოფა-ქცევი-  
სა არ იყო, თუმცა კი უგვაროებს ლაპარაკობდა.

— აბა შემომხედე, კარგი ვარ თუ არა, — მკითხა ამ ქალ-  
მა და ცალი ხელით სახეს იჩრდილებდა.

— მაგას კითხვა აღარ უნდა, შენ ძალიან ლამაზი ხარ,  
მაგრამ რაღა ჰკარგავ დროსა. უმჯობესია მითხრა, რა გინდა  
შენა?

იმან წარმოსთქვა:

— გეტყობა, შენ მე ვერ მიცანი. მე ვარ მაგნა, პტო-  
ლომეს და ალბინას ქალი. შემისყიდე, შემისყიდე, ჰამფალონ,  
მე პტოლომეს ასული — ეხლა შენ მდიდარი ხარ, და მაგნას-  
თვის ფული საჭიროა, რომ ქმარი და შვილები გამოიხსნას  
ტყვეობიდან.

მაგნა ღვრიდა ცრემლებს, და სწრაფად იხსნიდა ქამარსა!

## XVI

ამ გვარი უცნაური სტუმარი ჯერ არსად შემხვედროდა  
მე... თავიც გადაედო გასასყიდად, ამასთანავე საშინლად იტან-  
ჯებოდა. სწორე გითხრა, ამების ყურებით მე \*ოითონ გულმა  
კვნესა დამიწყო და მამელო რაღაც ვარამი.

სახელი მაგნა ეკუთვნოდა ერთ მშვენიერ, წარჩინებულს  
და უბედურ ქალსა დამასკში. მე იმას პატარაობიდანვე ვიც-  
ნობდი, მაგრამ მას აქეთ აღარ მენახა, რაც მაგნა გათხოვდა  
და გაგვშორდა. დედ-მამის სურვილით იმან შეირთო ქმრად  
ვიზანტიელი რუფანი.

— კმარა! — წამოვიყვირე მე: — მე გიცნობ შენ, ქეშმარი-  
ტია, — შენა ხარ კეთილ-შობილი მაგნა, ასული პტოლომესი.  
შენი ყმაწვილობის დროს, მე მამაშენის ნება-რთვით, ხშირად  
გართობდი ხოლმე თქვენი სასახლის ბაღში ჩემი თამაშობით.  
მე კარგად მახსოვს, რომ შენ ხშირად და აღერსით მომცემ-  
დი ხოლმე ფულსა, თეთრ პურსა და ხანდისხან ქიშმიშსა და





მელნიც უკეთურ ცხოვრებაში შემჩნეული ჰყავდა. იმის ში არც ერთხელ არ შემოხვევია იმნაირი კრება, რომლისათვისაც საჭირო ყოფილიყო მასხარა. იქ თავს იყრიდნენ ნასწავლი ღვთის-მეტყველები, რომელნიც საუბრობდნენ უშადლეს საგნებზე და თვით სული-წმიდაზე. პტოლომეს ცოლი, ალბინა, დედა ლამაზი მაგნასი, მიმართულებით წაავადა თავის ქმარს. მედიდურ დამასკის ქალებს არ უყვარდათ ალბინა, მაგრამ ყველანი თანახმად აღიარებდნენ იმის უბიწოებას და უმანკობასა. ალბინას ერთგულობა ქმრისა ყველასათვის მისაბამებელი იყო. ტურფა მაგნა დედას ემზგავსებოდა ხასიათებითაც და სილამაზითაც და ამასთანავე სიახალგაზღე ხდიდა მაგნას გულმოწყალებდაცა. პტოლომეს მშვენიერ ბალს მიჯნადა ჰქონდა ერთი დიდი და ღრმა თხრილი, და იმის იქით იწყებოდა ტრიალი მინდორი. როდესაც ახეოლას ქალაქს გარედ სახლში მივდიოდით ხოლმე, გზის შესამოკლებოად ხშირად ვარჩევდი ამ მინდორზე გავლასა, რადგანაც ეს უფრო პირდაპირი იყო. მე, რასაკვირველია, თან მიმქონდა ჩემი სამასხარო იარაღები და ეს ძაღლიც მიმყვანდა ხოლმე. აკრა მაშინ პატარა იყო და ჯერ კარგად არ იცოდა ისა, რაც საჭირო იყო მასხარას ძალისათვისა.

როდესაც ამ მინდორში გავიდოდი და დაეფუპირდაბირდებოდი პტოლომეს ბალებსა, დავისვენებდი ხოლმე; ამოვიღებდი ქერის ლავაშსა და საუზმეს, ხან სამხარს, გიხლებოდი. მერე აკრას ეწრთენიდი თამაშობაში. მე ჩამოვჯდებოდი თხრილის პირადა, შევექცეოდი ლავაშსა და აკრას აქ გაშლილ მინდორზე, გავამეორებინებდი იმასა, რასაც შინ სივიწროეში ვასწავლიდი. ერთხელ მე მოვკარ თვალი მშვენიერ და კარგა ტან აყრილ მაგნასა. დაბურულ მწვანე ტოტებიდან გამოიყურებოდა ისა და დაჰკვირებოდა აკრას თამაშობასა. მე ვითომ ევრა ვხედავდი მაგნასა და მინდოდა, რომ უფრო ბევრად მესიამოვნებინა იმისთვისა და რადგანაც აკრა ჯერ კარგად არ იყო განვითარებული, ერთი კარგი ვადაუშხუილე, რომ უფრო ძნელი ოინები გამოეჩინა. აკრამ საცოდავად შესწკმუღვა,

შტოები მსწრაფლ შეირყა და მშვენიერი სახეც ქალისა ვან-  
ქრა...

ამ შემთხვევამ ისე გამაგულისა, რომ ერთი ორი კიდევ მივარტყი აკრასა. ეს მოჰყვა საცოდავად წკმუილსა და მაშინათვე ლობეს იქიდან შემომესმა:

— შეუბრალებელო კაცო! რადა სტანჯავ მაგ უბედურ პირ-  
უტყესა! რად ატან ძალასა ჰქმნას ისა, რაც წინააღმდეგია მა-  
გის ბუნებისათვისა.

მოვტრიალდი და დავინახე მაგნა, რომელიც დაფოთ-  
ლილ და დაბალ ლობესთან იყო წამომდგარი; სახე ჰქონდა  
პრისხანე.

— ნუ გამკიცხავ, პატარა ქალბატონო,— ვუპასუხე მე:—  
მე არა ვარ უწყალო კაცი, ძაღლის გაწრთვნა ეკუთვნის ჩემ  
ხელობასა, რომლითაც ესეცა და მეცა ვსაზრდოობთ.

— საძაგელი და საზიზღარია შენი ხელობა და მაგითი  
გართობას საჭიროებენ საზიზღარივე და უკეთური პირნიცა,—  
მიპასუხა მაგნამა.

— ოხ, ქალბატონო, ყველანი საზრდოებენ იმითი, რითაც  
შეუძლიათ ლუკმის შოვნა, და კარგია, თუ კაცი თავის შრო-  
მით იკვებება და მოყვასს არ მიაყენებს უბედურებასა.

— ეგ შენ არ შეგეხება; შენ რყენი შენს მოყვასთა,—  
წარმოსთქვა მაგნამა, და თვალეში გამოეხატა ის სიმკაცრე,  
რომელიც ჩვეულებრივი თვისება იყო იმის დედისაცა.

— არა, ქალბატონო,— მივუგე მე: შენ სასტიკად სჯი და  
მაგას იმიტომ ამბობ, რომ ცხოვრებაში ჯერ შენ არაფერი გა-  
მოგიცდია. მე გლენი კაცი ვარ და არ შემძლიან გარყვნა  
უდიდეს წოდების გვამთა.

მე გავბრუნდი და ვაპირობდი ჩემ გზაზე წასვლასა, მაგრამ  
მაგნას სიტყვებმა შემაყენა:

— შენ არ შეგშვენის ლაპარაკი უმაღლეს წოდების პი-  
რებზედა. უკეთესი იქნება... აი დაიჭირე ჩემი ქისა: მე გაძლევ  
ამას, რომ მაძღრისად აქამო შენ საბრალო ძაღლსა.



და გადმოისროლა აბრეშუმის პარკი, რომელმაც ჩემსადრე  
ვერ მოაწია; საჩქაროდ ხელი მივატანე, რომ დამეჭირა, და  
ამ დროს მამისხლტა ფეხი და შიგ ხევის ძირში ჩავარდი.

მეგონა მთელი სხეული სულ დამემსხვრა-მეთქი.

### XVIII

ათი დღე დავყავი ხევის ძირში; წყლისაგან ნათხარ მღვი-  
მეში ვიწყეი. ღმერთი კაცს არ დაჰკარგავს და ნუგეშად ამ გა-  
ჭირებულ ღლეებში გამიჩინა მე მაგნა! ეს კეთილშობილი ქა-  
ლი ყოველ დღე ჩამოდიოდა ჩემს სანახავად და იმოდენა ფა-  
ქიზი და უხვი საჭმელი მოჰქონდა, რომ მეცა და აკრასაც კიდევ  
გვრჩებოდა. რადგანაც მხარი დაშავებული მქონდა და მიხურდა,  
მაგნა თავის უბიწო ხელებითა მალმალ მაფარებდა სველ ხელ-  
სახოცსა. აქ მქონდა შემთხვევა ბაასობისა მიუღარებელ მაგნას-  
თან და სულით ვტკებოდი, რომ აშკარად ვხედავდი იმის  
სულის უმანკობას და ცხოველ ნათელსა იმის გონებისას. მხო-  
ლოდ ერთი არ მომწონდა იმაში—არა ჰქონდა დათმენა სხვის  
ნაკლებობათა და თავის თავის ნამეტანი იმედი ჰქონდა ყველა-  
ფერში.

— რატომ, — ამბობდა ისა, — ყველანი ისე არა სცხოვრო-  
ბენ როგორც დედა-ჩემი და ჩემი მეგობრები ტაორა, ფოტინა  
და სილვია, რომლების ყოფა-ცხოვრება ვგრეთივე წმინდაა,  
როგორც ბროლი.

მე ვხედავდი, რომ მაგნას დიდად უყვარდა ესენი და მტკი-  
ცედ მიჰბაძავდა იმათ. თუმცა ძალიან ახალგაზდა იყო, ცდი-  
ლობდა ჩემს მოქცევას, უნდოდა მოვეცილებინე ჩემს ცხოვრე-  
ბას და როდესაც მე არ ვეთანხმებოდი ამაში, მაგნა ჯავ-  
რობდა.

მე პასუხად ვუთხარ ის, რაც ყველასაგან სიმართლედ არის  
აღიარებული.

— განა შენ არ იცი, — მივუგე მე: — რომ ქურქელი ერთი  
დანიშნულ არს მოსათავსებლად კარგისა და მეორე — მოსა-

თავსებლად უფარგისისა? შენ იცოცხლე პატიოსნებისათვის, მე კი ზვედრად მაქვს მონიჭებული საძრახისი ცხოვრება, და როგორც თიხას, განა მე შემიძლიან აეუხირდე ჩემს მექუტუტულს? ჩემმა ბედმა გამხადა მე მასხარად და მე მივსდევ ამ კვალსა, როგორც ყელზე თოჯ-წაბმული ხარი.

მაგნა ვერ მიხედა ამ ჩემს ადვილად გასაგებ სიტყვებს და ჩემ ცხოვრებას მიაწერდა მხოლოდ ჩვეულებას:

— ბრძენთაგან ნათქვამია, — ნიბასუხა იმან: — რომ ჩვეულება შემოდის ჩვენს გეგმაში როგორც უცხო მგზავრი, დარჩება ხოლმე როგორც სტუმარი, და შემდეგ მეუფედ გარდაიქცევა. კუბრი, როდესაც მოივლის კასრშია, ახდენს იმას და არაფრისთვის აღარ გამოდგება ის კასრი, თუ არ ისევ კუბრისთვის.

ცხადი იყო, რომ მაგნა თავის აზრში მადრიდა მე მხოლოდ კუბრის კასრსა და ძალიანა ეწუხნდი, რომ დაქრილობა ნებას არ მაძლევდა ამოვსულიყავ ხევიდანა. ამასთანავე ვამჩნევდი, რომ მაგნა თითქო მობეზრდა და თითონაც ფიქრობდა, რა ღონისძიებით ამომიყვანოს ხევიდან და სახლში გამისტუმროს.

ამის ასრულება ადვილი არ იყო: მე არ შემეძლო სიარული და მაგნა ვერას მიშველიდა, რადგანაც სუსტი იყო. ის ვერ გაბედავდა გასტყდომოდა თავის ამპარტავან დედ-მამას, რომ ჩემისთანა საზიზღარ ხელობის კაცთან არამც თუ მსვლელობა, მარტო ლაპარაკიც კი ჰქონდა. ამ მიზეზებითვე ვერც არას მოსამსახურეებს ეტყოდა.

ხშირად ხომ მოხდებოდა, რომ ერთი შეცდომა ჰბადავს მეორეს და ღირსეულ მაგნასაც ესე მოუვიდა. რომ მიშველოს რამე, მე, საძაგელ მასხარას, რომელიც ღირსი არ იყო იმის ყურადღებისა, ის იძულებული გახდა მინდობოდა კიდევ ერთ უცხო კაცსა, სახელად მაგისტრიანსა.

მაგისტრიანი იყო ახალგაზდა მხატვარი და მშვენივრად ამკობდა სურათებით სასახლეების კედლებსა. ერთხელ ხევის ჰირად თავის სამხატვრო კალმებით მიეჩქარებოდა ისა ახელ-ლასთან.



აზელლას აეგო თავის ბაღში ყოველად შემკული საჩრდილო და მიენდო მაგისტრიანისთვის დახატვა საჩრდილოს კედლები-სა იმ გვარის მხატვრობით, რომელიც წარმოადგენდა მხოლოდ მხიარულებას და ღზინსა.

როდესაც მაგისტრიანი მოგვიახლოვდა, აკრამ მაშინვე იცნო და შეჰქმნა საბრალოდ ღმუილი.

მაგისტრიანი შეფერხდა, მაგრამ უმაღვე აპირობდა წასვ-ლას,—იქნება მოკლული კაცი გდია ვინმე ხევშიო.

იმ ჟამად მაგნა ღობესთან დგომილიყო. ჩემმა სიბრალუ-ლმა გააკადნიერა ის, მწვანე ფოთლები გააპო და მოუწოდა:

— ყმაწვილო! ნუ წახვალ, ვიდრე არ მისცე შემწეობა შენ-სა მოყვასსა. მაგ ხევში ჩავარდა კაცი და რამდენი დღეა, რაც მადა წევს, საწყალი, დაქრილი. მე ვერ მოვერევი, რომ ამო-ვიყვანო, შენ კი ღონიერი კაცი ხარ და ვალდებულეაა შენი უშველო მაგას.

მაგისტრიანი იმ წამსვე ჩამოვიდა ხევში, გამსინჯა მე და გაიქცა ქალაქში მუშების მოსაყვანად, რომ გადამიყვანოს ჩემს სახლში.

სუყველა მსწრაფლად და კარგად შეასრულა და როცა მარტოკა დავრჩით, გამომკითხა: როგორ მოხდა, რომ ჩავარდი ხევში და ან თითქმის ორი კვირა როგორ გასძელი უქმელ-უსმელიო.

მაგისტრიანი დიდი ხნის და კარგი ნაცნობი იყო ჩემი: მე არაფერი არ დავუმაღე იმას ლ სუყველა დაწერილებით ვუამბე.

და როდესაც ვუთხარი, რომ მაგნა ყოველ დღე მიზიდაე-და სადილსა და სველ ხელცახოცს მაფარებდა დაშავებულ მხარ-ზე, ახალგაზდა მხატვარს სახეზედ მოედო ნათელი და აღტა-ცებით მითხრა:

— ოჰ, ჰამფალონ! რა ბედნიერი ხარ და როგორა მშურს შენი ბედის წერა! მე დიდი სიხარულით დავიმტვრევდი ფეხებს და ხელებსაც, ოღონდ კი ეს მშვენიერი ქალი ყოფილიყო ჩემს ახლოს.





მე მაშინვე შევატყე, რომ სიყვარულის ისრებს უწყალოდ დაუკოდავთ მხატვარი და ეწრაფობდი დამეშოშმინებინა.

— შენ სულ-მოკლე ყოფილხარ, — ვუთხარი მე: — პტოლომეს ქალი მშვენიერია, ამას კითხვა არ უნდა, მაგრამ, ძმაო, ყველა კაცისათვის ჯანის სიმრთელეზე უკეთესი არა იქნება-რა; ამასთანავე პტოლომე ამაყი კაცია და აღბინა ისე ზვაობით სავსეა, რომ თუ სიყვარულის ალმა აღგიტაცა შენა, — უმჯობესია განიქრო შენ ეგ გულის ცეცხლი, რადგანაც მადედან კარგი არა დაიბადება-რა.

მაგისტრიანს ფერი ეკრთო და მითხრა:

— რაღა უნდა დაიბადოს! განა ჩემთვის საკმარი არ არის, რომ მაგნას სიმშვენიერე მოჰყენს ჩემს გვამში რაღაც გონების სიმახვილეს?..

და აღტაცებით გონება ებნეოდა საბრალო ახალგაზდას.

XIX

როდესაც უკედ გავხდი, ერთ საღამოს წავედი ახელლასთან, იქ დამიხვდა მაგისტრიანიცა. დამინახა თუ არა, წამავლო ხელი და ბაღში ჩამიყვანა, მინდა ჩემი ნამუშევარი გიჩვენოვო. ახლად აგებული საჩრდილო კარგა დიდი შენობა იყო და შეადგენდა რამდენსაწე განყოფილებას. ყველა განყოფილების მხატვრობა ეთანხმებოდა დღიურ ცხოვრების მიმოსვლას. ამ გვარად, განყოფილებებს სხვა-და-სხვა დანიშნულება ჰქონდათ: ერთი იყო საწოლი, საიდანაც მშვენიერად სჩანდა დილის ცისკარი; მეორიდან სასიამოვნო იყო ამომავალი მზის ცქერა; დანარჩენი განყოფილებანი იყვნენ ცალკე-ცალკე მოწყობილი: მეცნიერების შესასწავლადა, საბანებლად, წყლის გადასავლებლად სიცხეში, სალხინოდა და ერთიც — სალოცავადა... და აი აქა, ერთს მოშორებულ და მყუდრო კუთხეში, ცხოველის მხატვრობით წარმოდგენილი იყო სიზმრად ნახული: დიდი ლხინი, მორთულ-მოკაზმული ლამაზი ქალები, რომლების თვითეულად დასახლება მე შემეძლო — ეს იყო სუ-



რათები ჩვენი ზნე-გაფუჭებულის ქალებისა. ისინი ისინი ყვაფილებით შემოსილნი ყმაწვილ-კაცებთან მდიდრად გაშლილს სუფრაზე. ერთ ვილაც ახალ-გაზღას ეძინა და პირისახე ჩამხო-ბილი ჰქონდა ყვაფილებით სავსე კალათშია. თუმცა პირი არ უჩანდა. მაგრამ ტანისამოსზე მე მაშინათვე ვიცანი, რომ ეს ახალგაზდა იყო თვით მხატვარი მაგისტრიანი. აქვე იყო გამო-ხატული შემოზღუდული სარბიელი: გამკაცრებული ლომები მიიწვედნენ ერთ ახალ-გაზდა ქალწულისაკენ... და ეს კი უში-შრად და შეურყეველად იღვა და ლოცულობდა. ის იყო მაგნა.

მაგისტრიანს ხელი დავკარი მხარზედა და ვუთხარ:

— მშვენიერად დაგინატავს! სურათი ძალიანა ჰგავს მაგ-ნასა, მაგრამ რითი იცი, რომ იმას ისეთი მაგარი გული აქვს, რომ გააღმასებული ნადირისაც კი არ ეშინიან? მე კარგად ვიცნობ იმათ ჩამომავლობასა: ყველამ იციან, რომ პტოლომე და ალბინა კეთილშობილი და ამასთან ამპარტავენები არიან, მაგრამ ბედს იმათვინ აქამომდე არა უფნიარა და იმათ ქალს აქამდის არავითარი განსაცდელი არ მისდგომია.

— რა გინდა სთქვა მაგითი?

— მე მინდა ვთქვა, რომ მშვენიერ მაგნას არავითარი უბედურება არ გამოუცდია, და არ მესმის, რისთვის გამოუსა-ხავს შენ ხელოვანს კალამსა იმის სურათში ეგრეთი უშიშრო-ბა და გულის სიმეგრე წინაშე გაკაპასებული ნადირისა? თუ ეს იგავია, უნდა იცოდე, რომ სააქაოს ცხოვრება ყველა ნა-დირზე უუსაშინელესია და შეუძლიან მოდრეკა ყველა ადა-მიანისა.

— მხოლოდ გარდა მაგნასი!

— ოხ, მე მგონია რომ თვით მაგნასიცა!

ეს ვუთხარი იმისათვის, რომ დასწყნარებოდა მხატვარსა გატაცებული სიყვარულის გრძობანი.

მაგისტრიანმა მსწრაფლად წამიჩურჩულა.

— იცი რა! ამ დღეებში ენახე მაგნა. მე მიმიწვიეს ფარ-დების დასახატადა იმის უბიწო საწოლისა. მინამ ხატვას და-

ვიწყებდი, მე ვებაასებოდი მაგნასა. სხვათა შორის, შენც მოგი-  
 გონა...

მხატვარი შესდგა.

— მაგნა ძალიანა სწყუხს, რომ შენ სამასხარო ხელობას  
 მისდევ. მე ვუპასუხე: „ქალო! ყველა ისეთი ბედნიერი არ არის  
 რომ გაატაროს თავისი ცხოვრება ისე, როგორც თითონა  
 სურს-მეთქი. ბედი უწყალოა: შეუძლიან ადამიანი იძულებული  
 გახადოს სვას მხოლოდ ამღვრეული წყაროს წყალი, სადაც  
 უმრავლესი წურბელა ფუთფუთებს და სადაც მოიპოება ასპი-  
 დიცა“. მაგნამ არ დაიჯერა ესა და ჩაიციანა.

— ჩაიციანა? — ვკითხე მე...— ეტყობა ქალობა პტოლო-  
 მესი და ამპარტავეანი ალბინასი. სწორედ გითხრა, მე უფრო  
 მიამებოდა, რომ ან გაჩუმებულიყო, ან გულშემტკიენედ ამო-  
 ეოხრა.

— დიად, — მიპასუხა მაგისტრიანმა: — მაგნამა სთქვა: „სიკვ-  
 დილი სჯობს ნაძრახ სახელსაო,“ და მე დარწმუნებული ვარ,  
 რომ ის დაბეჯითებულია ამაში და სრულიად ამ გვარი მიმარ-  
 თულებსაა თითონაცა.

— შენ სისწრაფითა სჯი, — მივუგე მე: — მართალია სიკვდი-  
 ლი უმჯობესია ნაძრახ სახელზედა, მაგრამ შესაძლებელია, რომ  
 ესა სთქვას დედამა, რომელსაც შვილები ჰყავს.

— და განა შენ არ იცი, რა ჰქნა მაკკაბელთა დედამა?

— როგორ არა. მაკკაბელნი დახოცეს, მაგრამ იმათ დედას  
 რომ დაჰქადებოდნენ შვილების გამოზრდასა ეგრეთსავე მასხა-  
 რებადა, როგორც ვარ მე, ანუ ფებთგამბანელთა უნამუსო ქა-  
 ლებისა, და თუ დედა მათი იქნებოდა თვით მაგნა, — არ ვიცი  
 რას უფრო ირჩედა ესა: სირცხვილსა თუ სიკვდილსა შვილე-  
 ბის გადასარჩენადა.

— რისთვის ლაპარაკობ მაგეებსა! — სთქვა მაგისტრიან-  
 მა: — და ნუ შეეხების მაგნასა თავის ცხოვრებაში ნურავითარი  
 განსაცდელი.

— მე სრულიად თანაგიგრძნობ მაგ შემთხვევაში და ვი-  
 სურვებ მაგნასათვის ყოველს კეთილსა.



მეორე დღეს საღამოზედა მაგისტრიანი მოვიდა ჩემთანა დალიან ნაღელიანი და მითხრა:

— ჰამფალონ, გაიგე თუ არა ფრიად სამწუხარო ახალი ამბავი: პტოლომე და ალბინა ათხოვებენ თავის ქალსა!

— რისთვის სთვლი მაგ ახალ ამბავს სამწუხაროდ! — ფუპასუხე მე, — არ მესმის, კავშირი ორი შეყვარებული გვამისა რად უნდა იყვეს შესაწუხარი და არა სსსხარულა!

— ყოველთვის ეგრეა, როდესაც მოიწადინებენ შეერთებას უმანკო გულისას გარყვნილებასთან.

— მაგისტრიანი! შენ გათქმევიანებს მაგას გაშფოთებული გრძნობანი, რომელსაც შური ჰქვიან. მაგგვარი გრძნობა უნდა მოსპო შენს გულში.

— მე დიდი ხანია მოვსპე კიდევ, — მიპასუხა მხატვარმა — მაგნა ჩემი საცოლდე არ არის და მე იმის საქრო, მაგრამ საშინელია, რომ პტოლომეს სასიძო ვიზანტიელი რუფინია.

გავიგონე თუ არა ეს სახელი, კანკალმა ამიტანა და შენს მტერს მოსწყდეს წელი, როგორც მე.

ვიზანტიელი რუფინი დიდი გვარის კაცი იყო, ტანადი და საზოგადოდ საუცხოვო მოყვანილი, მაგრამ ამასთანავე საშინელი ცბიერი და გამოქნილი, ისე რომ თვით ვიზანტიაშიც წრე გარდასულადა სთვლიდნენ იმას თავმოყვარე კორინთელი და ბევრი სხვანიცა, რომლებიც ფულეპს და ძალ-ღონესაც უწყალოდ ჰფანტავდნენ აზელლასთან. ჩემის დაკვირვებით, ესენი ბევრად სჯობდნენ რუფინსა. პტოლომეს სახლში რუფინი ჩინებულად იყო მიღებული. უნდა მოგახსენო, რომ ეს ახალგაზდა უზომო მატყუარა და მაცდური იყო: მთელი დღე თითქო სახლიდან ფეხს არსადა სდგამდა და კითხულობდა სასულიერო წიგნებსა; საღამოზე კი ეადიოდა ქალაქ გარეთ მოსამენლად კეთილსათნო ბაასისა. იმ დროებში დამასკის ახლო სცხოვრობდა ერთი ღრმად მოხუცებული განდევილი მესვეტე; ის დღისით იდგა კლდეზე და ღამით იმის რხვრა მოისმოდა საფლავიდან. რუფინი დადიოდა იმასთან, და მზის ჩასვლის დროს შეუდგებოდა ლოცვას განდევილის აჩრდილში... მაგრამ, დახე, რაკი სიბნე-

ლე მოედებოდა ქალაქსა, ის სხვა ფრთებს შეისხამდა და აქროლებდა აზვლასკენ. ჯერ კი შეუხვევდა ხოლმე მაგისტრიანსა და სრულიად შეაცვლევინებდა თავის სახეს... აი საიდან ვიცნობდით მე და ჩემი მეგობარი მაგისტრიანი რუფინსა. ჩვენ ყოველგან დავცინოდით გულში ამ ორ-პირ კაცსა. აზვლამაც სუყველა ესენი კარგად იცოდა და როდესაც მარტოკა დავრჩებოდით, ხშირად გველაპარაკებოდა იმაზე. საზოგადოდ, უნამუსო ქალებს, როდესაც თავისუფლები არიან, უყვართ ბაასი ჩვენთან, რადგანაც მათი შეხედულებით ჩვენში უფრო მოიპოვება წრფელი გული და ჭკუაცა, ვიდრე იმათ წარჩინებულ და მდიდარ სტუმრებში.

აზვლას ძლიერ უყვარდა მხატვარი, მაგრამ ეს სიყვარული ყოველად უიმედო იყო, ამისათვის რომ მაგისტრიანის სრული გონება და გრძობანი მიმართულები იყენენ მხოლოდ ერთად-ერთ მაკნასაკენ, რომლის უბიწო და უმანკო სახე გონებიდან განუშორებელი ჰქონდა იმას. აზვლას გულის მეტყველებით მიმხვდარი იყო ამ საიდუმლოს და ამიტომ უფრო ალერსით და ნაზად ექცეოდა მაგისტრიანსა. მე და მაგისტრიანი ხანდახან გათენებამდინ დავრჩებოდით ხოლმე აზვლას სახლში. დილით, მზის ამოსვლაზე, როდესაც სტუმრები გამოეთხოვებოდნენ, აზვლას შემოდიოდა ჩვენთან და თვითთულად აგვიწერდა ხოლმე თავის სტუმრებსა, რომლების შორის ყოველად საზიზღრად სთვლიდა რუფინსა. ის არისო საძაგელი პირმოთნე და თვალთმაქცი და არ შეფერხდება იკისროს, რაც გინდა უკადრისი და სათაკილო საქმე იყოსო. ერთხელ, კორინთელი დიდ ქეიფში შესულიყო და უკონოდ ებნია ფული. ამ შემთხვევის შემდეგ აზვლამ გვითხრა:

— საცოდავი კორინთელი ფარშმანგი... ყველანი უწყალოდ ბრტყვიან იმასა და როდესაც რუფინიც აქ არის ხოლმე, ცუდი არ იქნება ჯიბეები მოუქექონ ამასა...

ეს ნიშნავდა, რომ რუფინი, შესაძლებელია, ქურდიც ყოფილიყო... აზვლას ყველას კარგად იცნობდა და ძნელად შესცდებოდა, როდესაც ვისმეზე გამოსთქვამდა თავის აზრს.

მაგრამ პტოლომე და ალბინა სხვა თვალებით უყურებდნენ ვიზანტიელს; იმათი კეთილი ქალი მაგნა ყოველად მორჩილი იყო დედ-მამისა და ამათი ნება და სურვილი დაურღვეველი იყო იმისთვის.

უწყალო ბედმა უკუ-მოუქცევლად გადასჭრა... და მაგნა შეიქმნა რუფინის ცოლი.

ცოტა ხნის განმავლობაში რუფინმა თავის მდიდრად გამოზითული ცოლი ვიზანტიაში-წაიყვანა.

ფ. ხ.

(დასასრული შემდეგ ნომერში)



# გადმოსახლებულების დაბინაება საქართველოში

(ისტორიული წერილი)

## III \*)

ეხლა ვუამბობთ მკითხველს მოკლე ისტორიას იმისას, თუ ვინ და რა დროს დაბინაედა ქართლ-კახეთში.

პირველად რუსეთიდან საქართველოში გაჩნდნენ ჯარისკაცი და მოხელენი. ამ საუკუნის დასაწყისს მოგზაურობა რუსეთიდან საქართველოსკენ დიდს გაჭირვებითა ხდებოდა. ხშირად მგზავრნი სიცოცხლესაც კი ეთხოვებოდნენ. ამის გამო ვაი-ვაგლახით ჩამოსული მოხელე, სამსახურს რომ გაათავებდა, ადვილად ვეღარ ბრუნდებოდა შინ. ან რას იპოვიდა სამშობლოში სახარბიელოს ოც და ათის, ორმოცის წლის განშორების შემდეგ? სიბერე, მოხუცებულობაც უეჭველია ხელს შეუწყობდა, რომ დარჩენილიყო იმ ქვეყანაში, რომელმაც შეივრდომა და სადაც თვისი ყმაწვილი-კაცობა გაატარა. ამის გამო სამსახურიდან გამოსული მოხელეობა მკვიდრდებოდა ქალაქებად და სოფელს აგრე რიგად არ ეტანებოდა.

ესევე მიზეზი აძულებდა სამსახურ შესრულებულს ჯარისკაცებს აქვე ეშოვნათ ბინა. მთავრობა სიამოვნებით ურიგებდა მათ სახნავ-სითეს მამულს, შეღავათს აძლევდა ხარჯსა და გადასახადში. ამ კატეგორიის მოსახლენი დაბინავდნენ მო-

\*) იხ. „მოამბე“ № IV, 1899 წ.

მეტებულ ნაწილად ჯარების შტაბ-კვარტირებთან. უბირი კაცი ბუნებით გულ-კეთილია, ადვილად იცის სხვისი შევრდომა. თუ ცუდი ჩამკონებელი და გამბრიყვებელი არა ჰყავს გვერდით, რუსის მხნელ-მთესველი ვერც-კი მოაახერხებს სხვტომის ადამიანის ათვალწუნებას. ესაა მაზეზი რომ ამ საუკუნის დასაწყისს დაბინავებულნი ჯარის-კაცი ადვილად შეეჩვივნენ მეზობელ-ქართველებს, ისწავლეს ქართული, ტანთ-საცმელი ნახევრად ქართული შემოიღეს, ხვნა-თესვის წეს-რიგი ხომ სრულიად ქართული აქვთ. ბაკურიანში დაბინავებულ რუსობამ სრულიად დაივიწყა რუსული, მხოლოდ თითო-ოროლა-ლა ამტკრებს ჩიქორთულად რუსულს. . . . . სწორედ ტკბილი და მშვიდობიანი განწყობილება ჩამოვარდა ქართველებსა და პირველ რუს-მოსახლეთა შორის. იმასაც ნუ დავივიწყებთ, რომ პირველ მოსახლეთა რიცხვი ცოტა იყო და გარემოება აიძულებდა—მეზობლობა ჰქონოდათ ქართველებთან.

ამათ გარდა საქართველოში დაბინავდნენ რუსის მწვალებელნი. მე-XIX საუკუნის დასაწყისს ალექსანდრე I-ის ღ ნიკოლოზ I-ის მეფობის დროს რუსეთში მწვალებლებს სასტიკადა სდევნიდნენ. სხვათა შორის დასახელად მწვალებლებს ჩვენსკენა ჰგზავნიდნენ. მაშინდელი ამიერ-კავკასია რუსისთვის ნამდვილი ციმბირი იყო. კავკასიას რუსი, განსაკუთრებით ჯარის-კაცი „დამლუბველ კავკასიას“ ეძახდა. სწორედ, კიდევ შეეფერებოდა ეს სახელი მაშინდელ კავკასიას. ჩამოსახლებულ რუსსა ან მტრის ტყვია ასალმებდა წუთი სოფელსა, ან ციებ-ცხელება უღებდა ხოლმე ბოლოსა. სამოთხედ ამიერ-კავკასია და კერძოდ საქართველო დღეს გარდაიქცა მხოლოდ.

მწვალებლები დასობით გამოგზავნეს საქართველოში ოც და ათ, ორმოცსა და ორმოც და ათ წელსა. მომეტებულ ნაწილად მწვალებლები იყვნენ ტამბოვისა, სარატოვისა, ტავრისა, ეორონეისა, ორენბურგისა და ენისეის გუბერნიებიდან და აგრეთვე ბესსარაბიის ოლქიდან.



ადმინისტრაცია აქაც არ ასვენებდა პირველ ხანებში მწვალებლებს და ათას ნაირად აწუხებდა. ამ ჟამად მწვალებელნი მყუდროდ და მშვიდობიანადა სცხოვრობენ და ხელის შემშლელი აღარაფინაა. მწვალებელნი დასახლდნენ ამიერ-კავკასიაში მალლობ ადგილებზე, საცა ბუნება ცივია და მკაცრი. ამ გარემოებამ დიდი სამსახური გაუწია პირველ მოსახლეთ უცხო და შეუჩვეველ ადგილებში. ჰავა ისეთივე ჰქონდათ მწვალებლებს, როგორსაც მიჩვეულნი იყვნენ რუსეთში. ამის გამო არც ბანჯგვლიანი ქუდები და არც ქეჩისაგან გაკეთებული ფეხსაცმელი არ მოუშორებიათ. რალა თქმა უნდა, რომ ტყავების ხმარებაც ძველებურადვე დარჩათ. ნ. დინგელშტეტის სიტყვით მწვალებელთა ცხოვრება ამიერ-კავკასიაში არაფრით განირჩევიდა იმ წეს-რიგისაგან, რომელსაც უკვე მიჩვეულნი იყვნენ რუსეთში. ამასვე ჰმოწმობს თ. ა. მ. არლუთინსკი. სიღნაღში დაბინავებული რუსები ისე კარგად არიან მოწყობილნი, ისე კარგად შეეჩვივნენ ბუნებასო, რომ რუსეთს დაბრუნების სურვილი აზრადაც არა აქვთო.

მთელ ამიერ-კავკასიაში სულ 78 სოფელია რუსებისა, ცოტაოდენი მათგანი შერეულად ცხოვრობენ სხვა-და-სხვა ტომის ხალხთან. სულ რუსობა ითვლება 7,309 კომლი, ანუ 44,531 სული ორთავე სქესისა.

ტფილისის გუბერნიაში ირიცხება 32 რუსის სოფელი, სახელდობრ: ტფილისის მაზრაში 12; I. გომბორი, 139 კომლი, 518 სული მამრი და მდედრი; II. ოლგინსკოე, 59 კომლი, 146 სული; III. მალხაზოვკა, 89 კომლი, 335 სული; IV. მუხროვანი, 21 კომლი, 81 სული; V. ნოვო-ნიკოლაევსკოე, 27 კომლი, 145 სული; VI. ბელი-კლიუჩი, 165 კომლი, 832 სული; VII. გოლიცინსკი, 53 კომლი, 392 სული; VIII. ელისავეტინსკოე (იგივე პრიუტი) 43 კომლი, 290 სული; IX კონსტანტინოვსკოე, 228 კომლი, 1031 სული; X. მანგლისი, 149 კომლი, 818 სული; XI. სერგიევსკოე, 169 კომლი, 788 სული და XII. ვასილიევკა. (ცნობა არ არის, რამდენია მკვიდრი).



ახალქალაქის მაზრაში ითვლებოდა სულ 8 სოფელი, სახელდობრ: I. ბოგდანოვკა, 91 კომლი, 824 სული; II. გორელოე, 156 კომლი, 1343 სული; III. ეფრემოვკა, 91 კომლი, 734 სული; IV. ორლოვკა, 131 კომლი, 1039 სული; V. როდიონოვკა, 105 კომლი, 789 სული; VI. ტამბოვკა, 64 კომლი, 501 სული; VII. ტროიცკაია, 102 კომლი, 704 სული და VIII. სპასკოე, 77 კომლი, 682 სული.

ეს რვა სოფელი დასახლებული იყო დუხობორებით, რომელთა ნაწილი შარშან და წრეულს კანადაში გადასახლდა.

ბორჩალოს მაზრაში შეიღია რუსის სოფელი, სახელდობრ: I. ვორონცოვკა, 255 კომლი, 1095 სული (მალაკნები); II. გერგერი რუსებისა, 84 კომლი, 465 სული; III. ჯალალ-ოღლი რუსებისა, 50 კომლი, 212 სული; IV. ნოვო-ალექსანდროვკა, 40 კომლი, 202 სული, V. ნიკოლაევკა, 52 კომლი, 337 სული; VI მიხაილოვკა, იგივე ნოვო-პოკროვკა, 71 კომლი, 351 სული და VII. პრივოლნოე, 164 კომლი, 1169 სული.

გორის მაზრაში რუსები სცხოვრობენ ათ სოფელში ქართველებთან და ოსებთან ერთად: ბორჯომში 57 კომლი, 201 სული; ბაკურიანში, 10 კომლი, 67 სული; თორში, 17 კომლი, 65 სული და ხაშურში, 39 კომლი, 108 სული.

სიღნაღის მაზრაში რუსებს ოთხი საკუთარი სოფელი აქვთ. სახელდობრ: I. ლაგოდები, 41 კომლი, 159 სული; II. ნოვო-მიხაილოვკა, 45 კომლი, 161 სული; III. ალექსანდროვკა, 93 კომლი, 484 სული და IV. ცარსკიე კოლოდცი, 210 კომლი, 969 სული.

თელავის მაზრაში სულ 7 კომლია რუსობა, საცა ითვლება 19 სული; თიანეთის მაზრაში სულ არ არის რუსობა.

ეს ცნობანი ამოკრეფილია „Сводъ матеріаловъ...“-იდან, 1886 წ. კომლეთულად აღწერილობის მიხედვით კი ტფილისის გუბერნიაში ითვლება რუსობა უქალაქებოდ 3470 კომლი, ან 35,765 სული.



გერმანელები გამოიწვია 1817 წ. ვირტემბერგის სამეფოდან უმაღლესმა კავკასიის მთავრობამ იმ აზრით, რომ „ადგილობრივ მკვიდრთათვის ესწავლებინათ საუკეთესოდ მამულისა და ვენახების შემუშავება და აგრეთვე, რომ შრომისა და მუყაითობის მაგალითი ეჩვენებინათ“. მოწვეული იყო სულ 1,400 ოჯახი, მაგრამ ამიერ-კავკასიას მოაწია მხოლოდ 1818 წლის გასულს 486 ოჯახმა. გერმანელები დაასახლეს ტფილისისა და განჯის გუბერნიებში; ექვსი ახალშენი ტფილისის გუბერნიაში და ორი განჯისაში. 1842 წ. კიდევ ჩამოვიდა ვირტემბერგიდან 10 ოჯახი. ესენი დაესახლნენ ჯერ აბასთუმანში და შემდეგ 1848 წ. გადმოსახლეს ტფილისის მაზრაში. 1862 წელს უმამულო ახალშენელებისაგან ცალკე ახალშენი დააარსეს წალკაზე. 1852 წ. კუკია ტფილისს მიაწერეს, ასე რომ ამ უამად სულ ცხრა ახალშენია ამიერ-კავკასიაში: ალექსანდერსდორფი—65 კომლი; მარიენფელდი, 77 კომლი; პეტერსდორფი, 60 კომლი; ფრეიდენტალი, 24 კომლი; ელისაბეტტალი, 189 კომლი. ბორჩალოს მაზრაში: ალექსანდერსგილფი, 65 კომლი და ეკატერინენფელდი, 253 კომლი. განჯაში ორია ახალშენი: ანენფელდი და ელენენდორფი; პირველში 116 კომლია და მეორეში 303 კომლი. დასახლებულ ახალშენებში ითვლებოდა 1884 წ. აღწერილობით 850 კომლი და 4,943 სული. 1886 წ. აღწერილობით კი 1043 კომლია. მარტო ტფილისის გუბერნიაში 1886 წ. აღწერილობით 650 კომლია და 5065 სული.

გერმანელების დაბინავება მთავრობას ძვირად დაუჯდა, თითო კომლზე დაეხარჯა თითქმის 2000 მან.,\*) მამული აუარებელი მისცა მთავრობამ (იხ. ამ წლის შინაური მიმოხილვა) და აღმოუჩინა მრავალი შეღავათი ხარჯისა და ბეგრის გადახდაში. გერმანელები მშვენივრად მოეწყვენენ, გამდიდრდნენ და ჩვენებურ ნიაო გამოლყულ გლეხებს სრულიად არ მოგაგონებენ. გერმანელი ახალშენელის ოჯახი, ბინადრობა და სახლ-

\*) ეს ცნობა წრევანდელ გაზეთ „კავკაზ“-იდან მოგვყავს.

კარი სწორედ ამერიკელ ფერმერის მოწყობილებასა ჰგავს. ვინაც თავისის თვალთ არ უნახავს გერმანელთა ახალშენები, ვერც-კი წარმოიდგენს, თუ რა ნივთიერ კეთილ-დღეობას მიაღწიეს ამ ჩვენის ქვეყნის ხიზან-სტუმრებმა. ორ-სართულიანი ქვითკირის სახლები, რიგზედ ჩამწყრივებულნი ქუჩის პირად სიამოვნებასა ჰგვრის მაყურებელს. სიუხვე მოსავლისა, სიმრავლე საქონლისა, კარგად მოწყობილი სასოფლო სკოლა და ეკლესია აუცილებელი კუთვნილებაა გერმანელ ახალშენისა. საკვირველი ისაა, რომ გერმანელებმა კი არ ასწავლეს ჩვენებურ ტეტის მიწის შემუშავება და ვენახის მოვლა, არამედ ტეტისაგან შეისწავლეს ერთიც და მეორეც. მე ჩემის თვალთ ვნახე ახალშენ ელისაბეტტალში ნემენცების ხენა-თესვა და შემუშავებული ვენახი და ახალი ევროპიული იქ ვერა ვიპოვნე-რა. ისევ ის ჩვენი მამა-პაპური გუთანია ექვს-შვიდ უღელა ხარ-კამჩით, ზოგან კი ხარებთან ცხენები მიუბამთ. ახალი ევროპიული მხოლოდ ეს ცხენების შებმაა გუთანში\*).

გერმანელებმა არ გაუმართლეს ჩვენს მთავრობას იმედები, მეზობელ ხალხს, ე. ი. ქართველებს ჩვენში და განჯაში თათრებს ვერაფერი ასწავლეს. გერმანელები ერთმანეთობას დიდად ეტანებიან, სხვას აგრე რიგად გულოსა და სულოს არ უხსნიან, სცხოვრობენ კარ-ჩაკეტილნი და სხვისი დარდით აგრე რიგად თავს არ იწუხებენ. სწორედ მათზეა ზედ გამოქრილი ქართული ანდაზა:—ოღონც მე ვიყვე კარგად და ჩემს იქით თუნდ ქვა ქვაზედაც ნუ იქნებაო.

იმედის გაცრუებაა მიზეზი თუ სხვა სიომ დაჰბერა, ჩვენ არ ვიცით, მაგრამ ეს კი ცხადია, რომ დღეს მთავრობამ გული აიცრუვა გერმანელებზე და ისეთის მზრუნველობით აღარ ეპყრობა, როგორც წინად. ღვთის წინაშე დღეს გერმანელები

\*) ამავე ახალშენში მაჩვენეს ერთი მოხუცებული ახალშენელი ახლავანი ტანისა და ძალზედ ჩამომხმარი. გარეგნობით და სახის მეტყველებით სრულებით არა ჰგავდა გერმანელს. არ ვიცი რამდენად მართალია, და ასე კი მითხრეს, რომ ეს კაცი გაგერმანებული იმერელიაო. ელისაბეტტალში დიდმა და პატარამ ქართული ლაპარაკი იცის.



არცა საქიროებენ მთავრობის მზრუნველობას. წელში ისე არიან გამაგრებულნი, რომ სხვის ლოლიაობა და მზრუნველობა სრულიად აღარ არის მათთვის საქირო.

—

ელლინთა ჩამომავალი ტომი—ბერძნები ეწვია საქართველოს აღრიანოპოლის ხელ-შეკრულობის შემდეგ. ამ საუკუნის ოცდა ათ წლებში, როცა ოსმალეთიდან რუსის გამარჯვებულ ჯარს უკან გამოჰყვა დიდძალი სომხობა, ამათსავე გაქირვებულ მდგომარეობაში მყოფი ბერძნობაც თან დაედევნა ჯარსა და მოადგა საქართველოს. ბერძნებმა დასაბინავებლად აირჩიეს წალკა, ბორჩალოს მაზრაში, საცა 24 სოფელი დაიქირეს, ერთიც ტფილისის მაზრაში. მცირედი ნაწილი ბერძნებისა დაშკვიდრდა აგრეთვე ახალქალაქის მაზრაში და ერენის გუბერნიაში, სადაც სულ ორი სოფელია ბერძნებით დასახლებული. ამ ხანად საქართველოს სამზღვრებში ბერძნებსა აქვთ 25 სოფელი და ორიც საქართველოს გარეთ. სულ ამ ოცდა შვიდ სოფელში ითვლებოდა (1884—86 წ.) 2,037 კომლი და 17,027 სული ორთავე სქესისა. ათას რეას ოთმხოცდა ექვს წელს მომხდარი კომლეული აღწერილობიდან კი სჩანს, რომ მარტო ბორჩალოს მაზრაში ბერძნების რიცხვი არის 2636 კომლი, მამრ. სქეს. 10,021 სული და მდედრ. სქესისა—8965, სულ 18,986 ს. მაშასადამე ტფილისში დაბინავებული ბერძნებიც რომ ავიღოთ (388 სული) და მიუმატოდ ახალქალაქისა და გორის მაზრაში ჩასახლებულნიც (ატენისა და ბორჯომის ხეობანი) დავინახავთ, რომ ტფილისის გუბერნიაში ამ ჟამად 20,000 ბერძენია შემოხიზნული.

შემოხიზნულმა ბერძნებმა დაიქირეს სახელმწიფო ადგილები და მისდევნენ ხენა-თესვას, საქონლის მოშენებას და ქვის თლას. სარწმუნოებით, რაღა თქმა უნდა, მართლ-მადიდებელნი არიან, მაგრამ სამშობლო ენა სრულიად დავიწყებული ჰქონდათ. მხოლოდ მცირეოდენმა იცოდა ბერძნული, დანარჩენი ოსმალურად ლაპარაკობდა. ზნე, ჩვეულება და ასე გაშინჯეთ ტანა-საცმელიც დღესაც ოსმალური აქვთ. სოფ. წინ-წყაროს (ტფილისის



მაზრაში ესაა ბერძნების სოფელი; ამ სახელის სოფელი ბერძნებისა ბორჩალოშიც არის, მხოლოდ აქ, ამ წინ-წყაროს ეძახიან აგრეთვე კვირა-ცხოველს) დედა-კაცს ოსმალოსაგან ვერ გამოარჩევ ჩაცმულობით. ოსმალეთიდან მოსულ ბერძნებს ისე ჰქონდათ დავიწყებული სამშობლო ენა, რომ თურმე ზოგიერთა მღვდლები ღვთის მსახურებას ოსმალურად ასრულებდნენ. დღეს გარემოება შეიცვალა. ბერძნებს საკუთარი ინტელიგენცია გაუჩნდათ, რომელიც სცდილობს სასოფლო სკოლების შემწეობით აღადგინოს სამშობლო ენა. ამ სანაქებო მოღვაწეობას ხელს უმართავს აგრეთვე ტფილისის სასულიერო სასწავლებელსა და სემინარიაში კურს დამთავრებული ყმაწვილკაცობა და სამღვდლოება \*)

„მოამბეში“ უკვე იყო მოყვანილი სასტატისტიკო ცნობანი, (იხ. შინაური მიმოხილვა, ამ წლის მეორე ნომერი) თუ რამდენი ოსი შემოეხიზნა ქართლს ამ საუკუნის განმავლობაში. ოსები ისე ბლომად ჩამოვიდნენ მთიდან ბარში, რომ ქართველი გლეხ-კაცის ცხოვრების ელფერი სრულიად შესცვალეს. მათის წყალობით დაიბადა და უზომოდ გამწვავდა ესრედ წოდებული ხიზანთა საქმე. 1876 წლიდან დაწყებული, დღემდის ადგილობრივი და უმაღლესი მთავრობა სცდილობს როგორმე მოაწყოს ეს საქმე და ჯერაც გადაწყვეტით არ შეგვიძლიან ვსთქვათ — როგორ, ან როდის დასრულდება საქმე. ისეთი სპეციალური დაწესებულება, როგორცაა საგლეხო საკრებულო, მარტო ხიზნების, ანუ ოსების საქმეს უნდება. თამამად შეგვიძლიან ვთქვათ, რომ 80% საჩივრებისა ამ დაწესებულებაში ოსებისაგან მოდის. ბატონ-ყმობა რომ გადავარდა ნაყმევ გლეხთა რიცხვი იყო 14,230 კომლი, დღეს ხიზანთა რიცხვი თითქმის ამდენი-

\*) ბერძნების წალკას ერთი სასახლო შვილიცა ჰყავს. ეს გახლავთ ათინის უნივერსიტეტის პროფესორი ლაზარე ჰავლეს ძე კატანოვი. რამდენადაც გვახსოვს, კატანოვი დაბადებულია ს. ბარმაკისში, სწავლა დაამთავრა ტფილისში და შემდეგ სწავლობდა ქ. კიევისა და ათინაში, სადაც დღეს პროფესორობს.



ვეა. სამწუხაროდ 1897 წლის აღწერილობა ჯერ არ არის გამოქვეყნებული, რომ დანამდვილებით შევიტყუოთ რამდენია ოსი ტფილისის გუბერნიაში. დაახლოვებით კი შეიძლება სთქვას ადამიანმა, რომ დღეს ოსობა ტფილისის გუბერნიაში იქნება არა ნაკლებ თერთმეტი ათასი კომლისა, ანუ 52,895 სულისა. რაკი უმამულო და უნაყოფო მთამ ველარ ასახდოვა ოსობა, ძალა-უნებურად ბარად ჩამოვიდა და მთელ ქართლს მოედო ბინის საშოვნელად, ასე გაშინჯეთ, ოსებმა ახალქალაქის მაზრის სამზღვრებსაც კი უწიეს თითქმის. ბორჯომის საბოქაულოს სოფლები: ზემო და ქვემო მიტარბი და მაქარ-წყალი ოსებითაა დასახლებული; ბაკურიანში რვა კომლია ოსი, გომნაში 17 კომლი, ზეთამზეში—3 და ტიმოთეს-უბანში—1. ეს სოფლები, ბაკურიანის გარდა, თითქმის ზედ აკრავს ახალქალაქის მაზრას. ამას გარდა ოსები კონკურენციას უწევენ იმერლობას ტფილისში მოსამსახურობაში. დღეს სატახტო ქალაქ ტფილისში ოსობა უფრო მრავალია ხელის მოსამსახურე, ვიდრე იმერლები, რომელთაც ამ ათის წლის განმავლობაში შესამჩნევად აარიდეს პირი ლაქიობა-მოსამსახურობას. ძიძებად კი მარტო ოსის ქალები არიან, ძეირად შეხვდება ადამიანი ამ ხელობაში ქართლელს, იმერელს, სომეხს. ერთის სიტყვით, როგორც დიდი ხნით შეგუბებული მდინარე, როცა კი გაარღვევს ზღუდეს, შორს გაიშლება, გაიფანტება და რაც-კი შეხვდება გზაზე სულ წალეკავს და წალამავს, ისე ემართება ოსობასაც. მთა-გორა და განსაკუთრებით ტყე რომ აგრე არ უყვარდეს ოსსა, აქამდისინ ყარაიხსა და მილის ველ-მინდვრებშიაც გაჩნდებოდა, როგორც ხიზანი, ან თუ გაჭირდა, როგორც იჯარადარი.

1886 წ. კომლეთულად აღწერილობიდანა სჩანს, რომ ტფილისში ირიცხებოდა 314 სული ოსი. სულ მთლად გუბერნიაში ითვლებოდა 9486 კომლი და 72,420 სული. \*) აქ, რასა-

\*) ხიზან ოსების რაოდენობა დაფუძნებულია ჩვენს საკუთარ ანგარიშზე და ამიტომაც ეს რიცხვი არ ეთანხმება ოფიციალურსა. მიზეზი ასე-



კვირველია, ნაანგარიშეგია ხიზან ოსების გარდა—სახაზინა და დროებით ვალდებულნი გლენიცი.

### IV

სომხების მოსვლა ჩვენს ქვეყანაში არ ახალია, ძველია. ჯერ ისევ საქართველოს მეფენი დიდის სიამოვნებით და ხალისით იღებდნენ სპარსეთიდან და ოსმალეთიდან გამოქცეულ სომხებს. ქართველებს, როგორც ყველამ ეიცით, ვაჭრობა არ ეხერხებოდათ და არამც თუ არ ეხერხებოდათ, ეჯავრებოდათ კიდევ. უვაჭრობით კი ქვეყანას არ შეუძლიან ქვეყნობა. ამისათვის ქართველი მეფენი ხელ-გაშლილნი ხვდებოდნენ სომხებს და ასახლებდნენ ძველად ქალაქებში ვაჭრობა-მრეწველობისთვის. ოსმალეთ-სპარსეთში სომხებს ბევრი შავი დღე უნახავთ და დღესაც სანატრელ მდგომარეობაში არ არიან ამ დაქვეითებულ ქვეყნებში. ყოველი განსაცდელის შემდეგ ან სპარსეთში, ან ოსმალეთში, დაწიოკებული სომხები პირს ჩვენსკენ იზამდნენ ხოლმე, რათა თავი შეეფარებინათ ერთ-მორწმუნე ქართველის ქერის ქვეშ და მისი მფარველობით შეწუხებული სული მოებრუნებინათ. მეჩვიდმეტე საუკუნის დასაწყისს შაჰაბასმა დიდმა საშინლად დააწიოკა სომხეთი. აუარებელი ხალხი გაწყდა მახვილითა, შიმშილ-წყურვილითა და სიცივითა. ეინც კი გადაარჩა ცოცხალი, სისწრაფით გაშორდა უმადურ სამშობლოს. სწორედ ამ დროს მოეჩინა ევროპის დაბა-ქალაქებს სომხობა და მრავალი მათგანი ჩვენშიაც ჩარჩა. ყარაბაღიდანაც მრავლად იწვევდნენ საქართველოს მეფენი სომეხთა, რომელნიც დაბინავდნენ ქალაქებად და სოფლოდ. ქართლ-კახეთი საესეა სოფლებით, საცა სომხობა მრავლადაა დამკვიდრებული. მეტი არ იქნება, რომ დავასახელოთ რამდენიმე სოფელი: ლისი, სამ-

თის განსხვავებისა ადვილი ასახსნელია. ოფიციალურ ცნობაში ნაჩვენებია მხოლოდ კამელარიაში მოხსენებული კომლი, ჩვენ ისინიც ჩავთვალოთ, ვინც ჯერ არ აღრიცხულა კამელარიით. უკანასკნელი კამელარია იყო 1873 წელს.



შვილდო, კოდი, გლდანი, კუმისი, ველის-ციხე, ყვარელი, კის-ტაური, ურიათუბანი, წინანდლი, მუხრანი, რუისი, ალი, დირ-ბი, ახალ-ქალაქი და მრავალი სხვა. ქართლ-კახეთში ძვირად შეხედვები სოფელსა, საცა რამდენიმე კომლი სომეხი არ იყვეს ჩასახლებული. იმისთანა პატარა სოფელშიაც კი, როგორც სალოლაშენია, ათ კომლ ქართველზე ხუთი კომლი სომეხია.

მეჩვიდმეტე-მეთვრამეტე საუკუნეებში მოსული სომეხობა ისე გაქართველდა, რომ ძნელად გაარჩევს კაცი ქართველისაგან. ენა, ზნე-ჩვეულება, ჩაცმა-დახურვა, ყველაფერი ქართველური შეითვისეს, შეირჩინეს მხოლოდ სარწმუნოება და ლტოლვილება ვაჭრობისადმი. ამ უკანასკნელ დრომდის საღებ-მიცემო წიგნები სულ ქართული ჰქონდათ და ასე გასინჯეთ ქადაგება საეკლესიო კათედრიდან ქართულად სწარმოებდა. დღეს ყველაფერი შეიცვალა დი ხშირად ისეთ მოვლენას შევხვდებით ხოლმე, რომ ვერაფრით ვერ ავხსნით, თუ არ დამლუპველი გარეშე გავლენით და ჩავგონებით. მაგალითებრ გარდაიცვალა ვინმე მდიდარი და შეძლებული სომეხი სადმე დუშეთს, ან გორს. მთელ თავის ქონებას უანდერძებს მარტო თავისიანებს და მეზობელს კი არ გაიხსენებს. დუშეთია თუ გორია ეს ხომ შენი სამშობლოა, აქა ხარ დაბადებული და აქვე ჩახვალ საფლავსა, ამ ქვეყნის ჰავამ გაგზარდა და სული ჩავიდვა, შენი წინაპარი აქ აღიზარდენ, მათი საფლავნიც აქ არიან და ნუ თუ შენი მშობელი ქვეყნის ბედნიერება, კეთილ-დღეობა არ გიღელვებს გულს, ნუ თუ იმ კუთხის ბედი, სადაც სიყმაწვილე გაგიტარებია, არ უნდა აესებდეს შენს გულს სიამოვნებით? გულუხეობა თუა, აქ უნდა იჩინოს თავისი მადლი, სხვაგან შორს ხელის გაწოდება აქ რა შუაშია, ან მიკერძება მარტო თავისიანისკენ რა მოსატანია? ჯერ საერთოდ შენიანის ბედნიერებით დასტკბი და მერმე მადლიანი ხელი სხვისკენაც გაიწვდინე. ეგებ ვცდებოდეთ, მაგრამ ჩვენ ასე ფიქრობთ—ეს განკერძოება ხელოვნურადაა ჩამოვარდნილი და როგორც ბუნებრივის გრძობის წინააღმდეგ სიმპატიასა მოკლებული.



სომხების მოსვლა საზოგადოდ ამიერ კავკასიაში და კერძოდ საქართველოში სამს პერიოდად უნდა გაიყოს. პირველი ხანა დასრულდა საქართველოს პოლიტიკურ თვით არსებობასთან ერთად. ამ დროს მოსული სომხები მკვიდრისგან აღარ გაირჩევიან და მაშასადამე ისინიც მკვიდრად უნდა ჩაითვალებინ. მეორე ხანა დასრულდა 1828 წელს თურქმენჩაის ტრაქტატით. (10 თებერვალი 1828 წ.) ამ დროს აღირბეყანის პროვინციის სხვა-და-სხვა ოლქებიდან გადმოსახლდა 8,249 ოჯახობა და დასახლდა ერევნისა, განჯისა და ბაქოს გუბერნიებში. ამ ტალღას ჩვენამდინ არ მოუღწევია.\*) მესამე ხანა სომხების დასახლებისა დასრულდა ადრიანოპოლის ხელშეკრულებით 2 სექტემბერს 1829 წ. ოსმალეთიდან ამ დროს გადმოსახლდა 12,655 ოჯახი, ანუ 76,000 სული.\*\*) ამ დროს მოსული სომხობა დაბინავდა ჯავახეთ-საათაბეგოს. სომხების მოსვლა არც ამითი დამთავრდა. დიდ-ძალი სომხობა გადმოვიდა ამიერ-კავკასიაში ყირიმის ომის (1853—54) და რუს-ოსმალის ომის (1876—77) შემდეგ. სამწუხაროდ ცნობები არ მოიპოვება, სად დაბინავდა ამ ხანებში მოსული სომხობა. აგრედვე არა ვიცით-რა, სად მოიკიდა ფეხი 1894—1896 წლებში შემოსულმა სომხობამ. ყველას ეხსომება, რომ ამ დროს სასტიკად არბედა სომხობას ოსმალეთი და ამის გამო ვისაც კი გაქცევა შეეძლო, გამოიქცა და კავკასიას შეაფარა თავი. გ. ა. ეზოვის სიტყვით სომხობა ათი-ათასობით („ДЕСЯТКИ ТЫСЯЧЪ АРМЯНСКИХЪ СЕМЕЙСТВЪ“) გადმოიხვეწა რუსეთის სამზღვრებში. ბეერს ეხსომება—რა ტანისამოსით, რა შეწუხებულნი და დავაგლახებულნი მოვიდნენ საცოდავები ჩვენს ქვეყანაში. ერთის სიტყვით თუ ოსმალეთში ადმინისტრაციული წესი და მართვა-გამგეობა არ შეიცვალა, თუ სომხების ბედი ამ უბედურ სახელმწიფოში საკეთილოდ არ შეიცვალა, მთელი სომხობა იხუვლებს და ამიერ-კავკასიაში გადმოიხვეწება. ეხლაც ოსმა-

\*) მაგდა ნეიმანის სიტყვით 40,000 სული.

\*\*\*) ამავე მწერლის სიტყვით 90,009 სული. გ. ა. ეზოვის მოწმობით 14,000 ოჯახი ან 90,000 სული.

ლონი თამამად ელაპარაკებიან ევროპას: დიდი ხანია სომხეთი დაიღუპა, აღარ არსებობსო; სომხეთი მხოლოდ გეოგრაფიული ტერმინია და სხვა არაფერი; არც ერთი პროვინცია არ არის ოსმალეთში, საცა სომხები მკვიდრთა ნახევარს მაინც შეადგენდნენო და აბა სად უნდა მივანიჭოთ ავტონომიაო და სხვა ამისთანა. ოსმალეთმა ერთი იმისთანად კიდევ რომ დააწიოკოს სომხები, როგორც 1894—1896 წ. იყო, შესაძლებელია მართლა, რომ მცირე აზიაში აღარც ერთი სომეხი აღარ დარჩეს სოფლად და სულ აქედ წამოვიდეს. საქმე მხოლოდ ისაა, რომ ისედაც უმამულოობით შეწუხებულმა მკვიდრმა როგორ შეივდრომოს ამოდენა მშვიერ-მწყურვალი, ტიტველი და ნიათ გამოლევული ხალხი?

არ შეგვიძლიან აქვე არ მოვიხსენიოთ იმათი სახელები, ვინც ხელი შეუწყო სომხების გადმოსახლებას ამიერ-კავკასიაში ამ მეცხრამეტე საუკუნეში. სპარსეთიდან სომხების გადმოსახლების სულის ჩამდგმელად იყვნენ კავკასიის მთავარმართებელი გრაფი პასკევიჩი, არქიეპისკოპოსი ნერსესი, პოლკოვნიკი ლ. ი. ლაზარევი, პოდპოლკოვნიკი მოსე ზაქარიას-ძე არლუთინსკი-დოლოგორუკი და სომხეთის ოლქის (Армянская область) უფროსი თ. ალექსანდრე გარსევანის-ძე ჭავჭავაძე, რომელიც ქებით იხსენიებს მ. ზ. არლუთაშვილს გადმოსახლების რიგიანად მოწყობისათვის. ჭავჭავაძე იმასაც აღნიშნავს, რომ გადმოსახლების საქმეს დიდად თურმე ეხმარებოდნენ ეჩმიაძინის მონასტრის მიერ გაგზავნილნი სასულიერო გვამნი. უკანასკნელი ფრაზა რუსულად ასეა: „Дѣйствія духовныхъ лицъ, разсылаемыхъ Эчмиадзинскимъ монастыремъ, также не мало способствовали успѣхамъ означеннаго переселенія“. სპარსეთის ტახტის მემკვიდრე აბბას-მირზა აყვედრიდა გადმოსახლების მოხელეებს, არქიეპისკოპოსს ნერსესას და სამღვდლოებს, რომ ძალით მიკეცათ იმოდენა ხალხი, რომელიც თავის ნებით სამშობლოს თავს არ დაანებებსო. აბბას-მირზას სიტყვით, ნერსესი ემუქრებოდა მღვდლებს, გაგკრეჭათ და ეკკლესიიდან განგდევნით, უკეთუ სპარსეთიდან

არ გადმოსახლდებიოთ.\*) ამ სანაქებო მოღვაწეობისთვის იმპერატორმა ნიკოლოზმა არქიებისკოპოსს წერსესას უბოძა წმ. ალექსანდრე ნეველის ორდენი.

ოსმალეთიდან გადმოსახლების სულის ჩაქდგმელი იყო იგივე გრაფი პასკევიჩი. იმპერატორს მოახსენა, რომ თუ სომხებს ნებას არ მივცემთ გადმოსახლებისას, ოსმალონი სულ ერთიანად ამოსწყვეტავენო, რადგან ომის დროს სომხები ჩვენ გვიმართავდნენ ხელსაო. ხელმწიფემუწნება დართო და თითო ოჯახზე უბოძა შესაწევარი 25 მან. ასიგნაციით, სულ ერთი მილიონი მანათი.

პასკევიჩმა დააარსა გადმოსახლების ხელის შემწყობი კომიტეტი, რომელმაც მშვენივრად შეასრულა თვისი მოვალეობა. უბირ ხალხთან ერთად გადმოსახლდა ორი არქიელი, ერთს მათგანს სახელად ეწოდებოდა კარაპეტი. 1837 წ. 1 ოქტ. იმპერატორი ნიკოლოზი ბრძანდებოდა ახალციხეს და ინახულა არქიებისკოპოსი კარაპეტა, რომელიც წინ მოუძღოდა გადმოსახლებულ სომხებს. (რუსულად: „Посѣтил арх. Карапета, выведшаго Армянъ изъ Эрзерумскаго пашалыка“). პატრიარქ წერსესას უბოძა იმპერატორმა წმ. ელადიმერის პირველი ხარისხის ორდენი. ახალქალაქის მაზრაში დღესაც ახსოვთ მაღლიერ სოფელთ არქიებისკოპოსი კარაპეტი. სულდელები თავიანთი სოფლის სამზღვრად უჩვენებენ გუთნის კვალს, რომელსაც ეძახიან კარაპეტას კვალს (борозда еп. Карапета).

ბერლინის ხელ შეკრულობის შემდეგ სომხები აპირებდნენ გადმოსახლებას, როგორც 1830 წელს, მაგრამ გენერალმა ი. დ. ლაზარევმა (სომეხია) შეაჩერა გადმოსახლება. თეისის სურ-

\*) იხ. ეზოვის წიგნი, გვ. СХХІХ რუსულად: „Если по совѣсти разсуждать, писалъ Аббасъ-мирза полковнику Лазареву, какъ возможно, чтобы нѣсколько тысячъ семействъ по искреннему и добровольному желанію бросили тысячелѣтнюю родину, имѣнія, сады, дома, чтобы остаться безъ мѣста и безъ всего? Главною причиною переселенія народа поставлю переселеніе священниковъ, которое произошло отъ первенствующаго въ Эчміадзинѣ (арх. Нерсеса), который угрожалъ отлучить ихъ отъ сана и вѣры и подвергнуть отвѣтственности даже на томъ свѣтѣ“.

ვილით შეაჩერა გადმოსახლება, თუ მთავრობამ უბრძანა გენერალ ლაზარევს, არა სჩანს ნეიმანის წიგნიდან. (გვ. 24).

ამ წერილში გაბნეულს ცნობებს თავი რომ მოვეუყაროთ, შემდეგს დავინახავთ: 1886 წ. ტფილისის გუბერნიაში ირიცხებოდა 808,143 სული, აქედან: რუსები 35,755; პოლონელნი და ლიტველნი—1279; გერმანელნი და შვედელნი—5065; ბერძნები—22,171; ქურთები—2,130; ოსები—72,420; სომხები—193,610; ბოშები—81; ებრაელნი—7632; აისორები—269; ქართლ-კახელნი—363,717; თუშები—5624; ფშავეები—9155; ხევსურები—6560; მთიულეები—2324; იმერლები—9010; მეგრელები—283; თათრები—68,364 და ქისტები—2497. (დანარჩენს აღარ ვიხსენიებთ). სულ ქართველები 396,678 სული, არა ქართველები 411,465, ანუ 49,09% ქართველი და 50,91% არა ქართველი.

ა. ე—მე



## ომერ-ფაშა საგებრელოში

მოგონებანი კ. ა. ბოროზდინისა

III \*)

### ომერ-ფაშის დაბრუნება ყულეგში.

წერილი ინგლისის საპოლიტიკო აგენტის ლენგვორტისა, დედოფალთან მიწერილი, და ომერ-ფაშასთან მყოფის, ფრანგის კოლონელის გრაფ მეფრესი.—გურულ რაზმის გაძლიერება რეზერვებითა.—შიშიანობა ქუთაისში.—ძვირობა.—ომერ-ფაშა იმერეთის საზღვრებს შორდება.—სოფ. ანტავო.—რუსის ჯარის მოქმედება.—მეგრელთა მილიციონერებმა ზუგდიდში ოსმალოს ლაზარეთი და ლაზარეთთან მყოფი ჯარი შეიპყრეს.—ისკანდერ-ფაშამ ამისთვის შური იძია: დასწვა მთავრის სასახლე და გააჩანაგა ბაღი.—ცეცხლმა როზმურდუკის საფეიქროც იმსხვერპლა.—ოსმალოს ჯარის დაბანაკება ქვალონსა და ნაბადას შუა.—მუხრან-ბატონი გაიხმეს უკან; იმის ალაგას ჩადგა გენერალი ბრუნერი.—მეგრელთა მილიციისა და ოსმალების შეტაკება.—ყირიმში ერთის თვის ვადით ზავის ჩამოგდებას ამბავი და პარიზში გამართული თათბირი მშვიდობიანობის ჩამოგდების შესახებ.—მიზეზი ომერ-ფაშის გალაშქრებისა.—დედოფლის როლი ამ გალაშქრების დროს.

26 ნოემბერს დედოფალი უკვე იმერეთს იყო, დაბა ხონში. \*) მეგრელთა მილიციას წარუძღვა დედოფალი და ცხენის-წყალში გავიდა; რამდენჯერმე მონაწილეობას იღებდა მტე-

\*) იხ. „მოამბე“ №№ IV და V.

\*\*) ხონში მთავარი ბანაკი იყო გურულების რაზმისა 1855 წლის ნოემბრიდან ომის გათავებამდე.

რთან ბრძოლაში. მტრის ბანაკიდან არ უსვენებდნენ, არ წყნ-  
 ნებდნენ — გვებრალებით და თქვენს სიკეთეს-ლა ვფიქრობთო.  
 ერთბაშად ორი წერილი მოუვიდა, ფრანგულად დაწერილი:

მთავარი ბანაკი ოსმალებისა, სამეგრელო,

6 დეკემბერს (25 ნოემბერს), 1855 წელს.

ბატონიშვილო!

„მისის დიდებულების, ინგლისის დედოფლის მთავრობამ  
 კავკასიის ქვეყნებში აგენტად გამოიმგზავნა. პატივი მაქვს გა-  
 მოვუცხადო თქვენს უბრწყინვალესობას, რომ მზად გახლავართ  
 შეგარიგოთ თქვენა და მარშალი ომერ-ფაშა, სარდალი ოსმა-  
 ლოს ჯარებისა. თუ კიდევ არ დაუბრუნდით თქვენის სამთავ-  
 როის რეზიდენციას, ჩვენის აზრით, ამას არა სასურველი შე-  
 დევი მოჰყვება, როგორც თქვენთა უფლებათა, ისე თქვენთა  
 ქვეშევრდომთა ბედ-იღბლის შესახებ. მათი მდგომარეობა დღი-  
 თი-დღე აუტანელი ხდება. რაიცა შეეხება ოსმალთა ჯარის  
 ქცევას, უნდა მოგახსენოთ, რომ მისის უფროსის სიბრძნისა და  
 კეთილ-შობილობის წყალობით, მეგრელები იმათს ძვირს ვერ  
 იტყვიან; გარდა ამისა, თამაშად შემოძლია ვთქვა, რომ შემ-  
 დევშიაც ასე კარგად მოექცევიან სამეგრელოს მკვიდრთ. მაგ-  
 რამ უწესოება შინაურობაში დიდია, მეზობლები ხშირად ეს-  
 ხმიან თავსა და აწიოკებენ; ომერ-ფაშა ამ შემთხვევაში განზე  
 დგას, არაფერში ერევა, — ჩემი საქმე არ არისო. პირიქით, მის-  
 ნი განზრახვანი, აგრეთვე ჩემნიცა, გვაძულებენ არ ჩავერი-  
 თოთ იმ ქვეყნების საშინაო ცხოვრებაში, რომელნიც ოსმალოს  
 დაუპყრია. ამიტომ, თუ რამ უბედურება დაატყდათ თავს სამ-  
 თავროის მკვიდრთ, ბრალი იმ უფროსების იქნება, ვინც, სა-  
 ჭირო არ იყო ისე, თავის ქვეშევრდომთ თავი დაანებეს. სა-  
 სტიკად მხოლოდ მაშინ მოიქცევა მარშალი, თუ შინაურმა  
 უწესოებამ საზღვარს გადააცილა; ამ შემთხვევაში ომერ-ფაშა  
 იძულებული იქნება ახალი მთავრობა დააწესოს სამეგრელო-



ში, რომ თავისი ჯარი უფრო უზრუნველ ჰყოს ყოველ მოსახლეს, ლოდნელ ხიფათისაგან. თქვენის ბრწყინვალეობისა და თქვენის შვილების საკუთარი ინტერესი მოითხოვს ეს მძიმე საქმე როგორმე ჩქარა გაათავოთ.

„ჩემი ამხანაგი, ბატონი შამშუაზონი, აგენტი საფრანგეთის სახელმწიფოსი, დროებით სხვაგან გეახლათ, მაგრამ მე ვკისრულობ იმას, რომ ამ საგნის შესახებ ჩვენ ორივე ერთის აზრისა ვართ და მისის მთავრობისაგან იგივე დარიგება აქვს, როგორც მე ჩემისაგან. იქნება თქვენმა ბრწყინვალეობამ საქიროდ დაინახოთ გეახლოთ თქვენთან. თქვენი სურვილი მაშინ შემძლია აღვასრულო, თუ უბრძანებთ გზაში არაფერი შემემთხვეს.

დავშთები უღრმესის პატივისცემით უმდაბლესი და უმორჩილესი მონა-მოსამსახურე თქვენის ბრწყინვალეობისა ფ. ჯონგუორტი“.

აი მეორე წერილიცა, ისიც ფრანგულად დაწერილი:

„ბანაკი და მთავარი სადგომი სოფ. ონტოფოში,

6 დეკემბერს (25 ნოემბერს) 1855 წ.

ბატონი შვილო!

საკვირველი არ არის, რომ თქვენი ბრწყინვალეობა ამდენს ყოყმობს. მართალია, ამდენი ყოყმობა, როგორც მანდილოსანს, გეპატიებათ, მაგრამ თუ კიდევ გასტანა, სავალალო იქნება თქვენისა და თქვენის შვილების ინტერესებისათვის. რუსები ძლიერ იქმნენ დუნიაზე, ყირიმში, ინგურზე, ყველგან, სადაც კი მტერი შეხვდა. თქვენს ბრწყინვალეობას კარგად უნდა ჰქონდეს გაგებულება, რომ იმათ არ ძალუძთ კავკასიაში დაპყრობილი ქვეყნები შეირჩინონ. მერე რა ღონე უნდა იღონონ ამისთვის? არაფერი. სულ უკან-უკან იხევენ, ცეცხლს უკიდებენ თავის მაღაზიებსა, თავის სურსათსა, კერძო პირთა ქონებასაც არა



ჰზოგავენ, და ამავე დროს ვერა ჰბედავენ და არც შეუძლიათ გაუმკლავდნენ მტერსა.

„მთელ ერთ საუკუნის განმავლობაში უნდა იბრძოლოს რუსეთმა, მთელის საუკუნის განმავლობაში უნდა ღვაროს თავისის ჯარის სისხლი, რომ ოდნავაც არის, დაიპყროს კავკასია, ეს უპატრონოდ დარჩენილი და ყველასაგან მივიწყებული მხარე.

„ევროპამ ახლა თვალები გაახილა; მეტის მოთმენა არ შეიძლება და გადასწყვიტა კავკასიის ერნი, გონებრივის სიბნელითა და სიღარიბით შეწუხებულნი, გაათავისუფლოს; ევროპასა ჰსურს, რომ თქვენ შეუერთდეთ განათლებულს ხალხს, რომ იმ განძით და სიმდიდრითა, რომელიც უფალს თქვენის ქვეყნისათვის მოუმაღლებია, თქვენვე სარგებლობდეთ.

„ასე და ამ გვარად, ჩვენა გვსურს დამოუკიდებელ და მდიდარ გყოთ და თქვენი ბრწყინვალეობა კი ყოყმანობს! ნება გვიბოძეთ ბატონიშვილო, მოგახსენოთ, რომ თქვენი ბრწყინვალეობა ბრძანდებით მეგრელი და მმართველი სამეგრელოსი და არა ქვეშევრდომი რუსეთისა.

„ღმერთმა ჩაგაბარათ თქვენ ინტერესები თქვენის ქვეყნისა, თქვენის შვილებისა, თქვენის კუროთხეულის ხარისხისა.

„აქაური ხალხი და ქვეყნები სხვის ხელში თავისდღეში არ იქნებიან, მაგრამ ვინ იცის, მოკავშირე სახელმწიფოებს, შეიძლება, თავი მოჰბეზრდეთ თქვენი ყოყმობით. იტყვიან, ამდენ ხანს ხალხის დატოვება უპატრონოდ არ შეიძლებაო, თქვენზე იტყვიან—ამდენხანს იმიტომა ჯიუტობს, აქედან თავის ნებით იმიტომ გაიხიზნა, რომ მთავრობაზე ხელი აიღოვო და თქვენს მაგივრად სხვა თავადს დანიშნავენ მმართველად.

„მე კარგად მესმის, თუ რა ძნელია ამ შემთხვევაში თქვენი მდგომარეობა, როგორც ქალისა, მაგრამ რაკი თქვენს ბრწყინვალეობას მთელი ერის უფროსობა გაბარიათ, რაკი ვალდებული ბრძანდებით იზრუნოთ თქვენი შვილების ინტერესისათვის, უნდა იცოდეთ, რომ საქირთა ხელის გამოღება, რისამე ქმნა.

„თქვენო ბრწყინვალეზავ, მამატივეთ ჩემი გულახდილი  
 ლაპარაკი; თქვენ თითონ დაინახავთ, რომ ასე გულახდილად  
 იმიტომ მოგახსენეთ ყველაფერი, რომ თქვენის ბრწყინვალე-  
 ბის მოწიწებითი პატივისცემა მაქვს.“

გენერალურის შტაბის კოლონელი, იმპერატორის ბრძა-  
 ნებით მყოფი მისს ბრწყინვალეზავ გენერალისიმუს ომერ-  
 ფაშასთან.

გრავი მეფრე...“

ამ ორ წერილიდან ნათლად ჩნდა, რომ ომერ-ფაშა მიხვ-  
 და, დედოფალს ზუგდიდში ჩემის რჩევით ვერ მოვიყვანო და  
 უკანასკნელ საშუალებას მიჰმართა, — შეეცადა ფონს გასულიყო  
 მასთან მყოფ ინგლისის აგენტის გრაფ მეფრეს, საფრანგეთის კო-  
 ლონელის დახმარებით. ძალიან შეეცადნენ ორნივე, მაგრამ  
 მაინც ვერას გახდნენ და ამის შემდეგ ოსმალთ ბანაკიდან დედო-  
 ფალს წერილი არ მოსვლია.

ამასობაში, გენერალმა მურავიოვმა გურიის რაზმს შვიდი  
 ბატალიონი ჯარი მიაშველა. იმერეთი სიხარულმა მოიცვა, რო-  
 ცა გაისმა — ჯარი სურამს გადმოსცდაო. ქუთაისში ყველანი  
 თავზარდაცემულნი იყვნენ: ომერ-ფაშა 25 ვერსის მანძილზე  
 იდგა ქუთაისიდან, ხოლო გურიის რაზმისა ბევრი არაფერი  
 იმედი ჰქონდა ვისმე. ქალაქიდან საჩქაროდ ეზიდებოდნენ კან-  
 ცელარიის საქმეებს და ხაზინას ტფილისში, სახლების ფასები  
 დაეცა, საცაა ოსმალები შემოვლენ, აქაურობას ააკლებენ და  
 გადასწვავენო და ცდილობდნენ გაეყიდნათ. ამ დროით ისარ-  
 გებლა ერთმა აფერისტმა და ერთი მშვენიერი სახლი ვრცე-  
 ლის ეზოთი ორას თუმნად იყიდა, ხოლო ერთი წლის უკან  
 იმავე სახლში ათას-ოთხას თუმანს აძლევდნენ, მაგრამ არა ჰყიდ-  
 და. სანოვაგე აღარ შემოჰქონდათ, ყველაფერზე საშინლად  
 იმატა ფასებმა: ქილა ფქვილი, მაგალითად, 9 მანეთი ღირდა,  
 ფუთი შაქარი — 28 მ., ყოველსავე ამასთან ქალაქის ფულის  
 ფასი საშინლად დავარდა. მცხოვრებთ სანოვაგისათვის მხოლოდ  
 ოქრო-ვერცხლის ფული მიჰქონდათ, ქალაქის ფულს არავინ

ღებულობდა, ასე რომ ზუგდიდში ერთმა მედუქნემ ათ თუმ-  
 ნიანი ქალაქის ფული ხუთი მანეთის ვერცხლად იყიდა. ამი-  
 ტომ, ადვილი წარმოსადგენია, თუ რა სიხარული შეუდგათ  
 ქუთათურებს, როცა გაიგეს—ახალი ჯარი მოდის ჩვენდა სა-  
 შევლადაო.

ომერ-ფაშამ რომ გაიგო, გურიის რაზმს ახალი ჯარი მი-  
 აშველესო, იმერეთის საზღვარს თავი ანება. ამავე დროს ტფი-  
 ლისიდან თავადი ბებუთოვი მობრძანდა და ქვაშხორში დედო-  
 ფალი ინახულა. ეკატერინემ თავისი გაჭირვებული მდგომარე-  
 ობა ყველაფერი უამბო.

რაკი რუსებმა ყარსი აიღეს, ოსმალოს მთავარ-სარდალს  
 უკან უნდა დაეხია, სხვა გზა არა ჰქონდა: როცა სამეგრელო-  
 ზე გაილაშქრა, აზრად მხოლოდ ისა ჰქონდა, რომ გენერალი  
 მურავიოვი ყარსისათვის მოეშორებინა, მაგრამ საწადელს ვერ  
 ეწია. ეს ერთი. მეორეც, იძულებული იყო აქაურობას გას-  
 ცლოდა იმიტომ, რომ ძალიან სცადა, მაგრამ სამეგრელოს  
 მცხოვრებლებთან ვერავითარი კავშირი დაამყარა, ვერც დე-  
 დოფალი გადაიბირა თავის მხარეზე. ჯერ მცხოვრებნი მაში-  
 ნაც კი დაუხვდნენ მტრულად და იარაღიც კი იხმარეს ოსმალთ  
 წინააღმდეგ, როცა რუსებმა თავი გაანებეს აქაურობას. ახ-  
 ლა, როცა რუსები უფრო ღონე მოკრებილნი დაბრუნდე-  
 ბიან უკან მაშინ მით უფრო აიღებენ ხელში იარაღს და ჩემი  
 მდგომარეობაც უფრო საშიში გახდებოდა.

ომერ-ფაშას ჯარს, ცხენის-წყლისაკენ წასვლის დროს, მე-  
 რე მდ. ხობის წყალისაკენ გამობრუნებაზე, მეტად ცუდი და-  
 რი შეესწრო, გზებიც მეტად გაუფალი იყო და იმან ძალიან  
 შეასუსტა. გზები იმდენად გაფუჭებული იყო და სოფლებიც  
 ისეთი ხვდებოდა გასაეღელი, რომ სოფ. ონტოფოში, მაგალი-  
 თად, ერთი ზარბაზანი ჩაეფლოთ ტალახში და სოფლელებმა  
 მხოლოდ ერთი წლის უკან ამოათრიეს რის წვალებით. მდი-  
 ნარეები ყველა საშინლად ადიდდა, გადუღებელ წვიმებისაგან  
 ყველგან საფლობები გაჩნდა, ასე რომ გურიის რაზმისათვის  
 შეუძლებელი შეიქმნა ოსმალოს რაზმს გასდევნებოდა უკან.

იმისი ეშინოდათ, ვაი თუ ჩვენც ის დღე დაგვადგეს, რა დღეც ოსმალთს ჯარს დაადგა ამ გზებით სიარულითაო. გურიის რაზმიდან ერთი ნაწილი გამოაჩიეს, შეუერთეს დონელ ყაზახთა ერთი ბატალიონი და ორასი კაცი მილიცია ლენიგის ყაზახთა, ცხენის-წყალში გაიყვანეს და უკან გადადევნეს ომერ-ფაშას.

ზუგდიდში, როგორცა ვთქვით, ოსმალთა ჰოსპიტალი იყო და გარნიზონი, მაგრამ ისკანდერ-ფაშამ თავისი რაზმი წაიყვანა, რომ ომერ-ფაშას შეერთებოდა. სწორედ ამ დროს მეგრელების მილიცია ოსმალთ გარნიზონს დაეცა და უმეტესი მათგანი ტყვედ წაასხა. ეს რომ გაიგო ისკანდერ-ფაშამ, საშინლად გაბრაზდა და განიზრახა მეგრელებისათვის სამაგიერო გადაეხადნა; დაბრუნდა ზუგდიდში, გადაჰბუგა მთელი დაბა, მთავრის სასახლე, წინასწარ კი სასახლიდან ყველა ძვირფასი ნივთები გააზიდვინა, ორანჟერეებიდანაც რის გამოტანა კი შეიძლებოდა, ყველაფერი გაატანინა, ხოლო ბაღში ხეები სულ სირში დააჭრევინა. ამ სახით, ის საუცხოვო ბაღი, რომელიც დედოფალმა გააშენა და რომელსაც თვალის ჩინივით უვლიდა, მიწასთან იქმნი გასწორებული. სხვა შენობათა შორის დაიწვა გრაფ როზმურდუკის საფეიქრო. როზმურდუკი ძალიან გაანაწყინა ომერ-ფაშის ასეთმა საქციელმა, წავიდა სტამბოლში და იქ ფრანგების ელჩ ტუვენელთან უჩივლა ომერ-ფაშას. ტუვენელმაც თავი გამოიღო და ოსმალეთის მთავრობას 15,000 მანეთი მიაცემინა როზმურდუკისათვის ზარალის საზღაურად.

მდინარე ცივს რომ გავიდა, ოსმალთს ჯარი ქვალონის სერებზე დაბანაკდა. აქედან თანდათან იხევდა უკან და ომერ-ფაშამ ერთი ნაწილი თავისი ჯარისა ქვალონსა და ყუღეეს შუა დააყენა, ხოლო მეორე ნაწილი ზღვის პირას გაშალა ყუღეესა და ნაბადას შორის. ქრისტეშობისთვეში ი. მუხრან-ბატონი ტფილისში გაიხმეს, ხოლო გურიის რაზმის უფროსობამის მაგიერ ჩაბარდა გენერალ ბრუნერს. პირუთვნელი ისტორია გამოაშკარავებს მუხრან-ბატონის მოქმედებას. ხოლო რაიცა შეეხება ბრძოლის ველს, ის შეგვიძლია ვთქვათ, რომ ორი თვის განმავლობაში, ნოემბრის გასულიდან იანვრის გა-

სულამდე, მტერი მხოლოდ ახლო-მახლო სოფლების ადგილ-  
 მდებარეობას იკვლევდა და რამდენჯერმე მსუბუქი შეტაკებაც  
 მოუვიდა გურულ რაზმის მოწინავე წყობასთან, რომელიც მდ.  
 ცივის მარცხენა მხარეს იყო დაბანაკებული. მთელ თავის ძა-  
 ლას ომერ-ფაშა ყულევთან იკრებდა. აქ იშენებდა ქოხებსა,  
 აკეთებდა ბატარეას და ჯებირებს.

იანვრის გასულისათვის, როცა სამეგრელოს უმეტესი  
 ნაწილი ოსმალოს ჯარისაგან გაიწმინდა, დედოფალი გორდში  
 დაბრუნდა. მთელი თვე-ნახევარი მილიციას არ მოჰშორებია,  
 უკეთ, ცხენიდან არ ჩამომხტარა. ნებიერად და აზიზად გაზ-  
 დილი დედოფალი იძულებული შეიქნა სავსებით გამოეცადნა  
 მთელი სიმწარე სამხედრო ცხოვრებისა სხვა მილიციონერებთან  
 ერთად: ზამთრის სიცივესა და წვიმაში დღისით ცხენზე იჯდა,  
 ხოლო ღამეს გლეხის ქოხში ათევდა. გორდში თავისი ბავშვე-  
 ბიც მიჰგვარეს, რომელთაც ლეჩხუმის მთის ჰაერმა საუცხოვოდ  
 არგოთ. თვენახევრის გაშორების შემდეგ შეილები ნახვამ მე-  
 ტად ვახარა დედოფალი; მათმა ტიტინმა სულ დაავიწყა გე-  
 ლილი გაჭირვება.

თებერვალში გურულებისა და მეგრელების მილიციებს  
 რამდენჯერმე მოუვიდათ ოსმალებთან შეტაკება, მაგრამ გა-  
 მარჯვება ყოველთვის პირველთ რჩებოდათ, რადგან ადგილ-  
 მდებარეობა ზედმიწევნით იცოდნენ და მტერსაც მოულოდ-  
 ნელად ესხმოდნენ თავზე. მაგრამ საზოგადოდ კი უნდა  
 ეთქვას, რომ ომი თითქმის ჩაქრა. ორივე მხარე საშინ-  
 ლად დაღალა ოთხის თვის ომიანობამ, უგზოობამ და  
 ზამთრის სიცივემ, თან, ხმაც ისმოდა, — ზავი უნდა ჩამო-  
 ვარდეს მალეო. მეგრელებსა და ოსმალებს შორის უკანასკნე-  
 ლად შეტაკება მოხდა ხორგასა და ყულევს შუა. თავადმა ჯა-  
 იანმა და გუბერნიის სეკრეტარმა გაბუნია მდ. ხობისწყალზე  
 დაინახეს ნავი, რომელშიაც ოსმალი ჯარის-კაცები ისხდნენ,  
 მილიციონერებით დაეცნენ, ზოგი ტყვედ წამოასხეს და და-  
 ნარჩენი დახოცეს. ყულევთან ჯარის-კაცები მოაშველეს, მაგ-  
 რამ მეგრელებმა ისინიც დაამარცხეს; ჯაიანი წინიდან ებრძო-

და, ხოლო გაბუნია ზურგს უკანიდან. ოსმალოს კომანდა ყულევში გააქციეს და გამარჯვებულნი უკან გაბრუნდნენ. ეს იყო უკანასკნელი სურათი იმ სისხლის-ღვრის დრამისა, რომელიც მდ. ინგურზე იქმნა დაწყებული.

მარტის დამდეგს ამბავი მოვიდა, რომ ყირიმში ერთი თვით წინასწარი შერიგება მოხდა და პარიზში მოლაპარაკება აქვთ ზავის ჩამოგდების შესახებო. ამნაირივე წინასწარი მორიგება ჩამოვარდა აქაც; დაიწყო მისვლა-მოსვლა ორსავე მხარეზე და, ბოლოს, აპრილში, უმაღლესი მანიფესტი მოგვივიდა 19 მარტისა ზავის შეკერის შესახებ.

ომერ-ფაშას ყოველთ უწინარეს აზრად ჰქონდა—მურავიოვი ყარსიდან გაეტყუებინა, მაგრამ ამავე დროს ისიც უნდოდა, რომ რუსეთის მიერ აღებული სამი პროვინცია: აფხაზეთი, სამურზაყანო და, განსაკუთრებით სამეგრელო, ამ სახელმწიფოსათვის ბოველიჯნა, სამივე დამოუკიდებელ სამთავროებად გამოეცხადებინა და მათი არსებობა ევროპის ტრაქტატის ძალით უზრუნველ ეყო \*). ამ შეთხვევაში, იმდენად ამ პროვინციებისა და მისთა მკვიდრთა დარდი არა ჰქონდათ, რამდენადაც სურვილი იმისა, რომ რუსეთი ეზარალებინათ.

ერთბაშად აღვილი წარმოსადგენი არ არის, თუ რა მოჰყვებოდა ომერ-ფაშის განზრახვის ასრულებას და ზავის ზღვის პირად დამოუკიდებელ სამთავროთა დაარსებას მხოლოდ ის კი დანამდილებით შეიძლება ითქვას, რომ ეს შეიქმნებოდა მიზნები დაუსრულებელის შფოთისა კავკასიაში და რუსეთს ხელს შეუშლიდა კავკასიის საბოლოოდ დაპყრობის საქმეში.

ეკატერინე დედოფალი, რა თქმა უნდა, არ დაჰყვა ომერ-ფაშისა, ინგლისისა და საფრანგეთის მთავრობათა აგენტების ნებას და დუმილით მოიშორა თავიდან სამივე. საქმე ამით გა-

\*) „Le czar doit être refoulé au delà du Terek et du Kouban, c'est irrè vocablement arrêté dans les conseils des puissances alliées“. („რუსის ზელმწიფე თერჯისა და ყუბანს იქით უნდა იქმნას გაგდებული: ასე გადაწყდა საბოლოოდ დიდთა სახელმწიფოთა რჩევაზე“). ეს ამოწერბლია ფერზად-ფაშის წერილიდან, რომელიც რუსებს ჩაუვარდა.

სამეგრელო  
სამეგრელო

თავდა. უდედოფლოდ კი ამ საქმის გაკეთება ამით არ შეეძლოთ, ამიტომ რომ ეკატერინე სამეგრელოში იყო. მაგრამ ჩვენ კი გვგონია, რომ ომერ-ფაშისათვის უფრო ხელ-საყრელი იქნებოდა, რომ ამ დროს დედოფალი თავისის ოჯახით ტფილისში ყოფილიყო წასული მუხრან-ბატონისა და თავად ბებუთოვის დაბარებით. მაშინ ოსმალოს მთავარ-სარდალს შეეძლო პირდაპირ განეხორციელებინა თავისი სურვილი, რომლითაც დედოფალს აშინებდა წერილებში, სახელდობრ: რაკი ტახტის მემკვიდრე სამეგრელოში არ არის, ეტყობა ხელს იღებს თვისთა უფლებებზეო, და ამიტომ, ოსმალეთის და მისთა მოკავშირე სახელმწიფოთა სახელით, ენიშნავ მთავრად ერთ-ერთ აქაურ თავადსაო. ამისთვის ყოველივე მზად იყო, მხოლოდ რაკი ახალკაცს გამთავრებდა, მისთვის ზურგი უნდა მოემაგრებინა პირველ ხანებში. მაშინ, შესაძლებელია, ყარსის აღების ამბის მისვლის შემდეგ, ომერ-ფაშა იძულებული არ გამხდარიყო საჩქაროდ გაშორებოდა ცხენის-წყალსა. მაშინ მის მიერ დაყენებული მთავრობა ხალხთან მოციქულად და შუაკაცად გაუხდებოდა და იმისა არ შეეშინდებოდა—ხალხი იარალით დახვედროდა, როგორც სამურზაყანოს საზღვარზე უქნეს. და რაკი ხალხი იმის მხარეს იქნებოდა, თამამად შეეძლო თავის რიცხვ-მრავალ ჯარით რუსის ჯართან ხელ-ახლა გაემართა ბრძოლა. მართამდე როგორმე რომ მიეყვანა საქმე და გამაგრებულიყო, რაშიაც სამეგრელოს უგზოობაც ხელს შეუწყობდა, პარიზში მომხდარი თათბირი სამეგრელოს ახალს მთავრობას მოუსწრებდა და ძნელი შეიქნებოდა უარეყოთ უკვე მომხდარი ფაქტი. მაგრამ მთავარ-სარდალმა, რუსეთის საბედნიეროდ, ვერ გამართლა ის იმედები, რა იმედებიც ოსმალეთის მთავრობასა ჰქონდა მისი. ევროპაში ყველანი ომერ-ფაშას ამტყუნებდნენ—ყარსიც იმის უხეირობით აიღეს რუსებმა და სამეგრელოში გალაშქრებამაც იმისივე წყალობით ჩაიარა ასე ფუჭადაო. მერე ომერ-ფაშა დიდხანს იმართლებდა თავს ამის გამო როგორც თავის მთავრობისა, ისე ევროპის პრესის წინაშე.

ეკატერინე დედოფალი ხელმწიფის კურთხევაზე იყო მიწა-  
 ტიებული და მკათათვეში თავისი ბავშვები და თავისი და ნი-  
 ნო გრიბოედოვისა წაიყვანა და პეტერბურგში გაემგზავრა.

მე კი ვისარგებლე ამ შემთხვევით, მის შვილების მასწავლებ-  
 ლობაზე უარი განვაცხადე და კავკასიაში დავრჩი.

თ. ს.



## ტფილისის სათავად-აზნაურო საადგილ-მამულო ბანკის წარმომადგენელთა კრება.

30 და 31 მაისა

30 მაისს, პირველად შესდგა ახალის წესდების ძალით ტფილისის სათავად-აზნაურო საადგილ-მამულო ბანკის წარმომადგენელთა კრება, ნაცვლად წინანდელ წევრთა საზოგადო კრებისა. შეიყარა ას ათამდე წარმომადგენელი. თავმჯდომარემ ზედამხედველ კომიტეტისამ უგანათლებულესმა თავავადმა პ. ა. გრუზინსკიმ გამოაცხადა, რომ კრება შემდგარია და სთხოვს კრებას საკუთარი თავმჯდომარე ამოირჩიოს. კრებამ ამოირჩია თავმჯდომარედ თავ. ი. ზ. ანდრონიკაშვილი.

თავ. ანდრონიკაშვილმა დაიჭირა თავმჯდომარის ადგილი თუ არა, თ. პ. ა. გრუზინსკიმ სთქვა, რომ ამ დღეებში გარდაიცვალა თავ. რ. შ. ერისთავი, კაცი, რომელსაც ყოველ ჩვენ საზოგადო საქმეებში მიუძღვის ღვაწლი და რომელიც მხურვალე მონაწილე იყო ჩვენის ბანკის საქმეში და რამდენსამე ხანს ასრულებდა ზედამხედველ კომიტეტის წევრობას და ამიტომაც ჩვენის პატივისცემის გამოსაცხადებლად კრებას ვთხოვ ფეხზე წამოდგომით პატივი ვცეთ გარდაცვალებულსაო. კრებამ აღასრულა წინადადება თ. გრუზინსკისა და ფეხზე წამოდგა.

თავ. ილ. გრ. ქავჭავაძემ მოახსენა თავმჯდომარეს, რომ ვიდრე საქმეების გარჩევას შევეუდგებოდეთ, საჭიროა გადაწყვიტოთ ერთი საქმე. დღეს აქ მოსულნი არიან კრებაზე დასასწრებლად ჟურნალ-გაზეთების წარმომადგენელნი და თხოუ-



ლობენ ნება-დართვას კრებაზე დასწრებისას. § 92 წესდებისა ამბობს, რომ გარეშე პირთ არავითარ შემთხვევაში ნება არა აქვთ კრებაზე დასწრებისა და ეხლა გასარჩევია—ეჟურნალ-გაზეთების წარმომადგენელნი გარეშე პირებად უნდა იყენენ ცნობილნი, თუ არა. თავმჯდომარემ თ. ანდრონიკაშვილმა საჭიროდ სცნო ეს საგანი განერჩია თვითონ კრებას და თავისით დასძინა, რომ, ჩემის ფიქრით, ეჟურნალ-გაზეთების წარმომადგენელთ ნება უნდა ჰქონდეთ აქ დასწრებისა და ხსენებულ § 92 აკრძალვა ამით არ უნდა შეეხებოდეს. კრებამ დაადგინა, რომ რადგანაც ეჟურნალ-გაზეთების წარმომადგენელნი არავითარ საზოგადო საქმისათვის გარეშე პირნი არ არიან, ამიტომაც მიეცეთ ნება კრებაზე დასწრებისა.

ამის შემდეგ კრების თავმჯდომარემ წაუკითხა კრებას სია მორიგის საქმეებისა, რომელთა შორის პირველი საქმე განხილვა და დამტკიცება ბანკის მოქმედების წლიური ანგარიშისა. ბ-ნმა გ. ყარანგოზიშვილმა წარმოსთქვა, რომ მარტო დღეს დაგვირიგდა ეგ ვრცელი წლიური ანგარიში და ვერ მოვასწარით შიგ-ჩახედვით გაგვესინჯა და ამიტომ საჭიროა, ანგარიშის გაჩხრეკა სახვალიოდ გადიდვას, რომ დრო გვექონდეს გულ-დასმით გადავსინჯოთ ანგარიშიო. ბ-ნმა ამირალოვმა უპასუხა, რომ ანგარიში ურიგდბოდა ამ ორის დღის წინად, მე მოვედი და ანგარიში მივიღეო; ვისაც სურვილი ჰქონდა ანგარიშის წინა დღითვე გადასინჯვისა, შეეძლო ანგარიში წინაღვე მიეღო; ამიტომაც მიზეზი გაჩხრეკის სახვალიოდ გადადებისა შესაწყნარებელი არ არისო. თავმჯდომარემ საჭიროდ სცნო ეს საქმე გარდაეწყვიტა კრებას და ამიტომაც სთხოვა კრებას ამ საგანზე თავისი სურვილი გამოეთქვა: ვისაც გსურთ, დღესვე იყოს განხილული წლიური ანგარიში, გთხოვთ ფეხზე წამოდგეთო. ამ გვარად კრების უმეტესობამ სურვილი გამოაცხადა, დღესვე განხილულ იქმნას წლიური ანგარიში და საკვლავოდ დაევალოს ბანკის გამგეობას, რომ წლიური ანგარიში აღრე ჰქონდეს მომზადებული დასარიგებლადო.



წაკითხულ იქნა მოხსენება გამგეობისა შესახებ წლიურ ანგარიშისა და ზოგიერთის ცალკე ანგარიშის გამოკრევის და ახსნის შემდეგ კრებამ დაამტკიცა ერთხმობით წლიური ანგარიში ისე, როგორც წარდგენილი იყო. ამასთან ბ-ნმა ალ. თ. ფრიდონოვმა გამოსთქვა, რომ სასურველია ბალანსი ბანკისა აგრეთვე ლად არ იყოს შემდგარი, როგორც ეხლაო, ბალანსი რაც უფრო მოკლეა და ცხადი, მით უფრო კარგია და ადელი გასარჩევადაო. გამგეობა დაეთანხმა ბ-ნ ფრიდონოვს და დასძინა, რომ ზოგნი წევრნი ასე რთულად შედგენას ბალანსისას თხოულობდნენ წინადაო.

შემდეგ კრება შეუდგა 1899 წლის ხარჯთ-აღრიცხვის განხილვას.

შარშანდელი წლის სახარჯოდ დანიშნული ფული იყო 67,100 მანეთი. აქედან დახარჯულა მხოლოდ 62,439 მან. და 8 კაპეიკი. წლევანდელის წლისათვის სახარჯოდ წარმოდგენილია ზედამხედველ კომიტეტის მიერ 79,480 მანეთი, შარშანდელისაზე მეტია 12,380 მანეთით.

თ. პ. ა. გრუზინსკიმ მოახსენა კრებას, რომ წელს შესრულდა 25 წელიწადი ჩვენის ბანკის დაარსების დღიდან და მთელს ამ 25 წელიწადს თავ. ილია ჭავჭავაძე ემსახურებოდა ამ ბანკს და გამგეობის თავმჯდომარედ იყო. აქამომდე თავ. ილია ჭავჭავაძეს ეძლეოდა მხოლოდ 3,000 მანეთი წელიწადში ჯამაგირად. ასეთი მცირეოდენი ჯამაგირი არც ერთს თავმჯდომარეს გამგეობისას არ ეძლევა არც ერთს ბანკში. გავიხსენოთ, რომ თავ. ილია ჭავჭავაძეს ღვაწლი მიუძღვის სხვა საზოგადო საქმეებშიაც. გარდა იმისა, რომ ბანკს ემსახურა მთელი 25 წელიწადი, სხვა მხრივაც სამსახური გაუწიევა ჩვენის საზოგადოებისათვის. პატივსაცემად მისის შრომისა და ღვაწლისა, საჭიროდ ვიცანით აწ ჯამაგირი მოვეუმატოთ და 3,000 მანეთის მაგიერ დაენიშნოს 5,400 მანეთი. ამ სახით მადლობის გარდახდა პირველი არ იქნება ჩვენში. ყველამ ვიცით, რომ ჩვენის ბანკის მოძმე ბანკმა ქუთაისისამ ამ სახითვე გადაუხადა მადლობა საზოგადო მოღვაწეობისათვის თავ. აკაკი წერეთე-



ლსაო, რომელსაც დიდი სამსახური მიუძღვის საზოგადოების წინაშეო, ხოლო თავ. ილია ქავჭავაძეს, საზოგადო სამსახურის გარდა მიუძღვის 25 წელიწადი საკუთრივ ბანკში სამსახურისაცაო. გაიმართა ამაზე კამათი მხოლოდ იმ მხრით, რა სახით მიეცეს ეგ 2,400 მანეთი. ზოგი ამბობდა, რომ რაკი 25 წელიწადი შეუსრულდა ბანკში სამსახურისა, სამართალი ითხოვს პენსია დავუნიშნათო, ვიდრე ცოთხალია და თუ პენსიას დავუნიშნავთ ეგ ფული ცოტააო. ზოგი ამბობდა რომ პენსიის დანიშვნის ჯერ დრო არ არისო და ეგ 2,400 მანეთი ჯამაგირს მოეუმატოთ. ვიდრე ბანკს ემსახურებაო, მხოლოდ იმ პირობით, რომ 2,400 მანეთი თავმჯდომარეს ბანკის გამგეობისას კი არ მიემატოს, არამედ მარტო თ. ილია ქავჭავაძეს, ვიდრე ბანკში მსახურობსო. ბევრი ილაპარაკეს ამის შესახებ, და ბოლოს კრებამ, რომელსაც დაეკითხა თავმჯდომარე, ერთხმად გადასწყვიტა, რომ ეგ 2,400 მანეთი მიემატოს გამგეობის თავმჯდომარის ჯამაგირს, ვიდრე გამგეობის თავმჯდომარედ თავ. ილია ქავჭავაძე იქნებაო. კრებამ მოიწვია თავ. ილია ქავჭავაძე, რომელიც ამ დროს კრების დარბაზში არ იყო და ტაშის-ცემით მადლობა გამოუცხადა 25 წლის სამსახურისათვის.

ბევრი კამათი გამოიწვია ზოგიერთმა მუხლმა ხარჯთ-აღრიცხვის სიისამ და ბოლოს, როცა ეს მუხლები გამოირკვა და აიხსნა, საზოგადო კრებამ დაამტკიცა ხარჯთ-აღრიცხვის სია, წარმოდგენილი ზედამხედველ კომიტეტისაგან უკლებლად. ხარჯთ-აღრიცხვის სიის განჩინების დროს ზოგიერთმა წარმომადგენელმა სარჩიელი წარადგინა, რომ დამფასებელთ ჯამაგირები მოემატოსო. თ. ვლ. მიქელაძემ ეს სარჩიელი არ შეიწყნარა და სთქვა, რომ საქმეები ხშირად ყოვნდებიან და მგონია ამისი მიზეზა ის არის, რომ ამ სიდიდე-სივრცისათვის, რომელიც ჩვენს ბანკს ემქვემდებარება, ამ ხუთ გუბერნიისათვის ხუთი დამფასებელი მეტად ცოტააო. ჯამაგირის მომატება საქმეებს ვერ ააჩქარებს, აქ კაცის მომატება უნდაო. ისა სჯობია, რომ ეგ საქმე შემდგვისათვის გადიდვას და მიენდოს ზედამხედველ კამი-  
ა გამგეობას ეგ საგანი დაწვრილებით გამოარკვიოს და

წარმოგვიდგინოს თავისი აზრი, საჭიროა თუ არა დამფასებელთა აწ არსებულს რიცხვს მიერთოს კიდევ, თუ არა. გამგეობის წევრმა ბ.ნმა მამაცაშიელმა წარუდგინა კრებას სტატისტიკური ცნობები იმის შესახებ, რომ ამიერ-კავკასიაში ჩვენის ბანკის რაიონში ბევრი იმისთანა აღვილებია, საცა საადგილ-მამულო კრედიტი უშიშრად ფებს მოიკიდებს და თუ საქმე ბრკოლდება, მარტო იმისაგან, რომ ამოდენა სივრცეს ვერ გასწვდომია ხუთი დამფასებელი. კრებამ გარდასწყვიტა, რომ ჯამაგირები დამფასებლებისა უწინდლებ დარჩეს და საჭიროა თუ არა დამფასებლების მომატება, ეს მიენდოს შეერთებულს კრებულს ზედამხედველ კომიტეტისას და გამგეობისას, რომელმაც თავისი აზრი უნდა წარმოუდგინოს ან მორიგ და ან საგანგებო კრებას, თუ საჭიროდ დაინახავს.

31 მაისს ხარჯ-ალრიცხვის განხილვის შემდეგ კრებამ მოისმინა ბანკის გამგეობის მოხსენება საზოგადო საჭიროებისთვის გადადებულ ფულის განაწილებისა და ზედამხედველ კომიტეტის აზრი ამავე საგნის შესახებ. ეს ფული სულ 86,410 მანეთი და 29 კაპეკია. აქედან 62,682 მან. ტფილისის გუბერნიის თავად-აზნაურთა შეუძლებელ მოსწავლეთა დამხმარებელ საზოგადოების სასარგებლოდ (სათავად-აზნაურო სკოლისთვის) უნდა იქნას გადადებული. დანარჩენი ფული გამგეობამ ასე განაწილა: 500 მანეთი რუსეთის გუბერნიების დამშეულთა სასარგებლოდ, 1000—მცხეთის ტაძარს, 500 მანეთი—ჰუშკინის დაბადებიდან ასის წლის შესრულების სახსოვარ საყოფილოდ, ხოლო 18,728 მანეთი და 29 კაპ. ზემოხსენებულსავე შეუძლებელ მოსწავლეთა დამხმარებელ საზოგადოებას სათავად-აზნაურო სკოლის შენობის ასაგებად. გამგეობამ შეუძლებლად სცნო შემწეობის აღმოჩენა იმ სხვა დაწესებულებათათვის, რომელთაც ამ აზრით მიჰმართეს ბანკს, როგორც, მაგალითად, დრამატიულ საზოგადოებას, ბავშვთათვის სამზრუნველო საზოგადოებას, საკომერციო სასწავლებელს, თელავის წმ. ნინოს სასწავლებელს და სხვათა.



ზედამხედველმა კომიტეტმა ესევე ფული ასე განაწილა: დამუშეულთა სასარგებლოდ—500 მან., დრამატიულ საზოგადოებას—1000 მან., მცხეთის ტაძარს—1000 მან., პუშკინის ასის წლის შესრულების სახსოვრად, თელავის წმ. ნინოს სასწავლებელს, გორის ქალთა პროგიმნაზიას და მცხეთის დედათა სკოლას—1000 მანეთი და იმ კომიტეტს, რომელსაც აზრად აქვს პარიზის გამოფენაზე ქართული განყოფილება გამართოს—1000 მან., დანარჩენი თავად-აზნაურთა შეუძლებელ მოსწავლეთა დამხმარებელ საზოგადოებას.

ამ მოხსენების წაკითხვის შემდეგ დ. ა. გურამიშვილი შეეკითხა ზედამხედველ კომიტეტს: იმ კომიტეტმა, რომელსაც აზრად აქვს გამოფენაზე მონაწილეობა მიიღოს, სთხოვა თუ არა ბანკს ფული, ამასთან შეატყობინა თუ არა, რა მონაწილეობა სურს მიიღოს გამოფენაზე?

წაკითხულ იქმნა ამ კომიტეტის თხოვნა, რომელზედაც 50 კაცს უწერია ხელი და პროგრამმა იმისი, რაც განუზრახავს კომიტეტს. როგორც პროგრამიდანა სჩანს, კომიტეტს აზრად აქვს შეადგინოს და გამოსცეს რუსულს და ზოგიერთ ევროპიულ ენაზე პარიზის მსოფლიო გამოფენისათვის თხზულებანი საქართველოს წარსულისა და აწმყოს შესახებ: იმის სასულიერო და საერო ისტორიისა, ლიტერატურისა, ხელოვნებისა, მხატვრობისა, მეურნეობისა, მკურნალობისა და სხვათა შესახებ; შეადგინოს კატალოგები წერა-კითხვის საზოგადოებისა და საეკლესიო მუზეის წიგნთ-საცავებისა ევროპიულს ენებზე; შეჰკრიბოს და გაჰგზავნოს სხვა-და-სხვა ნივთები და სხვა.

**თავ. დ. ა. გურამიშვილი.** ზედამხედველმა კომიტეტმა გადასდო ამ საქმისათვის (გამოფენისათვის) მხოლოდ 1000 მანეთი, მაგრამ ეს ფული საკმაო არ არის. საქიროა სულ ცოტა 5000 მანეთი მაინც. დღემდის ვჩივით, რომ ჩვენ თავს არ ვიცნობთო, მაგრამ უფრო საჩივრელი და სავალალოა ის, რომ სხვები არ გვიცნობენ. ეხლა საუკეთესო შემთხვევა გვეძლევა, გავაცნოთ ჩვენი თავი ევროპას. ამიტომ ამ საქმისთვის ფული

არ უნდა დავზოგოთ. რამდენიმე კაცმა იკისრა საქმის გამძღო-  
ლა და ჩვენც უნდა ხელი შევეწყოთ.

ესევე აზრი წარმოსთქვა ზოგიერთმა სხვამაც.

ან. ნატრაშვილა. ჩემის აზრით ამ ქამად უმთავრესი ყუ-  
რადღება მცხეთის ტაძარს უნდა მივაქციოთ. ეს ღიდება და  
სახელი საქართველოსი ინგრევა, ჩვენ კი იმდენი არ შეგვიძ-  
ლიან, რომ შევაკეთოთ და განვაახლოთ. ტაძრის განსაახლებ-  
ლად შემდგარმა კომიტეტმა ყოველი ღონე იხმარა, მაგრამ  
მანათის მანათის მეტი ვერ შეჰკრიბა. ეს ფული კი იმდენად  
მცირეა, რომ სახურავის განახლებასაც არ ეყოფა. ჩემის აზრით  
ბანკმა 5000 მანეთი მაინც უნდა გადასდოს.

ბ. დ. ჟურჯულია. ბანკს აქვს ერთ-გვარი თანხა, სახელ-  
დობრ ექსტრა-ორდინარი, რომელიც, წესდების წყალობით,  
ისე ვერ მოუხმარებია, როგორც სასურველია. ამიტომ საჭი-  
როა წესდება იმ რიგად შეიცვალოს, რომ ამ თანხის მოხმა-  
რება შეგვეძლოს. ჩემის აზრით, კარგი იქნება ეხლავე შევამ-  
ხედველ კომიტეტსა და გამგეობას მივანდოთ შეადგინოს პრო-  
ექტი წესდების შეცვლისა.

ნ. ზ. ცხვედაძე. ჩვენი უმთავრესი საზრუნავი დღეს სა-  
თავად-აზნაურო სკოლაა. სკოლის პატრონი ბანკია; სხვა და-  
წესებულებასაც თავისი პატრონი ჰყავს. სკოლას საკუთარი შე-  
ნობა არა აქვს, რის გამო იგი დიდს გაჭირვებაშია. რასაკვი-  
რველია, ძალიან კარგი იქნება სხვა დაწესებულებათაც შემწე-  
ობა აღმოუჩინოთ, მაგრამ როდესაც სკოლა საჭიროებს, მაშინ  
სხვებზედ არ უნდა ეიფიქროთ. ჩემის აზრით, მცხეთის ტაძრის  
განსაახლებლად უნდა გადავდოთ რამოდენიმე ფული, დანარ-  
ჩენი კი უმეტეოდ სკოლის შენობის აგებას მოვანდომოთ.

თავ. ი. გ. ამაღახვანი. მცხეთის ტაძრისთვის სულ ცო-  
ტა 10,000 მანეთი მაინც უნდა გადავდოთ. მცხეთის ტაძარი  
ჩვენთვის ძვირფასი რამ არის. დღემდის ჩვენი ხალხი და ქვე-  
ყანა სარწმუნოებამ შეგვიინახა, იმან დაგვიცვა და დაგვიფარა  
განადგურებისაგან. აუარებელ ბრძოლისა და საზოგადოდ ყო-  
ველ გვარ გაჭირვების დროს სარწმუნოება ამხნევებდა და აც-



ხოველებდა ჩვენ წინაპართ. მცხეთის ტაძარი კი უპირველესი ემბაზია საქართველოში სარწმუნოებისა, უტყუარი მოწმეა განვლილ ქირ-ვარამისა. ამიტომ მეტი უნდა ვიზრუნოთ ამ ტაძრისათვის. ფული არ უნდა დავზოგოთ და შექველად 10,000 მანეთი უნდა გადავდოთ.

გ. წ. ეაფიანი. უპირველეს ყოვლისა ფული ჩვენსავე საკუთარ დაწესებულებას უნდა მოვანხაროთ. სრული ქეშმარიტება ბრძანა ბ-ნმა ცხვედაძემ, რომ ყველა სხვა დაწესებულებას თავისი პატრონი ჰყავს, სათავად-აზნაურო სკოლის პატრონი კი ბანკია. ამ მხრივ მცხეთის ტაძარსაც კი ჰყავს პატრონი. ამიტომ ბანკს რაც მეტი ფული აქვს სკოლისათვის უნდა გადასდოს.

ბოლოს, ხანგრძლივის კამათის შემდეგ, კრებამ ხმის უმეტესობით ასე განაწილა საზოგადო საჭიროებისათვის გადადებული ფული: 1) თავად-აზნაურთა შეუძლებელ მოსწავლეთა დამხმარებელ საზოგადოებას სათავად-აზნაურო სკოლისათვის—62,682 მან., 2) მცხეთის ტაძარს—5000 მანეთი, 3) იმ კომიტეტს, რომელმაც მსოფლიო გამოფენაში მონაწილეობა უნდა მიიღოს—3000 მან., 4) ქართულ დრამატიულ საზოგადოებას—1000 მანეთი, 5) რუსეთის გუბერნიების დამშეულთა—500 მან. და 6) პოეტის პუშკინის დაბადებიდან ასის წლის შესრულების სახსოვრად თელავის წმ. ნინოს სასწავლებელს, გორისა და მცხეთის სასწავლებლებს—1000 მანეთი. დანარჩენი 10,228 მანეთი 29 კაპ. სესხად მიეცეს თავად-აზნაურთა ღარიბ მოსწავლეთა დამხმარებელ საზოგადოებას სკოლის შენობის ასაგებად. ამის შემდეგ კრება საღამოსთვის გადაიღო.

საღამოს 9 საათზედ, კრების განახლებისას, ლაპარაკი გამოიწვია გ. დ. ჟურულის მიერ დილის კრებაზე აღძრულმა საგანმა ექსტრა-ორდინარის ფულის სხვა რიგად მოხმარებისა და ამ აზრით წესდების შეცვლის შესახებ. მაგრამ, რადგანაც ეს საგანი განსახილველ საგნების სიაში არ იყო მოქცეული, თავმჯდომარემ უადგილოდ სცნო იმის გარდაწყვეტა.



შემდეგ წაკითხულ იქნა ზედამხედველ კომიტეტისა და გამგეობის შეერთებულ საკრებულოს მოხსენება სასოფლო-სამეურნეო ფულის განაწილებისა. ეს ფული სულ 23,831 მან. 51 კაპეკია. შეერთებულ საკრებულოს ასე გაუნაწილებია: 1) წინამძღვარიანთ-კარის სკოლას—5000 მანეთი; 2) ტფილისში განზრახულ პოლიტექნიკუმის დასაარსებლად—2,383 მანეთი; 3) 1000 მან.—სასტატისტიკო ბიუროს დასაარსებლად. ამ ბიუროს დანიშნულება ის იქნება, რომ გამოიკვლიოს ტფილისის გუბერნია სასოფლო-მეურნეობის მხრივ; და 4) 15,448 მანეთი 51 კაპ. თავად-აზნაურთა ღარიბ მოსწაელეთა დამხმარებელ საზოგადოებას სესხად სკოლის შენობის ასაგებად. ამას გარდა ბანკს გორის მემამულეთა ამხანაგობამაც სთხოვა სესხად 8000 მანეთი, მაგრამ გამგეობამ და ზედამხედველმა კომიტეტმა არ შეიწყნარა.

საგანი ბიუროს დაარსებისა აღუძრავს უგან. თავ. პ. ა. გრუზინსკის. წესდებით სასოფლო-სამეურნეო თანხის დანიშნულება, — ნათქვამია თავ. პ. ა. გრუზინსკის განცხადებაში, — ტფილისის გუბერნიის მცხოვრებთა ეკონომიურ მდგომარეობის განკარგება, მაგრამ რადგანაც საკმაო ცნობები არ არის შეკრებილი ამ მდგომარეობისა, არ ვიცათ რა მხრივ და როგორ დავეხმაროთ მცხოვრებთ. ამ ნაკლის შევსება შეიძლება მხოლოდ მაშინ, როდესაც განსაკუთრებული ბიურო იქნება დაარსებული. ბიურომ ადგილობრივ კომიტეტების შემწეობით (ასეთი კომიტეტები უნდა შესდგეს სხვა-და-სხვა დაწესებულების წარმომადგენელთა და ადგილობრივ ინტელიგენციისაგან: მღვდლებისა, მასწავლებლებისა და სხვათაგან) უნდა შექპრიბოს ცნობები მეურნეობის, მოსავლის და სხვათა შესახებ.

ზედამხედველ კომიტეტის და გამგეობის მოხსენებას თანახლავს გ. დ. ჟურულის წერილი ამავე ბიუროს დაარსების შესახებ. ამ წერილში ბ-ნი ჟურული ამბობს, რომ ბანკის ერთი უმთავრესი დანიშნულება ის არის, რომ შემწეობა აღმოუჩინოს გუბერნიაში ყოველგვარ სასოფლო-სამეურნეო საქმეს. ამ აზრით ბანკს აქვს განსაკუთრებული თანხები: საზოგადო



საქიროებისთვის, სასოფლო-სამეურნეო და ექსტრა-ორდინარული. ამ თანხებით ბანკი მრავალგვარად ემსახურება გუბერნიის მცხოვრებთ, მაგრამ, რათა ეს სამსახური თავის დანიშნულებას არ ასცდეს და უფრო ნაყოფიერი იყოს, საქიროა დაწვრილებითი ცნობები სოფლის და მის ცხოვრების შესახებ, რომ ბანკმა იქ მიაშველოს ფული, სადაც საქიროა. დღეს არც ერთ საქმეს არ იწყებენ მანამდე, ვიდრე დაწვრილებით ცნობებს არ შეჰკრებავენ. თითქმის ყველა სახელმწიფო დაწესებულებას აქვს სასტატისტიკო კომიტეტები. შიდა გუბერნიებში ასეთი კომიტეტები საერო დაწესებულებათაც შემოიღეს. გარდა ამისა სტატისტიკური ცნობები რაიმე შუამდგომლობის აღძვრის დროსაც საქიროა. ეს ბიურო დაარსებულ იქნება კავკასიის საიმპერატორო სამეურნეო საზოგადოებასთანაო.

ამის შემდეგ წაკითხულ იქმნა წინამძღვარიანთ სკოლის მზრუნველის ილია წინამძღვარიშვილის თხოვნა სკოლის სასარგებლოდ ერთ ხანად 4000 მანეთის გადადების შესახებ. მზრუნველი სკოლისა თხოვნაში ამბობს, რომ ამას წინად სეტყვამ მეტად დიდი ზარალი მიაყენა სკოლასაო, რის გამო სკოლისათვის დაუყოვნებლივ 4000 მანეთია საქიროო. ამ საგნის გადაწყვეტა კრებამ ზედამხედველ კომიტეტს მიანდო, იმ პირობით კი, თუ ეს თხოვნა შეწყნარებულ იქმნა, ექსტრაორდინარულ თანხიდან მიეცეს ფული სკოლასაო.

**თავ. დ. ზ. ბარათაშვილი.** ყოველ წელიწადს წინამძღვარიანთ სკოლას 5000 მანეთს ვაძლევთ და კი არ ვიცით რაზედ და როგორ იხარჯება ეს ფული. ბევრი იმასაც კი ამბობს, რომ სკოლას მხოლოდ 1500 მანეთი უნდებოა. რამდენჯერმე მოვსთხოვეთ ანგარიში მზრუნველს, მაგრამ არც ერთხელ არ წარმოგვიდგინა. ეხლა მაინც დაუდოთ პირობა, რომ ანგარიში უეჭველად წარმოგვიდგინოს.

**თავმჯდომარე.** თქვენს წინადადებას მხედველობაში მივიღებთ და მოვსთხოვთ მზრუნველს წარმოგვიდგინოს ანგარიში.

**თავ. დ. ა. გურაძეშვილი.** რამდენადაც მახსოვს ბ-ნი წინამძღვარიშვილი ანგარიშებს წინად ყოველ წელიწადს ადგენ-

და. თუ ეხლა არ წარმოუდგენია, ამას რაიმე პატივ-სადები მიზეზი ექნება.

**ბ-ნი აშიანდღავი.** სკოლა კარგად არის დაყენებული, საქმეები იქ მშვენივრად მიჰყავთ, ამიტომ 5000 მან. უექველად უნდა გადავდოთ, მაგრამ ამასთან, რასაკვირველია, საჭიროა ანგარიშიც მოვთხოვოთ.

**თ. დ. გურაძეშვილი.** სასოფლო-სამეურნეო ფულიდან მცირე რამ იმ დაწესებულებათა სასარგებლოდაც უნდა გადავდოთ, რომელთაც შემწეობა გვთხოვეს, როგორც, მაგალითად, სამუსიკო და საკომერციო სასწავლებლების სასარგებლოდ.

**თავ. დ. ე. ჩაღლაყაშვილი.** მაგ ფულს ყველა დაწესებულებას ვერ გავუწოდებთ და ვინც მოგვმართავს, ყველას ვერ მივცემთ. ჩვენ თვითონ დღეს ბევრი საჭიროება გვადგია. მთელს კახეთში, მაგალითად, იმ კახეთში, რომლის ღვინომაც მსოფლიო ბაზარში საპატიო ადგილი მოიპოვა, არც ერთი მეღვინეობის სკოლა არ არის. საჭიროა ამიტომ ყოველ წელიწადს ამ თანხიდან გადავდოთ ფული ასეთის სასწავლებლის დასაარსებელ ფონდის შესადგენად. ამას გარდა ქიზიყში არსებობს დეპო, რომელსაც დიდი სარგებლობა მოაქვს მცხოვრებთათვის. საჭიროა ამ დეპოსაც დავებმაროთ რითიმე.

**თავმჯდომარე.** ეგ საგნები ახალია, განსახილველ საგნების სიაში არ არის მოხსენებული, ამიტომ დღეს ვერ განვიხილავთ.

ბოლოს კრებამ სასოფლო-სამეურნეო თანხა ასე გაანაწილა:

1) 5000 მანეთი—წინამძღვარიანთ კარის სკოლას, 2) 2,383 მ.—პოლიტეხნიკუმს, თუ იგი ტფილისში იქნება დაარსებული და 3) დანარჩენი 15,448 მან. 51 კ. სესხად მიეცეს შეუძლებელ მოსწავლეთა დამხმარებელ საზოგადოებას სკოლის შენობის ასაგებად.

წაკითხულ იქმნა ბანკის დირექტორად ნამყოფის თავ. დ. ავალიშვილის ქვრივის კნ. ო. ე. ავალიშვილის თხოვნა, იმის შესახებ, რომ იმის ქალს, გიმნაზიის მოსწავლეს, სტიპენდია დაენიშნოს ბანკიდან. კრებამ, ზედამხედველ კომიტეტის გარ-



დაწყვეტილების თანახმად, დაადგინა, დაენიშნოს თავ. დამფუძნებლის ობოლს ის სტიპენდია, (350 მან. წელიწადში), რომელიც დიმიტრი ყიფიანის შვილის-შვილს ეძლეოდა და რომელმაც წმ. ნინოს სასწავლებელში სწავლა უკვე დაამთავრა.

ამის შემდეგ კრებამ მოისმინა გამგეობის მოხსენება იმის შესახებ, რომ შეცვლილ იქმნას ის გარდასახადი, რომელიც მამულების დამგირავებელთ ერთმევათ დაფასების მოსახდენ და გირავნობის ფურცლების მოსამზადებელ ხარჯის დასაფარავად. მოხსენებაში ნათქვამია: ყოველ წელიწადს ბანკის მოქმედების ანგარიშიდანა სჩანს, რომ ჩვენის ბანკიდან ტფილისის ქალაქის საკრედიტო საზოგადოებაში უფრო მეტი გირავნობები გადადის, ვიდრე იქიდან ჩვენში. სხვა მიზეზთა შორის ერთი უმთავრესი მიზეზი ამისა ისიც არის, რომ გირაოს იმ ბანკიდან ჩვენ ბანკში გადმოტანას დიდი ხარჯი სჭირდება, რაიცა აბრკოლებს ამ გადატანას. ჩვენი ბანკი ტფილისელ დამგირავებელთაგან იღებს 10% სესხისას იმ ხარჯის დასაფარავად, რომელიც დაფასებასა და გირავნობის ფურცლების მომზადებას უნდება, ამასთან აქედან  $\frac{1}{4}\%$  წინდაწინვე იღებს განცხადების შეტანის დროს, ხოლო  $\frac{3}{4}\%$  სესხის გატანის დროს.

გამგეობის აზრით საჭიროა ამ 10% ნაცვლად ტფილისელ დამგირავებელთ  $\frac{1}{4}\%$  გამოერთევით, ისიც სესხის გატანის დროს მხოლოდ იმ ხარჯის დასაფარავად, რომელიც გირავნობის ფურცლების მომზადებას სჭირდება.

ამ მოხსენებამ ხანგრძლივი კამათი გამოიწვია. ბევრმა აღნიშნა რა, რომ საკრედიტო საზოგადოებაში ქონების დამგირავების პირობები გაადვილებულია, რის გამო ჩვენი ბანკიდან მრაველი მამული გადადის იქ, განაცხადა, საჭიროა, რომ ამ მხრივ ჩვენი ბანკი გათანასწორებულ იქმნას საკრედიტო საზოგადოებასთან, ე. ი. ისეთი ცვლილებანი იქმნას შემოღებული, რომ აქაც ესევე ადვილად შეიძლებოდეს მამულების დამგირავება და გადმოგირავება, როგორც იქ. სხვათა შორის, თავ. ი. გ. ქავჭავაძემ განმარტა ის მიზეზნი, რომელთა წყალობითაც საკრედიტო საზოგადოებაში უფრო მეტი მამული შედის გი-

რაოდ და უფრო მეტი მამული გადადის სათავად-აზნაურო ბანკიდან, ვიდრე იქიდან გადმოდის და აღნიშნა ის უპირატესობანი, რომელნიც კანონმა მიანიჭა ერთობ ქალაქების საკრედიტო საზოგადოებათა მთელ რუხეთში.

პ. რ. ყიფიანიმა სთქვა: როგორც ჩვენი ბანკი, ისეც საკრედიტო საზოგადოება, ყოველ ნახევარ წლის გადასახადს ახდევინებს მსესხებელს ბანკის ხარჯისათვის, სათადარიგო და ძირის ფულის და სხვა თანხების სამატად. ეს ნაწილი ნახევარის წლის გარდასახადისა ჩვენს ბანკში დაარსებულია  $\frac{3}{8}\%$  საკრედიტო საზოგადოებიდან რომ გადმოდიან ჩვენს ბანკში, ამ ნაწილს გარდასახადისა იქაც იხდიან და ჩვენ ბანკშიაც, ასე რომ დამგირავებელი ერთს გარდასახადს ორ-კეცად იხდის. ჩემის ფიქრით, შესაძლოა ის შეღავათიც მივცეთ იმ მსესხებელთ, რომელნიც საკრედიტო საზოგადოებიდან გადმოდიან, რომ წლის პირველ ნახევრის ეს ნაწილი გარდასახადისა სულაც არ გამოერთოთ.

ბოლოს, დიდის კამათის შემდეგ, კრებამ გარდასწყვიტა: 1) ტფილისელ სესხის მთხოვნელთ წინაღვე არ გამოერთვათრა, ხოლო როცა სესხს მიიღებენ  $\frac{1}{4}\%$  გამოერთვათ დაფასების და გირავნობის ფურცლების ხარჯის დასაფარავად; 2) ის ნაწილი გარდასახადისა, რომელიც ეხლა ერთმევათ ბანკის ხარჯის გასაძლოლად და სხვა-და-სხვა თანხების სამატად, წლის პირველ ნახევარს აღარ გამოერთვათ იმაჲ, ვისაც სხვა საკრედიტო დაწესებულებიდან გადმოაქვთ ჩვენს ბანკში დასაგირავებლად მამულები.

დასასრულ კრებამ მოიხმინა და შეიწყნარა კიდევ გამგეობისავე მოხსენება იმის შესახებ, რომ ბანკში მოსამსახურეთათვის საპენსიო კასხა იქმნას დაარსებული. ბანკმა ამ კასისათვის 50,000 მანეთი უნდა გადასდოს—ყოველ წელიწადს 5,000 მანეთი. ამას გარდა კასის თანხის შესადგენად მონაწილეთ  $\frac{5}{10}\%$  ჯამაგირისა გამოერთმევათ. კრებამ დაავალა გამგეობას, წარუდგინოს უკვე შემუშავებული წესდება მთავრობას დასამტკიცებლად და დამტკიცების შემდეგ გადასდოს 50,000 მან.

(წელიწადში ხუთას-ხუთასი თუმანი, ვიდრე 50,000 მანეთი შესრულდეს) და გამოფუკლოს მოსამსახურეთ ჯამაგირიდან 5% საპენსიო კასის თანხის შესადგენად. საპენსიო კასიდან პენსიის დანიშვნა დაიწყება ათი წლის შემდეგ დაარსებიდან.

1 ივნისს ბანკის წარმომადგენელთა კრება დასრულდა. ამ დღეს კრებამ დაამტკიცა ოქმები და თანამდებობის კაცნი აარჩია.



## ქუთაისის სათავად-აზნაურო ბანკის წარმომადგენელთა კრება

30 მაისი

კრება დაიწყო ქალაქის თეატრში შუადღის 12 საათზე. თავმჯდომარეობდა ზედამხედველ კომიტეტის თავმჯდომარე თ. ლ. ა. გ. წულიკიძე. დარბაზის მარცხენა მხარე დაიჭირა ოპოზიციამ, ხოლო მარჯვენა—გამგეობის მომხრეებმა. თავმჯდომარემ მოკლე სიტყვით მიჰმართა საზოგადოებას, მიულოცა კრების დაწყება და ურჩია, მიეტოვებინათ დასური ბრძოლა და უმთავრესი ყურადღება მიექციათ ბანკის საქმეების და მისის მდგომარეობის გამოსარკვევად. შემდეგ კრებას წინადება მისცა თავმჯდომარე ამოერჩია. წარმომადგენელთა კრების თავმჯდომარედ ოპოზიციამ გუბერნიის მარშალი თ. ს. გ. წერეთელი დაასახელა, ხოლო გამგეობის მომხრეებმა კი ქალაქის მოურავი ბ. ნი. ლ. თ. ლოლუა.

ერთმა წარმომადგენელთაგანმა ბ. ნ. ი. ა. ღუმბაძემ სთხოვა კრებას, გუბარნიის მარშალი უკენ ჟოდ იყოს ამორჩეულიო. ეს არ მოეწონა ბანკის მმართველს კ. ნ. ჩიკვაიძეს და მკვახედ შენიშნა ღუმბაძეს, რომ იგი საზოგადოებაში წესსა და მშვიდობიანობას არღვევს და თავმჯდომარეს სთხოვა, ღუმბაძისათვის ამის შესახებ ლაპარაკის ნება არ მიეცა. ღუმბაძემ იწყინა ეს შენიშვნა და უპასუხა კალისტრატეს, რომ ბრბოს წინამძღოლის შენიშვნას არ ვაქცევთ ყურადღებასაო. ამ პასუხმა საშინელი ყვირილი გამოიწვია კ. ჩიკვაიძის მომხრეთა შორის



და ბერმა მოითხოვა ღუმბადის სიტყვები ოქმში შეეტანა. ყვირილმა და მღელვარებამ დიდ ხანს გასტანა. ზედამხედველის კომიტეტის წევრმა მ. ა. ქიქოძემ ითხოვა სიტყვის ნება. თავის სიტყვაში იგი ამტკიცებდა, რომ ლოლუას, როგორც ზედამხედველის კომიტეტის წევრს, არა აქვს უფლება კრების თავმჯდომარედ იყოს, რადგან ამ კრებამ სხვა საქმეთა შორის ლოლუას მოქმედებაც, როგორც ზედამხედველი კომიტეტის წევრისა, უნდა განიხილოს და დაათასოსო. ამიტომ მისი თავმჯდომარედ ამორჩევა ბანკის საქმეების მიუდგომლად გარჩევასა და დაფასებას ხელს შეუშლისო.

ამ ლაპარაკის დროს ორატორს ვილაცამ ხელი შეუშალა; ქიქოძეს ეგონა, ეს კ. ჩიკვაიძეაო და სთხოვა დაეცლია სიტყვის გათავება. კ. ჩიკვაიძემ უკმეხად უბასუხა: „თქვენ, როგორც გეტყობათ, ჭკუასთან სმენაც გლალატობთო“!...

საზოგადოება არ წყნარდებოდა და ითხოვდა ორი ყუთი დაედგათ: ერთი წერეთლისთვის, მეორე ლოლუასთვის. დადგეს ყუთები. ოპოზიციამ მოითხოვა, ყუთები აეხადათ და კენჭი ისე ჩაეგდოთ. გამგეობის მომხრეებმა ესეც იწყინეს და სთხოვეს თავმჯდომარეს, ამომრჩევლებისათვის ამის ნება არ მიეცა. მიუხედავად ამისა, ოპოზიციის დიდი უმრავლესობა ახდით ყუთებში ისროდა კენჭებს. ორ საათზე არჩევანი გათავდა. თ-ღმა ს. გ. წერეთელმა მიიღო 111 თეთრი კენჭი, 86 შავი; ხოლო ლოლუამ—100 თეთრი, 97 შავი.

### 1 ივნისი

კრება დაიწყო გუბერნატორის კანცელარიის დიდს დარბაზში დილის 11 საათზე. თავმჯდომარეობდა გუბერნიის მარშალი თ. ს. გ. წერეთელი, რომელმაც მიჰმართა კრებას მოკლე სიტყვით დე სთხოვა წესიერების დაცვა. „პატიოსნის სიტყვით გარწმუნებთო, —სთქვა ბ-ნმა თავმჯდომარემ,— რომ ჩემის თავმჯდომარეობის ერთად-ერთი სურვილი ის არის, რომ საკმაო სინათლე მოვფინოთ ბანკის აწინდელს მდგომარეობასო“. შემდეგ წაკითხულ იქმნა 30 მაისს კრების შედგენილი ოქმი,



რომელიც საზოგადოებრივ დაამტკიცა. გამგეობის წევრმა გ. ნ. ი. ჯაიანი წაიკითხა გამგეობის მოკლე მოხსენება ბანკის მდგომარეობის შესახებ.

ა. თ. ნახაშვილი. სანამდის ანგარიშს გავარჩევდეთ, მე მსურს საზოგადო მოსაზრებანი წარმოვთქვა გამგეობის მიერ წარმოდგენილ მოხსენების შესახებ. მოხსენება გამგეობისა არ შეიცავს ნამდვილს და სრულს სურათს ბანკის საქმეების მდგომარეობისას. მოხსენებაში სწერია: „ბანკის გამგეობის მიერ აღძრული შუამდგომლობა, რომ სამინისტროს მოეცა უფლება 36 წლ. და 48 წლ. სესხის გაცემისა, დაკმაყოფილებული იქმნა ფინანსთა მინისტრის მიერ მხოლოდ 1899 წლის ბოლოს მთავრობის რევიზორის მოხსენების წყალობითაო. ამ შუამდგომლობის დაკმაყოფილება დაგვიანდა იმის გამო, რომ 1893 წ. მანდელმა საგუბერნიო მთავრობამ თავისი მოსაზრებანი წარადგინა ჩვენს ბანკის საზოგადო კრების სხვა ნაირად მოწყობის შესახებ. ამგვარი მოსაზრებანი გაგზავნილ იყო მთავრობის წინაშე თავად-აზნაურთა კრებისაგანაც... ეს აღგილი მოხსენებისა სრულიად შესაწყნარებელი და პატივსაცემი არ არის. ჩვენი საყვედური მაინც უნდა გამოვუცხადოთ გამგეობას, იმიტომ რომ მას ხელთ ჰქონია 1890 წ. ბანკის საზოგადო კრების გარდაწყვეტილება, რომლის ძალითაც უნდა ეშუამდგომლნა ფინანსთა მინისტრის წინაშე, რათა მოეცა უფლება 36 და 48 წ. სესხის გაცემისა, მაგრამ გამგეობამ ამის შესახებ ორის წლის განმავლობაში ყურთაც არ გააბანტურა და აი ამ გარემოებამ გამოიწვია ის მოვლენა, რომ დიდ ძალი მამულები ქუთაისის გუბერნიისა გადაგირაედა ტფილისის ბანკში, რომელსაც უკვე ჰქონდა მოპოვებული გრძელ ვადიანის სესხის გაცემის უფლება. მოხსენებაში სწერია: „სიმდიდრე და შეძლებულება ბანკისა ყოველ ექვს გარეშეაო, რასაც ჰმოწმობს თითონ მთავრობის მიერ დანიშნული რევიზორიცაო. 1899 წლის პირველ იანვარს ბანკს დარჩენია 152,800 მან. მამულები. ეს მამულები ბანკს დიდ ზარალს ვერ მისცემენო: იყო დრო, როცა ბანკს დარჩენილი ჰქონდა 800,000 მან. მამულებიო“... ყვე-



ლა ეს მართალია, მაგრამ საქმე ის არის, რომ ის 800,000 მლდარჩენილი მამულები არ აძლევს ბანკს იმ ზარალს, რასაც დღევანდელი დარჩენილი მამულები აძლევს. გამგეობას უნდა ნათლად ეჩვენებინა საზოგადოებისათვის, რა ნაირი მამულები დარჩა ბანკს და თითოეულ მათგანს რა ვალი ადევს. გამგეობამ ეს არა ჰქნა. ამის გამო სულ სხვა ნაირი სურათი წარმოგვიდგინა თვალ-წინ.

თ. ნ. ყ. თავდგირაძე. ბატონებო, ჩვენი ბანკი რომ ცუდს მდგომარეობაშია, ეს საექვეო არ არის. ყოველს ნაკლულევაწებას, ყოველ უბედურებას პირდაპირ უნდა შევხედოთ, გულახდილად უნდა გავუზიაროთ ერთმანეთს რასაც ვხედავთ და ვგრძნობთ. პირადად მგ აქ ორ შევეხები. მგ შედარებას მივმართავ, რადგან შედარება ორის ერთგვარი საგნისა უფრო ნათლად დაგვანახებს მათს ვითარებას. აბა შედარეთ ჩვენი ბანკი, რომელსაც ერთი ოთხად მეტი ძირითადი თანხა ჰქონდა, ტფილისის ბანკს და თქვენ წარმოგიდგებათ მეტის-მეტად უნუგეშო სურათი ჩვენის ბანკისა! როცა ტფილისის ბანკი თექვსმეტ მილიონ მანეთს ამოძრავებს, ჩვენი ბანკი ძლივს-ძლიობით—ორს მილიონს. მიაქციეთ ყურადღება იმას, რომ სისტემატიურად ყოველ წელს შემოსავალი ბანკისა მცირდება. ეს იმითი აიხსნება, რომ ჩვენის ბანკის გამგეობამ თავის დროზე არ იზრუნა გრძელ-ვალიანის სესხის გაცემის უფლება მოეპოვა, როგორც აქ საუფუძლიანად შენიშნეს და ამასთან არც კონფერსია მოახდინა. ჩვენი ბანკის მსესხებელი ას მანეთზე წელიწადში შვიდ მანეთს იხდის, ტფილისისა კი მანეთით ნაკლებს. რუსეთის იმპერიაში არ არის არც ერთი ისეთი ბანკი, რომ ასეთს დიდ სარგებელს ახდევინებდეს, როგორც ქუთაისის ბანკი. ცხადია, მსესხებლები ტფილისის ბანკს მიჰმართავდნენ. ნუ ასეთს მდგომარეობას ბოლო არ უნდა მოეღოს? ნუ დაივიწყებთ, ბატონებო, რომ ჩვენს ბანკს მარტო სავაჭრო მიზანი არა აქვს. იმას საქველ-მოქმედო მიზანიც აქვს; ბანკის შემოსავლით ინახება თავად-აზნაურობის პროგიმნაზია, რომელსაც უსაშუალოებისა გამო სული ხდება. ყოველი ღონისძიება ვიხმაროთ, რომ ჩვე-

ნის ბანკის მდგომარეობა ისე გაუმჯობესდეს, როგორც ეს უნდა იქნებოდეს.  
ლისშია.

**გამგ. წევრი. თ. ნ. კრასთავი.** მოხსენებაში ისეთი არაფერია, რაიცა სინამდვილეს მოკლებული იყოს. შეიძლება რაიმე აკლდეს, რასაც, ჩვეულებრივ, საზოგადო კრება შეავსებს. ხოლო, რაიცა შეეხება იმ გარემოებას, რომ შუამდგომლობა გრძელ ვადიან სესხის შესახებ დაეაგვიანეთ, ამისი მიზეზი მრავალია: გუბერნატორის აზრი ჩვენის ბანკის საზოგადო კრებების სხვა-ნაირად მოწყობის შესახებ, რევიზია და სხვ., ასე რომ მართო გამგეობა არ არის დამნაშავე.

**თ. შ. გ. ფაღვავა.** მადლობას ვუცხადებთ თავდგირიძეს დარიგებისათვის, მაგრამ დარიგების მაგივრად რომ დაესახელებინა ის მიზეზები, რის გამოც გამგეობამ ვერ იშუამდგომლა გრძელ-ვადიანის სესხის გაცემის უფლება მიეღო უმჯობესი იქნებოდა. იქ დროს, როცა საზოგადო კრებამ ეს შუამდგომლობა გადასწყვიტა, ისეთი არეულობა იყო საზოგადოებაში, ისეთი ბრძოლა ორის დასისა, რომ გამგეობა თითქმის არც კი არსებობდა. ამის გამო შუამდგომლობასაც ვერ გაჰზავნიდა; როცა საზოგადოება დამშვიდდა, ესე იგი 1892 წ., გამგეობამ კიდევ გაჰზავნა ეს შუამდგომლობა. რომ ბანკს მამულები რჩება და ვერ ჰყიდის, ეს გარემოება სასურველი არ არის, მაგრამ ამის მიზეზი არის ეკონომიური დაქვეითება, წინაღ მამულის მეტი ფასი ჰქონდა, ეხლა ის ფასი აღარა აქვს და არც ის შემოსავალი, და თუ აქ ვაშე ბრალი ედება, ეს ბრალი უნდა დაედოს დამფასებელ კომისიას, რომლის წევრიც ბ-ნი ნანეიშვილი ბრძანდება. გამგეობას არა აქვს უფლება მოუმატოს იმ ჯამს, რომელსაც გადასწყვეტს დამფასებელი კომისია. რაც შეეხება კონვერსიას, იმის შესახებ უნდა მოგახსენოთ, რომ მისი მოხდენა შეუძლებელია, თუ ბანკმა არ გამოსცა ჯერ უვადო ფურცლები. ხოლო ამ ფურცლების გამოცემა 1891 წ. შეუძლებელი იყო, რადგან იგი ახალი საქმე იყო და მძიმე ტვირთად და ხარჯად დაწვებოდა მსესხებლებს ამ უვადო ფურცლების გამოცემა. ამას გარდა გამორკვეული არ იყო ის პირობები და წესები, რის ძალითაც კონვერსია უნდა მომხდარიყო.



დ. თ. ლოლუა (ზედ. კომ. წევრი). ბატონებო, ჩვენს ზოგადობას უწინ სხვა წესი ჰქონდა. კრება უფრო მრავალრიცხოვანი იყო; წესიერებაც უმჯობესი გვექონდა. სამწუხაროდ ჩვენდა, ის უფლება დავკარგეთ. სირცხვილი იქნება, რომ საზოგადოების რჩეულთ არ დაიცვან წესი და რიგი. უნდა ვემორჩილებოდეთ ჩვენ მიერ ამორჩეულ თავმჯდომარეს. მე კი ამას ვერ ვხედავ. დავაცალოთ თავმჯდომარეს, რომ მან დაგვიყენოს განსახილველი საგნები და თითოეული მათგანი ცალცალკე განვიხილოთ. თქვენ ახლა იმისთანა საგნებს შეეხებით, რომლის განხილვაც შემდეგ უნდა დავიწყეთ. არ უნდა შევჩერდეთ იმისთანა წვრილმან საკანზედ, როგორც, მაგალითად, ეს არის; გამგეობამ შუამდგომლობა თებერვალში გაგზავნა, თუ დეკემბერში. რაც შეეხება იმას, რომ ბანკი აგვიანებს დარჩენილის მამულის გაყიდვას, ეს არაფერი საშიშია საადგილ-მამულო ბანკისათვის. ხან ბანკისთვის უფრო სახეიროა, რომ მოიცადოს და მერე გაჰყიდოს. ესეცაა აქ სათქმელი, რომ ჩვენ დავიდარბას მოვუნდით, გამგეობა გამგეობად არ ეიცანით, ავუტყხეთ ერთი შფოთი და აღარ მივეცით დრო საქმეები ეწარმოებინა.

ა. თ. ნანკიშვილი (წევ. დამფ. კომისიისა). საკვირველად ჰლაღატობს მესხიერება ბ-ნს ლოლუას! ზედამხედველ კომიტეტის 1896 წლის ოქმში, რომელზედაც ხელი უწერია ბ-ნს ლოლუას, სულ სხვა აზრი აქვს გამოთქმული. იქ სწერია: „დახანება დარჩენილის მამულების გაყიდვისა არის დიდი უბედურება ბანკისათვის, ამიტომ გარდაწყვეტილია, რაც შეიძლება მალე გაიყიდოს დარჩენილი მამულები“.... რაც შეეხება თ. ფაღავას თქმას, რომ მამულების დარჩენა დამფასებლების ბრალიაო, ამ საგანზე დამფასებელ კომისიას ვრცელი მოხსენება აქვს და თავის დროზე იქნება აქ წაკითხული. საზოგადო კრების მიერ გარდაწყვეტილი შუამდგომლობა გრძელ ვადიანის სესხის გაცემის შესახებ გამგეობამ გაგზავნა მხოლოდ 1893 წელს და არა 1892 წელს, როგორც ამას ამტკიცებს თავადი ფაღავა. ამ ხნის განმავლობაში გამგეობა საქმეს კი არ

აკეთებდა, კენჭობიას უნდებოდა. კონვერსიისათვის საღვესად რომ მსესხებლებისათვის მძიმე ტვირთი შეესუბუქებინა. კონვერსიის მოსახდენად სრული უფლება ჰქონდა მინიჭებული გამგეობას, საზოგადო კრების გარდაწყვეტილებით, რომელიც მოხდა 1891 წ. კონვერსიის მოხდენისათვის სრულიად არ არის საჭირო უვადო ფურცლების გამოცემა, როგორც ეს ჰგონიათ დირექტორს თ. ერისთავს და თ. ფაღვას. (ამის დასამტკიცებლად კითხულობს ჯ-ს კონვერსიის წესდებისას).

დ. ბ. ხელთუფლიშვიდი. გამგეობის მოხსენება უნდა წარმოადგენდეს სარკეს ბანკის მდგომარეობისას, რომ მკითხველს შეეძლოს სრული უნაკლულო სურათი ბანკის ავისა და კარგისა თვალ-წინ დაიყენოს. ეს მოხსენება კი თითქმის არაფერს გვეუბნება. მე არ ვიცი, ეს გარემოება განზრახ ჩაიდინა გამგეობამ, თუ უნებურად მოვიდა. ეს კია, რომ გამგეობის არც ერთ ნაკლულეფანების შესახებ არაფერია ნათქვამი. მაგალითად, გამგეობის მოხსენებაში არ არის აღნიშნული, თუ როდის გადასწყვიტა საზოგადო კრებამ, რომ გამგეობას ეშუამდგომლა გრძელ-ვადიანის სესხის გაცემისათვის? როდის იყო ეს შუამდგომლობა გაგზავნილი? რამდენი ზარალი ნახა ბანკმა დარჩენილ მამულებში? რით დაჰფარა ეს ზარალი და რამდენი დაჰფარა? ამას გარდა გამგეობას დაეალეებული ჰქონდა 1891 წელს კონვერსია მოეხდინა, გაღის ამის შემდეგ ცხრა წელიწადი და ამ დროის შემდეგ კონვერსიის შესახებ მოხსენებასაც ვერ ვხედავთ! შემცდარი აზრია თ. ფაღვასი, ვითომც კონვერსიის შესახებ წესდებანი არ იყო დადგენილი 1891 წ. პირ-იქით, 24 მაისს 1791 წ. ეს წესდებანი მკვიდრად იყო დადგენილი. ამით ისარგებლეს რუსეთის ბანკებმა და ამ წლის განმავლობაში 75 მილიონის კონვერსია მოახდინეს, არ გაუვლია დიდ ხანს, რომ 59 მილიონის კონვერსია მოხდა. ჩვენ გვეუბნებიან, რომ მმართველი ბანკისა ბრძოლას უნდებოდა, მაგისთვის არ ეცალაო. საკვირველი თავის გამართლებათ. მაგრამ თუ გინდ დავიჯეროთ, რომ ეს ასე იყო, დანარჩენნი წევრნი გამგეობის და მთელი ზედამხედველი კომიტეტი რაღას აკეთებდნენ? ნუ თუ ისინი



მოვალენი არ არიან საზოგადო კრების გარდაწყვეტილებას ჯეროვანი ყურადღება მიაქციონ და სისრულეში მოიყვანონ.

განა ბრძოლა მარტო ქუთაისში იყო, ტფილისში კი არ იყო ამ გვარი ბრძოლა? იქ საყვედური მოახვედრეს გამგეობას, რომ ორი თვე დაიგვიანა და მერმე აღძრა კონფერსიის შესახებ შუამდგომლობა. აქ კი ცხრა წელიწადი მიდის და უბრალო მოხსენებაც არ არის ამ საგანზე შედგენილი. ეს მეტი-მეტი დაუდევრობაა და საზოგადოების ინტერესების სასაცილოდ აგდება.

**თ. ა. ზაშაძე.** ამისთანა მოხსენების წარმოდგენა, როგორც ინება ბანკის გამგეობამ, მიმაჩნია საზოგადოების სასაცილოდ აგდებად. ცხრა წლის განმავლობაში ჩვენმა საზოგადოებამ არაფერი არ იცოდი ბანკის შესახებ და აი ამ ცხრა წლის შემდეგ გამგეობამ წარმოგვიდგინა ისეთი მოხსენება, რომელთაგანაც ჩვენ ვერასფერს ვერ გავიგებთ. რის თქმა შეიძლება იმ მოხსენებით, რომელიც შესდგება 75 სტრიქონით! განა ეს სირცხვილი არ არის?

გამგეობის თავმჯდომარე **კ. ნ. ჩაკვაძე.** მე გრძლად მსურს ლაპარაკი, ამიტომ საზოგადოებას ვსთხოვ, ნუ შემაჩერებს, ნუ გამაწყვეტინებს ლაპარაკს; თუ რასმე სალაპარაკო საგნის გარეშე ვიტყვი, მხოლოდ თავმჯდომარემ გამაჩეროს. ჩვენ სურვილი არა გვაქვს დანაშაულობის აღმოჩენისა. ჩვენ გვინდა განურჩევლად უპატიურება მივაყენოთ აღამიანს. პატარა მოხსენება წარმოადგინეო, გვისაყვედურებენ, აბა ეს სასაყვედუროა? იქნება მეტი ვერ შევიძელით, იქნება მეტი ვერ დაესწერეთ. ზოგი ბევრს დასწერს, მაგრამ ამ ბევრის დაწერილიდან არაფერი გამოდის. ან რა მოსატანია აქ შედარება ჩვენის ბანკისა ტფილისის ბანკთან. იქნება ტფილისის ბანკი ისე მდგომარეობაში არ არის, როგორც ბევრს ჰგონია. რევიზორმა იქაც ბევრი ნაკლულევალება ნახა. ტფილისის ბანკმა ეს ჰქმნა, ის ჰქმნაო, რა სათქმელია. ჩვენს ბანკს იმასა სთხოვენ, რაც არ შეიძლება მოეთხოვოს. აბა ერთი მიბრძანეთ, 437 ათასი მანეთი ძირითადი თანხა რა დიდი ჯამია, რომ ბევრი მოეთხოვოს ბანკს!

ამოდენი თანხა არა ერთსა და ორს მოსკოველ ვაჭარსა აქვს. საადგილ-მამულო ბანკისათვის ძირათადი თანხას კი არა აქვს უმთავრესი მნიშვნელობა, არა, მნიშვნელობა აქვს იმ უფლებასა, რომლითაც იგი აღჭურვილია, ამ მხრით ტფილისის ბანკი საუცხოვო მდგომარეობაში იყო, ხოლო ქუთაისისა ძალიან ცუდ მდგომარეობაში. ტფილისის ბანკს შეეძლო, რამდენიც უნდა იმდენი გირავენობის ფურცლები გამოეცა, ქუთაი?ის ბანკს მარტო სამასის ათასის ფურცლების გამოცემის ნება ჰქონდა. ისიც უნდა ვთქვათ, რომ ტფილისის ბანკი ურიგო ცილობას გვიწევს. იგი აძლევს მეტს სესხს, ვიდრე ჩვენ. (აქ ჩამოთვალა ის მამულები, რომელთაც ქუთაისის ბანკმა ნაკლები სესხი შეაძლია, ტფილისისამ კი მეტი მისცა). ამას გარდა საზოგადოება ორ დასად იყო გაყოფილი და მათ შორის ბრძოლა უკანასკნელ ხარისხამდის იყო მისული; ეს გარემოებაც ხელს უშლიდა საქმეს. ამას ისიც დაემატა, რომ სიმინდის ფასი დაეცა, ფილოქსერამ ვენახი დალუბა და ბევრი ცარიელზე დასვა; საზოგადოდ, ეკონომიური მდგომარეობა ჩვენის გუბერნიისა ძალიან დაქვეითდა. ამისდა მიუხედავად გამგეობამ იმდენი მხნეობა გამოიჩინა, რომ ბანკის მოგება განაძლიერა იქამდე, სადამდეც არაოდეს არ გაძლიერებულა. ერთის სიტყვით, გამგეობამ ბევრი სიკეთე შესძინა საზოგადოებას, რომ წინ არ გადალობებოდა დამაბრკოლებელი მიზეზები, რის გამო სამინისტრომ არ შეიწყნარა ჩვენი შუამდგომლობა. გამგეობა მაინც ეცადა და სესხის გაცემა ნახევარ მილიონამდის მიიყვანა.

დამფასებლების კომისიის წევრნიც ბ-ნი ნანეიშვილი და დ. წულუკიძე არ მემორჩილებოდნენ, თავის დროზე არ მიდიოდნენ დასაფასებლად და მთელის წლობით საქმეები ჩერდებოდა. ნანეიშვილი იქ წასასვლელად ეჩქარებოდა, სადაც სალაყო იყო და გაზეთებში წერას უფრო მეტს დროს ანდომებდა, ვიდრე თავისს სამსახურს. დ. წულუკიძემ კი ასე მითხრა: „შენ როგორ დაგემორჩილები, უკანონოდ ამორჩეული ხარო!“ აი ამისთანა შევიწროებულ მდგომარეობაში მყოფს გამგეობას მეტი რა მოეთხოვება?



ა. თ. ნანეაშვილი. თუ სალაცხოზე ვრბოდით და არაფერს ვაკეთებდით, ეს გამოჩნდება იმ მოხსენებიდან, რომელსაც დამფასებელი კომისია წარმოადგენს საზოგადო კრებას. ხოლო რა ნაირის ერთგულებით, სიბეჯითით და სიყვარულით ეკიდება ბანკის საქმეებს თითონ ბ-ნი ჩიკვაძე, მე ამის შესახებ არას ვიტყვი, მივმართავ ჩიკვაძის ორს ამხანაგს თ. ერისთავს და ბ-ნს ჯაიანს (დირექტორებს) როგორც კეთილშობილ კაცებს, იმათ სთქვან საზოგადოებაში ვინ ეკიდებოდა საზოგადო საქმეს აგდებულად ვინ ერთგულად. (საზოგადოება ხმა-მადლა ითხოვს, თქვან ეს დირექტორებმა).

თ. ნ. ენასთავა (დირექტორი). მე ჩემს სინიღისსა და პატრონებს არაოდეს არ გადავუდგები და ნამდვილს ყოველთვის ვიტყვი, მაგრამ ამ საგნის შესახებ ლაპარაკის დრო ეხლა არ არის.

კ. ნ. ჩაგვაძე. მე იმით საქმეს არ ვახდენ, რომ სასამართლოებშიაც დავდივარ, ნოტარიუსთანაც, შინაურ საქმეებსაც ვაკეთებ და სხვ.

ს. დ. ჯაფარიძე. ჩვენ აქ ენა-მახვილობის სავარჯიშოდ კი არ მოესულვართ, ჩვენ გვინდა ჩვენის ბანკის მდგომარეობა გავიგოთ და ნათლად წარმოვიდგინოთ. ბ-ნი ჩიკვაძე კი მოგვიყვება აქ იმას, წულუკიძემ რა უთხრა კაბინეტში. ეს აქ რა მოსაყვანია, მით უმეტეს, რომ ის კაცი აქ არ არის, რომ პასუხი მისცეს. ჩვენ უნდა დავუკვირდეთ და გამოვიკვლიოთ, რა მიზეზებმა გამოიწვია ჩვენის ბანკის ასე უკიდურესად დაქვეითება. მე ვფიქრობ, რომ აქ სამი უმთავრესი მიზეზია: ერთი ის, რომ დროზე ვერ მოიპოვა ჩვენმა გამგეობამ გრძელ-ვადიანი სესხის უფლება, მეორე ის, რომ კონვერსიაზე ამ ცხრა წლის განმავლობაში გამგეობას არაფერი უფიქრია, მესამე—დარჩენილ მამულების მოვლა და პატრონობა. აი ამ სამის მიზეზის განხილვას უნდა შევუდგეთ, ამას უნდა მივაქციოთ უმთავრესი ყურადღება. ვიდრე ანგარიშს დავამტკიცებდეთ, კომისია ამოვირჩიოთ და მივანდოთ ამ მიზეზების გამოკვლევა და დასურათბატება, ამ აზრს მიემხრო ბ-ნი ხუნდაძე.



## 2 ივნისი.

კრების მდივანმა დ. ბ. მდივანმა წაიკითხა გუშინდელი ოქ-  
მი, რომელიც მცირედის ცვლილებით დაამტკიცა.

თ. ნ. ყ. თავდგომამე. მე ვსთხოვ ბ-ნ თავმჯდომარეს,  
ნება მისცეს ლაპარაკისა თავ. დ. გ. წულუკიძეს (დამფასებე-  
ლია), რომელზედაც გუშინ ჩიკვაიძე ჩიოდა, რომ არ შემოარ-  
ჩილებოა.

ქქ. ს. თაყაიშვილი. გუშინ ბ-ნმა ნანეიშვილმა სთხოვა თ.  
ნ. ერისთავს დაემოწმებინა მისი განცხადება, რომ გამგეობის  
თავმჯდომარე გულ-აცრუებულია ბანკის საქმეებზე და თავისს  
კერძო საქმეებს უფრო მეტ დროს ანდომებს, ვიდრე ბანკის  
საქმეებს, მაგრამ თ. ერისთავმა ამ თხოვნას გვერდი აუხვია და  
როგორც ქართულად იტყვიან, სიტყვა ბანზე ააგდო. ჩვენთვის  
კი საინტერესო იყო, მცირეოდენი ნათელი მაინც მოეფინა ამ  
საგნისათვის. წარმომადგენელთა უმრავლესობისათვის საჭიროა  
დაგვიხატოთ საზოგადო სურათი ბანკის მდგომარეობისა და იქ  
მომქმედთა, ვიდრე ანგარიშის წვრილმან ციფრებისა და რიც-  
ხვებისა, საიდანაც ძნელია კაცმა რაიმე განსაზღვრული დასკვნა  
გამოიყვანოს.

ლ. თ. ლულუა (წევრი ზედამხედველ კომიტეტისა). ბა-  
ტონებო, ორიოდ სიტყვას მოგახსენებთ. ზნეობის სიფაქიზის  
დაცვა ყოველგან და ყოველთვის უნდა იყოს. ჩვენ წინაპრებს,  
მართალია, უნივერსიტეტი არ გაუთავებიათ, მაგრამ ზნეობით  
ფაქიზნი იყვნენ, იქნება ახლა ზნეობას სხვა მოთხოვნილება  
აქვს, მე სიბერის გამო ჩამოვრჩი ამ მოთხოვნილებას; მაგრამ  
მე ეს ვერ გამიგია, ბ-ნი ნანეიშვილი რატომ ჩამჯდარა გამგე-  
ობის მოწინააღმდეგე დასში და თავისის უფროსის წინააღმდეგ  
ამხედრებულა. იგი უნდა იყოს გამგეობასთან და იცავდეს მისს  
ინტერესებს.

ქქ. ს. თაყაიშვილი. მორჩილება ქვეშევრდომისა უფროსის  
წინაშე, რასაკვირველია, უნდა არსებობდეს, უამისოდ არავი-  
თარი დაწესებულება და საქმე რიგიან გზაზე ვერ დადგება.



დისციპლინა უეჭველად მოითხოვს ამას, მაგრამ არის დროდადრო ადგილი, სადაც უმცროსსაც ისეთი უფლება აქვს, როგორც უფროსს, მაგალითად, აი ეხლა. და სწორედ იმ ზნეობის სიფაქიზის ძალით, რომელზედაც წელან ასე მშვენივრად ლაპარაკობდა ბ-ნი ლოლუა, ნანეიშვილი ვალდებულია, როგორც კი შეუძლინ, ნათელი მოჰფინოს საკამათო საგანს და ამით თავისი წმინდა მოვალეობა შეასრულოს.

**ა. თ. ნანეიშვილი.** ბ-ნი ლოლუა ჩემის ზნეობის სიფაქიზეს იმიტომ შეეხო, რომ მე ის გუშინ ორს სიტყურეში დაეიქირე. (ხმაურობაა, პირადობას ნუ ეხებით).

**თავმჯდომარე.** ბ-ნებო, განვიხილოთ პირველი განსახილველი საგანი—განხილვა და დამტკიცება ბანკის მოქმედებათა 1893—1894 წ.; აღმოწერა რევიზორის ანგარიშიდან; დარჩენილი მამულები და კონვერსია.

**თ. კ. ბ. ლათინაძე.** გუშინ ლაპარაკობდნენ, რომ კონვერსია საზარალოაო, რადგან მისის მოხდენის დროს მსესხებლები ჰკარგავენ ას მანეთზე ორ მანეთსაო, მაგრამ ის კი ავიწყდებათ, რომ ეს დაკარგვა დროებითია, დავკარგავდით მხოლოდ ერთხელ, ეხლა კი მსესხებლები ყოველ წელიწადს ჰკარგავენ უკონვერსიოებისა გამო; გუშინ ისიც განაცხადეს, რომ უკონვერსიოდაც შეიძლება მსესხებლების გაჭირებულოს მდგომარეობას ეშველოსო, თუ გადაგირავებას მოვახდენთო. მაგრამ აქაც ისევ ავიწყდებათ ის გარემოება, რომ გადაგირავებისა და კონვერსიის შორის დიდი განსხვავებაა: გადაგირავება გამოიწვევს მსესხებლებისაგან დიდს ხარჯს, რაიცა საჭირო არ არის, თუ კონვერსია მოვახდინეთ. გამგეობას არ მოსწონს, როცა ქუთაისის ბანკს ადარებენ ტფილისისას, მაგრამ თვითონ გამგეობასაც ვერ აუქცევია ამ შედარებისთვის მხარი: ძალაუნებურად იგი თვითონაც ადარებს, როცა ამბობს: „ტფილისის ბანკს უფლებანი მეტი ჰქონდა, საქმეც მისი უმჯობესად წავიდაო“. მართალია, რომ ტფილისის ბანკს მეტი უფლება აქვს, ქუთაისისას ნაკლები, მაგრამ ეს ეისი ბრალია? რასაკვირველია, ბანკის მმართველებისა, რომელთაც არ იშუამდგომლეს სამი-

ნისტროს წინაშე და არ მოიპოვეს ეს უფლებანი. ისიცა ნიქვეს, ვითომც ოპოზიციის ერთს წევრს, ლ. ასათიანს შეეფერხებინოს ბანკის საქმეები მის მიერ შედგენილის მოხსენებით, რომელშიაც ჩვენი საზოგადოება ცუდის მხრით არის დიხასიათებული მთავრობის წინაშეო, ამის გამო ბანკის საზოგადოებრივი უფლებანი შემცირდაო. ჩვენი საზოგადოების დიხასიათება ასათიანის მოხსენებაში ისეთი არ არის, რომ ვისთვისმე საწყენი იყოს. ჩვენი საზოგადოება თავისის თვით-ცნობიერებით და განათლებით რომ პარიზისა და პეტერბურგის საზოგადოების სწორი არ არის, ეს არავისთვის საიდუმლო არ უნდა იყოს; რაიცა შეეხება ბანკის საზოგადოებრივი უფლებათა შემცირებას, ეს ასათიანის ბრალი სრულიადაც არ არის. თავად-აზნაურობამ და თვითონ ბანკის გამგეობამაც წარმომადგენლების სხვაწირი პროექტი შეადგინა და არა ისეთი მცირე უფლებიანი, როგორც ეხლა გვაქვს, მაგრამ მთავრობამ ის ჩვენი პროექტი არ დაამტკიცა. გუშინ დამფასებლების კომისიის მოქმედებას შეეხნენ და სთქვეს, რომ მისი დაფასება საზარალო იყო ბანკისათვისაო. მიეცით ნება ამ კომისიის წევრთ, წარმოგვიდგინონ თავიანთი მოხსენება. ეს განცხადება თ. კ. ლორთქიფანიძისა თანაგრძნობით იყო უმრავლესობისაგან მიღებული.

**კ. ს. ხუნდაძე.** გამგეობის თავმჯდომარის განცხადებას, რომ ვითომც მისის მართვის დროს ბანკის შემოსავალს ყოველ წლოვით უმატნია, სიფრთხილით უნდა მოვეკიდინეთ. რომ კარგად დაუყვირდეთ ბანკის ანგარიშებს, შევატყობთ, რომ, როცა ბანკს ჰქონია შემოსავალი 90 ათასი მან., ნაკლები ზარალი უნახავს, როცა 114 ათასი მანეთი, მაშინ მეტი ზარალი. ვერ დავეთანხმები ბ-ნს ლოლუასაც, რომელიც გვირჩევს, დარჩენილს მამულს მალე ნუ გავყიდითო, მოვიცადოთო. ბანკის გამგეობამ ცხადად დაგვიმტკიცა, რომ იგი სრულიად ვერ ახერხებს დარჩენილის მამულების პატრონობას და ამის გამო დიდი ზარალი მოსდის ბანკს. ამას ამტკიცებს თვითონ რევიზორიც (ჰკითხულობს ამ ადგილს რევიზორის ანგარიშიდან), მე

ვსთხოვ კრებას, ამოარჩიოს კომისია, რომელიც წარმოუდგენს კრებას ბანკის მდგომარეობის სურათს.

გ. ნ. ჩაკვაძე. კონვენციის მოხდენის შესახებ მე იმ აზრისა ვარ. რომ ყოველ საქმეში თან-და-თანობა სჯობია, ესე იგი ჯერ მცირე შევიძინოთ, შემდეგ ცოტა მეტი; არ ივარგებს, რომ ერთჯერად ვითხოვოთ მრავალი უფლებანი და არც ერთი არ მივიღოთ. რაიცა შეეხება იმას, რომ ჩვენი მამულები ტფილისის ბანკში გადადის, კიდევ ვიმეორებ, მიზეზი ამისა არის რაოდენობა სესხისა, რომელსაც იძლევა ტფილისის ბანკი. ჩვენმა ბანკმა რომ სესხის რაოდენობა იმ ზომამდის ასწიოს, როგორც ტფილისისაა, დიდად საზარალო იქნება ჩვენის ბანკისათვის. ამის გამო ქუთაისის ბანკი ცილობას არ უწყევს. საჭიროა ასპარეზი ბანკის მოქმედებისა გაფართოვდეს; ამ მხრივ ცოტა რამ შევიძინეთ. მართალია, რომ დარჩენილი მამულები დიდ ტვირთად აწევს ბანკს, მაგრამ სასტიკად ვერ მოგეჭქეცით ამ მამულების გაყიდვას, როგორც ამას ითხოვს კანონი, ასე რომ ზოგჯერ მხარი ავუქციეთ კანონის ამ მოთხოვნისა, რადგან ეს სასარგებლო იყო ბანკის ინტერესებისათვის.

თავ. ნ. ე. თავდგირაძე. სხვა-და-სხვა გაზეთებში და ისეც ლაპარაკობენ საზოგადოებაში, რომ ბანკის მმართველნი ძალიან ურიგოდ იქცევიან მამულების გაყიდვის დროს. ეს შავი ლაქა უნდა ჩამოირეცხოს გამგეობამ კრების წინაშე, რომ ამით თვითონ კრებაც დამშვიდებულის სინიღისით უყურებდეს თავისს ამორჩეულ კაცებს. აღბად წაკითხული ექნება ბევრს „НОВОЕ ОБЩЕСТВО“-ში ცნობა, რომ ვიღაც ობლის ივანოვის მამული ბანკში მოსამსახურეთა წყალობით და მეცადინეობით შეუძენია ერთ მოხელეს, რომელსაც ამის გამო სამსახურის ადგილი დაუკარგავს. ხმებია, რომ ბანკში მოსამსახურე კაცები ეგრედ წოდებულ „ოტსტუპნოს“ იღებენო. ისიც ყველას ეცოდინება, რომ ჩვენს პატივცემულს მგოსანს აკაკი წერეთელს პენსია ჰქონდა დანიშნული, მაგრამ არაფერი არ მიუღია, რადგან საჭირო ყოფილა ეილაცეების მოსყიდვა. ეს ამბავი თითონ აკაკი წერეთლის „კრებულში“ არის აღწერილი. (კითხულობს იმ ადგილს.)

იქნება ეს ხმები უსაფუძვლო იყოს, რაიცა დიდად სასურველია, მაგრამ ვაი თუ ეს მართალი იყოს. მე ვთხოვ გამგებას, ეს ლაქა ჩამოირეცხოს აქ, კრების წინაშე! თავი გაიმართლონ აგრეთვე დამფასებლებმა, რომელთაც ბ-ნი კ. ჩიკვაძე ბრალსა სდებს, რომ რიგიანად ვერ აფასებდნენო.

თავ. ი. ნ. ნაჭარაძე (დამფასებელი). ზედამხედველმა კომიტეტმა მოგვეთხოვა პასუხი, რატომ გვიანდება ზოგჯერ დაფასებათ. ჩვენ ეს პასუხი მივართვით ზედამხედველ კომიტეტს: დაგვიანება ზოგჯერ იმის გამო ხდება, რომ ბანკს ერთი მიწის მზომელი ჰყავს და, სანამ იგი ერთ ადგილს მიწის გაზომას არ გაათავებს, დანარჩენი დამფასებლები უცდიან. რომ დამფასებელი კომისია სინიღისიანად აფასებს მამულებს, ეს ყოველ ექვს გარეშე უნდა იყოს. მე პირადად ჩემის ქონებით ვაგებ პასუხს, თუ რომელიმე მამული უსინიღისოდ იქნება დაფასებული. მაგრამ, მე დარწმუნებული ვარ, რომ ვერც ერთ ამისთანა მამულს ვერაინ დაასახელებს. ბანკის ზარალი აიხსნება იმით, რომ რიგიანი მოვლა და პატრონობა არა აქვთ დარჩენილ მამულებს.

თავ. დ. გ. წულუკაძე (დამფასებელი). ჩვენ გვამტყუნებენ, რომ ბ-ნ თოფურისს მამული ნაკლებად დააფასეთ და ამიტომ გადაიტანა ტფილისის ბანკშიო. განა მარტო თოფურისს მამული გადავიდა ტფილისის ბანკში? მამულები გადადის ტფილისის ბანკში იმიტომ, რომ იქ ნაკლებ სარგებელს ახდევინებენ, იმიტომ, რომ იქ გრძელ ვადიანი სესხია, იმიტომ, რომ იქ კონვერსია მოახდინეს და მრავალი სხვა გარემოებაა, რომელნიც უადვილებენ მსესხებლებს ვალის გადახდას. განა ტფილისის ბანკის გზა კი ია და ვარდით იყო მოფენილი, იმას კი არ შეხვდა მრავალი დაბრკოლება და მთავრობის სხვა-და-სხვა განკარგულება, რომელიც ასე თუ ისე ხელს უშლიდა ბანკის წინ-მსვლელობას? მაგრამ იქაურის ბანკის მმართველებმა თავისის მხნეობით, გამჭირაზობით და საქმის სიყვარულით ყველა დაბრკოლებანი დასძლიეს და გამარჯვებულნი გამოვიდნენ. აქაურს მმართველობას კი მე ვამჩნევ სულ წინააღმდეგ თვისებას; სრულს უზრუნველობას და უღარდებლობას იმ საქმისას, რომე-



ლიც მათთვის საზოგადოებას მიუხდვია. ამ უსაქმურობის შედეგად ლითონ მოგიყვანთ, საიდანაც ცხადად დაინახავთ, სადამდის მიდის ამ მოღვაწეების უზრუნველობა: 1891 წელს ბანკის საზოგადო კრებამ დაავალა გამგეობას ეშუამდგომლო სამინისტროს წინაშე კონვენციის მოხდენაზე და წარმოიდგინეთ, ამ გარდაწყვეტილების არსებობა ყველას მივიწყებია. ზედამხედველის კომიტეტის ერთმა წევრმა მდგომარე წლის 10 აპრილს დააწერა ამ ოქმზე: „წავიკითხე მხოლოდ 10 აპრილს 1899 წ.“

ა. თ. ნანეაშვილი. ბანკის საქმეებს აწარმოებს ოთხი ორგანო: გამგეობა, დამფასებელი კომისია, ზედამხედველი კომიტეტი და წარმომადგენელთა კრება. თითოეულს ამ ორგანოთაგანს აქვს თავისი განსაზღვრული სამოქმედო ასპარეზი და უფლებანი. ერთს ორგანოს სრული უფლება აქვს შენიშნოს მეორეს ნაკლებეანებანი და ამხილოს ეს. მე არასოდეს არ მილაღატნია სიმართლისათვის და ეხლაც ვიტყვი ამ სიმართლეს; ამტყუებენ დამფასებელ კომისიას, ვითომც იგი აგვიანებდეს დაფასებას და უსაქმობაში ატარებდეს დროს. ამ საგნის შესახებ არსებობს ჩემის ხელით დაწერილი მოხსენება და ოქმი ზედამხედველის კომიტეტისა, რომელმაც ვერც ერთი, ჩვენ მიერ წარდგენილი საბუთი ვერ დაარღვია. აქ ითქვა გამგეობის თავმჯდომარის მიერ, რომ სარგებლის შემცირება და გრძელ-ვადიანი სესხი არ იზიდავს მსესხებლებსაო; აბა დააკვირდით ანგარიშს (ჰკითხულობს სტატისტიკურ ცნობებს), სადაც ცხადად სჩანს, რომ როდესაც ჩვენმა ბანკმა გრძელ-ვადიანის სესხის გაცემის უფლება მოიპოვა, მაშინვე შემცირდა, თითქმის მოისპო მამულების გადასვლა ქუთაისის ბანკიდან ტფილისისაში. ბანკის მოქმედების ასპარეზი გაფართოვდა, ამასთან 19 წლიან სესხმა საკმაოდ იკლო (კითხულობს ცნობებს ანგარიშიდან).

თავ. ნ. ურასთავი. (გამგ. წევრი). მე არ მითქვამს, რომ არ ყოფილა საზოგადო კრების გარდაწყვეტილება კონვენციის მოხდენის შესახებ. მე ვთქვი მხოლოდ ის, რომ არა ყოფილა გარდაწყვეტილება უვადო ფურცლების გამოცემისა.

თავ. კ. ბ. ღორთქაფანიძე და თავ. დ. გ. წულუკიძე ამ ბოზენ, რომ კონვერსიის მოხდენა შეიძლება უვადო ფურცლების გამოუცემლად. გამგეობას უნდა მოეყვანა სისრულეში 1891 წლის საზოგადო კრების დადგენილება კონვერსიის შესახებ. მრავალი წარმომადგენელი ითხოვს წაიკითხონ ეს დადგენილება. მდივანი კრებისა დ. ბ. მდივანი კითხულობს 1891 წლის 22 მაისის ოქმს, სადაც სწერია: „შესახებ კონვერსიისა, რომლის მოხდენაზე ლაპარაკი აღძრა თ. კ. მ. ღორთქაფანიძემ, კრებამ გარდასწყვიტა: ვიშუამდგომლოთ ბ-ნ ფინანსთა მინისტრის წინაშე, რათა ნება მოგვცეს მოვახდინოთ კონვერსია 6<sup>0</sup>/<sub>0</sub> სესხისა 5<sup>0</sup>/<sub>0</sub>-ად იმ წესით და საფუძვლით, რომელნიც დაშტკიცებულია ბ-ნ ფინანსთა მინისტრის მიერ 24 აპრილს 1891 წელს; ამას დაემატოს ის წესები, რომელთაც საჭიროდ დაინახავს ზედამხედველი კომიტეტი და გამგეობა“.

თ. ნ. ერასთავი (გამგეობის წევრი). კონვერსიის მოსახდენად საჭიროა უვადო ფურცლების გამოცემა, რაიცა ითხოვს წესდების შეცვლას.

ამას კ. ნ. ჩიკვაძემ დაუმატა, რომ წესდების შეცვლა მოითხოვს, რომ კრებას დასწრებოდა წევრთა კანონიერი რიცხვი, რაიცა არ იყო 1891 წლის კრებაზე. ამიტომაც ამ გარდაწყვეტილებას არავითარი ძალა არა აქვს.

თავ. დ. გ. წულუკიძე (დამფასებელია). რას გვიბრძანებ, ბ-ნო ლ. თ. ლოლუა, ის კრება (1891 წლისა) მართლა უკანონოა, თუ კანონიერი? თქვენ ხომ მაშინ ამ კრების თავმჯდომარედ ბრძანდებოდით?

ლოლუამ აიღო იმ წლის ოქმები, გადაფურცლა და სთქვა: „ოქმებში არ არის აღნიშნული კრების წევრთა რიცხვი, ამიტომ მე არ შემიძლიან ვსთქვა, კანონიერი იყო, თუ არა! მე მოვედი ტფილისიდან ქუთაისს 1891 წლის 22 მაისს საღამოს. მთხოვეს თავმჯდომარეობა საზოგადო კრებაზე თავ. ს. გ. წერეთლის მაგიერ, რომელსაც თავმჯდომარეობისათვის თავი დაენებებინა, ასე რომ, მე არ ვიცი, რა მოხდა მაშინ.“

თავ. დ. გ. წულუკიძე. ბატონო, როგორ არ იცით არაფერი, ოქმის შავი თქვენი ხელით არის დაწერილი?

დ. ა. ლაშქარაშვილი. როგორც ხიანს, თქვენ კრებას არ დასწრებინათ, რა ხდებოდა იმ კრებაზე არ იცოდით და, რაც სხვამ გითხრათ, ის დასწრეთ და შემდეგ ხელი მოაწერეთ? ხომ ასეა?

დ. თ. ლაშქარაშვილი. დიალ, ასე იყო.

თავ. კ. ბ. ლაშქარაშვილი. არ გახსოვთ, ლუარსაბ თეიმურაზის ძევ, რომ მე გთხოვეთ თქვენ, ოქმი კონვენციის შესახებ შეგედგინათ დაწვრილებით, საფუძვლიანად, რომ სამინისტროში არავითარი დაბრკოლება არ დახვედროდა კონვენციის მოხდენას?

დ. თ. ლაშქარაშვილი. მახსოვს ეგ თხოვნაც.

თავ. გ. შაქელაძე. ეს რა გვესმის; ეს რა ამბები ყოფილა?! საით მიგყავთ საზოგადოება? მართალს ამბობთ, თუ გვატყუებთ, ჩვენ ვერაფერი ვერ გავიგეთ! ეს სირცხვილი არ არის ბანკის მმართველებისათვის? პატრონობა ასეთი უნდა ჩვენს საზოგადოებას?

თავ. დ. გ. წულუკაძე (დამფასებელი). მე მაკვირვებს ბ-ნ ლოლუას საქციელი, რომ იგი 1891 წლის საზოგადო კრების გარდაწყვეტილებას ბანკის სასარგებლოდ არა ხსნის და არ მართავს.

თავ. ა. ა. დუმბაძე. მე ვითხოვ, მოვსპოთ ბანკი 1891 წლის საზოგადო კრების ოქმზე და კითხვა კონვენციის მოხდენის შესახებ ჩავთვალოთ გამორკვეულად. და, თუ მიუხედავად ამისა, მაინც ამ საგანზე განაგრძობენ ლაპარაკს, მე იძულებული ვიქნები, სიყალბის შესახებ აღეძრა ლაპარაკი. ამ განცხადებამ საშინელი ხმაურობა ასტეხა გამგეობის მომხრეთა შორის და ითხოვდნენ უეჭველად ოქმში შეეტანათ ბ-ნ დუმბაძის განცხადება.

(დასასრული იქნება)



## შინაური მიმოხილვა

ტფილისის და ქუთაისის საადგილ-მამულო ბანკების კრება.—  
თ. ილია ჭავჭავაძის დეაწლი ბანკის საქმეში.—ბ. კალისტრატე ჩიკვა-  
იძის დანაშაული.—ბ.ბ. ლოლუას, თოფურის და ჯორჯიკიას საქცი-  
ელი კრებაზე.—იმერეთის სამღვდლოების კრება.—† ი. პ. სტარიცკი.

ამ დღეებში შესდგა და დასრულდა კიდევ ჩვენი საად-  
გილ-მამულო ბანკების კრება, ტფილისისა და ქუთაისისა, ახა-  
ლის წესით, წარმომადგენელთა თანადასწრებით.

თუმცა ეს ორი ბანკი ერთს და იმავე ხალხში, ერთს და  
იმავე დროს მოქმედობს, მაგრამ მათ წეს-რიგობასა, საქმის მსვლე-  
ლობასა და წარმატებაში მეტად დიდი განსხვავებაა. მაშინ,  
როდესაც ტფილისის ბანკი მუდამ წარმატებაში მიდის და მის  
მდგომარეობას არსაიდან შიში არ მოეღოს, ქუთაისის ბანკი  
დაუძლიურდა და დაქვეითდა უკიდურესს მდგომარეობამდე.

ტფილისის ბანკის სათავეში ეს ოცდა ხუთი წელიწადია  
დგას თ. ილია ჭავჭავაძე. როცა 25 წლის წინად საზოგადოე-  
ბამ ამოირჩია იგი ბანკის გამგედ, იმას უკვე დამსახურებული  
ჰქონდა სახელი არა მარტო ნიჭიერი პოეტისა, არამედ ჰკუი-  
ანის და მხნე მოღვაწისა, რომელიც წინამძღვრობდა ყოველ  
საქმეში და ყოველ საჭიროების დროს. დააარსეს თუ არა ბან-  
კი, მთელმა საზოგადოებამ ხელი თ. ჭავჭავაძესაკენ გააშვირა  
და სთქვა, რომ ეს არის ბანკის გამგის თანამდებობაზე ზედ-  
გამოჭრილი. მშვიდობით და წყნარად აირჩიეს კიდევ მაშინ-  
ვე ამ თანამდებობაზე. ამისათვის მას არც მეკენჭეების შოვნა  
დასჭირებია და არც საღილ-ვახშმების გამართვა. მისმა საქმეებმა,



კოდნამ და ნიჭმა განუმზადა მას ეს ადგილი. მას აქეთ გავ-  
ლილმა 25 წელიწადმა ცხადად დაამტკიცა, რომ საზოგადოება არ  
შემცდარა მის ამორჩევაში და რომ ეს ჩვენი ნიჭიერი პოეტი  
მართლა დაუფასებელი საზოგადო მოღვაწეა. ამიტომაც ორ-  
კეცად უნდა ვცემდეთ ჩვენ მას პატივსა.

ხე ნაყოფით იცნობა და კაცი ნაღვაწით. ი. ჭავჭავაძის  
ნაღვაწი ბანკის საქმეში ეხლა ყველას თვალ წინ აქვს. ტფი-  
ლისის ბანკს ძირის ფულად ჰქონდა 25 წლის წინად 240,000  
მანეთი. დღეს კი ბანკს შემოაქვს ყოველ წლოვით წმინდა შე-  
მოსავალი 200,000 მანეთზე მეტი. მაგალითად, წელს ჰქონდა  
წმინდა შემოსავალი 232,000 მანეთი. აქედან მიეცა 62,682  
მანეთი ტფილისის სათავად-აზნაურო სკოლას, რომელიც ეხ-  
ლა არის სრული რვა-კლასიანი გიმნაზია, 10,228 მანეთი ამ  
სკოლისთვის საკუთარის შენობის ასაგებად, რომელიც, იმე-  
ლია, დასრულდება ამავე ბანკის შემწევობით. ბევრიც სხვა საზოგა-  
დო საქმიანობა კმაყოფილდება ტფილისის ბანკის წმინდა შე-  
მოსავლიდან. ამავე ბანკის შემწევობით შეიძინა ქართლ-კახეთის  
თავად-აზნაურობამ არწრუნისეული ქარვასლა ტფილისში და  
სათავად-აზნაურო სკოლის საზოგადოებამ—შენობები შუაგულ  
ქალაქში და სასოფლო მამული სკრაში. სულ ეს უძრავი ქო-  
ნება თავად-აზნაურობისა და სკოლის საზოგადოებისა ეღირება  
ერთ მილიონ ნახევრამდე.

თუ მადლიერმა ბანკის საზოგადოებამ ასეთის მოღვაწეო-  
ბისათვის თ. ილია ჭავჭავაძეს დაუნიშნა საკუთრად 2,400  
მანეთი ზედ-მეტი წლიური ჯამაგირი, რასაკვირველია, ვერაინ  
იტყვის, რომ ან დაჯილდოვებული ამისი ღირსი არ იყოს, ანდა  
საზოგადოებას მეტის-მეტი სიუხვე გამოეჩინოს. საქმე ის არის,  
რომ წყაროც აქვს ტფილისის ბანკს ამ ჯილდოს გასაცემად  
და ისე არ დაემართება ტფილისის ბანკს, როგორც ქუთაისი-  
სას დაემართა: დაუნიშნა პოეტს აკაკი წერეთელს პენსია და  
ვერ მისცა უფულოობის გამო.

რაც შეეხება ქუთაისის ბანკს, ძირის ფული მას ერთი  
ორად მეტი ჰქონდა ტფილისის ბანკზე. დღეს კი მისი მდგო-

მარეობა მეტად სამწუხაროა. მას წელიწადში აქვს წმინდა შემოსავალი მხოლოდ 38,000 მანეთამდე, თუმცა ესეც წმინდა შემოსავლად არ ჩაითვლება, რადგან ბანკს აწევს კისერზე მრავალი დარჩენილი მამული, რომელსაც არავითარი შემოსავალი არ შემოაქვს და ამიტომ ზარალი ბანკისა არ არის გამოირიცხული შემოსავლიდან. ესეც რომ გამოირიცხოს, წმინდა შემოსავალი არც წელს და არც მოკლე მომავალში სრულებით არ ექნება.

ბანკს არამც თუ მთელი გიმნაზიის კლასები ვერ გაუხსნია, არამედ იმ ოთხი პროგიმნაზიის კლასებისთვის სენაკის განყოფილებით და სამეურნეო სკოლის შემწეობისთვის რაც ფული არის საჭირო, იმის დასაფარავად არ ჰყოფნის ბანკის შემოსავალი და 8,000 მანეთამდე უნდა ისესხოს ბანკმა მომავალ მოგებიდან. ბანკის კრება იძულებული იყო 1,500 მანეთის შემწეობის უარი ეთქვა თავის სკოლისათვის, რომელიც თხოულობდა ამ ფულის სკოლის დამტვრეულ მოწყობილობის განსაახლებლად.

ვინ არის დამნაშავე ქუთაისის ბანკის ასეთის დაქვეითებისა? როგორც ცხადად და ფაქტების შემწეობით საქმე გამოირკვა წარმომადგენელთა კრებაზე, ამის დამნაშავე არის ბანკის გამგეობა საერთოდ და მისი თავმჯდომარე კალისტრატე ჩიკვაიძე განსაკუთრებით.

დავიწყეთ ჯერ იქიდან, რომ ეს გვამი, როგორც ბანკის მოღვაწე, ცოდვით-შობილია, და თუ ყველგან არ მართლდება ხალხის აზრი, რომ ცოდვით-შობილი ცოდვილი იქნებაო, ამ შემთხვევაში კი, ჩვენდა სამწუხაროდ, ნათლად დამტკიცდა.

გავიხსენოთ, როგორ აირჩიეს, ანუ უკედ ეთქვათ, როგორ აარჩევია საზოგადოებას თავი კ. ჩიკვაიძემ ამ ცხრა წლის წინად. აარჩევია თავი და არა აირჩიეს, ვამბობთ იმიტომ, რომ საზოგადოებამ აირჩიაო, იტყვიან მაშინ, როცა საზოგადოება თვითონ იცნობს ამოსარჩევ კაცს, იცის მისი წინანდელი ნაღვაწი, ნიჭი და ცოდნა და შემდეგ ერთმანერთ შორის თათ-



ბირისა, ცნობიერად აძლევს მას უპირატესობას მეორე მოქმედებაზე.

კ. ჩიკვაიძის ამორჩევის დროს არც ერთი ამ პირობათაგანი არ არსებობდა: მისი საზოგადო სარბილზე საზოგადოების სასარგებლოდ მოღვაწეობა არაფერს არ უნახავს, მისი ნიჭი და ცოდნა არაფერს არ გამოუყვლია, მისი არჩევა არაფერს თავში არ მოსვლია. სამაგიეროდ თვით მან განიზრახა თავის თავის ამორჩევენება. მიიწვია ნათესავები, მეგობრები, იმხნევა, შეჰქრება „ვექილობები“, „აიღო ალღო, როგორც სთქვა გ. წერეთელმა — და მიემხრო ახლად აღორძინებულ კლასს სულით, გულით და გონებითაც“, მოიწვია თავის ხარჯით მეკენჭეები და შეადგინა პარტია, რომელმაც იგი აირჩია, ვინ იცის რა სიმართლით, რადგან „ვექილობები“, რომელსაც სიყალბე შესწამეს, მაშინვე გაჰქრა ბანკის გამგეობიდან და დღესაც აღარ სჩანს.

ასეთს გამარჯვებაში კ. ჩიკვაიძის ორს ღირსებას პოულობენ ზოგიერთები, არა-ჩვეულებრივ მხნეობას და საზოგადოების ალღოს აღებას. ორივე ეს თვისება უეჭველია, მაგრამ მისი ღირსება კი საეჭვოა ჩვენთვის. მხნეობა დიდს ღირსებას შეადგენს კაცისას მხოლოდ მაშინ, როცა იგი მიმართულია კარგს საქმეზე და კარგი ნაყოფიც მოაქვს. ეს პირობა აკლია ჩიკვაიძის მხნეობას.

რაც შეეხება „საზოგადოების ალღოს აღებას“, ჩვენ ეს ღირსებად არ მიგვაჩნია. დარწმუნებული ვართ, რომ ამ სიტყვების მთქმელსაც არ მიაჩნდა ეს გარემოება საქებურად, როცა იგი უფრო საღ ჭკუაზე იყო და ცოტა არ იყოს ანგარების გამომჟღავნება რცხვენოდა.

ჩვენის აზრით ყოველი საზოგადოების მოღვაწეს და განსაკუთრებით რომლისამე საზოგადო საქმის სათავეში მდგომის მოვალეობა ის არის, რომ საზოგადოებაში სთესოს დიდებული და ჭეშმარიტი აზრები, ფაქიზი ზნე-ჩვეულება და ჩაუნერგოს ხალხს ის იდეალები, რაც ხალხს აკლია და არა შეითვისოს ხალხისაგან ის ცრუ-მორწმუნეობა, ის ზნე-ჩვეულება და ხასიათი, რომელიც საზიზღარია ყოველი ნამდვილ განათლებუ-

ლი კაცისათვის. ერთის სიტყვით, ჭეშმარიტი მოღვაწე უნდა ეცადოს ხალხი აღამაღლოს თავის სიმაღლემდი აზრებისა და ზნეობის მხრით და არა დაიწიოს განუვითარებელ და დაქვეითებულ ხალხის სიმდაბლემდე.

ვინც ამ აზრისა არ არის, იმასთან ჩვენ არაფერი საერთო არ გვაქს, ჩვენ სხვა-და-სხვა ენაზე მოლაპარაკე ვყოფილვართ და მათთვის დაგვილოცნია გზაც და გამარჯვებაც. მანამდი იარონ ამ გზაზე და იხარონ გამარჯვებით, სანამდი მომავალი მათ თვალს არ აუხელოთ და არ შეარცხვენთ.

წრევანდელ კრებაზე კ. ჩიკვაიძეს დიდი წინააღმდეგობა გაუწია ოპოზიციამ. თუ გამარჯვება არ დარჩა ამ ოპოზიციას, ის მაინც უეჭველია, რომ ყოველ გონიერ და კეთილ-სინიდი-სიერ კაცის თვალში მას მიუძღვის ორი დიდი ღვაწლი.

ერთი ისა, რომ იგი კი არ მიემხრო რომელსამე ისეთ კანდიდატს, რომელიც თავის ამოჩემებით კანდიდატად თვითონ დაასახელა თავი და როგორც იტყვიან რუსები, „на свой страхъ и рискъ“ აპრობდა პარტიის შედგენას, არამედ ამოარჩიეს ისეთი კანდიდატი, რომელიც ღირსი იყო მათის აზრით ამ ადგილისა და ჯეროვანად წაიყვანდა ბანკის საქმეს. თვით კანდიდატმა კი არა სთხოვა პარტიას ამომირჩიეთო, არამედ პარტიამ, საზოგადო საქმის სარგებლობისათვის, სთხოვა თავის კანდიდატს დაგვეთანხმე კენჭის ყრაზეო. ამ ბოლოს დროს ქუთაისის ბანკის საქმეში ეს ახალი ამბავია. მხოლოდ ასეთი კანდიდატურა არის წესიერი და პატიოსანი.

მეორე ღვაწლი ოპოზიციისა ის არის, რომ ნათლად და სავსებით გამოარკვია ბანკის უკიდურესი მდგომარეობა და მისი დაქვეითებული მდგომარეობა ამ ცხრა წლის განმავლობაში, ე. ი. მას აქეთ, რაც კალისტრიტე ჩიკვაიძე გამგებლობს იქ.

აი რა დანაშაულობა მიუძღვის კ. ჩიკვაიძეს ამ ცხრა წლის განმავლობაში, როგორც დამტკიცდა კრებაზე: 1) მას ნაკლებად უფლია ბანკში და უფრო მეტ დროს ანდომებდა თურმე იგი თავის კერძო, სავეჭილო საქმეებს; 2) დროზე არ ეცადა გძელ ვადიან (36  $\frac{2}{3}$  წლიანი) გირავნობის ფურცლების გა-



მოცემას, თუმცა საზოგადო კრებამ ეს დაავალა გამგეობას 1890 წელს. ამის გამო ბევრი ქუთაისის მამული გადავიდა ტფილისის ბანკში და ქუთაისის ბანკმა იზარალა 149,056 მან.\*) 3) ჯერ არ მოუხდენია კონვერსია 6<sup>0</sup>/<sub>0</sub> გირავენობის ფურცლებისა 5<sup>0</sup>/<sub>0</sub>-ზე, თუმცა საზოგადო კრებამ ორჯელ დაავალა მას ეს საქმე, 1891 და 1893 წწ. ამით მან აზარალა მსესხებლებს 122,700 მან.\*\*) 4) კ. ჩიკვაიძე თავის ნებით ვისაც უნდოდა, იმას მისცემდა შეღავათს და ვადაზე შემოსატანს ფულს აღროვებდა. მათ შორის მდიდარი მსესხებლებიც ყოფილან. არც თვითონ ჩიკვაიძეს და მის ამხანაგს, გამგეობის წევრს ჯაიანს არ შეჰქონდათ დროზე შესატანი ვალი, მაგრამ მათი მამული სასაციდად არ დაუნიშნაეთ, თუმცა ამას კანონი მოითხოვდა. 5) წინანდელ მუხლში მოხსენებულ უკანონობას ორ გვარი ზარალი მოუტანია: ერთი რიამ მსესხებლებს ბევრი ჯარმა ხდებოდათ, სულ გადახდენიათ 167,000 მან.,\*\*\*) და მეორე ისა, რომ მეტად დავალიანებულმა მსესხებლებმა მამული ვეღარ შეირჩინეს და ბანკს დარჩა მათი მამული. 6) ბანკში დარჩენილ მამულებს გამგეობა არ უფლის და შემოსავალი ბანკს არაფერი არ შემოსდის, რისგან ბანკს ზარალი აქვს 200,000 მანეთისა. 7) გამგეობა არ ასრულებდა კანონიერ გარდაწყვეტილებას არც საზოგადო კრებისა და არც ზედამხედველი კომიტეტისას, რომლისთვის კ. ჩიკვაიძეს მეტად უზრდელი სახელი დაურქმევია: „захребетный органъ правленія“.

სხვა, წვრილმანებს რომ არ გამოვუდგეთ, ვფიქრობთ, რომ ზემორე აღნიშნული დანაშაულიც კმარა იმის დასასკვნელად, რომ ამდენი ზარალის მომტანი, აგრე საქმეზე გულ-აცრუებული, აგრე თავხედი და თავის ნების კაცი ბანკის მმართველობისათვის სრულებით უვარგისია.

\*) იხ. „მოამბე“ № V, სტ. „რა აზარალა ჩიკვაიძემ ქუთაისის ბანკს და მის მსესხებლებს“.

\*\*\*) იხ. იგივე სტატია.

\*\*\*\*) იხ. იგივე სტატია.



საინტერესოა პასუხი, რომელიც მისცა კ. ჩიკვაიძემ ვის ბრალმდებლებს და რომელიც თავის-თავად ახასიათებს მას და ამტკიცებს, რა ცოდნის, ქულის და ზნეობის პატრონი ყოფილა იგი.

აი, ბატონებო, მისი პასუხები, აგერ-ეგერ გაბნეულნი, ვითარცა ობოლი მარგალიტები: „რა სასაყვედუროა“, თუ რა-მე ვერ გავაკეთეთო, „იქნება მეტი ვერ მოვახერხეთო“. კონვენსიის თაობაზე ვერ ვიშუამდგომლეო, რადგან 1893 წ. საზოგადო კრება არ იყო კანონიერიო. ამის შესახებ კრებაზე კი გამოიჩევა, რომ გამგეობას არავითარი მსჯელობა იმ გარდაწყვეტილების უკანონობის შესახებ არა ჰქონია, რომ გამგეობას ამ კრების პროტოკოლი წარუდგენია, როგორც კანონიერის კრებისა, კანონისავე მოთხოვნისამებრ, ფინანსთა მინისტრისათვის და გაზეთებში დასაბეჭდად და შემდეგ კი დავიწყებია ამ გადაწყვეტილების არსებობა. მართალია, კანონის წინააღმდეგ შეღავათს ვაძლევდი მსესხებლებს და არ ეთხოვდი ვადაზე შესატან ფულს და სხვებთან ერთად არც მე შეეიტანე, მაგრამ ჩემის მხრით მე კარგს საქმეს ჩავდიოდით. ბანკში დარჩენილ მამულებიდან მართლა არაფერი არ შემოდისო, მაგრამ აგრეა სხვა ბანკებშიაცო. მართალია, ზედამხედველი კომიტეტის განკარგულებას არ ვეთანხმებიო, მაგრამ ხან და ხან მე ჩემს თავსაც არ ვეთანხმებიო (самъ съ собою не солидаренъ). კომიტეტს, რასაკვირველია, ჩემზე ძალა არა აქვსო, „აბა მუშტიკრივს ხომ ვერ გამიმართავსო“. თუ ასეთი ჩემი საქციელი კრებას არ მოსწონსო, კრება არ ამირჩევსო. მართალია, მთელს ჩემს დროს არ ვანდომებდი ბანკის საქმეებს, საექილო საქმეებზედაც დავდიოდი და ჩემის ფიქრით ბანკის საქმესაც კი ვაკეთებდი და თუ კრება არ მოიწონებს ჩემს მოქმედებას, კრება არ ამომირჩევსო.

ძალდი, როგორც იტყვიან, ამ უკანასკნელ სიტყვებში მარხია. ამით კი ჩიკვაიძემ სთქვა: თქვენ რაც გინდათ, იმაში გამამტყუნეთ, რაც გინდათ, ის დამიმტკიცეთ, მე კი კენჭები მომზადებული მაქვს და არჩეული ვიქნები და გარეშე ამისა

არც პატივი, არც თავმოყვარეობა, არც სირცხვილი ჩემთვის არ არსებობსო!! ეს კიდეც არაფერი! როცა კ. ჩიკვაიძეს გაზეუებშიც დაუწერეს და კრებაზეც უთხრეს, რომ შენ არჩვენების დროს ქრთამს იძლევიო, იმან ყურიც არ ათხოვა ასეთ ბრალდებას, თითქო აქ არაფერია საწყენი და სამარცხვინოო.

შესანიშნავი კიდეც ის არის, რომ თუმცა გამგეობას დიდი პარტია ჰყავდა და მის შორის განათლებულებიც ერივნენ, მაგრამ არავის ხმა არ ამოუღია ოპოზიციის არსებითად საპასუხოდ, თუ მხედველობაში არ მივიღებთ მ. ფაღავას, რომელმაც ორიოდეჯერ მხოლოდ გაიმეორა კ. ჩიკვაიძის მოსაზრება,

უეჭველია, რომ გამგეობის პარტიის ბურჯი იყო ამ კრებაზე ქუთაისის ქალაქის თავი ლ. ლოლუა, რომელსაც საზოგადოდ უყვარს „რეჩები“ და რომელიც გამოცდილი და შნონიანი მოლაპარაკეა, მაგრამ არსებითი პასუხი არც ერთის მუხლის შესახებ არც მას მიუცია ოპოზიციისათვის. ცხადია, რომ ბ.ნ. ლოლუა და ყველა მომხრეები კ. ჩიკვაიძისა გრძნობდნენ ოპოზიციის ბრალდების სიმართლეს.

თუ საქმის გამორკვევით და საცილო საგნების აღსნით ვერ ჰპოვა ბ.ნ. ლოლუამ შესაძლოდ კ. ჩიკვაიძის გამოსარჩლება, სამაგიეროდ საქმის გადაფუჩეჩებით, სიმართლის დამალვით და ფაქტების დამახინჯებით კი მხარი მისცა კ. ჩიკვაიძეს. ამებში ბ.ნ. ლოლუამ ძლიერ დახელოვნებულად გამოიჩინა თავი და მასთანვე ცხადად დაამტკიცა, რამდენად მოკლებული ყოფილა იგი საზოგადოებრივ ინსტიქტსა, სიმართლის გრძნობას, და მაგიერში რა უზომო თვითნებობის კაცი ყოფილა.

ბ.ნ. ლოლუას ასეთის დახასიათების მასალას და საბუთს გვაძლევს მისი საქციელი მხოლოდ იმ კრებაზე, რომელზედაც ეხლა ვამბობთ და რომელიც აღწერილია ანგარიშში. \*) საქირო არ არის ამისთვის შეეცხოთ ბ. ლოლუას წინანდელ მოქმედებას საზოგადო ასპარეზზე.

აი რაში გამოიჩინა ბ.ნ. ლოლუამ ის ხასიათი, რომელზედაც ზემოდ მოგახსენეთ. როცა ბ.ნ. ნანეიშვილმა გამოუ-

\*) იხ. ეს ანგარიში ამ №-ში.



ცხადა კრებას, რომ ბ-ნი ჩიკვაიძე ბანკში არ მუშაობდა და თავის კერძო, სავაჭრო საქმეებს უნდებოდაო და ამის მოწმედ თვით გამგეობის დირექტორი, თ. ნ. ერისთავი, ბ-ნი ჩიკვაიძის მომხრე, მოიყვანა, რომელმაც თავის მხრით განაცხადა, რომ ამ საგანზე მე ყოველთვის მართალს ვიტყვი, მაგრამ ეხლა ამის დრო არ არისო (ცხადია, რომ მართალი ყოფილა ბ. ნანეიშვილის განცხადება, თორემ ტყუილი რომ ყოფილიყო, რატომ დრო არ იყო ბ. ჩიკვაიძე გამართლებინა ბ-ნ ერისთავს?). ბ-ნმა ლოლუამ ეს იწყინა და ბ-ნ ნანეიშვილს ზნეობის სიტუაქიზე დაუწუნა. საინტერესო სურათი იქნებოდა კრებაში: ბ-ნი ლოლუა ზნეობას უწუნებს ბ-ნ ნანეიშვილს, რომლის შეურყვევლს პატიოსნებას დიდი ხანია იცნობს მთელი შეგნებული და განათლებული საზოგადოება როგორც ქუთაისის, ისე ტფილისისა! ბ-ნმა ლოლუამ უბასუხა ბ-ნ ნანეიშვილს, რომ თქვენ ამას არ უნდა ამტკიცებდეთ აქ, კრებაში, რადგან თქვენ გამგეობის ერთი მოხელეთაგანი ხართ, ჩვენთან უნდა იყოთ და გამგეობის ინტერესებს უნდა იცავდეთ კრების წინაშეო. — შეუძლებელია კაცმა მოათავსოს ამ ცოტა სიტყვაში ამდენი უსაფუძვლო, შემცდარი და ცრუ აზრი.

ჯერ ერთი, რომ ბ-ნი ნანეიშვილი ლაპარაკობდა კრებაზე არა ვითარცა მოხელე ბანკისა, არამედ ერთი წარმომადგენელთაგანი ბანკის საზოგადოებისა და მისი მოვალეობა იყო გამოერკვია კრების წინაშე მხოლოდ ქეშმარიტება, მთელი ქეშმარიტება და არაფერი გარდა ქეშმარიტებისა. მეორე: ორს მოხელეს ბანკისას შეიძლება მოეთხოვოთ ერთმანეთს მხარი დაუჭირონ და ერთმანერთის აზრი დაიცვან კრების წინაშე, რომლისაზე პრინციპიალურ საქმის შესახებ, ისიც იმ შემთხვევაში, როცა ორივე მოხელე თანამოზიარე არიან ერთისა და იმავე აზრისა და ამ აზრისამებრ მოქმედობენ.

სულ სხვა მდგომარეობაა, როცა საქმე პრინციპს კი არ შეეხება, არამედ ბოროტ-მოქმედებას. ამ შემთხვევაში რომ ერთ მოხელეს უთხრათ, შენი ბოროტ-მოქმედი ამხანაგი დაიცვი და მისს სიბოროტეს ნუ გაამტკიცებო, ეს იგივე იქნება



რომ უთხრათ: შენც ბოროტ-მოქმედი იყავი და საზოგადოებასა-  
ქმეს უღალატეო. მართალია, ბ-ნმა ნანეიშვილმა დიდი ბრალი  
დასდო ბ-ნ ჩიკვაძეს, დიდ ბოროტებაში ამტყუნებდა. ცხრა  
წელიწადს იყო ბ-ნი ჩიკვაძე ბანკის გამგედ. თუ ამ ცხრა წე-  
ლიწადს ბანკში არ საქმობდა, კერძო, სავაჭირო საქმეებს უნ-  
დებოდა, მაშ ფული ტყუილად უღია ბანკიდან! დრო მოუპა-  
რავს საზოგადოებისათვის და ამ დროსათვის დანიშნული ფუ-  
ლი ტყუილად მიუთვისებია. თუმცა ეს ისეთივე ბოროტ-მოქ-  
მედებად არ ჩაითვლება, რომ კასიდან ჩუმად ფული აიღოს კა-  
ცმა და ჩაჯიბოს, მაგრამ მაინც ბოროტ-მოქმედებაა.

ბ. ლოლუას მოვალეობა იყო წინააღმდეგობა ბ-ნ ნანე-  
იშვილს, ეკიჟინა მისთვის ზნეობა, მართებულობა და სინიდი-  
სი, უკეთუ ბ. ლოლუა დარწმუნებული იყო, რომ ეს ბრალ-  
დება ტყუილი იყო. ამ შემთხვევაში დილაღ უნდა გამოსარ-  
ჩლებოდა ბ. ჩიკვაძეს და აეცილებინა მისთვის უმართლო ცი-  
ლის წამება. უკეთუ ბრალდების სიცრუეში და ბ. ჩიკვაძის  
სიმართლეში აღარ იყო ბ-ნილოლუა დარწმუნებული, — და რომ  
არ იყო, ამას გვიმტკიცებს, რომ მან არაფერი არა სთქვა თვით  
ბრალდების წინააღმდეგ, — მაშინ არ უნდა ეკადრა თავის-თა-  
ვისთვის და კრების პატიოსნებისთვის იმის თქმა, რომ ბოროტ-  
მოქმედება საზოგადოების წინააღმდეგ, საზოგადოების ინტე-  
რესებისთვის მავნებელი, უნდა დაფაროთო. ამას იტყვის მხო-  
ლოდ კაცი, რომელსაც არ უღვივის გულში ნატამალიც სა-  
ზოგადო საქმის ერთგულებისა და რომელიც მოკლებულია, რო-  
გორც ზემოდ ვთქვით, საზოგადოებრივ ინსტიქტსა.

მესამე: რა არის ფრაზა „გამგეობის ინტერესებს უნდა  
იკავდესო“? განა გამგეობას აქვს რაიმე ინტერესი, რომელიც  
არ ეთანხმება კრების ინტერესს და გარეშეა საზოგადო საქმი-  
სა?! ამას იტყვის მხოლოდ ისეთი კაცი, რომელიც ემსახურე-  
ბა ყოველგან და ყოველთვის პირად ინტერესებს და არა სა-  
ზოგადო საქმეს. დიად, ბ. ლოლუა, თქვენისავე სიტყვით უნ-  
და მოგმართოთ თქვენ: „ზნეობის სიფაქიზის დაცვა ყოველ-  
გან და ყოველთვის უნდა იყოს. ჩვენ წინაპრებს, მართალია,

უნივერსიტეტი არ გაუთავებიათ, მაგრამ ზნეობით უაქიზნი იყვნენ! ან რად მივდივართ ასე შორს, წინაპრებთან: თქვენს კრებაზედ ბევრი იყო, თვით თქვენივე მომხრეთა შორის, რომელთაც უნივერსიტეტი არ გაუთავებიათ, მაგრამ არც ერთს მათგანს არ უთქვამს, რომ საზოგადოების წარმომადგენელმა კ. ჩიკვაიძის ბოროტება უნდა დამალოს მხოლოდ იმიტომ, რომ იგი ბ. ჩიკვაიძის ხელ-ქვეით მსახურებდაო.

ეხლა ვნახოთ რამდენად გამოიჩინა ბ. ლოლუამ კრებაზე სიმართლის სიყვარული. როცა გამგეობამ თავის გასამართლებლად დაიწყო დამტკიცება, რომ 1891 წლის ბანკის კრება უკანონო იყო წევრთა რიცხვის ნაკლებობის გამო, კრებამ ბ-ნ ლოლუას ჰკითხა, როგორც მაშინდელ კრების თავმჯდომარეს, თქვენის აზრით კანონიერი იყო, თუ არა ის კრებაო? ლოლუამ პროტოკოლი გადაფურცლა და უპასუხა კრებას, რომ, რადგან პროტოკოლში არ არის ნაჩვენები წევრთა რიცხვი, მე არ შემიძლია ვთქვა, კანონიერი იყო ის კრება, თუ არაო. — აკი პროტოკოლის შავი თქვენის ხელით არის დაწერილიო, გაახსენა ერთმა წევრმა. მე მხოლოდ ბოლოს თავმჯდომარეობდიო, უპასუხა ბ-ნმა ლოლუამ, და არ ვიცო კრება როგორ შესდგაო. „მე კრებას არ დავსწრებდვარო, რა ხდებოდა იმ კრებაზე არ ვიცოდი და რაც სხვამ მითხრა ის დავწერე და იმას მოვაწერე ხელიო“. (!!) შემდეგ ისიც გაახსენეს ბ. ლოლუას და გაიხსენა კიდევ, რომ მაშინ ბ. ლოლუას სთხოვეს „კონვენსიის შესახებ ოქმი დაწერილებით, საფუძვლიანად შეედგინა, რათა სამინისტროში არავითარი დაბრკოლება არ დახვედროდა კონვენსიის მოხდენას“.

ცხადია, რომ ამ სიმართლეს კუდი უჩანდა და თავს კი უმაღლავდა ბ. ლოლუა, რის გამო მსცოვანმა წევრმა თავ. გიორგი მიქელაძემ მიჰმართა ბ. ლოლუას ამ სიტყვებით: „მართალს ამბობთ, თუ გვატყუებთ, ჩვენ ვერაფერი გავიგეთ! ეს სირცხვილი არ არის ბანკის მმართველობისათვისო?“.

კიდევ ერთი მაგალითი ბ-ნ ლოლუას სამართლიანობისა: როცა კრების თავმჯდომარეს ირჩევდნენ, ზოგიერთები თხოუ-



ლობდნენ, რომ კენჭის ყრა დახურული არ ყოფილიყო. ამის წინააღმდეგ პროტესტი გამოაცხადა ბ-ნმა ლოლოვამ. მაშინ ლოლოვას შენიშნეს, რომ თქვენ არ შეგშენით ასეთი პროტესტი, რადგან თქვენ იყავით, რომ განმარტეთ ქალაქის არჩევნების დროს, როცა თქვენი კანდიდატურა წამოყენებული იყო, და თქვენ თავმჯდომარეობდით, რომ კანონი არ უკრძალავს არავის ახდელად კენჭი ჩაავდოსო და კიდევ ჩაავდებიან ახდელად კენჭი მალრადეს თქვენს ყუთში, რომელსაც თქვენვე უდექითო.

მაშ რა არის ასეთი განმარტება, თუ არა თვით-ნებობა, თუ არა უტიფრობა? რას ნიშნავს ეს საქციელი, თუ არა იმის თქმას, რომ როცა მიჯობს კანონს ასე დავატრიალებო, და როცა მიჯობს ისეო?!

როგორც სჩანს კრების ანგარიშიდან მართებულობა ჩვეულებად არ ყოფილა მიღებული გამგეობის მომხრეთა შორის. ამ მხრით ღირსია აღნიშნისა საქციელი ორის წევრისა, ს. თოფურიასი და ს. ჯორჯიკიასი. ორთავე შეუძლიანთ კალისტრატისებურად სთქვან—„ჩვენც გვისწავლია უნივერსიტეტში“, მაგრამ ორთავე მოქცეულან ისე, რომ უსწავლელსაც არ ეკადრებოდა.

ბ-ნი თოფურია სრულებით კრებაზე არ დასწრებია, მას კრების არა მოუსმენია-რა და კრებას მისი არაფერი გაუგონია, საქმის გაგება, აზრთა გამორკვევა მას საჭიროდაც არ მიუჩნევია. მის სავალდებულოდ მხოლოდ ის მიუჩნევია, რომ გაჭირების დროს დახმარებოდა გამგეობას. მართლაც, რადგან გამგეობას გასჭირვებია, უწყსოების საშუალებით კრება გადაუდვიათ გამგეობის მომხრეთ მეორე დილისთვის და ამ დილისათვის ბ-ნი თოფურიაც, რომელიც კრების დროს ტფილისში ყოფილიყო, სხვებთან ერთად ქუთაისში გაჩენილა!..

ბ-ნ ჯორჯიკიას საქციელი კი კიდევ უკეთესია: როცა გამგეობამ კენჭის ყრისათვის დამზადებული ყუთები თავმჯდომარეს ჩუმიდ ხელიდან გამოაცალა და მაგიერი, საგანგებოდ გაკეთებული, მოუტანა, თავმჯდომარემ უარჰყო ეს ყუთები, რად-

გან დაკეტილი იყო და მისი მოწყობილობა მან არ მაშინ ბ-ი ჯორჯიკია, რომელიც მთელი კვირა, ამბობს კრების ანგარიში, პირდამუწულ პატარძალსავით იჯდა და ხმა არ ამოუღია, გაიმართა წელში, მარჯვენა მუშტით სტოლზე დააბრახუნა და მარცხენა ხელი ჰკრა ყუთს და თავსმჯდომარისაკენ გააგორა: „რითაა ეს ყუთები გლახა?“ შეჰყვირა მან ხმა-მალლა“.

ამ ამბავმა დიდი არეულობა გამოიწვია და კრება გადაიდვა შემდეგის დღისათვის. „კალისტრატეს მომხრეებსაც ეს უნდოდაო, — დასძენს ანგარიში.

ბ-ნი ჯორჯიკია, რომელიც ეგრე უპატიურად, უშვერად და „უზრდელად“ მოეპყრო თავსმჯდომარეს, არის ყმაწვილების „აღმზრდელი“, მას აქვს კერძო სკოლა და კრებას სთხოვა, რომ ჩემი სკოლა პროგიმნაზიად მიიღოს გადავაკეთო, შემწეობა აღმომიჩინეთ და 18,000 მანეთი მიამცეთო.

ეს თხოვნაც კარგად ახასიათებს მთხოვნელს. ჯერ ერთი ეს: კიდევ რომ ყოფილიყო ბანკში ფული ასეთის უხვის შემწეობისათვის, ჰქონდა თუ არა უფლება ბ-ნს ჯორჯიკიას ამ შემწეობის თხოვნისა? მომავალი იმედები აძლევდა მას ამის უფლებას, თუ წარსული ღვაწლი? ეს წარსული ღვაწლი მდგომარეობს იმაში, რომ „წერა-კითხვის საზოგადოებამ“ დროებით ჩააბარა მას ქუთაისის სათავად-აზნაურო სკოლა, სადაც თავის უტაქტობით არივ-ღარია საქმე. ამის გამო საზოგადოებამ სთხოვა მას თავი დაენებებია დროებით სკოლის გამგებლობისათვის. მან შეუთვალა საზოგადოებას მაკ-მაჰონისებურად „აქ ვარ და აქ უნდა დავრჩეო“ (j'y suis et j'y reste), მაგრამ საზოგადოებამაც გამბეტისებურად უპასუხა: „რადგან არ დაგვემორჩილეთ, უნდა გადადგეთო“ (il faut se soumettre, ou se démettre), სკოლას იგი მოაშორა და მას აქეთ სკოლაში მშვიდობა ჩამოვარდა.

ესეც რომ არ ყოფილიყო, რა წყაროდან უნდა მიეღო ეს ფული ბ. ჯორჯიკიას? ბ. ჯორჯიკია რომ გარეშე პირი ყოფილიყო, რომელმაც არ იცოდა ბანკის მდგომარეობა, კიდევ სხვაა. მაგრამ იგი ზედამხედველი კომიტეტის წევრია.



იმან კარვალ იცოდა ბანკის გაჭირებული მდგომარეობა, იგი ცხადად ხედვიდა, რომ ბანკმა თავის სკოლას 1,500 მანეთი ვერ მისცა საკლასო მოწყობილობის შესაძენად, რომ უფულობის გამო ამ სკოლას ბევრი რამ აკლია. ოღონდაც იცოდა ყოველივე ეს, მაგრამ იფიქრა, „ძალა აღმართს ხნავსო“, სადაც ასეთი მომხრეები მყავს, როგორებიც ბ.ბ. ლოლუა, ფალავა, თოფურია და „ძმა-ბიჭი“ კალისტრატე არიან, იქ შეუძლებელსაც შევიძლებთო. მისდა სამწუხაროდ, იმედი გაუცრუვდა და ისიც იყო ჯავრიან გულზე უზრდელობა ჩაიდინა და უწესოება გამოიწვია.

დარწმუნებული ვართ, რომ თუ მკითხველი ასწონ-დასწონის ყოველსავე გარემოებას, რაც მოხდა ქუთაისის ბანკის კრებაზე, გაითვალისწინებს ოპოზიციის საფუძვლიან კრიტიკას, ხმის ამოუღებლობას გამგეობის მოსარჩლეთა მხრით ამ კრიტიკის წინააღმდეგ, ზნეობითს ხასიათს, რომელიც გამოიჩინეს გამგეობის უფრო განათლებულმა მომხრეებმა და დასასრულის, რომ გამგეობამ მხოლოდ ოთხის ხმით სძლია ოპოზიციას და ეს ოთხის ხმით ძლევა-მოსილობა მოიპოვა მან ორის ცხადის უწესოებით, რომლითაც გამგეობამ წლევანდელი არჩევნები დაიწყო და დაასრულა კიდევ: მსესხებელთა სიების გამოუცხადებლობა კანონისამებრ წარმომადგენელთა არჩევნების წინ, რათა მარტო გამგეობას შესძლებოდა თავის სურვილისამებრ ამოერჩია წარმომადგენლები, და ბოლოს, გამგეობის წევრთა ამორჩევის დღეს, კენჭის ყრის ძალდაძალ გადადება, რათა მეორე დილისათვის შეეძინათ ის კენჭები, რომელიც აკლდათ, — თუ ყოველსავე ამას მკითხველი გაითვალისწინებს-მეთქი, ვამბობთ ჩვენ, დარწმუნდება, რომ გამგეობა ზნეობით მაინც დამარცხებულია, თუმცა ისიც უეჭველია, რომ ამით გამგეობას არც დასცხება და არც შესცივა.

იმ დროს, როცა ქუთაისის ბანკის კრებაზე ასეთი ხმაურობა და აყალ-მაყალი იყო, ქუთაისშივე მომხდარა საზოგადოებისათვის თითქმის შეუჩნეველად, წყნარად და მშვიდობიანად მეორე კრება — იმერეთის სამღვდელოების დებუტატთა

საგანგებო კრება. ამ კრებაზე სამღვდელოებას ორი თვალ-სა-ჩინო საქმე გადაუწყვეტია: 1) იმერეთის სამ-კლასიანი გაბრი-ელის სახელობის საეპარქიო ქალების სასწავლებელი გარდაქ-მნილ იქმნას ექვს-კლასიანად და 2) რადგან სანთლის ვაჭრო-ბის საქმეში უწყეს-რიგობა აღმოჩენილა, ჩამოერთვას ეს საქმე დეკანოზს დ. ლამბაშიძეს და გადაეცეს იგი ახლად ამორჩეულ კომიტეტს.

სჩანს, რომ იმერეთის სამღვდელოება უფრო ერთგულად ეკიდება საზოგადო საქმეს, რომლის განკარგებისა და სარგებ-ლობისათვის პირადი სიმპატიით არ ხელმძღვანელობს. თუმცა, საზოგადოდ, ჩვენს სამღვდელოებას, გაუნათლებლობის გამო, ბევრი აკლია იმისთვის, რომ თავისი მოვალეობა სავსებით შე-ასრულოს და ხალხს ნამდვილი სულიერი ხელმძღვანელობა გა-უწიოს, მაგრამ ეს კია, რომ იგი მშრომელ ელემენტს შეადგენს ჩვენის ერისას, არ ზოგავს საშუალებას შვილების აღზრდისა-თვის და სამშობლოს ბლომად უმზადებს განათლებულ შვი-ლებს.

—

ემ დღეებში გარდაიცვალა ქ. პოლტავაში იაგორ ჰავლეს ძე სტარიცი, რომლის სახელი პატივით უნდა მოიხსენოს ჩვენმა საზოგადოებამ. განსვენებული იყო პირველი უფროსი თავ-მჯდომარე ტფილისის სამოსამართლო პალატისა და თანამოდ-ვაწე კავკასიის ნამესტნიკის დიდის მთავრის მიხეილ ნიკოლო-ოზის ძისა. სტარიცის დიდი ღვაწლი უდევს იმ რეფორმებში, რომელიც შემოიტანა კავკასიაში დიდმა მთავარმა. სტარიცის თანამშრომლობით შემოღებულ იქმნა საჯარო მართლ-მსაჯუ-ლება სამიჯნო საქმეებში 1863 წელს, ესე იგი მაშინ, როდესაც ჯერ რუსეთშიაც არ იყო ასეთი წარმოება მართლ-მსაჯუ-ლებისა. შემდეგ კი, როცა რუსეთში შემოიღეს ახალი წარმო-ება მართლ-მსაჯულებისა 1864 წელს, დამტკიცებულის წესდებ-ბის ძალით, კავკასიაშიაც ჩქარა (1868 წ.) შემოიღეს ეს წეს-დება, თუმცა, სამწუხაროდ მთლად არა; მაგალითად: ნაფიცი მსაჯულების ინსტიტუტი არ იყო შემოღებული. ამ წესდებ-



ბის შემოღებაში უდიდესი წილი ეკუთვნოდა განსვენებულ სტარიცკის.

იმ დროებში ადგილობრივი მთავრობა მოწადინებული იყო, რაც შეიძლება მალე, გაეგრძელებინა კავკასიაშიაც ის რეფორმები, რომელიც შემოღებული იქნებოდა რუსეთის შიდა გუბერნიებში. მაშინ არ აბრკოლებდა, როგორც შემდეგში, ყოველს რეფორმას ის მოსაზრება, რომ ადგილობრივი საზოგადოება არ არის მომზადებული იმ დაწესებულებისათვის რომელიც შიდა გუბერნიაში შეუტანიათ და ხალხს კიდევ შეუთვისებია.

მეორე დიდი ცვლილება, რომელიც იყო ჩვენში შემოღებული დიდის მთავრის დროს, არის ქალაქის თვით-მმართველობა. ამის დებულება პირველად შემოიღეს 1874 წ. ტფილისის ქალაქში და შემდეგ სხვა ქალაქებშიაც.

მას აქეთ ეს დებულება სწარმოებდა ჩვენში ისე, როგორც რუსეთში. როცა 1892 წ. იგი შესცვალეს რუსეთში, მაშინ ჩვენშიაც სრულებით იგივე ცვლილება შემოიღეს.

ამ ჟამად კი სრულებით განსაკუთრებული კანონი გამოვიდა კავკასიისათვის: 15 მაისს ამა წლისას უმაღლესად დამტკიცდა დროებითი კანონი, რომლის ძალითაც გუბერნიის ქალაქებში ხმოსნებისა და ქალაქის გამგეობის მოხელეთა სამსახურიდან გადაყენების უფლება მიენიჭა მთავარმართველს. სამაზრო ქალაქებში და დაბებში იგივე უფლება მიენიჭათ გუბერნატორებს.

ამ კანონების გამოცემამდი კავკასიის მთავარ-მართველმა, როგორც მკითხველებმა იციან, გადააყენა ტფილისის ქალაქის გამგეობის წევრნი ივანენკო და ვერმიშევი. მათ შეიტანეს ამის შესახებ სენატში საჩივარი, მაგრამ სენატს უყურადღებოდ დაუტოვებია ეს უკანასკნელი.



# ბ ი ბ ლ ი თ გ რ ა თ ე ი ა

1

О народномъ врачеваніи въ Закавказскомъ краѣ, д—ра И. И. Пантхова. 1899 г.

დოქტორი ი. ი. პანტიუხოვი ცნობილია, როგორც ანტროპოლოგი, მაგრამ თავის შრომებში ის შეეხება მრავალ-გვარ კითხვებს. ეს მრავალ-მხრივობა შრომისა ჩვენს დროში იშვიათი კუთვნილებაა მეცნიერისა. ზემოხსენებულ წიგნში ავტორი განიხილავს ექიმობას კავკასიაში. დოქტორი ი. ი. პანტიუხოვი საფუძვლიანად ამტკიცებს ხალხური ექიმობის უფლებას ჯერ მისთვის, რომ მასზედ აშენებულია თანამედროვე სამეცნიერო მედიცინა; მეორე მისთვის, რომ შინაურ ექიმებს თუ ესენი ნამდვილი ხალხის შვილნი არიან და შთამომავლობით ეტანებიან ექიმობას, მართლა გულწრფელი სურვილი აქვთ დაეხმარონ ავადმყოფს. მათ კარგად იციან ხალხის ზნე-ჩვეულება, მატერიალური მდგომარეობა და ამგვარი ცოდნის ნიადაგზე შესაძლოა ზნეობრივი და ფსიხიკური გავლენა შინაური ექიმებისა და ეხლა ხომ თვით სამეცნიერო საექიმო ლიტერატურაშიაც აღიარებულია. მართლაც, ვინც კარგად ჩაჰკვირვებია ჩვენს ცხოვრებას, დარწმუნებული იქნება, რომ ხალხური ექიმობა არც ისე გვერდ შესავლელია, როგორც ჰვიქრობენ ზოგიერთი სწავლული ექიმებიც. მართალია, აქაც დიდია ბოროტ-მოქმედება, შარლატნობა, რასაც ცოტა ალაგი არ უკავია სამეცნიერო მედიცინაშიაც. რომელი გონიერი ექიმი იტყვის გულ-წრფელად, რომ მოქმედობს ყოველ შემთხვევაში ნამდვილ სამეცნიერო საექიმო ნიადაგზე, იკვლევს ავადმყოფობას და არა ებრ-



ძვის მხოლოდ თვით ავადმყოფობის სიმპტომებს. ყველამ იცის გამოცდილებით, რომ მრავალ შემთხვევაში ექიმი მოქმედობს უსაფუძვლო მოსაზრებით და არა მეცნიერულად. შინაური ექიმები, რაღა თქმა უნდა, უფრო ბრმად მოქმედობენ, თუ ისინი ეტანებიან ყოველგვარ ავადმყოფობის მორჩენას, მაგრამ ისინი, ვისაც ზოგი ავადმყოფობა (შთამომავლობით) აურჩევია სპეციალურ საგნად, ხშირად მართლაც იჩენენ ცოდნას და შევლიან კიდევ ავადმყოფს. მაგალითად: არჩენენ ქრილობას, გატეხილს ძვალს, დამწვარს და ბევრს სხვა გვარ ავადმყოფობას. ამნაირად სოფლის ექიმებს მართლა სარგებლობა მოაქვთ ზოგ შემთხვევაში ხალხისათვის, და მათ მიერ ზოგიერთ შემთხვევაში ხმარებულ საშუალების გაცნობა და შესწავლა საჭიროებას შეადგენს ნასწავლი ექიმებისათვის, რადგან ზოგი საშუალება მართლა ძლიერ საყურადღებოა. მაგრამ ამ მხრით ძლიერ ცოტა ნაბიჯი გადაუდგამთ ჩვენს ექიმებს. ჯერ თუ რამე გაუკეთებიათ მათ, მხოლოდ შეუკრეფიათ ის წამლები, რომლებიც არიან ხმარებაში. მაგრამ ჯერჯერობით არ არის ნაცადი, რომელი საშუალება, რომელ ავადმყოფობას შევლის. თუმცა შინაური ექიმები ადვილად არ გააცნობენ კაცს იმ წამლის შედგენილებას, რომელსაც ხმარობენ ამა თუ იმ ავადმყოფობის მოსარჩენად, მაგრამ მაინც შესაძლოა ხშირად გაიგოს ყოველი ეს სწავლულმა ექიმმა, თუ მოინდომებს სოფლის ექიმებთან გულწრფელად დაახლოვებას. მაგრამ სწავლული ექიმები, გატაცებულნი თავისი მეცნიერებით ექვის თვალთ უყურებენ ყოველ სოფლიურ საშუალებას; გარდა ამისა, აქამდის სწავლული ექიმი იშვიათი სტუმარი იყო სოფლისა და ხალხური ექიმობა ხომ უფრო სოფელში ბუდობს და სოფელშია მხოლოდ ის ადვილად შესასწავლელი. სწავლული ექიმი ძლიერ გატაცებულია ბევრ ნაირად იხმაროს უკვე ცნობილი სამეცნიერო ექიმობაში საშუალება. ხშირად ჰკითხულობთ სამეცნიერო საექიმო გაზეთებში, რომ ამა და ამ ექიმმა ესა და ეს საშუალება იხმარა რომელიმე ავადმყოფის მოსარჩენად და საკვირველი შედეგი დაინახა. სცდის ამ საშუალებას და დარწ-

მუნდებით, რომ ვატაცებული ექიმი სცდება და თან სევდიანი ექვიც გებადებათ: თავის განდიდების სურვილით მთვრალნი ხომ არ არიან ეს ექიმები. მაშინ, როდესაც ხალხური საშუალების ცდა ბევრჯერ და ბევრს შემთხვევაში, ხანდისხან მაინც, მიიყვანდა სასურველს დასკვნამდის ექიმს. დღემდე ექიმები მხოლოდ ჩამოსთვლიდნენ ხალხურ საშუალებებს და როგორ ავადმყოფობას არჩენდნენ ეს საშუალებანი, ამაზე ცოტას ამბობდნენ. ახლო მომავალში ხალხური ექიმობის შესწავლა იქნება, უნდა იყვეს მაინც, პირდაპირი მიზანი იმ ექიმობისა, რომლებიც სოფლად წავლენ. ამ მოკლე მომავალში სოფლად წასული ექიმების რიცხვი არა ნაკლები იქნება თვით ქალაქში მცხოვრებ ექიმებზე, რადგან ეხლა დიდი ყურადღებაა მიქცეული, რათა სოფლებში გარშავდნენ სასოფლო ქსენონები. მაშინ ექიმები უფრო მიაქცევენ ყურადღებას ხალხურ ექიმობას და არამც თუ დევნას დაუწყებენ ხალხურ ექიმებს, დაიხლოვებენ კიდევაც და მრავალჯერ სცდიან მათ საექიმო საშუალებას. მართა ამ მხრითაც აქვს ხალხურ ექიმობას არსებობის უფლება, მით უფრო, რომ, როგორც ბრძანებს სამართლიანად დოკტორი ი. ი. პანტიუხოვი, ეს არსებობის უფლება მოუპოვებია დღეს გომეოპათიას, წყლით ექიმობას კნეიპისას, კუზნიჩის ბალახს და სხვ. და ხალხური ექიმობა ხომ თვით ხალხის ცხოვრების მრავალმხრივი დაკვირვების წარმონაშობია.

## II

Вліяніе маляріи на колонизацію Кавказа, д—ра И. И. Пантюхова. 1899 г.

მეორე წიგნი ი. ი. პანტიუხოვისა შეეხება სულ სხვა გვარ კითხვას: ციების (მალიარიის) გავლენას კავკასიის დასახლებაზე. ავტორი განიხილავს სხვა-და-სხვა კუთხეს კავკასიისას ჰიგიენის მხრით. მისი აზრით, კავკასიის მკვიდრის ეროვნული ფიზიონომიის დაცვის უმთავრეს მიზეზად უნდა ყოფილიყო ციება, რომელიც მუსრს ავლებდა შემოსულ მტერს, და ეს უკანასკნელი ამის გამო იძულებული იყო ან უკან დაბრუნებულიყო, ან-და შეერთებულიყო მკვიდრთან.



კავკასიის უღმობელ ციებას აღნიშნავენ გიპპოკრატის დაწყებული. ამისათვის, ავტორის აზრით, კავკასიის დასახლების კითხვასთან შეკავშირებული უნდა იყვეს თვით ციების საწინააღმდეგო ზომებიც. აქ უნდა შევნიშნოთ, რომ გადასახლებას, როდესაც არის ის გამოუწვეველი ბუნებრივი მიზეზების გამო და არა ძალდატანებულია, უნდა ჰქონდეს ერთი ძირითადი პირობა. ახალი სამშობლო ალავი ძლიერ უნდა ჰგავდეს ძველს ჰავის თვისებით, მიწის ნიადაგის ვითარებით, თვით ადგილის გეოგრაფიული მდგომარეობით. ეს არის მიზეზი, რომ გადმოსახლებულებში აქამდის უფრო მოიოდგეს ფეხი ციებიან ალავებშიაც სომხებმა, ბერძნებმა და რუსებმა კი შედარებით ბევრად ნაკლებად. ამ მხრივ მომეტებული ნაწილი კავკასიისა იმდენად განირჩევა რუსეთისაგან, რომ მართლაც საგულისხმოა ეს გარჩევა. მაგალითად, რომ მივიღოთ სახეში წვიმიანობა ზოგიერთ კავკასიის ალავებისა, ამ მხრითაც დიდს დაბრკოლებას წარმოადგენენ, ზღვის ახლოს მყოფი ალავები მაინც.

როდესაც საშუალო რაოდენობა წვიმიანობისა რუსეთში გამოიხატება არა უმეტეს 400 მ.

	წვიმიანი დღეები.	საწვიმრად მომზადებუ- ლი დღეები.	მოწმენდი- ლი დღეები.
ბათომში 2480 მ.	162	135	60
სოხუმში 1150 მ.	121	127	80
სოჩაში 2300 მ.	120	94	105
იალტაში 530 მ.	100	70	100,

დანარჩენი დღეები კი წელიწადში ღრუბლიანია. ამასთანავე შესამჩნევი განსხვავებაა დღისა და ღამის ტემპერატურას შუა. ხშირად დიდია განსხვავება ტერმპერატურისა ერთ ვერსზე ნაკლებ მანძილზედაც კი, რაიცა იწვევს შეჩვეულ მკვიდრშიაც კი მომეტებულ ავადმყოფობას ფილტვებისას, სასუნთქავისას, ქარებს და სხვა ავადმყოფობას. კავკასიის ზემოხსენებული არა-ჰიგიენური პირობებით აიხსნება, რომ ზოგ ალავებში შემოსულა ძველ დროში დიდი კულტურის მქონე ხალხი, მაგრამ მალე მოსობილა. ზოგან (მაგალითად დაღესტანში) ნახავთ საოცარ ძველ ნივთებს სხვა-და-სხვა რკინეულობისაგან და თიხისაგან ვაკეთებულებს. ეხლანდელი დაღესტნის მცხოვრებლები ვერც კი მოიფიქრებენ ამგვარი ნივთების ვაკეთებას.

ცხადია, მათგანში შემოხიზნულა მალალი კულტურის მქონე ხეივანი, მაგრამ გაწყვეტილა.

კავკასიის დასახლებას უცხო ელემენტებით და ამავე დროს მკვიდრის უმიწა-წყლოდ დატოვებას აქვს ერთი ნაკლები ნება, რომელიც არამც თუ არ მოსპობს კავკასიაში არსებულს ავაზაკობას, დანაშაულობას საკუთრების წინაშე, კიდევაც შეუწყობს ხელს. კავკასიაში ავაზაკობის მიზეზი ერთი ის არის, რომ ახლო არიან მებობლები, რომლების ნაფარდობა ისტორიული მოვლენა არის. სპარსეთის მებობლობა ერთის მხრით, მეორე მხრით ოსმალეთის, დიდხანს იქნება კავკასიაში ავაზაკობის მიზეზი. მაგრამ კავკასიის შუაგულშიაც იმატებს ბოროტ მოქმედება, თუ საქმე იმ მდგომარეობაში დარჩა, რომელიც არის დღეს. ექვ გარეშე უნდა ჩავთვალოთ, რომ მიწის მფლობელობას, ავით ფორმას მიწის მფლობელობისას დიდი გავლენა აქვს ადამიანის სულის მდგომარეობაზე. მიდრეკილება ქურდობისადმი და მკვლელობისადმი არ არის მართლა ანტროპოლოგიური თვისება, რომელიც ერთს მეტად აქვს, მეორეს ნაკლებად, ან სრულგვარადაც არა აქვს, როგორც ამტკიცებს ვითომ სტატისტიკური ცნობებით პროფესორი სიკორსკი თავის წერილში „*Quelques traits de la psychologie des slaves*“ (Revue philosophique 1898 № 6). პროფესორი სიკორსკის ცოტად და ნაკლებად შემუშავებული სტატისტიკური ცნობებიდან სჩანს, რომ იტალიაში, საფრანგეთში და სხვ. მეტი მკვლევლობა და ქურდობა ჩაუდენიათ, ვიდრე შუაგულ რუსეთში (აღებულია ერთი წელი, 1887), და ამბობს, რომ ეს ერთა ანტროპოლოგიურ თვისებებით უნდა აიხსნას. ავტორი ივიწყებს ათასნაირ პირობებს, მიწა-წყლის ურიგობას და პოლიტიკურ არეულობას, მეტადრე იტალიაში, რაიცა ძლიერ ამშლელია ცუდი მიდრეკილების. ივიწყებს, რომ თვით სტატისტიკური ცნობები სხვა-და-სხვა სახელმწიფოებში არ არიან ერთ წესსზე და საკმარისად ერთნაირად შეკრებილ-შემუშავებული. მომეტებული ნაწილი კავკასიისა, მეტადრე ტფილისის და ქუთაისის გუბერნიები, ძლიერ მკიდროდ არის დასა-

ხლებული. როგორც სჩანს სტატისტიკური ცნობებიდან, თითო მოსახლეს ძლივს უწევს ორი დესეტინა მიწა. ამ მიწაზე უნდა მოიწიოს მოსახლემ ოჯახისათვის და სახელმწიფო გარდასახადისთვის საჭირო ჭირნახული, ამ მიწაზე უნდა შეინახოს საქონელი, რომელიც საჭიროა მეურნეობისთვის. სადაც მიწა-წყალი ნაკლები არის, იქ ხალხი ძალა-უნებურად დაიწყებს ბოგინს, ერთი ადგილიდგან მეორე ალაგას გადასვლას ბედის საცდელად. რადგან ეს ბედის ცდა ძვირად უჯდება ადამიანს, ის ძლიერ მტკიცე ხასიათისაა რომ იყვეს, მაინც აპყვება ცულ მიდრეკილებას. ხალხი, რომელიც ათას წლოვით ეტანება მეურნეობას, მტკიცედ არის შეკავშირებული მიწასთან, როდესაც გარემოების ძალდატანებით სტოვებს მიწას და სხვაგან გარბის ბედის საცდელად, ჰკარგავს ნიადაგს და ხასიათის სიმტკიცეს. ამ მხრით საინტერესო იყო პატივეცემული თავი. ილია ჭავჭავაძის წერილები „ივერია“-ში, სადაც ამტკიცებდა ის მიწის-მფლობელობის ურიგობის დიდ გავლენას კავკასიაში არსებულ ავაზაკობაზე და სხვაგვარ დანაშაულობაზე. ავაზაკობა, ცხადია, თანდათან იმატებს კავკასიაში. მას ძლიერ ცოტად შეამცირებს სწავლა-განათლების გავრცელება კავკასიაში, რომელიც თვით პატივეცემულ კ. პ. იანოვსკის აზრით ერთად-ერთი საუკეთესო საშუალება არის ავაზაკობის მოსასპობლად, ამ სწავლა-განათლებას რომ მოხმარებოდა ის აუარებელი საშუალება, რაც ავაზაკობის დევნაში იხარჯება. ავაზაკობას ვერ მოსპობს ვერაფერთარი ადმინისტრაციული დევნა და დასჯა, თუ იმის ფესვები თვით გზაზე დაუყენებელ ცხოვრებაშია. ვერც მოსული ხალხის კულტურა უშველის რასმეს, რაც საეჭვოა საზოგადოდ და გარდა ამისა, ახალ პირობებში ძალაუნებურად გადმოსახლებული უკვე ნაცად მიწის კულტურას მისდევს, ის ისევ მკვიდრის გამოცდილებით ხელმძღვანელობს. როდესაც გადმოსახლება მართებლობის სხვა გვარ მიზანსაც შეადგენს, რის გამო სახელმწიფო მეტს მზრუნველობას იჩენს გადმოსახლებულებზე, ხშირად მართლიერებაც ირღვევა და მთავრობა ხომ ერთადერთი ნამდვილი შემტანი უნდა იყვეს ცხოვრებაში მართლიერე-

ბისა და თვით კანონების მაკურთხებელი. მომეტებულად ზრუნვა ახლად გადმოსახლებულეებზე, მათი დიდ-ძალი მიწით დაჯილდოვება, მაშინ, როდესაც მეზობელი მკვიდრი ქაპანს იწყევტს, წელებზე ფეხს იდგამს, რომ ცოტაოდენი მიწა შეიძინოს, რადგან ერთი დესიატინას მქონე ძლიერს არის, გამოიწვევს მკვიდრში უკმაყოფილებას, აგრძობინებს თავს რუსეთის უკანონო შეილაღ. ძნელი წარმოსადგენი არ არის ეს უკმაყოფილება იქ, სადაც ერთი ან ორი დესიატინა ძლიერს შეუძენია ერთს დიდის შრომით, მეორე იძენს 15—30 დესიატინას და ამავე დროს მეტ მფარველობის ქვეშ არის. ძალა უნებურად ამ პირობებში ერთი დაჩავრულად ჩაითვლის თავს, მეორე კი უეჭველად განებივრდება და ამის მაგალითი დღესაც ბევრია.

განებივრებული, ხელ-შეწყობილი კიდევ მეტს იმედოვნებს და სხვაგან გარბის. ცხადია, გადმოსახლება უნდა მიმდინარეობდეს ძლიერ განსაზღვრულ ფარდებში, ისე რომ არ უნდა იყვეს სხვისი თავ-მოყვარეობა და კანონიერი უფლება შელახული, რადგან ბევრი მკვიდრთაგანიც უმიწა-წყლოდ არის დღესაც. მართალია, როგორც ამბობს პატრიცემული ექიმი ი. ი. პანტიუხოვი, დახმარება მთავრობისაგან, ცხოვრება თავაზიან და ზრდილობიან მეზობელთან, (მკვიდრთან) უფრო გამბედავად და დამოუკიდებლად ჰხდის გადმოსახლებულს, მაგრამ ეს მოვლენა დროებითია და არც ისე დიდი ყოფილა რიცხვი გადმოსახლებულეების აქამდის, რომ შეეზღუდა მკვიდრის ყოფა-ცხოვრება. დღევანდელი უმიწა-წყლობა მკვიდრის ათი წლის განმავლობაში კიდევ გაორკეცდება, მაშინ მკვიდრი დაჰკარგავს საუბედუროდ თავაზიანობას და ზრდილობას, ამ მშენიერ ნაშთს წარსულისას. ამასთანავე შურიანი თვალით შეხედავს ის მოსული მეზობლის სიმდიდრეს, ოჯახობას, საქონელს მაინცა-დამაინც დიდი შრომით არ შენაძენს და ადვილად უნდა დაგვეთანხმონ, თუ შრომისათვის ნიადაგი არ მიეცა ხალხს, ძალადობით შეძენის სურვილი გაუძლიერდება, ეს მისთვის რომ, გერცენის არ იყოს, სიღარიბეში ბევრი სიცუდება. ამისათვის, ჩვენი ღრმა რწმენით, კავკასიის დასახლება ის ორივე მხრით მჭრელი მახელია, რომელიც მოითხოვს მეტს სიფრთხილეს პატრონისაგან. ამ გადმოსახლებით არ უნდა იყოს ძლიერ გატაცებული არც მთავრობა, არც კავკასიის ინტელიგენტი რუსობა. ეს ისე უნდა ხდებოდეს, რომ ძალ-დატანებითი ხასიათი არ უნდა ჰქონდეს და არც უნდა იყოს უარ-ყოფილი



მკვიდრის ბუნებრივი და ამისთვის კანონიერი მოთხოვნის დაკმაყოფილება. უამისოდ ბოროტება, რომელსაც დღესაც ამჩნევენ და არა რაციონალურად სდევნიან, უფრო იმატებს და ვერაფერ ვერ მოიგებს, — ვერც მოსული, ვერც დამხვედრი და ვერც სახელმწიფო. დაიკარგება პატივი კანონიერების და მართლიერებისა და ეს მხოლოდ მისთვის, რომ იქნას რუსეთში ერთი ანტროპოლოგიური ტიპი ადამიანისა. მაგრამ გვაქვს საფუძველი ვიფიქროთ, რომ ძალით შექმნილი ანტროპოლოგიური ტიპი იდეალთან ძლიერ დაშორებული იქნება. ექიმ ი. ი. პანტიუხოვის წიგნი ამ ტენდენციას მოკლებულია. მისი მიზანი უფრო ჰუმანური მოსაზრება არის.

ის ამბობს, რომ დასასახლებელი ადგილები კავკასიაში მეტი ცივებანია და საჭიროა მეტი ზრუნვა გადმოსახლებულებზე, რომ ტყუილ-უბრალოდ არ ამოწყდნენ ისინი. საზოგადოდ, წიგნში ბევრი საინტერესო ცნობებია მოყვანილი. ეს წიგნი მით უფრო საინტერესოა, რომ ბ. ი. ი. პანტიუხოვი მშვენიერი მცოდნეა კავკასიის და ყოველი კუთხე დავლილი აქვს მას. ექიმი ი. ი. პანტიუხოვი ცნობილი ანტროპოლოგია. მისი ანტროპოლოგიური გამოკვლევა მეტადრე კავკასიის მცხოვრებლებისა ძლიერ საყურადღებოა, თუმცა ძნელი სათქმელია, რამდენად საფუძვლიანია ზოგი დასკვნა. ამის მიზეზი ის არის, რომ ანტროპოლოგია ძლიერ რთული საგანია. ეს იმის შედეგია, რომ მეტად რთულია ადამიანი თვისი ფიზიკური და ფსიხოლოგიური განწყობილებით, ინდივიდუალური თვისებებით, რომელნიც ხშირად შთამომავლობითაც დაშორებულ ადამიანებს აახლოვებს, ახლობლებს კი აშორებს. ამასთანავე ანტროპოლოგიურ გამოკვლევაში არ უნდა ვივიწყებდეთ ერთ ფაქტორს — მემკვიდრეობითი ძალას, რომელიც ხშირად თავისებურად იჩენს თავს, ან გვიანობს, ან ძლიერ ჩქარობს, ხან ცოტაოდნად იხატება, ხან დიდად. ამისათვის რომელიმე ანტროპოლოგიური დასკვნა რომ ნამდვილი იყოს, საჭიროა მრავალმხრივი დიდი დროს განმავლობაში მომხდარი დაკვირვება, საკმარისი სტატისტიკური მასალის მეცნიერულად შემუშავება. უამისოდ ზოგი დასკვნა აჩქარებული და ნაკლებად დასაბუთებული იქნება.

ე. გაზაკაძე

რედაქტორი  
ა. ლექსანდრე ჭეიხაია

გამომცემელი  
ა. ლექსანდრე ჭეიხაია